


10805

Polakow-14/5



ŒUVRES
DE PLUTARQUE.

TOME SIXIEME.

VIES DES HOMMES ILLUSTRÉS
contenues dans le sixième Volume.

AGESILAS.	} comparés.
POMPÉE.	
PHOCION.	} comparés *.
CATON D'UTIQUE. . .	

598775

SBN

LES VIES

DES

HOMMES ILLUSTRES

DE PLUTARQUE,

*Traduites du Grec par JACQUES AMYOT,
Grand-Aumônier de France ;*

Avec des Notes & des Observations de M. VAUVILLIERS,
Lecteur du Roi, Professeur de Langue grecque au Collège
Royal, de l'Académie Royale des Inscriptions & Belles-
Lettres.

TOME SIXIEME.



A PARIS,

Chez JEAN-BAPTISTE CUSSAC, Libraire,
rue & carrefour S. Benoît, vis-à-vis la rue Taranne.

M. DCC. LXXXV.

AVEC APPROBATION, ET PRIVILÈGE DU ROI.

THE UNIVERSITY OF CHICAGO

LIBRARY

500 EAST 57TH STREET

CHICAGO, ILL. 60637

TEL: 773-936-5000

FAX: 773-936-5001

WWW.CHICAGO.EDU

CHICAGO, ILL. 60637

CHICAGO, ILL. 60637

CHICAGO, ILL. 60637

CHICAGO, ILL. 60637

CHICAGO, ILL. 60637

CHICAGO, ILL. 60637

CHICAGO, ILL. 60637

EXPLICATION DE L'ESTAMPE.

ELLE représente la chambre de Caton. Il paroît tombé à côté de son lit. On voit par terre auprès de lui l'épée dont il s'est percé, & la table de géométrie qu'il a entraînée dans sa chute, & sur le lit le Traité de Platon sur l'immortalité de l'ame, intitulé *Phædon*. Son fils & ses amis l'entourent avec tous les caractères de la consternation & du désespoir; le médecin s'approche pour bander sa plaie; mais l'inflexible Romain le repousse d'une main, & de l'autre élargissant sa blessure, s'arrache à la fois les entrailles & la vie. *Vie de Caton d'Utique*, p. 504.

SOMMAIRE

S O M M A I R E

DE LA VIE D'AGÉSILAS.

NAISSANCE & éducation d'Agésilas. II. Son caractère & sa figure. III. Commerce d'Alcibiade avec Timée, femme du roi Agis, qui n'avoue son fils Léotychide qu'à la mort. IV. Agésilas lui enlève la couronne par le crédit de Lysandre. V. Comment il acquiert une grande autorité. VI. Équité d'Agésilas vis-à-vis de ses ennemis; sa foiblesse pour ses amis. VII. Il est nommé pour aller faire la guerre au roi de Perse. VIII. Il sacrifie une biche à Diane. IX. Il conçoit de la jalousie contre Lysandre. X. Il le traite avec une indécence qui oblige Lysandre à se séparer d'avec lui. XI. Ressentiment de Lysandre. XII. Agésilas entre dans la Phrygie, où il prend plusieurs villes. XIII. Comment il se forme une cavalerie. XIV. Il fait vendre les prisonniers nuds pour montrer la foiblesse des Perses. XV. Il bat Tissapherne, & prend son camp. XVI. Les Lacédémoniens lui donnent le commandement général de terre & de mer.

ce qui étoit sans exemple. XVII. Il va attaquer le satrape Pharnabaze dans la Phrygie. XVIII. Amour d'Agésilas pour Mégabate. XIX. Entrevue d'Agésilas & de Pharnabaze. XX. Amitié étroite d'Agésilas avec le fils de Pharnabaze. XXI. Agésilas aime ses amis au-delà des loix de l'équité. XXII. Simplicité, tempérance & autres vertus d'Agésilas. XXIII. Il est rappelé à Sparte. XXIV. Il quitte tout pour obéir à la voix de sa patrie. XXV. Comment il passe par la Thrace, la Macédoine, la Thessalie & la Pharfalie. XXVI. Il entre dans la Béotie. XXVII. Bataille où Agésilas est grièvement blessé. XXVIII. Il va célébrer les jeux Pythiques à Delphes. XXIX. Agésilas conserve l'ancienne simplicité de ses mœurs. XXX. Il engage sa sœur Cynisca à envoyer un char pour disputer le prix de la course aux jeux Olympiques. XXXI. Comment il gagne ses ennemis. XXXII. Comment il s'attache Agésipolis. XXXIII. Il chasse les Argiens de Corinthe. XXXIV. Combien Agésilas faisoit peu de cas de certains talens. XXXV. Réception qu'il fait aux députés de Thèbes. XXXVI. Il ravage l'Acarmanie. XXXVII. Traité des Lacédémoniens avec le roi de Perse. XXXVIII. Agésilas

S O M M A I R E.

3

soutient l'entreprise injuste de Phœbidas sur la citadelle de Thèbes. XXXIX. Paroles d'Agéfilas sur la justice , différentes de ses actions. XL. Il excite la guerre contre les Thébains. XLI. Entreprise de Sphodrias sur le Pirée. XLII. Conduite d'Agéfilas par rapport au procès de Sphodrias. Il le fait absoudre. XLIII. Agéfilas fait la guerre en Béotie. XLIV. Comment il montre à ses alliés que les Lacédémoniens fournissoient plus de soldats qu'eux , quoiqu'ils donnassent moins d'hommes. XLV. Maladie d'Agéfilas. XLVI. Assemblée des députés de la Grèce à Lacédémone. XLVII. Bataille de Leuctres. XLVIII. Sentimens des Lacédémoniens à la nouvelle de la défaite de leur armée. XLIX. Agéfilas ordonne que les loix dormiront pour un jour. L. Epaminondas entre dans la Laconie. LI. Il est forcé de se retirer de Sparte. LII. Sédition dans la ville apaisée par la sagesse d'Agéfilas. LIII. Conjuration étouffée & punie par Agéfilas sans forme de procès. LIV. Les Thébains se retirent de la Laconie. LV. Foiblesse de Sparte. LVI. Victoire sans larmes remportée par Archidame sur les Arcadiens. LVII. Epaminondas surprend la ville de Sparte en l'absence d'Agéfilas.

A 2

LVIII. *Agéfilas revient & le repousse.* LIX. *Merveilleux courage d'un jeune homme nommé Isadas.* LX. *Bataille de Mantinée.* LXI. *Agéfilas perd l'estime des Grecs & des Lacédémoniens.* LXII. *Il va en Egypte.* LXIII. *Mauvaise opinion que les Egyptiens conçoivent de lui.* LXIV. *Il quitte Tachos pour passer dans le parti de Néclanébus.* LXV. *Il le fait sortir d'une forteresse où il étoit assiégé.* LXVI. *Il gagne une grande victoire qui assure le trône à Néclanébus.* LXVII. *Il meurt.*

Depuis la dernière année de la 83^e olympiade, jusqu'à la troisième année de la 104^e; avant J. C. 362 ans.

LES VIES
DES
HOMMES ILLUSTRÉS
GRECS ET ROMAINS,
COMPARÉES L'UNE AVEC L'AUTRE
PAR PLUTARQUE DE CHÉRONNÉE.

AGESILAUS.

ARCHIDAMUS filz de Zeuxidamus ayant honorablement regné en Lacedæmone, laissa deux enfans, dont l'un fut Agis, qu'il eut d'une notable dame nommée Lampido, l'autre fut Agésilas de beaucoup plus jeune, qu'il eut de la fille de Melisippidas, qui avoit nom Eupolia : & pource que la succession au royaume appartenoit au filz aîné Agis, le puîné Agésilas ayant à demourer homme privé fut nourry en la discipline Laconique, laquelle estoit bien dure & pénible : mais aussi enseignoit elle aux enfans à obeir : & estime lon que ce soit la cause pour

laquelle le poëte Simonides appelle Sparte Damafimbrotos, c'est à dire, domptant les hommes, pource qu'elle rend par longue accoustumance ses citoyens maniables & obeïssans à ses loix, autant ou plus que cité qui ait onques esté au monde, en les domptant dès leur enfance, comme lon fait les jeunes poulains. La loy exempte & dispense de ceste subjection les enfans qui doyvent succeder à la royauté : mais Agesilaus eut cela de propre plus que les autres de ceste qualité, qu'il vint au degré de commander, ayant appris d'enfance à obeïr : ce qui fut cause qu'il sceut beaucoup mieulx que nul autre roy s'accommoder & se comporter avec ses subjects, ayant adjousté à la grandeur royale & aux façons de prince qu'il avoit de nature, la courtoisie & la privaulté qu'il avoit acquise par nourriture.

II. Du temps donques qu'il estoit ès troupes qu'ilz appellent des enfans qui sont nourriz ensemble, Lysander fut amoureux de luy pour sa gentillesse principalement : car estant plus courageux & plus ferme en ses opinions que nul autre des enfans, comme celui qui vouloit toujours en toutes choses estre le premier, avec une vehemence & une impetuosité si grande en tout ce qu'il vouloit, qu'il estoit impossible de la vaincre ny de la forcer : il estoit d'un autre costé si

doux & si souple, qu'il faisoit tout ce que lon luy commandoit par gracieuseté, & rien par crainte, luy faisant plus grand mal de se sentir blasmer, qu'il ne luy grevoit de travailler. Et quant à l'imperfection de sa jambe, qui estoit plus courte que l'autre, la beaulté de sa personne estant pour lors en sa fleur, & sa gentillesse, en ce que lon voyoit qu'il la portoit si patiemment & si guayement, que luy mesme s'en moquoit & s'en gaudissoit le premier, cela couvroit grandement ceste defectuosité : & , qui plus est , faisoit davantage apparoir la gentillesse de son courage, attendu que lon veoit que pour estre boiteux, il ne refusoit peine ny travail quelconque. Quant à la forme de son visage, nous ne l'avons point porttraitte au naturel, pource qu'il ne le voulut pas, ains defendit expressement par son testament, que lon ne feist ny peindre ny mouler aucune image de son corps, mais bien treuve lon qu'il estoit de petite stature, & qu'il promettoit bien peu de soy à le voir : mais ce qu'il estoit tousjours guay & deliberé, & jamais chagrin, ny fascheux ny en parole, ny en visage, cela le rendoit plus agreable & plus amiable, voire jusques en sa vieillesse, que les plus beaux du monde : toutefois les ephores, ainsi comme Theophrastus escrit, condamnerent à l'amende leur roy Archidamus, à cause qu'il avoit espousé

une petite femme, disans qu'il leur engendreroit des roytelets, non pas des roys.

III. Mais du temps que son filz aîné Agis regnoit, Alcibiades banny d'Athenes s'en foutit de la Sicile en Lacedæmone, & n'eut pas gueres demouré à Sparte, qu'il fut incontinent souspçonné d'entretenir la femme du roy Agis, qui s'appelloit Timæa, de maniere que pour ceste cause Agis n'advoua point pour son filz l'enfant qu'elle feist, disant qu'elle l'avoit conceu d'Alcibiades : dequoy Timæa ne se soucioit gueres, ainsi comme Duris escrit : car quelquefois estant en son privé entre ses femmes, elle l'appelloit tout bas Alcibiades, non pas Leotychides : aussi dit on qu'Alcibiades mesme disoit, que ce n'estoit point pour faire mal ny desplaisir à personne qu'il s'estoit approché de la royne Timæa, ains seulement pource qu'il desiroit qu'il y eust des roys de Lacedæmone engendrez de sa semence. Toutefois il fut contraint pour ceste occasion de sortir hors de Lacedæmone pour la deffiance qu'il avoit du roy Agis, qui tousjours depuis eut l'enfant pour suspect, & ne le teint jamais pour legitime, jusques à ce qu'estant rumbé malade au liçt de la mort, Leotychides s'alla jeter à genoux les larmes aux yeux devant luy, & sceut si bien faire que Agis en presence de tesmoins, declara qu'il l'advouoit pour son filz.

IV. Ce neantmoins après la mort d'Agis, Lyfander, qui ja avoit desfait les Atheniens par mer; & avoit plus de credit & d'autorité en la ville de Sparte, que nul autre, entreprit de faire rumber la royauté sur Agesilaus, disant qu'elle n'appartenoit point à Leotychides, attendu qu'il estoit bastard: autant en disoyent aussi plusieurs autres des citoyens qui aimoyent la vertu d'Agesilaus, & luy favorifoyent fort affectueusement; à cause qu'il avoit esté nourry & élevé d'enfance avec eulx. Mais au contraire aussi y avoit il à Sparte un devin nommé Diopithes, qui sçavoit par cueur une infinité de propheties anciennes, & estoit tenu pour fort sçavant & suffisant homme en tout ce qui concernoit les choses divines: celuy la maintenoit qu'il n'estoit point loisible qu'un boitteux fust roy de Sparte, & pour le prouver il allegua en jugement cest ancien oracle:

Regarde bien, ô nation Spartaine,
Quoy que tu sois en courage haultaine,
Que royauté boitteuse ne se germe
En toy qui a l'alleure droite & ferme:
Car autrement des malheurs te viendront
Non esperez, qui long temps te tiendront
Enveloppée en tourmente de guerre,
Qui d'hommes rend despeulée la terre.

Lyfander à l'encontre repliquoit, que si les Spar-

riates redoubtoient cest oracle, c'estoit plus tost de Leotychides qu'ilz se devoient garder, pource qu'il ne chaloit point aux dieux, si aucun s'estant affolé un pied venoit à estre roy, mais bien s'il n'estoit pas legitime ny veritablement extraict de la race de Hércules : car ce seroit alors, disoit il, que la royauté viendroît à clocher. Agesi-laus alleguoit davantage, que le dieu mesme Neptune avoit tesmoigné que Leotychides estoit bastard : car il avoit contrainct Agis par un tremblement de terre, de sortir hors la chambre de sa femme, & que depuis, plus de dix mois après, avoit esté né Leotychides. Ainsi fut Agesi-laus pour ces causes & moyens, non seulement déclaré roy de Sparte, mais aussi luy fut adjugée la succession des biens de son frere Agis, & en debouta lon Leotychides : toutefois voyant que les parents de luy du costé de sa mere estoient extremement pauvres, mais gens de bien au demourant, il leur laissa la moitié des biens : en quoy faisant il acquit honneur & bienveillance de tout le monde, au lieu de l'envie & de la malvueillance que lon luy eust autrement portée pour le faict de ceste succession.

V. Et quant à ce que Xenophon escrit, qu'en obeïssant à son païs, il y acquit si grande puissance, qu'il faisoit entierement tout ce qu'il vouloit, voicy que c'estoit : les ephores & les sena-

teurs avoyent pour lors la souveraine autorité au gouvernement de la chose publique : mais les ephores ne demouroient en leurs offices qu'un an seulement, & les senateurs demouroient en cest honneur toute leur vie, ayans esté ordonnez & establiz pour refrener l'autorité des roys ; à fin qu'ilz n'eussent pas toute puissance, ainsi comme nous avons plus amplement escript en la vie de Lycurgus : à l'occasion dequoy dès que les roys venoyent à succeder au royaume, ilz avoyent incontinent une pique & une inimitié hereditaire, par maniere de dire, à l'encontre d'eulx. Mais Agefilaus suyvit un chemin totalement contraire à ses predecesseurs : car au lieu de prendre querelle & de s'attacher à eulx, il leur porta tout honneur & toute reverence, n'entreprenant jamais rien qu'il ne leur eust communiqué premierement, & quand il estoit mandé par eulx y allant plus viste que le pas. Toutes & quantes fois qu'il estoit en sa chaire royale à donner audience, si d'aventure les ephores y survenoyent, il se levoit au devant d'eulx, & quand un nouveau sénateur venoit à estre esleu ; il leur envoyoit par honneur à chacun une robbe & un bœuf comme un prix d'honneur. Par tous lesquelz moyens il sembloit qu'il honorast & qu'il augmentast la dignité de leurs offices, là où il alloit soubz main amplifiant sa propre

puissance, & adjoustoit à la royauté une grandeur procedante de la bienvueillance que lon luy portoit.

VI. Au reste quant à ses deportemens envers les autres citoyens, il estoit moins reprehensible ennemy qu'amy : car il ne nuisoit jamais injustement à ses ennemis, mais il aidoit bien souvent à tort & en choses injustes à ses amis : & ayant honte de ne recompenser & de ne honorer pas assez ses ennemis quand ilz avoyent bien fait, il ne pouvoit condamner ny blasmer ses amis encore qu'ilz eussent mal fait, ains estoit toujours bien aise de les secourir comment que ce fust, & de faillir plus tost avec eulx, estimant que rien ne pouvoit estre mauvais de ce que lon fait pour survenir à son amy. Au contraire s'il advenoit que quelqu'un de ses adversaires tumbast en affliction, il estoit le premier qui en avoit compassion, & si le secouroit volontiers si l'autre l'en requeroit : par lesquels moyens il gaignoit la bonne grace & l'amitié de tout le monde. Ce que voyans les ephores, & redoubtans sa puissance qu'ilz voyoyent aller ainsi en avant, le condamnerent en une amende, y adjoustant la cause, que c'estoit pource qu'il possedoit luy seul les cueurs de tous les citoyens, qui devoyent estre communs. Car tout ainsi qu'il y a des philosophes naturelz qui tiennent, que

qui osteroit du monde le discord & la noise ,
le cours des corps celestes s'arresteroit , & que
la generation & tout mouvement cesseroit , pource
qu'ilz disent que c'est la cause qui maintient l'ar-
monie de ce monde : Aussi semble il que celuy
qui establit les loix des Lacedæmoniens , messa
parmy le gouvernement de sa chose publique ,
l'ambition & la jalousie entre les citoyens , comme
un aiguillon de la vertu , voulant que les gens
de bien eussent tousjours quelque chose à des-
mesler & à debatre les uns contre les autres ,
estimant que celle lasche & paresseuse grace par
laquelle les hommes s'entrecedent & s'entrepardonnent
les uns aux autres sans se controller ,
estoit à faulses enseignes appellée concorde. Et
cuident aucuns que certainement Homere eut
ceste opinion , pource qu'il n'eust pas autrement
fait Agamemnon se resjouissant de voir Ulysses
& Achilles quereller à grosses paroles ensemble ,
s'il n'eust estimé que le debat & l'envie entre
les principaux hommes (qui fait qu'ilz ont l'œil
l'un sur l'autre) tournaist au grand bien de la
chose publique : toutefois cela n'est pas sans
doubte , ny ne se doit pas à l'adventure con-
fesser simplement , pource que les querelles &
diffensions excessives entre les citoyens sont très
dommageables & dangereuses aux choses publi-
ques.

VII. Au demourant un peu après que Agésilas fut parvenu à la royauté de Lacedæmone, il arriva quelques uns venans de l'Asie, qui apportèrent nouvelles comme le roy de Perse faisoit preparer une grosse armée de mer, pour debouter & deposseder les Lacedæmoniens de la seigneurie de la marine : & davantage Lyfander desirant estre une autre fois renvoyé en Asie pour y secourir ses amis, lesquels il avoit laissez comme seigneurs & maistres des villes & citez du pais, dont les uns estoient dechassez par leurs citoyens, les autres punis de mort, à cause qu'ilz abusoient violement & tyranniquement de leur autorité, il meit en teste à Agésilas qu'il entreprist ce voyage de passer en Asie, pour aller faire la guerre à ce roy Barbare loing de la Grece, premier que son armée & son equippage fussent prests. Pour à quoy plus facilement parvenir, il escrivit à ses amis en Asie, qu'ilz envoyassent à Sparte demander Agésilas pour leur capitaine : ce qu'ilz feirent : & Agésilas en pleine assemblée du conseil de la ville accepta la charge, pourveu qu'on luy baillast trente capitaines Spartiates pour luy assister & le conseiller en ses affaires, deux mille Ilotes affranchiz, avec six mille des alliez de Lacedæmone. Cela luy fut facilement accordé, moyenant le port & la faveur que luy feit Lyfander, & l'envoya lon inconti-

nent avec les trente capitaines qu'il avoit demandez, desquelz Lyfander fut le premier, non seulement pour l'autorité & la reputation qu'il avoit acquise, mais aussi pour l'amitié qu'il portoit à Agefilaus, lequel se sentoit plus tenu à luy de ce qu'il luy avoit procuré ceste charge, que de ce qu'il l'avoit fait parvenir à la royauté.

VIII. Parquoy ce pendant que l'armée s'assembloit au port de Geræste, luy avec quelques uns de ses amis s'en alla en la ville d'Aulide, là où il luy fut advis que la nuit quelqu'un en dormant luy dit, « O roy des Lacedæmoniens, tu » sçais qu'il n'y eut onques capitaine general de » toute la Grece eleu, que jadis Agamemnon, » & toy maintenant après luy : & pource que » tu commandes aux mesmes peuples qu'il faisoit, & que tu vas faire la guerre aux mesmes ennemis, partant d'un mesme lieu pour » y aller, il est raisonnable que tu faces aussi un » mesme sacrifice à la deesse, qu'il feist à son » departement ». Agefilaus n'eut pas plus tost eu ceste vision, qu'il luy souvint incontinent que Agamemnon à la persuasion des devins sacrifia en ce mesme lieu sa propre fille, toutefois il ne s'en effroya point, ains le matin en fit le compte à ses amis, & leur dit qu'il sacrifieroit à la deesse, ce dont il estoit vray-semblable qu'elle se delectoit, & qu'il ne vouloit point ensuyvre

la cruelle devotion de cest ancien capitaine Agamemnon : & disant cela , il feit amener une biche couronnée de chapeaux de fleurs , & commanda à son devin de l'immoler , ne voulant pas que celuy qui estoit deputé par les gouverneurs de la Bœoce eust l'honneur de ce faire , comme le portoit la coustume du lieu : ce qu'entendans les magistrats & gouverneurs de la Bœoce en furent malcontens , & envoyerent leurs sergens denoncer à Agesilaus qu'il se deportast de vouloir faire faire sacrifices en ce lieu là contre les loix , privileges & coustumes du país. Les sergens qui y furent envoyez feirent le contenu de leur commission , mais trouvens que la beste estoit desja immolée , & les quartiers dessus l'autel , ilz les prirent & les jetterent çà & là hors de dessus ledit autel. Cela fascha Agesilaus qui estoit sur son embarquement , & s'en alla de là tout courroucé contre les Thebains , avec mauvaise esperance de l'issue de son voyage à cause de ce sinistre presage , qui sembloit luy pronostiquer , qu'il ne ressortiroit pas à telle issue comme il desiroit.

IX. Arrivé qu'il fut en la ville d'Ephese , il eut incontinent à desplaisir l'honneur qu'il veit que lon y faisoit à Lyfander , & la suite grande qu'il y avoit : car tous ceux du país alloient ordinairement à son logis pour luy faire la cour ,
&

& quand il en sortoit le suyvoyent & l'accompagnoient par tout, comme si Agefilaus n'eust eu que le nom & l'apparence de capitaine general pour la loy de Lacedæmone qui le vouloit ainsi; & que Lyfander fust celuy, qui à la verité eust le plein pouvoir & l'autorité de tout faire : car jamais n'avoit esté envoyé capitaine Grec en ces marches là, qui y eust acquis tant de reputation, ne qui s'y fust fait tant redoubter comme luy, ne jamais n'y eut homme qui feist plus de bien à ses amis, ny plus de mal à ses ennemis : lesquelles choses estans toutes fresches, ceux du païs s'en souvenoyent encore, avec ce qu'ilz voyoyent Agefilaus homme simple, populaire & de peu de monstre en toutes ses façons de faire, là où au contraire ilz remarquoyent en Lyfander la mesme vehemence, aspreté & briefveté de langage qu'ilz y avoyent autrefois cogneüe : au moyen dequoy tout le monde plioit entierement soubz luy, & n'estoit fait que ce que luy seul commandoit. Ce qui fut cause que les autres Spartiates premierement s'en fascherent, pource qu'il sembloit proprement qu'ilz fussent venuz pour servir à Lyfander, & non pas pour conseiller le roy : mais depuis Agefilaus mesme s'en ennuya & s'en mescontenta aussi, encore que de sa nature il ne fust point envieux ny marry de voir faire honneur à d'autres qu'à luy : mais estant

de son naturel fort convoiteux de gloire & homme courageux, il avoit peur que s'il se faisoit quelque chose de beau en ceste guerre, lon ne l'attribuast à Lyfander, pour la grande reputation qu'il avoit, parquoy il commença à se porter de ceste sorte envers luy : Premièrement il contredisoit à tous ses conseils, & toutes les entreprises qu'il mettoit en avant, mesmement celles auxquelles il se monstroir plus affectionné, il n'en faisoit pas une, ains en prenoit d'autres à executer plus tost que celle là : davantage s'il y avoit aucuns poursuivans qui eussent à faire à luy, ou qui le requissent de quelque chose, s'ilz s'appuyoyent sur la faveur de Lyfander, il les renvoyoit tous sans rien faire.

X. Au cas pareil aussi ès jugemens, s'il y en avoit aucuns que Lyfander rabrouast, ilz estoient tous asseurez de gagner leurs procès : & au contraire, s'il y en avoit à qui il portast affection, & à qui il desirast gratifier, il estoit malaisé qu'ilz se sauvassent d'estre condamnez à l'amende. Toutes lesquelles demonstrations se faisans ordinairement, non point par cas d'aventure en un ou en deux, ains egaleement en tous, comme de propos deliberé, Lyfander se doubant bien de la cause, ne la desguisa point à ses amis ; ains leur dit franchement que c'estoit à cause de luy, que lon leur faisoit ce tort & ce rebut,

& pourtant leur conseilla qu'ilz allassent faire la cour au roy & à ceulx qui avoyent plus de credit que luy. Agefilaus estima qu'il disoit & faisoit tout celà pour susciter la haine du monde à l'encontre de luy : parquoy luy voulant faire encore plus grand despit, il l'establit commissaire des vivres & distributeur des chairs , & après l'avoir fait, encore escrit on qu'il dit tout hault en presence de plusieurs qui le peurent oir : « Qu'ilz aillent maintenant faire la cour à mon distributeur de chair ». Dequoy Lyfander se plaignant luy dit, « Vrayement, Syre Agefilaus, tu sçais très bien comme il fault ravaller tes amis. Ce fais-mon, respondit Agefilaus, ceulx qui veulent entreprendre sur mon autorité, & estre plus grands que moy ». « Voire mais, repliqua Lyfander, à l'adventure ne l'ay-je pas fait ainsi que tu le dis : toutefois si tu as telle opinion, donne moy quelque charge & quelque lieu auquel sans te fascher je te puisse estre utile ».

XI. Depuis ces propos, Agefilaus l'envoya en la marche de l'Hellepont, là où il prattiqua un seigneur Persien, nommé Spithridates, des pais du gouvernement de Pharnabazus, qu'il amena à Agefilaus avec grosse somme d'or & d'argent, & bien environ deux cents hommes de cheval : non que pour cela le maltalent, qu'il

avoit conçu à l'encontre du roy, fust appaisé : ains au contraire il garda tousjours ceste rancune en son cueur : tellement que depuis il espia tousjours les moyens de faire oster aux deux maisons royales le privilege qu'elles avoyent de la royauté, pour la mettre en commun à toutes les familles des Spartiates, & pour ce different là il eust suscité un grand trouble en la ville de Sparte, à mon advis, s'il ne fust mort si tost, comme il feit en un voyage qu'il entreprit au pais de la Bœoce. Voilà comment les grandes natures ambitieuses, ne pouvans tenir moyen, & se garder d'exceder en trop ès gouvernemens des choses publiques, sont souventefois cause de plus de mal que de bien : car encore que Lyfander eust esté fascheux & importun, comme il estoit veritablement de monstrier ainsi son ambition hors de temps & de saison, Agefilaus n'ignoroit pas qu'il y avoit beaucoup d'autres moyens moins reprehensibles de chastier un personnage grand & illustre, qui pechoit par une ambitieuse convoitise de se monstrier seulement. Et m'est advis que tous deux aveuglez d'une mesme passion, faillirent : l'un de ne cognoistre pas la puissance de son superieur : & l'autre, de ne pouvoir supporter l'ignorance & l'imperfection de son amy.

XII. Or du commencement Tisaphernes redoubtant Agefilaus, feit quelques tresves avec

luy foubz un donner à entendre , que le roy se contenteroit de laisser les villes Grecques de l'Asie en pleine liberté : mais depuis qu'and il pensa avoir assemblé des forces suffisantes pour le combattre, il luy denoncea la guerre , laquelle Agesilaus accepta fort volontiers , pour autant mesmement que lon avoit grande esperance par la Grece qu'il feroit quelque grande chose en ce voyage , & luy mesme estimoit que ce luy seroit une grande honte, que les dix mille Grecs , qui estoient retournés du fond de l'Asie jusques à la mer majour ², foubz la conduite de Xenophon , eussent vaincu & batu l'armée du roy , autant de fois comme ilz avoyent voulu, & que luy qui estoit capitaine general des Lacedæmoniens , lesquelz donnoyent pour lors la loy à la mer & à la terre , ne feist aucun acte digne de memoire entre les Grecs. Parquoy pour venger incontinent le desloyal parjurement de Tisaphernes par une juste tromperie , il feit semblant de vouloir premierement entrer dedans le país de la Carie, au moyen dequoy le Barbare y feit l'amas de toute sa puissance : mais soudain il tourna bride tout court, & se jetta dedans la Phrygie , où il prit plusieurs villes , & y gaigna beaucoup de biens , faisant voir à ses gens , que violer l'accord de paix ou de

² Majeur n'est point dans le grec.

trefves , que l'on a juré , c'est mespriser les dieux : mais que decevoir & abuser ses ennemis n'est pas seulement juste , ains est aussi honorable , & y a du profit conjoint avec le plaisir.

XIII. Au demourant , pource qu'il estoit le plus foible de chevalerie , & que les entrailles des b. stes qu'il avoit sacrifiées aux dieux se trouvoient defectueuses , il s'en retourna en la ville d'Ephese , là où il amassa des gens de cheval , faisant entendre aux hommes riches qui ne voudroyent aller eulx mesmes en personne à la guerre , qu'il les en dispensoit , pourveu qu'ilz fournissent d'un homme & d'un cheval de service en leur place , & y en eut plusieurs qui le feirent ainsi , de maniere qu'en peu de jours Agefilaus se trouva bon nombre de vaillans hommes d'armes , au lieu de gens de pied qui ne valoyent gueres : car ceulx qui n'alloyent pas voluntiers à la guerre , souldoyoyent ceulx qui y vouloyent bien aller en leur place , & semblablement aussi ceulx qui ne vouloyent servir à cheval , payoyent au lieu d'eulx ceulx qui en desiroient servir : en quoy il suyvit sagement l'exemple du roy Agamemnon , qui dispensa un riche couard d'aller personnellement à la guerre , en prenant de luy une bonne jument.

XIV. Or avoit il commandé aux commissaires , qui vendoyent publiquement au plus offrant à

l'encan les prisonniers de guerre, qu'ilz les despouillaissent tous nuds pour les vendre : ce qu'ilz feirent, & se trouvoit assez de gens qui achep-toyent volontiers leurs despouilles & leurs habillemens : mais quant aux corps ils s'en moc-quoient, les voyans ainsi blancs, delicats & tendres, pour avoir esté nourriz en delices à l'ombre au couvert, tellement qu'il se trouvoit peu de gens qui y meissent enchere, pource qu'ilz les estimoyent personnes inutiles, & qui ne valoyent rien. Adonc Agefilaus se trouvant à ceste vente expressement pour ceste fin dit à ses gens : « Voyez vous, mes amis, ce sont là » les personnes à qui vous aurez à combattre, » & ici les dépouilles pour qui vous com- » batrez ».

XV. Depuis estant la saison venue de se remettre en campagne, & de rentrer dedans le païs des ennemis, il dit publiquement, qu'il entreroit dedans la Lydie, non point en intention de tromper plus Tisaphernes : mais luy mesme se trompa : car pour s'estre trouvé deceu la premiere fois, il ne adjousta plus de creance à ceste seconde publication, ains se persuada que ce seroit à ce coup là qu'il entreroit en la Carie, attendu mesmement que c'estoit un païs bossu & malaisé pour gens de cheval, en quoy il se sentoit le plus foible : mais nonobstant Agefilaus

entrant, comme il avoit predit, dedans le plat païs, auquel est située la ville royale de la Lydie, Sardis, Tisaphernes fut contraint d'y accourir au secours à grande haste, & y estant arrivé en extreme diligence avec sa chevalerie, il surprit par les champs plusieurs des ennemis escartez sans ordre çà & là à piller le plat païs, & en meit la pluspart à l'espée. Quoy entendant Agésilas, discourut en luy mesme, que les gens de pied de son ennemy ne pouvoyent pas encore estre arrivez, & que luy au contraire avoit toute son armée complete, au moyen dequoy il pensa qu'il valoit mieulx venir à la bataille promptement, que dilayer davantage : si mesla parmy sa chevalerie ses gens de pied armez à la legere, & leur commanda qu'ilz allassent vistement attacher l'ennemy, pendant que luy feroit suyvre à leur cueüe les autres pesamment armez : ce qu'ilz feirent : mais les Barbares se meirent incontinent en rouverte, & les Grecs poursuyvans vivement & de près, prirent leur camp, & occirent un grand nombre des fuyans.

XVI. Depuis ceste bataille ilz eurent le moyen non seulement de courir & piller les païs du roy à leur aise, sans danger, mais aussi de voir la vengeance de Tisaphernes, qui estoit un mauvais homme & très apre ennemy de la nation des Grecs : car le roy de Perse envoya incon-

tinent en sa place un autre sien lieutenant appelé Tithraustes, qui luy fait trancher la teste, & envoya devers Agefilaus, le prier de vouloir entendre à appointment, & luy faire offrir force or & argent pour s'en retourner en son país. A quoy Agefilaus fait responce, que quand à la paix, il n'estoit pas en luy de la faire, & que c'estoit aux Lacedæmoniens, & qu'au regard de luy il estoit plus aise d'enrichir ses souldards que soy mesme : mais qu'outre cela les Grecs n'estimoient point honorable prendre des presens de leur ennemy, ains des despouilles : toutefois voulant gratifier en quelque chose à Tithraustes, pource qu'il avoit fait la vengeance d'un commun ennemy de tous les Grecs, il mena son armée hors de la Lydie en la Phrygie, moyennant la somme de trente talents ¹ qu'on luy bailla pour ses frais. Ainsi qu'il estoit par le chemin il receut un petit billet des officiers & magistrats de Sparte, qui luy mandoyent comme on luy avoit baillé la charge de l'armée de mer avec celle de terre : ce que jamais autre capitaine Lacedæmonien avant luy n'avoit eu : aussi estoit il sans contredit le plus grand & le plus digne personnage qui fust vivant de son temps, ainsi que Theopompus mesme l'escriit en quelque pas-

¹ Dixhuit mille escus. *Amyot.* 140,062 livres de notre monnoie.

sage, comme celuy qui se faisoit estimer plus pour sa vertu, qu'il ne faisoit pour la grandeur de son autorité : toutefois il semble qu'en cest endroit il commet une faulte, quand il feit son lieutenant en l'armée de mer un Pisander frere de sa femme, là où il y avoit d'autres capitaines plus aagez & plus experimentez que luy, ayant plus de regard à gratifier à sa femme, & à honorer un sien allié, qu'à faire ce qui estoit le plus utile pour son païs.

XVII. Cela fait, il mena son armée ès provinces du gouvernement de Pharnabazus, là où il trouva non seulement abondance de tous vivres, mais aussi y amassa grosse somme d'argent : & de là passa jusques au royaume de Paphlagonie, où il feit alliance avec le roy Cotys, qui rechercha affectueusement son amitié, pour la vertu & la constante foy qui estoit en luy : comme feit aussi Spitridathes, lequel abandonna Pharnabazus pour se rendre à Agefilaus, & depuis qu'il s'y fut rendu, jamais ne se partit d'auprès de luy, ains le suivit & l'accompagna tousjours par tout. Il avoit un filz qui estoit un fort bel enfant, nommé Megabates, duquel Agefilaus estoit amoureux, & une fort belle fille preste à marier, qu'Agefilaus feit épouser à ce roy Cotys : & prenant de luy mille hommes de cheval, avec deux mille hommes de pied armez à la legere, s'en retourna

en la Phrygie, là où il destruisit les provinces du gouvernement de Pharnabazus, lequel ne l'osoit attendre en campagne, ny mesme se fier en ses forteresses, ains alloit tousjours fuyant devant luy, emportant quant & soy la plus part de ce qu'il aimoit le mieulx & qu'il tenoit le plus cher, en se retirant tousjours arriere, d'un lieu en autre, jusques à ce que Spitridathes accompagné d'un Spartiate nommé Erippidas, le pressa un jour de si près, qu'il luy prit son camp, & se faisoit de tout le precieux meuble qu'il avoit quant & luy. Mais là Erippidas se monstra un peu trop aspre à rechercher ce qui avoit esté soustraiect du butin, contraignant les Barbares à le rendre, jusques à vouloir visiter & fouiller par tout. Cela irrita si fort Spitridathes, qu'il se retira incontinent avec les Paphlagoniens en la ville de Sardis, dequoy Agefilaus fut aussi fasché que de chose qui luy advint en tout ce voyage : car il estoit marry d'avoir perdu un si homme de bien que Spitridathes, & la troupe de gens de guerre qu'il avoit emmenée quant & luy, laquelle n'estoit pas petite : & si avoit encore peur que lon le notast de ceste mechanique chicheté, dont il avoit tousjours estudié à se maintenir pur & net, & non seulement soy, ains aussi tous ceulx de son país.

XVIII. Mais oultre ces causes apparentes,

encore le poignoit fort l'amour de l'enfant, qui estoit profondement empraint en son cœur, combien que lors qu'il l'avoit auprès de luy, suivant son naturel de ne vouloir jamais estre vaincu, il s'esforceast de combattre son desir, de maniere qu'un jour Megabates s'approchant de luy pour le caresser & baiser, il destourna sa teste : dequoy l'enfant ayant eu honte, s'en deporta de lors en avant, & ne l'oza plus saluer que de loing. Ce qui despleut d'un autre costé à Agefilaus : au moyen dequoy se repentant d'avoir destourné le baiser de Megabates, il faisoit semblant de s'esmerveiller, pourquoy il ne le saluoit plus d'un baiser comme il avoit accoustumé : & quelques uns de ses familiers luy respondirent adonc, « Tu en es cause toy mesme, sire, qui n'a pas » ozé attendre, ains as eu peur du baiser d'un » si bel enfant : car encore y retourneroit il bien » qui le luy diroit, pourveu que ru te gardes de » le fouir une autre fois, comme tu as ja fait ». Ces paroles ouyes, Agefilaus demostra un espace de temps tout pensif, sans mot dire, puis leur respondit à la fin : « Il n'est point de besoing » que vous luy en parliez, car je vous assure que » je ferois plus aise de pouvoir encore un coup » resister à un tel baiser, que si rour ce que je » voy devant moy me devenoit or ». Ainsi se comportoit Agefilaus envers Megabates lors qu'il

estoit autour de luy : mais au contraire quand il en fut esloigné , il s'en trouva si ardemment espris , qu'il seroit malaisé d'affirmer si l'enfant fust une autre fois retourné & se fust présenté devant luy , s'il se fust peu garder de se laisser baiser.

XIX. Depuis Pharnabazus rechercha de parler avec luy , & les assembla ensemble un Cyzicenien nommé Apollophanes , qui estoit hôte commun à tous deux : si se trouva le premier Agesilaus avec ses amis au lieu assigné pour leur entreveuë , & en attendant Pharnabazus se jeta dessous un arbre à l'ombre sur l'herbe qui y estoit haulte & drue , jusques à ce que Pharnabazus y arriva aussi , auquel on estendit des peaux douces à long poil , & des tapis ouvrez de diverses couleurs , pour se seoir dessus : mais ayant honte de voir Agesilaus ainsi couché par terre dessus l'herbe nue , il s'y coucha aussi auprès de luy , combien qu'il fust vestu d'une robe de merveilleusement desliée tiffure & fort riche teincture. Après qu'ilz se furent entresaluez , Pharnabazus commença à parler , où il n'eut point faulte de bonnes remonstrances & justes doleances , comme celuy qui avoit fait beaucoup de plaisir aux Lacedæmoniens en la guerre contre les Athéniens , & en recompense se trouvoit lors pillé & saccagé par eux. Et Agesilaus voyant les autres

Spartiates qui assistoyent à ceste entreveuë jettans les yeux contre bas de honte , & ne sachans que respondre à cela , pource qu'ilz cognoissoyent bien que lon faisoit tort à Pharnabazus , prit la parole , & respondit en ceste maniere : « Quand » nous avons parcy devant esté amis du roy , » seigneur Pharnabazus , nous avons usé de ce » qui estoit à luy comme amis , & maintenant » que nous sommes devenus ses ennemis , nous » en usons aussi comme ennemis : & voyans que » tu veux estre l'un de ses esclaves , ce n'est » pas de merveilles si nous taschons de l'en- » dommager en te mal faisant : mais de l'heure » que tu aimeras mieulx estre amy & allié des » Grecs , que serf du roy de Perse , estime que » ces hommes de guerre , ces armes & ces » navires , & nous tous sommes pour garder » & defendre tes biens & ta liberté à l'encontre » de luy , sans laquelle il n'y a rien de beau , » de bon , ny de desirable en ce monde ». A cela luy respondit Pharnabazus ouvertement , & luy donna à entendre quelle estoit son intention : « Car si le roy , dit-il , envoie par deçà » un autre capitaine pour estre son lieutenant , » assurez vous que je me tourneray tout aussi » tost des vostres : mais aussi s'il me donne la » charge & superintendence de ceste guerre , je » n'omettray rien de diligence ny d'affection à

» faire entierement tout ce que je pourray pour
» son service à l'encontre de vous ». Ceste
responſe pleut à Ageſilaus , lequel luy prenant
la main en ſe levant quant & luy , luy |dit :
« Je deſirerois , ſeigneur Pharnabazus , qu'ayant
» le cueur tel , comme tu l'as , tu fuſſes noſtre
» amy plus toſt que noſtre ennemy ».

XX. Mais ainſi que Pharnabazus ſ'en retour-
noit avec ſes gens , ſon filz qui eſtoit demouré
derriere accourut à Ageſilaus , & en riant luy
dit , « Sire Ageſilaus , je veux contracter amitié
& hoſpitalité avec toy : & en diſant cela luy
preſenta un dard qu'il tenoit en ſa main. Age-
ſilaus l'accepta , & fut bien aïſe de voir l'enfant
qui eſtoit beau , & de la gentille careſſe qu'il
luy faiſoit : ſi regarda autour de luy , s'il y autoit
quelqu'un en ſa compagnie qui euſt quelque
choſe de beau , qui peuſt eſtre propre pour luy
rendre la pareille , & apperceut le cheval d'un
ſien ſecrettaire nommé Adæus , qui eſtoit ac-
couſtré d'un beau & riche harnois : il luy feit
iucontinent oſter , & le donna au beau & gentil
jeune garſon , lequel jamais depuis il n'oublia :
ains quelque temps après comme il euſt eſté
chaffé de la maiſon de ſon pere , & privé de
ſes biens par ſes freres , eſtant contrainct de
ſ'en fouir au Peloponeſe , il l'eut tousjours en
ſinguliere recommandation , voire juſques à luy

aider en quelques siens amours : car il aimoit fort affectueusement un jeune garçon Athenien , que lon nourrissoit aux exercices de la personne pour un jour combattre ès jeux de prix : mais quand il fut devenu grand & roide , & qu'il se vint presenter pour estre enrrollé au nombre de ceulx qui devoient combattre ès jeux Olympiques , il fut en danger d'en estre de tout poinct rejezté : parquoy le Persien qui l'aimoit eut recours à Agésilas , le requerant de vouloir aider à ce jeune champion , de sorte qu'il ne souffrist point ce deshonneur d'estre refusé. Agésilas luy desirant gratifier jusques à là , s'y employa & obtint ce qu'il demandoit , non sans grande peine & grande difficulté.

XXI. Ainsi estoit Agésilas en toutes autres choses bien roide à observer de poinct en poinct tout ce que les loix commandoyent : mais ès affaires de ses amis , il disoit que garder estroittement la rigueur de justice , estoit une couverture , dont se couvroient ceulx qui ne vouloyent point faire pour leurs amis. Auquel propos on treuve encore une petite lettre missive qu'il escrivoit à Idrien prince de la Carie , pour la delivrance d'un sien amy : « Si Nicias n'a point failly , delivre le : s'il a failly , delivre le pour l'amour de moy : mais comment que ce soit , delivre le ». Tel donques estoit Agésilas

Agésilas en la plus part des affaires de ses amis : toutefois il escheoit bien des occasions, où il regardoit plus tost à l'utilité publique, comme il monstra un jour à quelque deslogement qu'il fut contrainct de faire un peu en trouble à la haste, tellement qu'il luy fut force qu'il abandonnast un qu'il aimoit, malade : & comme l'autre l'appellast par son nom ainsi comme il s'en parloit, & le suppliaست de ne le vouloir point abandonner, Agésilas se retourna & dit, « O qu'il est malaisé ¹ d'aimer & estre sage » tout ensemble ! ainsi l'a escrit le philosophe » Hieronymus ».

XXII. Or y avoit il ja deux ans entiers qu'il estoit en ceste guerre, & ne parloit on plus ès haultes provinces de l'Asie que d'Agésilas, courant par tout une très glorieuse renommée de son honnesteté, sa continence, courtoisie & simplicité : car quand il alloit seul avec son train par les champs, il logeoit tousjours dedans les plus saincts temples des dieux, voulant que les dieux mêmes fussent tesmoins de ce qu'il faisoit en son privé, là où bien souvent nous ne voulons pas que les hommes seulement voyent ce que nous y faisons : qui plus est, entre tant de milliers de soudards qui estoient en son camp, à peine eust on trouvé une paillasse pire que

¹ Autres lisent, avoir pitié & estre sage tout ensemble. Amyot.

celle , sur laquelle il dormoit : & quant au froid & au chaud , il supportoit l'un & l'autre si aisément , qu'il sembloit qu'il fust tousjours né à supporter seulement la qualité de l'air & de la saison , où il se trouvoit. Si estoit chose fort plaisante aux yeux des Grecs habitans en Asie , de voir les satrapes lieutenans du roy de Perse , gouverneurs des provinces , & autres seigneurs , qui paravant estoient si superbes & si intolerables , & qui ne pouvoient pas , par maniere de dire , tenir en leur peau , tant ilz estoient gorgés de richesses , de voluptez & de delices , faisans lors la cour , en grande crainte , à un homme qui alloit simplement vestu d'une pauvre meschante cappe , & de voir comme ilz se resserroyent & reformoyent pour une simple parole courtes qu'il leur disoit à la Laconienne : de maniere qu'il venoit alors en pensée à plusieurs , de dire ces vers du poëte Timotheus :

Mars est un tyran , & la Grece
Ne craint or , argent , ny richesse.

XXIII. Estans donques toute l'Asie emeuë , & se tournant en plusieurs endroits de son costé volontairement , après y avoir reformé les villes & citez , & leur avoir rendu l'administration de leur chose publique en toute liberté & toute franchise , sans effusion de sang humain ,

& sans bannissement d'un seul homme, il delibera de passer oultre, & en transportant la guerre arriere des costes de la mer Grecque, aller combattre contre le roy mesme de Perse pour sa propre personne, & luy mettre en compromis ses richesses & ses delices, dont il jouissoit trop à son aise en ses haults païs d'Ecbatane & de Suse; & l'empescher si bien qu'il n'eust pas loisir d'entendre à mouvoir la guerre entre les Grecs, & en disposer à sa volonté sans se bouter de sa chaire, en corrompant à force d'argent ceulx qui avoyent autorité au gouvernement de chacune des villes. Mais sur les entrefaittes qu'il estoit en ce pensement, arriva devers luy Epicydidas Spartiate, qui luy apporta nouvelles, comme la ville de Sparte estoit fort pressée de guerres que luy faisoient les autres peuples Grecs: au moyen dequoy les ephores le rappelloient, & luy mandoyent qu'il eust à retourner pour defendre son païs.

O Grecs, qui plus de maux vous procurez,
Qu'onques n'ont fait Barbares conjurés!

Car comment pourroit on appeller d'autre nom, celle envie ou celle conjuration, que feirent alors les Grecs à l'encontre d'eulx mesmes, par laquelle ilz arresterent avec leurs propres mains la fortune qui les conduisoit au comble de

félicité , & retournerent contre leurs propres entrailles , les armes qui ja estoient acheminées à l'encontre des Barbares , en rappelant en leur païs la guerre qui en estoit bannie ? Car je ne suis pas de l'opinion de Demaratus le Corinthien , quand il dit que les Grecs estoient privez d'un singulier plaisir , qui n'avoient veu Alexandre le grand assis dedans le throsne royal de Darius : ains au contraire , je croy plus tost qu'ilz eussent deu plorer , quand ilz eussent pensé qu'ilz avoient laissé ceste gloire à Alexandre & aux Macedoniens , lors qu'ilz perdoyent follement tant de bons capitaines de la Grece ès batailles de Leuctres , de Coronée , de Corinthe & d'Arcadie.

XXIV. Toutefois Agefilaus ne fit onques acte plus meritoire ne plus grand , que de s'en estre retourné lors en son païs , ny ne fit onques un plus bel exemple d'obeïssance & de justice deuë à son païs , que celui là. Car s'il est ainsi , que Hannibal commençant desja à faire mal ses besongnes , & à estre debouté de l'Italie , ne cuida encore presque jamais , sinon à toute force , obeïr à ses citoyens , qui le rappelloient pour les aller defendre de la guerre qu'ilz avoient sur les bras , & dedans leur propre païs : Et Alexandre le grand étant appelé pour mesme cause en son royaume de Macedoine , tant s'en

fallut qu'il y retournaſt , qu'encore s'en moqua il , quand il entendit la groſſe bataille que ſon lieutenant Antipater avoit eüe contre le roy Agis , diſant , « Il me ſemble quand j'oy compter ces » nouvelles, que ce pendant que nous deſfaifions » par deçà le roy Darius , il y ait eu par delà en » Arcadie une bataille de rats » : S'il eſt (dy-je) ainſi , que ces deux grands capitaines ayent tenu ſi peu de compte de leur païs , ne doit on pas reputer la cité de Sparte bienheureuſe , d'avoir eu un roy qui luy ait porté tant d'honneur & de reverence , & tant d'obeiſſance à ſes loix , que tout auſſi toſt qu'il eut receu le petit billet , par lequel il luy eſtoit commandé de s'en retourner , il abandonna & quitta tant de biens , & tant de puiſſance qu'il avoit paiſible entre ſes mains , avec une eſperance très bien fondée & très bien acheminée de beaucoup encore davantage , & ſ'embarqua pour s'en retourner tout ſoudain , laiſſant oultre cela un très grand regret à tous les alliez & confederez de ſon païs , de ce qu'il n'achevoit pas un ſi beau chef-d'œuvre qu'il avoit ſi bien commencé ? Certes ouy : & ſi refuſa un dire de Demoftratus Phzacien , lequel diſoit que les Lacedæmoniens eſtoient plus gens de bien en public , & les Atheniens en particulier : car s'il s'eſtoit monſtré bon roy & excellent capitaine envers le public , encore

se faisoit il sentir plus doux amy en privé , & plus agreable en familiere conversation. Et pource qu'en la monnoye persienne il y avoit d'un costé la figure d'un archer imprimée , il dit en se departant , que dix mille archers le chassoyent de l'Asie : car autant en avoit on porté à Thebes & à Athenes , qui avoyent esté distribuez entre les harengueurs & gouverneurs du peuple , qui fusciterent par leurs harengues ces deux puissantes citez , & leur feirent prendre les armes contre les Spartiates.

XXV. Ayant donques à son retour passé le destroit de l'Hellepont , il prit son chemin à travers le país de la Thrace , là où il ne pria jamais ny peuple , ny prince Barbare pour son passage , ains leur envoyoit seulement demander comment ilz vouloyent qu'il passast par leurs terres , comme amy , ou comme ennemy. Tous les autres le receurent amiablement , & l'honorèrent chacun selon leur puissance : mais ceulx que lon y appelle les Trochaliens , ausquelz le roy mesme Xerxès fait des presens pour avoir amiable passage par leurs terres , luy envoyerent demander pour le laisser passer cents talents ^{*} en argent , & cent femmes : à quoy Agefilaus se mocquant d'eulx fait response , « Et que ne

^{*} Soixante mille escus. Amyot. 466,875 livres de nostre monnoie.

« font ilz donques venus quant & vous pour
« les recevoir » ? Et en disant cela fait aussi
tost marcher ses gens contre les Barbares , qui
l'attendoient en bataille pour le cuider engarder
de passer , & les ayant rompus en occit un grand
nombre sur le champ. Autant en envoya il de-
mander au roy de Macedoine , s'il passeroit par
ses païs , ou comme amy , ou comme ennemy.
Ce roy fait response , qu'il y penseroit. « Et
« bien , repliqua Agesilaus , qu'il y pense don-
« ques : mais ce pendant nous ne laisserons pas
« de tirer tousjours oultre ». Adonc ce roy s'es-
bahissant de sa grande hardiesse , & craignant
qu'il ne luy feist quelque desplaisir en passant ,
l'envoya prier qu'il passast comme amy. Or es-
toient pour lors les Thessaliens en alliance avec
les ennemis des Lacedæmoniens : parquoy en
passant par leur païs , il le fourragea & pillà
comme terres d'ennemis , & envoya en la ville
de Larisse Xenocles & Scytha pour la cuider
induire à prendre party avec les Lacedæmoniens.
Ces deux ambassadeurs y furent retenus &
arrestez prisonniers : dequoy tous les autres
Spartiates estans grièvement indignez , estoient
d'avis que Agesilaus y devoit aller mettre le
siege devant : mais il leur respondit qu'il ne
voudroit pas avoir gaigné toute la Thessalie

entiere, pout perdre l'un de ces deux hommes là, & à ceste cause feit tant qu'il les retira par composition. Ce qui n'est pas, à l'aventure, trop à esmerveiller en la personne d'Agésilas, veu qu'une autre fois entendant qu'il y avoit eu une grosse bataille donnée près la ville de Corinthe, en laquelle estoient demourez sur le champ plusieurs grands & vaillans personnages du costé des ennemis, & bien peu de Spartiates, il n'en feit point bonne chere, ny ne veit on point qu'il s'en resjouist : ains au contraire, en souspira très fort & du profond du cueur, en disant, « O pauvre Grece, tant tu es mal-
» heureuse d'avoir occis avec tes propres mains
» tant de bons hommes tiens, qui eussent été
» suffisans pour desfaire en un jour de bataille
» tous les Barbares ensemble » ! Mais comme les Pharsaliens, ainsi qu'il passoit son chemin le harcellassent, & endommageassent la cueüe de son armée, il prit cinq cents chevaux, avec lesquels il les alla charger si vivement, qu'il les rompit à force : & de ceste victoire feit dresser un trophée au dessoubz du mont qui s'appelle Narthacium, & luy fut ceste victoire autant ou plus agreable, que nulle autre ; pource que avec si petite troupe de gens de cheval, que luy mesme avoit mis sus, & qu'il

avoit dressez , il se trouva avoir desfait en bataille ceulx , qui de tout temps se glorifioyent de leur chevalerie.

XXVI. Là le vint trouver Diphridas l'un des ephores , estant envoyé exprès de Sparte , pour luy commander qu'il entraist incontinent en armes dedans le país de la Bœoce : & luy , combien qu'il eüst deliberé d'y entrer une autre fois avec beaucoup plus grosse puissance , toutefois ne voulant en aucune chose desobeïr aux seigneurs du conseil de son país , dit incontinent à ses gens , que la journée pour laquelle ilz estoient retournez de l'Asie s'approchoit , & envoya querir deux compagnies de ceulx qui estoient au camp près de Corinthe. En recompense dequoy ceulx de Sparte le voulans honorer , pource qu'il avoit si promptement obeï à leur mandement , feirent crier en la ville , que les jeunes hommes qui voudroyent aller secourir le roy de leurs personnes , vinsent bailler leurs noms : & adonc n'y en eut pas un qui ne s'allast presenter fort affectueusement pour se faire enroller : mais les gouverneurs en choisirent cinquante seulement des plus vigoureux & mieux dispos , qu'ilz luy envoyerent. Ce pendant Agésilas passa le pas des Thermopyles , & traversant le país de la Phocide amy de ceulx de Lacedæmone , entra dedans la Bœoce , & alla planter

son camp près la ville de Cheronée , là où soudain qu'il fut arrivé , il veit le soleil eclipsé , qui perdit sa lumiere , & prit une forme de lune quand elle est en son croissant : & au mesme temps entendit la nouvelle de la mort de Pifander , lequel avoit esté tué en une bataille navale , qu'il avoit perdue contre Pharnabazus & Conon , près l'isle de Gnidos. Ceste nouvelle luy fut fort desplaisante , comme lon peut penser , tant pour le regret de la perte du personnage qui estoit son allié , comme aussi pour le dommage du public : toutefois de peur que cela ne descourageast ses gens , & ne meist quelque frayeur en leurs cueurs , mesmement sur le poinct qu'ilz estoient prests d'avoir la bataille , il commanda à ceulx qui venoyent de la marine , qu'ilz fassent un bruit tout au contraire de ce qu'ilz luy avoyent dit , & luy mesme pour seconder leur dire sortit en public ayant sur sa teste un chapeau de fleurs , & sacrifia aux dieux comme pour les remercier de ceste bonne nouvelle , envoyant à chacun de ses amis sa portion de la chair des bestes immolées , comme il a accoustumé de se faire en une resjouissance publique : puis marchant en pais , aussi tost qu'il apperceut de loing les ennemis , & que luy fut aussi apperceu d'eulx , il ordonna ses gens en bataille , dont il donna la poincte

gauche aux Orchomeniens , & luy mena la droite.

XXVII. Les Thebains de l'autre part se renegerent à la droite de la leur , & donnerent la gauche aux Argiens. Xenophon qui se trouva en ceste bataille du costé d'Agefilaus , avec lequel il estoit revenu de l'Asie , escrit qu'il n'en fut jamais une telle. Il est bien vray que la premiere rencontre ne fut pas fort opiniaistrement debatue , ny ne dura pas longuement , pource que les Thebains rompirent incontinent les Orchomeniens , & Agefilaus les Argiens : mais quand les uns & les autres entendirent que les poinctes gauches de leurs batallles avoyent des affaires , & quelles reçuloyent en arriere , ilz retournerent tout court , là où Agefilaus pouvant avoir la victoire entiere sans aucun danger , s'il eust seulement voulu laisser passer le bataillon des Thebains , & puis les charger sur la cueuë après qu'ilz eussent esté passez , par une opiniaistreté de vouloir monstrier sa prouesse , & par une ardeur de courage aima mieux leur donner en teste , & les alla chocquer de front , ne les voulant vaincre sinon à vive force. Les Thebains de l'autre costé le receurent non moins courageusement , & y eut là une meslée fort aspre par tous les endroits de la bataille , mais principalement au lieu où il estoit , entre les

cinquante jeunes hommes qui luy avoyent esté envoyez pour la garde de sa personne , la vail-
lance desquelz luy vint adonc fort à propos ,
& luy fut très salutaire : car encore qu'ilz feissent
tout le devoir qu'il est possible de bien combattre ,
& qu'ilz se meissent au devant pour le garder ,
ilz ne le peurent neantmoins sauver d'estre bien
blecé , mais bien l'emporterent ilz navré de plu-
sieurs coups de javeline & d'espée qu'il receut
à travers son harnois , lequel en fut faulcé en
beaucoup de lieux , & se reneans en troupe
ferrée au devant de luy pour le couvrir , tuerent
grand nombre des ennemis , & plusieurs d'eulx
aussi demourerent morts sur la place , jusques à
ce que finablement voyans qu'il estoit trop mal
aisé de forcer les Thebains de front , ilz furent
contraints de faire ce qu'ilz n'avoyent pas voulu
du commencement : car ilz s'ouvrirent pour les
laisser passer , puis quand ilz furent passez ,
prenans garde qu'ilz marchoyent en desorde ,
comme ceulx qui cuidoyent bien estre hors de
tout danger , ilz les suyvirent , & courans au
long d'eulx les rechargerent de nouveau par
les flancs : mais pour cela encore ne les peurent
ilz tourner en fuite à val de rouverte , ains se
retirerent les Thebains au petit pas à la mon-
tagne de Helicon , se sentans fort fiets de
l'evenement de ceste bataille , en laquelle ilz

s'estoyent quant à eulx maintenus invincibles.

XXVIII. Mais Agesilaus, encore qu'il se portast fort mal, à cause de plusieurs bleceures qu'il avoit sur sa personne, jamais pourtant ne se voulut retirer en seureté pour se faire penser, que premierement il n'eust esté au lieu de la bataille, & qu'il n'en eust veu emporter les corps morts de ses gens dedans leurs armes. Quant aux ennemis, il commanda que lon laissast aller où ilz voudroyent ceulx qui s'en estoyent fouiz dedans le temple de Minerve Itonienne, qui n'estoit pas loing de là, devant lequel y a un trophée, que les Thebains jadis y dresserent après y avoir desfait en bataille, soubz la conduite de Sparton, l'armée des Atheniens, & y avoir occis sur le champ le capitaine Tolmides. Le lendemain au poindre du jour Agesilaus voulant esprouver si les Thebains auroient courage de descendre une autre fois à la bataille, commanda à ses soudards qu'ilz meissent des chapeaux de fleurs dessus leurs testes, & aux menestriers qu'ilz jouassent de leurs flustes, pendant qu'il faisoit dresser & accoustrer un trophée comme victorieux : & ayans ses ennemis envoyé demander licence d'enlever leurs morts, il leur ottroya trefves pour ce faire, en quoy faisant il confirma sa victoire, puis se feit porter en la ville de Delphes, là où se jouoyent

les jeux Pythiques , & y fait la procession & le sacrifice ordinaire à Apollo, en luy offrant la decime de tout le butin qu'il avoit apporté de l'Asie, qui monta bien à la somme de cent talens.

XXIX. Cela fait il s'en retourna en sa maison, là où ses citoyens l'aimerent , & l'estimerent plus que jamais pour la simplicité de sa vie & de sa conversation : car il ne se monstra point en ses façons de faire autre qu'il n'estoit auparavant; ny changé de son naturel par les mœurs des estrangers, comme font ordinairement les autres capitaines quand ilz retournent d'une expedition longue & loingtaine, de sorte qu'il mesprisast les coustumes de son país, ou desdaignast d'obeir aux ordonnances d'iceluy : ains tout ne plus ne moins que ceulx qui n'avoient jamais passé la riviere de Eurotas, continua tousjours à les observer, entretenir & garder, sans rien innover en son boire & manger, laver & estuver, en l'equippage de sa femme, ès ornemens de ses armes, ny aux meubles de sa maison : car il y laissa les mesmes portes qui y estoient de tout temps, si vieilles & si anciennes, que l'on estimoit que ce fussent celles mesmes que Aristodemus y avoit mises : & dit Xenophon; que le canathre de sa fille n'estoit en rien plus magnifique que ceulx des autres. On appelloit

canathres en Lacedæmone des figures de gryphons, de cerfs, ou de boucs, dessus lesquelles on portoit les jeunes filles en certaines processions solennelles que lon faisoit par la ville. Xenophon n'a point écrit comme s'appelloit ceste fille d'Agésilas : & Dicæarchus se plaint & se courrouce que lon ne sçait le nom d'elle, ny celuy de la mere d'Epaminondas : toutefois nous avons trouvé ès registres de Lacedæmone que la femme d'Agésilas se nommoit Cleora, l'une de ses filles Apolia, & l'autre Prolyta : & voit on encore jusques au jourdhuy en la ville de Sparte, sa lance, qui n'est point differente des autres.

XXX. Mais voyant qu'il y avoit aucuns des citoyens de Sparte qui se glorifioient, & cuidoyent bien estre quelque chose davantage que les autres, pource qu'ilz tenoyent des chevaux en l'estable, il persuada à sa sœur, qui s'appelloit Cynisca, qu'elle envoyast son chariot avec ses chevaux aux jeux Olympiques, pour essayer d'y gagner le prix de la course, à fin de donner à cognoistre & faire voir aux Grecs que cela n'estoit acte de vertu quelconque, ains de richesses & de despense seulement : & ayant autour de luy le philosophe Xenophon qu'il aimoit, & duquel il faisoit grand compte, il luy suada d'envoyer querir ses enfans pour

les faire nourrir en Lacedæmone , là où ilz apprendroyent la plus belle science que les hommes sçauroyent apprendre , c'est à sçavoir , obeïr & commander.

XXXI. Après la mort de Lyfander il trouva en Sparte une ligue de plusieurs citoyens bandez & conjurez à l'encontre de luy , que Lyfander luy avoit suscitée à sôn retour de l'Asie : & à fin que lon cogneust quel citoyen avoit esté Lyfander en son vivant , il fut entre deux de monstrier & reciter en public une harengue qu'il trouva entre ses papiers , laquelle l'orateur Cleon Halicarnassien avoit composée , & Lyfander la devoit prononcer en publique assemblée devant tout le peuple , par laquelle il vouloit mettre en avant beaucoup de nouveautez , & remuer presque tout le gouvernement de la chose publique de Lacedæmone : mais il y eut un des conseillers , homme sage , qui ayant leu la harengue , & craignant la vivacité des raisons y alleguées & deduites , luy dit qu'il luy conseilloit de ne deterrer point Lyfander , ains plus tost d'enterrer sa harengue quant & luy. Agésilas le creut , & ne remua rien : & quant à ceulx qui luy avoyent esté ou estoient adversaires , il ne leur voulut point nuire ouvertement : mais il trouvoit moyen d'en faire tousjours envoyer quelqu'un capitaine d'armée , ou bien
de

de luy faire avoir quelque autre charge : & puis faisoit evidemment cognoistre comment ilz ne s'estoyent pas portez en gens de bien ès charges que lon leur avoit données , ains avoyent esté avaricieux & meschans : & neantmoins s'ilz venoyent à en estre appelez en justice , encore les secouroit & aidoit il , & se les rendoit par ce moyen amis au lieu qu'ilz luy estoyent ennemis , & les regaignoit en ce faisant : de sorte qu'il n'eut à la fin personne qui luy fust adverfaire.

XXXII. Car l'autre roy Agefipolis son concurrent ¹, estant filz d'un pere ² que lon avoit banny , se trouvant lors en fort bas aage , & de nature estant homme doux & debonnaire , ne s'entremettoit gueres du gouvernement de la chose publique : toutefois encore se porta il de maniere envers luy , qu'il le rendit sien : car les deux roys quand ilz estoyent en la ville , mangeoyent ensemble en une mesme salle. Et Agefilaus cognoissant que de sa nature il estoit enclin à l'amour , comme aussi estoit il luy mesme , luy mettoit tousjours en avant quelque propos des beaux enfans de la ville , & incitoit

¹ Concurrent n'est pas le mot, puisqu'il y avoit toujours deux rois. C'étoit son compagnon, ou, si on permet ce mot, co-roi.

² Pausanias, fils de Plistoanax. Voyez la Vie de Lyfandre, depuis le ch. LII jusqu'au ch. LVI, T. IV.

ce jeune homme à en aimer quelqu'un qu'il aimoit luy mesme , & le secondoit en cela : pource que ès amours Laconiques il n'y avoit rien de deshonesté , ains toute continence & toute honesteté , avec un zele & un soing de rendre l'enfant que lon aimoit le plus vertueux & le mieulx conditionné , ainsi que nous avons plus amplement deduit en la vie de Lyncurgus.

XXXIII. Par ces moyens donques Agefilaus estant parvenu à avoir plus grande authorité que nul autre en sa ville , feit avoir la charge de la marine à son frere de mere , qui s'appelloit Teleutias , & luy s'en alla avec son armée par terre devant la ville de Corinthe , de laquelle il prit les longues murailles , & Teleutias luy aida à ce faire du costé de la mer. Les Argiens la tenoyent alors , & celebroyent la feste des jeux Isthmiques , ainsi comme Agefilaus y arriva , & les en chassa sur le poinct qu'ilz venoyent de sacrifier au dieu Neptune , & furent contraints d'abandonner tous leurs apprests. Adonc les bannis de Corinthe qui estoient avec luy , le prierent de vouloir luy mesme presider à ceste feste , & ordonner les jeux : mais il ne le voulut pas faire , ains voulut que eulx mesmes le feissent & y presidassent , seulement y demoura il tant comme les jeux durerent pour leur donner seurété. Depuis quand il en fut party , les Argiens.

y retournerent , qui celebrerent une autre fois ces jeux Isthmiques, & y eut aucuns de ceulx qui avoyent gaigné le prix à la premiere fois, qui l'emporterent encore à la seconde, & d'autres qui ayans vaincu aux premiers, furent vaincus aux seconds. En quoy Agefilaus disoit que les Argiens s'estoyent declarez hommes de bien peu de cueur, s'ilz estimoyent chose si grande & si honorable que de presider à ces jeux là, qu'ilz n'avoyent ozé venir combattre contre luy le droit qu'ilz y pretendoyent.

XXXIV. Quant à luy, il estimoit qu'il falloit garder un moyen en telles choses, sans en estre trop curieux : car il honoroit bien de sa presence telles assemblées solennelles de danfes & de festes publiques, qui se faisoient à Sparte d'ancieneté, & ne failloit jamais de se trouver avec grand plaisir & grande affection à telz esbatemens, que faisoient les jeunes garçons & les jeunes filles à Sparte : mais au demourant en matiere de jeux, il ne faisoit pas semblant de cognoistre seulement ce que les autres avoyent en singuliere admiration. Auquel propos on recite que Callippides excellent joueur de tragedies, & qui estoit grandement renommé, honoré & estimé entre les Grecs pour l'excellence de son art, le rencontra un jour, & le salua premierement, puis se jetta assez presumptueusement au renc

de ceulx qui se promenoient quant & luy, se presentant devant luy, & estimant qu'il commenceroit le premier à luy faire quelque careffe, à la fin il luy dit : « Comment, sire roy Agefilaus, » ne me cognois tu pas » ? Agefilaus le regardant au visage, luy respondit : « Et n'es tu pas Cal-lippides le farceur » ? & n'en feit autre compte. Une autre fois comme lon le conviait à ouyr un qui contrefaisoit naïvement le chant du rossignol, il ne le voulut point ouyr, disant, « J'ay souvent ouy le rossignol mesme ». Et comme le medecin Menecrates pour avoir esté heureux en la cure de quelques maladies desesperées eust esté surnommé Jupiter, & usurpât un peu trop arrogamment ce surnom là, de sorte qu'il eut bien la hardiessé de mettre en la suscription d'une missive qu'il luy escrivoit, « Menecrates le Jupiter au roy Agefilaus, salut » : Agefilaus luy rescrivit, « Agefilaus à Menecrates¹, fanté ».

XXXV. Mais pendant qu'il estoit dedans le territoire de Corinthe, où il avoit pris le temple de Juno, ainsi comme il regardoit ses gens, qui pilloyent & fourrageoient tout le plat país, il arriva devers luy des ambassadeurs de Thebes pour luy parler de paix & d'amitié avec les The-

¹ Comme voulant dire, qu'il avoit le cerveau blécé d'estre si présomptueux. *Amyot.*

bains : mais luy qui de tout temps haïſſoit ceulx de Thebes, & qui oultre cela eſtimoit qu'il fuſt lors expedient pour le bien de ſes affaires, monſtrer ſemblant de n'en faire compte, teint contenance comme s'il n'eult ny veu ny ouy ceulx qui parloyent à luy. Mais ſur l'heure meſme il advint un cas, comme par expreſſe vengeance divine, qui luy rendit bien la pareille : car avant que les ambaffadeurs ſe departiſſent d'avec luy, il eut nouvelles que l'une de leurs bendes, qu'ilz appellent Mœres, avoit eſté toute taillée en pieces par Iphicrates, qui fut la plus grande perte qu'ilz euſſent receuë de bien long temps : car ilz y perdirent grand nombre de bons & vaillans hommes tous naturelz Lacedæmoniens, qui furent tuez par des aventuriers mercenaires, & tous armez à bon eſciant par hommes nudz ou armez à la legere. Si ſe meit Ageſilaus incontinent aux champs pour les cuider aller ſecourir ou venger : mais ſur le chemin il fut certainement informé qu'ilz eſtoient tous deſpeſchez, au moyen dequoy il ſ'en retourna, dont il eſtoit party, au temple de Juno, & lors feit appeller les ambaffadeurs Bœotiens pour leur donner audience : & eulx luy voulans rendre la pareille du tour de meſpris qu'il leur avoit fait au paravant, ne firent aucune mention de paix, ains luy requirent ſeulement qu'il les laiſſaſt entrer

D ;

dedans Corinthe. Dequoy Agefilaus ayant despit, leur respondit, « Si c'est pour voir voz amis se » glorifier en leur prosperité, vous le pourriez » demain seurement faire » : & le lendemain les menant quant & luy, il alla gaster & destruire le país des Corinthiens jusques tout contre les murailles de leur ville : & ainsi après avoir fait voir aux ambassadeurs Bœotiens comme ceulx de Corinthe n'ozoyent sortir aux champs pour defendre leur país, il leur donna congé, & recueillant quelques uns qui estoient eschappez de la troupe desfaite, les remena à Lacedæmone, partant tousjours du logis avant jour, & n'y arrivant qu'il ne fust nuict toute noire, de peur que les Arcadiens, qui les haïssoyent & qui leur portoyent envie, ne se resjouissent de leur perte.

XXXVI. Depuis ce voyage, pour gratifier aux Achæiens, il alla quant & eulx au país de l'Acarnanie, dont il emmena grande quantité de butin; après avoir desfait les Acarnaniens en bataille : mais comme les Achæiens le requissent qu'il y voulust demourer tout l'hyver, pour oster à leurs ennemis tout moyen d'ensemencer leurs terres, il leur respondit qu'il n'en feroit rien : « Pource, dit il, qu'ilz craindront plus la guerre » à la saison prochaine, quand ilz auront leurs » terres ensemençées », comme il advint : car y

estant l'armée retournée pour la seconde fois ilz feirent appointement avec les Achæiens.

XXXVII. Environ ce temps Pharnabazus & Conon avec l'armée du roy de Perse, estans sans contredit seigneurs entierement de toute la marine, pilloyent toute la coste de la Laconie : & davantage les murailles de la ville d'Athenes se rebatissoient de l'argent que Pharnabazus leur fournissoit, à raison dequoy les seigneurs de Lacedæmone furent d'avis qu'il valoit mieulx faire paix avec le roy de Perse, & pour cest effect envoyerent Antalcidas devers Tiribazus, abandonnans laschement & meschamment à ce roy Barbare les Grecs habitans en l'Asie, pour la liberté desquelz Agefilaus luy avoit fait la guerre. Ainsi n'eut point Agefilaus de part à ceste honte & à ceste infamie, pource que Antalcidas, qui estoit son ennemy, chetcha par tous moyens de faire ceste paix, à cause qu'il voyoit que la guerre augmentoit tousjours l'autorité, l'honneur & la reputation d'Agefilaus, lequel toutefois respondit lors à un qui luy reprochoit, que les Lacedæmoniens Medisoient, c'est à dire, favorisoient aux Medois, « Non font, dit il, mais les Medois Laconisent » : & néanmoins en menaçant, & denonceant la guerre à ceulx des Grecs qui ne vouloyent accepter les conditions de ceste paix, il les contraignit de consentir à ce que

le roy de Perse voulut : ce qu'il feit principalement pour le regard des Thebains, à fin qu'estans contraincts par les capitulations de la paix, de remettre tout le país de la Bœoce en liberté, eulx en demourassent de tant plus foibles.

XXXVIII. Ce qu'il declara bien manifestement par ce qui s'ensuyvit tantost après : car comme Phœbidas eust fait un meschant & malheureux acte, d'avoir en pleine paix surpris & occupé le chasteau de la ville de Thebes, que lon appelloit la Cadmée, dont tous les autres peuples Grecs estoient fort indignez, & les Spartiates mesmes n'en estoient pas gueres contens, principalement ceulx qui estoient contraires à Agefilaus, à l'occasion de quoy, ilz demandoient en courroux à Phœbidas, par commandement & adveu de qui il avoit fait ceste surprise, pour deriver toute la suspicion du faict sur luy, Agefilaus ne faignit point de dire hault & clair pour la descharge de Phœbidas, qu'il falloit regarder & considerer le faict en soy, s'il estoit point utile pour leur chose publique, & que c'estoit bien besongné que de faire de son propre mouvement, sans attendre autre commandement, ce que lon cognoissoit estre utile pour le bien public.

XXXIX. Et toutefois il avoit tousjours accoustumé de dire en ses privez devis, que justice

estoit la premiere de toutes les vertus, pour autant, disoit il, que la prouesse ne vault rien, si elle n'est conjoincte avec la justice, & que si tous les hommes estoyent justes, alors on n'auroit que faire de la prouesse. Et à ceulx qui disoyent, « le grand roy le veut ainsi. Et en quoy, » disoit il, est il plus grand que moy, s'il n'est plus juste? Ayant en cela bonne & droite opinion, de penser qu'il falloit prendre la difference du grand au petit roy à la justice, comme à la mesure royale. Et comme après la paix faite, le roy de Perse luy eust particulierement envoyé une lettre missive, par laquelle il luy escrivoit qu'il desiroit avoir amitié & hospitalité particuliere avec luy, il ne la voulut point accepter, disant qu'il suffisoit de l'amitié publique, & que tant comme celle. là dureroit, il ne seroit point besoing d'en contracter d'autre entre eulx. Mais puis après quand se venoit aux effectz, il ne retenoit plus ceste belle opinion premiere, ains se laissoit bien souvent transporter à l'ambition ou a son obstination, mesmement à l'encontre des Thebains, comme il feit lors, quand non seulement il sauva Phœbidas, ains feit que la ville de Sparte prit sur elle & advoua la forfaiture qu'il avoit commise, en retenant la forteresse de la Cadmée, & mettant le gouvernement de la ville de Thebes entre

les mains d'Archidas^{*} & de Leontidas, par intelligence desquelz Phœbidas s'estoit saisy de la Cadmée : pourtant eut on incontinent opinion, que c'estoit bien Phœbidas, qui avoit fait l'exécution, mais que Agefilaus en avoit donné le conseil : & les choses qui ensuyvirent depuis, declarerent que ceste suspicion estoit entierement veritable.

XL. Car après que les Thebains eurent chassé hors de la Cadmée la garnison Lacedæmonienne, & remis la ville en sa liberté, leur mettant sus qu'ilz avoyent meschamment occis Archidas & Leontidas, lesquelz de nom s'appelloyent gouverneurs, mais de faict estoyent vrais tyrans, il leur commença là dessus la guerre : & Cleombrotus, qui desja regnoit, après le decès d'Agésilas, fut envoyé devant en la Bœoce avec armée, pource que Agefilaus ayant passé quarante ans au dessus de l'aage d'adolescence, & pour ceste cause estant dispensé par les loix d'aller plus à la guerre, ne voulut pas prendre la charge de ceste expedition, ayant honte que lon le veist combattre pour la querelle de deux tyrans, là où peu devant il avoit pris & porté les armes en faveur des bannis contre les Phliasiens.

XLI. Or y avoit il lors un Laconien nommé

^{*} Lisez Archias, comme les Historiens & Plutarque lui-même l'a écrit par-tout ailleurs.

Sphodrias de faction contraire à celle d'Agésilas qui pour lors estoit gouverneur en la ville de Thespies , homme hardy & vaillant de sa personne , mais tousjours plein de nouvelle esperance , plus tost que de bon sens ny de bon jugement : iceluy desirant acquerir renommée , & estimant que Phœbidas estoit venu en honneur & en réputation pour la hardie entreprise qu'il avoit executée à Thebes , se persuada que ce luy seroit chose encore bien plus honorable , si de soy même il surprenoit le port de Piræe , & qu'il ostast par ce moyen aux Atheniens l'usage de la marine en leur courant fus au desprouveau du costé de la terre. On estime que cela fut une trame ourdie par Pelopidas & par Gelon ¹ gouverneurs de la Bœoe , lesquelz attiltrent quelques hommes qui feirent semblant d'estre fort affectionnez aux party des Lacedæmoniens , & en hault louant ce Sphodrias , luy donnerent à entendre , qu'il n'y avoit que luy seul qui fust digne d'executer un si glorieux chef d'œuvre , de maniere que par leurs persuasions ilz le conduisirent à entreprendre de faire ceste surprise , qui n'estoit pas moins damnable ny moins meschante , que celle de la Cadmée à Thebes : mais elle fut moins hardiment & moins diligemment attentée : car le jour le surprit qu'il

¹ Voyez les Observations.

estoit encore en la plaine de Thriasium , & commença là l'aube du jour à poindre , là où il faisoit son compte d'arriver qu'il seroit encore nuit , aux murailles du Piræe : & dit on que les gens qu'il menoit ayans apperceu quelques feux des temples de la ville d'Eleusine, en eurent peur & s'en effroyerent : qui plus est, luy mesme voyant qu'il ne se pouvoit plus cacher perdit le courage, de maniere qu'il s'en retourna honteusement & ignominieusement en la ville de Thespies , sans faire autre chose qu'emmener un peu de pillage.

XLII. Pour ce cas furent incontinent envoyez des accusateurs d'Athenes à Sparte , lesquels trouverent qu'il n'estoit ja besoing de l'accuser , pour ce que desja les gouverneurs & magistrats l'avoient fait adjourner à comparoir en personne devant eulx , pour luy faire son procès criminel : mais luy ne s'osa presenter , redoubtant la fureur de ses citoyens, pensant bien qu'ilz voudroyent monstrier que le tort leur avoit esté fait à eulx mesmes , à fin que lon n'estimast qu'ilz l'eussent fait faire. Or avoit cestuy Sphodrias un filz nommé Cleonymus , duquel estant encore enfant beau de visage , Archidamus filz d'Agésilas estoit amoureux , & lors se trouvoit en grande peine, comme lon peult estimer , voyant celuy qu'il aimoit en la destresse du danger de perdre son pere , & si ne luy osoit ouvertement aider , à cause

que Sphodrias estoit des aduersaires d'Agésilas : toutefois Cleonymus s'en estant adressé à luy , & luy ayant requis & prié les larmes aux yeux qu'il gagnast son pere , pource que c'estoit celuy de tous dont ils avoyent plus grande peur , Archidamus fut trois ou quatre jours après son pere , le suyvnt par tout pas à pas sans luy en ofer entamer le propos : mais à la fin estant le jour du jugement prochain , il prit la hardiesse de luy declarer comme Cleonymus l'avoit prié de vouloir interceder envers luy pour le faict de son pere. Et Agésilas sachant bien que son filz aimoit Cleonymus , ne le voulut point destourner de ceste affection , pource que l'enfant dès les premiers ans de son enfance , avoit tousjours donné esperance qu'il deviendroit un jour aussi homme de bien que nul autre : mais aussi ne monstra il pour lors aucune apparence à son filz qu'il voulust rien faire pour ses prieres , & ne luy respondit autre chose , sinon qu'il adviseroit ce qui seroit honeste & convenable de faire en ce cas : parquoy Archidamus en estant honteux , cessa de hanter Cleonymus , là où auparavant il y souloit aller plusieurs fois le jour pour le voir : cela feit que les amis de Sphodrias desespererent de son faict encore plus que jamais , jusques à ce que l'un des familiers d'Agésilas nommé Erymocles , devisant avec eulx , leur des-

couvrit ce qu'en pensoit Agefilaus, qui estoit, que quant au faict en foy, il le trouvoit mauvais, & le blasmoit au possible, mais au demourant, qu'il tenoit Sphodrias pour un vaillant homme, & voyoit que la chose publique avoit besoing de telz hommes de service : car Agefilaustenoit ordinairement ce propos là quand on venoit à parler du procès de Sphodrias, pour gratifier à son filz : tellement que Cleonymus s'apperceut incontinent que Archidamus avoit fait de bonne foy tout ce qu'il avoit peu pour luy, & les amis de Sphodrias en prirent adonc plus grand courage de le secourir & de solliciter & parler pour luy à bon esciant. Agefilaus avoit cela entre autres choses, qu'il aimoit fort tendrement ses enfans : & compte lon de luy qu'il se jouoit avec eulx emmy la maison, quand ilz estoient petits, montant dessus un baston ou dessus une canne comme sur un cheval, auquel estar l'un de ses amis l'ayant un jour trouvé en son privé, il le pria de n'en vouloir rien dire, jusques à ce que luy mesme eust de petits enfans. Finablement Sphodrias par sentence de ses juges fut absouls à pur & à plein : ce que les Athéniens ayans entendu, en envoyerent denoncer la guerre aux Lacedæmoniens, dont Agefilaus fut fort blasmé, qui pour gratifier à un fol & léger appetit de son filz, avoit empesché un

juste jugement, & rendu sa ville coupable envers les Grecs, de si grievés forfaitures.

XLIII. Au reste voyant que l'autre roy son compagnon Cleombrotus ¹ n'alloit point volontiers à la guerre contre les Thebains, il s'y en alla luy mesme, en transgressant l'ordonnance touchant la charge de conduire l'armée, que paravant il avoit observée, & entrant à main armée dedans le país de la Bœoe, y feit du dommage, & y en receut aussi : au moyen dequoy Antalcidas un jour le voyant navré luy dit, « Certainement tu reçois bien des Thebains le salaire que tu merites, pour leur avoir enseigné malgré eulx à combattre, ce qu'ilz ne sçavoient, ny vouloyent faire ». Car à la vérité, l'on dit que les Thebains devindrent alors plus belliqueux que jamais ilz n'avoient esté au paravant, s'estans adressez & exercez aux armes par les continuelles invasions des Lacedæmoniens. Aussi estoit ce la raison, pour laquelle l'ancien Lycurgus en ses loix, que lon appelloit Retres, leur defendoit de faire souvent la guerre contre un mesme peuple, de peur qu'ilz ne le contraignissent en ce faisant d'apprendre à la faire.

XLIV. Si en estoit Agésilas haï des alliez

¹ Voyez les Observations.

mesmes de Lacedæmone, lesquelz alloient disans que ce n'estoit pour aucune offense qui concernast le public, ains pour une particuliere rancune & opiniaftreté, qu'il cherchoit à perdre & ruiner les Thebains, & qu'à l'appetit de luy, il falloit qu'ilz se consumassent à aller tous les ans porter les armes, tantost cy, tantost là, sans qu'il en fust autrement befoing, en fuyvant une petite troupe de Lacedæmoniens, là où ilz estoient eulx en beaucoup plus grand nombre. Ce fut lors qu'Agésilas leur voulant faire voir quel nombre ilz estoient de gens de guerre, usa d'un tel artifice: il commanda un jour que les alliez pesse messe se asseissent les uns parmy les autres tous d'un costé à part, & les Lacedæmoniens à part aussi de l'autre costé: puis feit crier par un herault que tous ceulx qui estoient du mestier de faire pots de terre se levassent sur leurs piedz: quand ceulx là furent levez, il feit crier que les fondeurs se levassent aussi, & puis les charpentiers, & après les massons, & conséquemment ainsi de tous autres mestiers, de maniere que rous les alliez presque, obeïssans à ces proclamations, se trouverent à peu près de bout: & ne s'en leva pas un des Lacedæmoniens, pource qu'il estoit defendu d'apprendre ny exercer aucun art ou mestier mechanique: & lors Agésilas se prenant à rire leur dit,

dit, « Voyez vous maintenant, mes amis, combien plus de gens de guerre nous mettons aux champs que vous ne faites ».

XLV. A son retour de ce voyage de Thebes passant par la ville de Megare, ainsi comme il montoit au palais public de la seigneurie qui estoit dedans le chasteau, il luy prit soudainement une grande convulsion de nerfs, avec une douleur vehemente à sa jambe saine, qui s'en enfla & devint fort grosse avec une inflammation extreme, & pensa lon que ce fust du sang dont elle fust pleine, au moyen dequoy il y eut un medecin de Syracuse en Sicile, qui luy fit ouvrir la veine de dessoubz la cheville du pied, ce qui appaisa bien les douleurs: mais il en sortit du sang en si grande abondance que lon ne le pouvoit estancher, de sorte qu'il en tomba en grandes pasmoisons, & fut en très grand danger de mort soudaine: toutefois à la fin on trouva moyen d'estancher le sang, & le porta lon en Lacedæmone, là où il fut malade bien long temps, de sorte qu'il ne peult aller à la guerre: durant lequel temps il advint beaucoup de pertes & de desfaites aux Lacedæmoniens, tant par mer que par terre, entre lesquelles celle de Leuctres¹ fut la principale, là où ilz furent la premiere fois

¹ Voyez les Observations.

vaincus & desfaits en bataille rengée par les Thebains.

XLVI. Si furent d'avis tous les Grecs qu'il falloit faire une paix universelle, & s'assemblerent ambassadeurs & deputez de toutes les villes de la Grece, en Lacedæmone, pour cest effect. L'un de ces deputez fut Epaminondas homme fort renommé pour ses grandes lettres & pour son sçavoir en la philosophie, mais qui n'avoit pointencore fait preuve de grand capitaine. Iceluy voyant comme tous les autres ambassadeurs & deputez fleschissoient & plioient dessoubz Agesilaus, prit la hardiesse de parler franchement, & fit une harengue, non pour la cause des Thebains seulement, mais pour toute la Grece ensemble, par laquelle il remontra à la communauté, comme la guerre alloit augmentant la ville de Sparte seule, & au contraire, diminuant toutes les autres villes & citez de la Grece. A ceste cause, qu'il conseilloit à tous de vouloir entendre à traiter & composer une bonne paix par bonne equité & egalité entre tous, à fin qu'elle durast plus longuement, quand tous les contractans seroyent egaulx. Agesilaus adonc voyant que tous les autres Grecs assistans à ceste assemblée luy prestoyent l'oreille fort attentivement, & prenoient fort grand plaisir à l'ouir discourir ainsi franchement de la paix, il luy

demanda tout hault s'il estimoit pas juste & raisonnable, que toute la Bœoce fust remise en pleine liberté & en toute franchise. Epaminondas de l'autre costé luy demanda promptement & hardiement, si luy aussi n'estimoit pas qu'il fust juste & raisonnable de remettre toute la Laconie en son entiere liberté. Adonc Agesilaus en courroux se dressant sur ses pieds, luy commanda de respondre ouvertement, s'ilz remettroyent pas toute la province de la Bœoce en sa liberté: & Epaminondas luy repliqua tout de mesme, si eulx remettroyent pas aussi celle de la Laconie en sa liberté. Cela irrita tellement Agesilaus, avec ce qu'il estoit bien aise d'avoir ceste couleur pour l'ancienne rancune qu'il portoit à ceulx de Thebes, que sur l'heure il effacea le nom des Thebains de la liste de ceulx qui devoient estre compris en la paix, & leur denonça la guerre tout sur le champ, & donna semblablement congé aux deputez des autres peuples Grecs, avec telle conclusion, qu'ilz appointeroyent amiablement les differents qu'ilz avoyent ensemble, s'ilz se pouvoient accorder par voye de paix, & ceulx qui ne se pourroyent appointer par voye d'amiable composition, ilz les decideroyent par armes, pource qu'il estoit bien malaisé de nettoyer, resouldre & vuider toutes les querelles qu'ilz avoyent ensemble.

XLVII. Or estoit pour lors d'aventure le roy Cleombrotus avec une armée au païs de la Phocide, & luy escrivirent les ephores qu'il eust à marcher incontinent au dommage des Thebains, & quant & quant envoyèrent par tout pour assembler le secours de leurs alliez, qui n'estoyent point gueres affectionnez, & n'alloyent point volontiers à ceste guerre, mais toutefois aussi n'ozoyent pas ouvertement refuzer d'y aller, ny desobeïr aux Lacedæmoniens. Et combien qu'il y eut plusieurs signes de mauvais presage, comme nous avons escrit en la vie d'Epaminondas, & que Prothous Laconien resistast de tout son pouvoir à l'entreprise de ceste guerre, Agefilaus pour cela ne laissa point de tirer oultre, esperant bien avoir trouvé le point de l'occasion pour se venger des Thebains, lors que tout le reste de la Grece estoit en paix & en liberté, & eulx seuls exclus du traitté de la paix. Mais quand il n'y auroit autre chose que la brieveté du temps, elle toute seule monstre bien que ceste guerre fut conduite par cholere, plus tost que par discours de raison : pource que le traitté de paix universelle entre les autres Grecs fut conclu à Sparte le quatorzieme jour de may¹, & les Lacedæmoniens furent desfaits en la bataille.

¹ Voyez les Observations.

de Leuctres ¹ le cinquieme de juin, de maniere qu'il n'y eut que vingt jours de l'un à l'autre. Il y mourut mille naturelz Lacedæmoniens, avec leur roy mesme Cleombrotus, & les plus vail-
lans Spartiates autour de luy, entre lesquelz fut Cleonymus le filz de Sphodrias ce beau jeune homme, duquel nous avons patlé cy devant, qui ayant esté abbatu par trois fois au pied du roy mesme, par trois fois se releva, & à la fin finale fut occis en combatant vertueusement contre les Thebains.

XLVIII. Ceste desconfiture estant advenue aux Lacedæmoniens contre l'opinion de tout le monde, & ceste prosperité aux Thebains si grande & si glorieuse, que jamais Grecs combatans contre autres Grecs n'en gaagnerent de telle, la cité neantmoins qui fut vaincue, ne fait pas moins à louer & estimer pour sa vertu, que celle qui la vainquit. Car comme Xenophon dit, que les devis, les jeux & passetemps des gens de bien à la table mesme ont tousjours quelque chose digne d'estre mise en memoire, & dit en cela verité : aussi ne fait pas moins, mais davantage, à noter & considerer, ce que les gens d'honneur disent, & la contenance qu'ilz tiennent en leur adversité, qu'en leur prosperité. Car alors

¹ Leuctres de Béotie, en descendant de Thèbes vers le midi, sur la route de Platée à Thespie.

il se faisoit d'aventure une feste publique à Sparte, & estoit la ville pleine d'estrangers venus pour voir les danfes & jeux qui se font à corps nuds dedans le Theatre, quand arriverent ceulx qui apportèrent les nouvelles de la desfaitte de Leuctres : mais les ephores combien que le bruit courust incontinent par toute la ville que tout estoit ruiné pour eulx, & qu'ilz avoyent perdu toute leur principaulté en la Grece, ne voulurent pas neantmoins pour cela, que la danse sortist hors du theatre, ny que la ville changeast en aucune chose la forme de la feste, ains envoyerent par les maisons aux parents les noms de ceulx qui estoient morts en la bataille, & eulx demourerent au theatre à faire continuer & parachever les jeux & l'esbatement des danfes, qui s'efforcerent à l'envy à qui gaigneroit le prix. Le lendemain au matin quand tout le monde sceut certainement ceulx qui estoient morts & ceulx qui estoient eschappez, les peres, parents, amis & alliez de ceulx qui estoient morts, se trouverent sur la place avec bons visages & contenance d'hommes joyeux, & ayans bon courage s'entr'embrassans les uns les autres : & au contraire, les parents de ceulx qui s'estoyent sauvez demourerent en leurs maisons avec leurs femmes, comme gens qui sont en dueil : & si d'aventure quelqu'un d'eulx estoit contraint de

fortir dehors pour quelque affaire neccessaire , on luy voyoit une contenance si triste & si affligée , qu'il n'osoit pas parler ferme , haulser la teste , ny lever les yeux : & voyoit on encore plus ceste difference entre les femmes : car celles qui attendoyent leurs enfans retournans de celle bataille , estoient mornes & tristes , sans mot dire : & au contraire , les meres de ceulx que lon disoit y estre morts , s'en alloient par les eglises en rendre graces aux dieux , s'entrevisitoient l'une l'autre joyeusement & affectueusement : toutefois quand la commune veit que leurs alliez commenceoyent à les laisser & se departir d'avec eulx , & que lon attendoit de jour à autre que Epaminondas encouragé par sa victoire se jettast dedans le Peloponese , alors leur vint il à la plus part un remors de conscience touchant les oracles des dieux , qui leur defendoyent d'elire un roy boitteux comme estoit Agefilaus , & leur prenoit un grand descouragement & une grande frayeur , à cause qu'ilz estimoyent leur ville estre rumbée en ce malheur , pour autant qu'ilz avoyent debouté de la royaulté un qui estoit entier , pour y mettre un defectueux , dequoy les dieux les avoyent advertiz qu'ilz se gardassent sur toutes choses.

XLIX. Mais toutefois son autorité estoit si grande pour sa vertu , & sa reputation si bonne ,

que non seulement ilz se seruoient de luy à la guerre, comme de leur roy & de leur souverain capitaine, mais aussi uſoyent de son conseil & de son advis, quand il estoit question de trouver expedient en quelques difficultez civiles; comme ilz feirent lors qu'ilz estoient en doubte, s'ilz devoient imposer à ceulx qui s'en estoient fouiz de la bataille, que lon appelle à Sparte Tresantas, c'est à dire, ceulx qui ont eu peur, les notes d'infamie ausquelles les loix les condamnent, pource qu'ilz estoient en grand nombre, & tous des plus nobles & plus puissantes maisons de la ville, de peur qu'ilz ne leur suscitassent quelque nouuelleté: car oultre ce qu'ilz sont declarez inhabiles de jamais tenir office ny magistrat quelconque en la chose publique, c'est deshonneur que leur donner femme en mariage ny en prendre d'eulx, & qui les rencontre en son chemin les peult frapper s'il veult, & fault que eulx l'endurent baissans la teste sans mot dire, & sont contrains d'aller vestus salement & pauvrement de meschantes robes rappieccées de drap de couleur, & si sont tenus de faire razer une partie de leur barbe, & l'autre non: si leur sembloit chose dangereuse d'en voir plusieurs par la ville notez de ceste infamie, mesmement lors qu'ilz avoyent besoing de grand nombre de gens de guerre: au moyen de quoy

ilz s'en rapporterent du tout à Agefilaus pour y pourvoir. Et luy, sans oster ny adjouster ou changer rien aux loix, en publique assemblée de tout le peuple Lacedæmonien, dit que pour ce jour là il falloit laisser dormir les loix, pourveu que de lors en avant elles reprissent leur autorité.

L. Par ce moyen il mainteint les loix sans y rien corriger, & si sauva l'honneur à ces pauvres gens : mais pour remettre le cueur à leur jeunesse, & leur oster l'estonnement qui les avoit faisis, il entra en armes dedans l'Arcadie, là où il se garda de donner bataille, & seulement prit une petite ville¹ sur les Mantiniens, & courut le plat país : ce qui resjouit un peu la ville de Sparte, & la remeit en quelque esperance, comme n'ayant occasion de se desespérer de tout poinct : mais tantost après arriva Epaminondas dedans le país de la Laconie, avec quarante mille hommes de pied armez, sans une autre multitude infinie de peuple nud ou armé à la legere, qui suyvoit son camp pour desrober seulement, de maniere qu'il y avoit en tout jusques au nombre de soixante & dix mille combatans, qui entrèrent dedans la Laconie en armes quant & luy. Il y avoit bien environ six

¹ Appellée Eutée, suivant Xénophon Hellen. L. VI, p. 353.

cents ans, que les Doriens estoient entrez en celle province de la Laconie , & s'y estoient habitez , & en tout cest espace de temps jamais on n'avoit veu les ennemis dedans le païs jusques à ce jour là : car au paravant onques ennemy n'y estoit ozé entrer en armes : mais lors ilz le faccagerent & bruslerent , tout entier qu'il estoit, jusques à la riviere d'Eurotas , & jusques tout contre la ville de Sparte , sans que personne en fortist pour leur donner empeschement : pour ce que Agésilas , ainsi comme escrit Theopompus , ne vouloit pas permettre que les Lacedæmoniens se presentassent contre un si impetueux torrent & si violent orage de guerre : ains ayant garny le milieu de la ville , & les principales advenues d'icelle, de gens de defense , supportoit patiemment les fieres braveries & menaces des Thebains, qui l'appelloyent nommément au combat , & luy disoyent qu'il fortist dehors en campagne pour defendre son païs, luy qui seul estoit cause de tous ces maux , ayant allumé & enflammé ceste guerre. Si cela perçoit le cueur à Agésilas , non moins de regret luy donnoyent les troubles qui s'emouvoyent dedans la ville , & les cris , allées & venues des vieilles gens , qui perdoyent patience de voir ce qu'ilz veoyent devant leurs yeux , & des femmes mesmement qui ne se pouvoyent tenir en un lieu , ains cou-

royent çà & là comme personnes forfennées d'ouïr le bruit que faisoient les ennemis , & de voir le feu qu'ilz mettoient par tout en la campagne : car ce luy estoit une grande destresse de douleur quand il venoit à penser en luymesme, qu'estant venu à la royaulté lors que sa ville estoit la plus puissante & plus florissante, qu'elle eust jamais esté , il veoit de son regne sa dignité ravallée , & sa gloire retrenchée, veu que luymesmes'estoit souvent vanté que jamais femme Laconiene n'avoit veu fumée du camp d'aucun ennemy : comme lon dit aussi qu'Antalcidas respondit un jour à quelque Athenien, qui contestoit à l'encontre de luy sur la vaillance de l'un & de l'autre peuple, en alleguant pour ses raisons, que les Atheniens avoyent souvent chassé les Lacedæmoniens de la riviere de Cephissus. « Il est vray, dit le Laconien, mais nous ne vous » chassâmes jamais de celle d'Eurotas ». Semblablement aussi respondit un autre Spartiate des moins renommez, à un Argien qui luy reprochoit : « Il y a plusieurs de voz gens ensepve- » liz dedans le país de l'Argolide : Et il n'y en » a point des vostres enterrez en la Laconie. Lon dit que Antalcidas estant pour lors ephore envoya secretement ses enfans en l'isle de Cythere, pour doubte que la ville de Sparte ne fust prise.

LI. Mais Agefilaus voyant que les ennemis s'efforceoyent de passer la riviere , & penetrer au dedans de la ville , entendoit à defendre seulement le milieu qui estoit le plus hault , au devant duquel il tenoit ses gens en bataille. Or estoit lors d'aventure la riviere d'Eurotas plus grosse qu'elle n'avoit accoustumé d'estre , pource qu'il estoit tumbé force neges , & faisoit plus de mal à passer aux Thebains pour sa froideur , qu'elle ne faisoit pour sa roideur. Si y eut quelques uns qui monstrerent à Agefilaus Epaminondas marchant le premier devant toute sa bataille : il le regarda long temps , le suyvant toujours de l'œil sans dire autre chose que ce mot seulement , « O l'homme de grande entreprise que voilà » ! Epaminondas donques ayant fait tout ce qui luy estoit possible pour donner bataille aux Lacedæmoniens dedans la ville mesme de Sparte , & y dresser un trophée , ne peut onques y attirer Agefilaus , ny le faire sortir de son fort : parquoy il fut à la fin contraint de s'en partir , & s'en alla achever de piller & gaster tout le plat país.

LII. Mais dedans la ville , il y eut environ deux cents mutins , hommes qui de long temps avoyent mauvaise volonté , lesquelz saisirent un quartier de la ville , où est le temple de Diane , lieu fort d'affiette & bien malaisé à forcer , qui

s'appelle Ifforium ¹. Les Lacedæmoniens voulurent incontinent courir en fureur contre eux : mais Agésilas craignant que cela ne fust cause de quelque plus grande nouvellété, commanda aux autres qu'ilz ne bougeassent, & luy seul en robe simple sans armes s'y en alla, criant à ceulx qui le tenoyent, « Vous avez autrement entendu » que je n'ay commandé : car ce n'est pas icy que » j'avois ordonné que vous vous assemblissiez, ny » tous en un lieu : mais j'avois commandé que les » uns allassent là, & les autres là », en leur montrant divers quartiers de la ville. Les séditieux entendans ces paroles, en furent bien aises, pource qu'ilz cuiderent que leur mauuaise intention ne fust point descouverte : & sortans de là se départirent aux eudroits qu'il leur avoit monstrez : & adonc Agésilas en faisant venir d'autres, se faisit du fort de Ifforium, & fit prendre environ quinze de ces seditieux conjurez, qu'il fit tous mourir la nuit ensuyvant.

LIII. Mais il fut lors descouvert une autre conjuration beaucoup plus grande de Spartiates mesmes, qui s'estoyent assemblez secretement en une maison pour y susciter quelque nouveau remuement, auquelz il estoit bien mal aisé de faire le procès, en un si grand trouble, & bien dangereux de les negliger, attendu leur conf-

¹ Voyez les Observations.

piration. Agésilas en ayant communiqué en conseil avec les ephores , les fait aussi tous mourir sans autre forme de procès , là où jamais au paravant homme Spartiate n'avoit esté executé à mort , que premier il n'eust esté condamné judiciairement. Et comme tous les jours il y eust plusieurs de leurs voisins , & des Ilotes mesmes , qu'ilz avoyent enrollez en leurs bandes pour gens de guerre , qui se desfroboyent , & s'alloyent rendre aux ennemis , ce qui descourageoit fort le demourant , il advertit ses serviteurs , que tous les jours aux matins ilz allassent visiter les paillasses , ès quelles ilz auroyent couché , & qu'ilz prissent les armes de ceux qui s'en seroyent fouiz , & les cachassent , à fin que lon ne cogneust point le nombre de ceulx qui se seroyent desfrobez.

LIV. Et quant au partement des Thebains , les uns disent qu'ilz se partirent de la Laconie pour l'hyver qui survint , à cause duquel les Arcadiens commenceoyent desja à se desbander & à se departir en desordre : les autres disent qu'ilz y demourerent trois mois tous entiers , durant lesquelz ilz destruisirent la plus grande partie du país : mais Theopompus escrit que les capitaines des Thebains ayans desja conclud de se retirer , il vint devers eulx un Spartiate nommé Phrixus , envoyé de la part d'Agésilas ,

qui leur porta dix talents à fin qu'ilz s'en allassent : tellement que pour faire ce qu'ilz avoyent de long temps arresté de faire d'eulx mesmes, encore eurent ilz de l'argent de leurs ennemis pour faire leurs despens par le chemin. Mais je ne puis entendre comment il soit possible que tous les autres historiens n'ayent rien sceu de cela, & que Theopompus seul en ait eu la cognoissance.

LV. Bien est il certain & confessé de tous, que Agefilaus seul fut cause de sauver la ville de Sparte, pource que laissant à part son ambition & son opiniastrété, qui estoient passions nées avec luy, il entendit seulement à prouvoir aux affaires seurement : toutefois jamais depuis ceste lourde cheute, il ne la peut relever ny remettre sus en la reputation, ny en la puissance, où elle avoit au paravant esté. Car tout ainfi comme un corps sain, mais qui de tout temps a gardé une diete & regime de vivre trop exquis, la moindre faulte & le moindre desordre qu'il fait puis après, gaste tout : aussi estant le gouvernement de la chose publique de Sparte très bien estably & bien composé à la vertu, pour faire vivre ses citoyens en paix & en concorde les uns avec les autres, quand ilz y voulurent adjouster des dominations & seigneuries violentes, dont Lycurgus estimoit qu'une cité pour

heureusement & vertueusement vivre, n'a point de besoing, ilz allerent incontinent en decendance.

LVI. Or estoit desja Agefilaus si vieil, que pour sa vieillesse il n'alloit plus à la guerre : mais son filz Archidamus, ayant le secours que Dionysius le tyran de Syracuse leur envoya, gagna une bataille contre les Arcadiens, que lon appella la bataille sans larmes : car il n'y mourut pas un seul de ses gens, & y fut tué grand nombre des ennemis. Ceste victoire monstra bien clairement la foiblesse & diminution grande de la ville : car paravant ce leur estoit chose si ordinaire & si coustumiere, que de vaincre leurs ennemis en bataille, qu'ilz n'en sacrifioyent aux dieux dedans la ville, pour leur rendre graces de la victoire, autre chose qu'un coq : & ceulx qui avoyent combatu, ne s'en vantoyent point, ny ceulx qui en oyoyent compter les nouvelles, ne s'en esjouissoyent point trop : car quand ilz gaignerent à Mantinée celle grande bataille, que Thucydides¹ a descrite, les ephores envoyerent à celui qui en avoit apporté la nouvelle, pour tout present, une

¹ L. V, p. 361. Cette bataille contre les Athéniens, les Argiens & les Mantiniens, fut donnée la troisieme année de la quatre-vingt-dixieme olympiade, l'an de Rome 336, sous le commandement d'Agis.

piece de chair de leur fallé, & non autre chose : mais lors quand on apporta la nouvelle de ceste victoire, & que lon entendit qu'Archidamus s'en retournoit victorieux, il n'y eut personne qui se peust contenir en la ville, ains son pere mesme le premier luy alla au devant plorant de joye, & après luy les autres officiers, & toute la multitude des vieillards & des femmes descendit jusques sur le bord de la riviere, tendans les mains au ciel, & remerciaient les dieux, comme si leur ville eust adonc vengé sa honte & recouvré son honneur, & qu'elle recommenceast à voir de rechef le jour clair & serain, comme devant. Car jusques là lon dit que les maris mesmes n'osoyent pas seulement regarder franchement au visage leurs femmes, tant ilz avoyent de honte des pertes qu'ilz avoyent receuës.

LVII. Mais estant la ville de Messene repeuplée & rebastie par Epaminondas, qui y rappelloit les anciens naturelz habitans de tous costez, ilz n'oserent se presenter à combattre pour l'empescher, combien qu'en leurs cueurs il en fussent grièvement indignez, & en sceussent fort grand mal à Agésilas pource que de son regne ilz avoyent perdu le territoire d'icelle, qui n'estoit pas de moindre estendue que toute la Laconie, & qui en bonté combattoit avec les meilleurs endroits de toute la Grece, dont ilz avoyent

jouy paisiblement par tant d'années , & si long temps durant. Ce fut la cause pour laquelle Agefilaus ne voulut point accepter la paix que les Thebains luy envoyerent offrir , ne voulant pas quitter de parole , ce que les ennemis leur tenoyent de faict : mais en s'opiniastrant à le vouloir encore combattre & quereller , non seulement il ne le recouvra pas , ains s'en fallut bien peu qu'il ne perdist davantage la ville mesme de Sparte par une ruz de guerre , dont il fut affiné : pource que s'estans de nouveau les Mantiniens départis de l'alliance des Thebains , & ayans envoyé querir les Lacedæmoniens , Epaminondas adverty comme Agefilaus estoit party avec toute sa puissance pour venir au secours des Mantiniens , se partit une nuit de Tegée sans que ceulx de Mantinée en sceussent rien , & s'en alla droit à Sparte , de sorte qu'il s'en fallut bien peu qu'en allant par un autre chemin que Agefilaus ne venoit , il ne surprist au desproueu la ville de Sparte toute vuide de gens de defense : mais un Thespien nommé Euthynus , ainsi que dit Callisthenes , ou comme escrit Xenophon , un Candiot , en apporta la nouvelle à Agefilaus , qui soudainement envoya devant un homme de cheval pour en advertir ceulx de la ville , & luy mesme se mettant en chemin pour y retourner , ne tarda gueres à y arriver : & tantost

après y atriverent aussi les Thebains , qui passans la riviere d'Eurôtas donnerent l'assault à la ville.

LVIII. Et là Agesilaus-voyant qu'il n'estoit plus temps de se tenir trop sur ses gardes , & de ne vouloit rien aventurer , la défendit vigoureusement plus que son aage ne portoit , comme celuy qui pensoit que l'heure estoit venue qu'il falloit s'exposer la teste baissée à tout peril , & combattre à la desesperée. Ainsi par desesperoir & par hardiesse , à quoy jamais au paravant il ne s'estoit voulu fier , n'y n'en avoit jamais voulu user , il repoulsa lors arriere le danger , & sauva la ville de Sparte des mains d'Epaminondas ; dont il dressa un trophée pour avoir ainsi repoulsé les ennemis , faisant voir aux femmes & aux petits enfans les hommes Lacedæmoniens , qui payoyent à leur país un beau & honorable loyer de leur naissance & nourriture : mesmement Archidamus qui y feir entre autres merveilles de combattre , tant pour la gentillesse de son courage , que pour la disposition de sa personne ; courant çà & là par les rues & ruelles de la ville , avec peu de suite , aux endroits où il y avoit plus d'affaire , & en repoulsant les ennemis.

LIX. Lon dit aussi qu'il y eut lors un Isadas filz de Phœbidas ; qui feir des prouesses estranges & admirables à voir , non seulement à ses

citoyens , mais aussi aux ennemis : car il estoit fort beau de visage & de taille , & se trouvoit justement lors en la plus agreable fleur & en la plus belle saison de son aage , lors que l'homme passe de l'enfance en la jeunesse , & estant nud non seulement d'armes defensives , mais aussi de tous vestemens , & ayant tout le corps oinct d'huile , comme pour lutter , tenant en l'une de ses mains une parthisane , & en l'autre une espee , il sortit hors de sa maison en tel estat , & s'alla jetter en la presse de ceux qui combatoyent , frappant & abbatant tous ceux des ennemis qu'il trouvoit devant luy , & si n'y fut jamais blecé , soit ou pource que dieu le voulust preserver à cause de son excellente vertu , ou que les ennemis eussent opinion qu'il y eust en ce faict là quelque chose plus que d'homme. Les ephores depuis luy donnerent une couronne pour honorer sa prouesse , mais ilz le condamnerent quant & quant en une amende ¹ de mille drachmes d'argent , pource qu'il avoit esté si temeraire que de se hazarder au peril de la bataille sans armes defensives.

LX. Peu de jours après ilz eurent une autre bataille devant la ville de Mantinée , là où Epaminondas ayant desja rompu les premiers rens des Lacedæmoniens , & pressant encore

¹ Cent escus, Amyot, 775 livres de notre monnoie.

vivement les autres , en donnant courage aux siens de les poursuyvre asprement , il y eut un Laconien nommé Anticrates , qui l'attendit de pied coy , & luy donna un coup de javeline , comme escrit Dioscorides : toutefois les Lacedæmoniens jusques aujourdhuy appellent les descendans de cestuy Anticrates Machæionas , qui vault autant à dire comme , Spadassins , comme s'il l'eust frappé d'un coup d'espée : car les Lacedæmoniens l'aimèrent & l'estimerent tant , à cause de ce coup là , pour la grande crainte qu'ilz avoyent eüe d'Epaminondas vivant , qu'ilz ordonnerent de grands honneurs & de grands presens à celuy qui l'avoit tué , & à ses descendans affranchissement de toutes charges & contributions publiques , duquel affranchissement jouïssoit encore de nostre temps un Callicrates qui estoit descendu de cestuy Anticrates.

LXI. Après ceste bataille & la mort d'Epaminondas , ayans les Grecs fait paix universelle entre eulx , Agésilas voulut encore debouter & exclurre les Messeniens de jurer le traité de celle paix , disant qu'il ne leur appartenoit point de jurer pour un chef , attendu qu'ilz n'avoient point de ville , & pource que tous les autres Grecs nonobstant cela les receurent au nombre des contractans , & prirent leur serment , les Lacedæmoniens se departirent de ce traité de

paix generale, & ne demoura que eulx seulz; qui feissent la guerre en esperance de recouvrer le pais & territoire de Messene, le tout à l'instigation de Agesilaus, qui fut adonc estimé par les Grecs homme violent, cruel & insatiable de guerres, d'aller ainsi minant par dessoubz, pour faire tumber par toute maniere le traité de paix universelle. Et d'autre costé estant contrainct de fascher ses citoyens au dedans de sa ville à faulte d'argent du public, en empruntant d'eulx, & les contraignant de contribuer, il se meit en mauvaise opinion de tout le monde, là où il valoit mieulx imposer fin à tous ces malheurs là, puis que le temps le portoit ainsi, non pas après avoir perdu un si grand empire de tant de citez & de villes, & avoir esté dessaisy de la principauté de toute la Grece, tant par mer que par terre, se tourmenter encore pour recouvrer le revenu des heritages & possessions du territoire Messenien.

LXII. Mais encore perdit il plus de sa reputation, quand il se donna à un capitaine Egyptien nommé Tachos, pource que lon estima que c'estoit chose indigne de luy, qu'un tel personnage, qui estoit réputé le plus grand de toute la Grece, & qui avoit remply toute la terre de la renommée de son nom, allast loer sa personne pour de l'argent, & la gloire

de son nom, à un Barbare traistre & rebelle à son maistre, pour faire à son service office de capitaine mercenaire : car estant aagé de plus de quatre vingts ans, & ayant le corps tout détaillé de bleceures, quand il eust accepté ceste belle & honorable charge pour le recouvrement de la liberté des Grecs, encore n'eust point esté son ambition du tout irreprehensible, pource que les choses qui sont de soy belles, ont leur temps & leur faison, ou pour mieulx dire, les bonnes & belles ne different d'avec les laides & mauvaises, sinon en tant qu'elles consistent en une certaine moderation & mediocrité. Toutefois Agesilaus ne se soucia point de tout cela; & n'estima point qu'il y eust indignité quelconque en service qui se fait au bien de la chose publique, ains plus tost se persuada, que c'estoit chose indigne de luy, de vivre oisif sans rien faire en une ville, attendant que la mort le vinst saisir : pourtant assembla il en la Grece gens de guerre de l'argent que Tachos luy envoya, avec lesquelz il s'embarqua, ayant pour ses conseillers & ses collateraux trente Spartiates, comme il avoit eu à son premier voyage.

LXIII. Arrivé qu'il fut en Ægypte, incontinent les principaux gouverneurs & capitaines du roy Tachos descendirent vers la marine pour

le recueillir & luy faire honneur : & non ceulx là seulement , mais aussi plusieurs autres Ægyptiens de tous estats & de toutes sortes , qui l'attendoient en grande devotion , pour la grande renommée du nom d'Agésilas , y accoururent de tous costez pour voir quel homme c'estoit : mais quand ilz n'y veirent magnificence quelconque de suite ny d'equippage , ains seulement un vieillard couché sur l'herbe le long de la marine , petit de personne , simple en sa contenance & de nulle monstre , vestu grossièrement d'une meschaute robbe toute usée , il leur prit adonc envie de rire & de se mocquer , disans entre eulx que c'estoit veritablement ce qu'il y avoit en la fable , Que une montagne fut quelquefois en travail d'enfant , & puis qu'en fin elle s'accoucha d'une souris. Encore le trouverent ilz plus estrange quand on luy apporta des presens pour sa bien venue : car il prit bien des farines , des veaux & des oisons , mais des confitures , pastisseries , senteurs & parfums , il les refusa : & comme ceulx qui les avoyent apportez le pressassent d'en prendre , il leur dit qu'ils les portassent aux Ilotes ses esclaves. Theophrastus escrit qu'il prit alors plaisir à l'herbe du papier , & qu'il trouva beaux les chappelllets qui s'en font pour la netteté & polisseure d'icelle , & qu'il en emporta quand il s'en alla.

LXIV. Mais pour lors ayant parlé à Tachos, qui estoit après à mettre sus son armée, & à dresser son voyage, il ne fut pas fait capitaine general, comme il l'avoit esperé, ains fut fait seulement coulonnael des estrangiers, Chabrias general de l'armée de mer, & le chef du total par dessus estoit Tachos en personne : cela premierement despleur fort à Agefilaus : car il estoit contrainct, voulust ou non, de supporter la vaine gloire & folle arrogance de cest *Ægyptien* : ce qui luy grevoit beaucoup, & falut qu'il allast par mer quant & luy contre les *Phœniciens*, ployant soubz le joug, & endurant malgré luy contre sa dignité & contre sa nature, jusques à ce que l'occasion fust venue de s'en ressentir. Car un nepveu de ce Tachos nommé *Nectanebos*, ayant charge d'une partie de l'armée, se rebella contre luy, & ayant esté eleu roy par les *Ægyptiens* envoya devers Agefilaus le prier de le venir secourir : aussi envoya il devers Chabrias le solliciter de prendre party avec luy, leur promettant à l'un & à l'autre de grands presens : dequoy Tachos s'estant apperceu, se meit à les supplier tous deux de ne l'abandonner point : ce que feit Chabrias, qui reconfortant Agefilaus, & luy faisant plusieurs remonstrances, tascha de le conrenir en l'amitié de Tachos. A quoy Agefilaus luy respondit, « Quant à toy, Chabrias,

» qui es icy venu de ton propre mouvement ,
» tu puis bien faire tout ce que bon te semble ,
» mais c'est autre chose de moy : car mon païs
» m'a cy envoyé pour capitaine au service des
» Ægyptiens , pourtant ne me seroit il pas honeste
» que je feisse la guerre à ceulx que lon m'a
» envoyé pour servir & secourir , si n'estoit que
» ceulx mesmes qui m'y ont onvoyé , me com-
» mandassent maintenant le contraire ». Ceste
responſe faite , il despescha quelques uns de
ses gens à Sparte pour y aller accuſer Tachos ,
& louer Neſtanebos : & eulx y envoyerent auſſi
chacun de ſon coſté pour prier le conſeil de
Lacedæmone l'un comme eſtant leur amy &
allié de tout temps , & l'autre promettant leur
eſtre à l'advenir de tant plus loyal & plus affec-
tionné amy. Les Lacedæmoniens ces prieres des
deux ouyes , reſpondirent en public , qu'Ageſilaus
auroit ſoing de prouvoir à cela , & en ſecret luy
eſcrivirent qu'il feiſt ce qu'il verroit eſtre le plus
expedient pour la choſe publique de Sparte. Ainſi
Ageſilaus prenant avec luy les adventuriers qu'il
avoit amenez de la Grece , ſe retira devers Nec-
tanebos , ſe couvrant de ceſte couverture , que
c'eſtoit pour le bien de ſon païs , pour deſguiſer
une mauvaiſe & meſchante choſe : car qui luy
oſteroit ce maſque de l'utilité publique , on
trouveroit que le plus juſte nom qu'on luy ſçau-

roit bailler , feroit trahifon : mais les Lacedæmoniens mettans le premier poinct d'honneur en ce qui eft utile à leur païs ne cognoiſſoyent autre juſtice , que ce qu'ilz penſoyent devoir ſervir à l'accroiffement & à l'augmentation de Sparte.

LXV. Ainſi Tachos ſe voyant abandonné par ces mercenaires eſtrangers , ſ'en fouit : mais d'un autre coſté il ſe leva auſſi en la ville de Mendes un autre roy à l'encontre de ce Nectanebos , lequel ayant mis enſemble juſques au nombre de cent mille combatans , venoit pour trouver & combattre Nectanebos. Et Nectanebos cuidant donner bon courage à Ageſilaus , luy alloit diſant , que les ennemis eſtoient bien en grand nombre , mais que c'eſtoient hommes ramassez de toutes pieces , gens de meſtier la plus part , dont il ne falloir point faire de compte , pource qu'ilz ne ſçavoyent que c'eſtoit de la guerre : & Ageſilaus luy reſpondit : « Mais au » contraire , je ne crains pas leur multitude , » ains leur ignorance & faulte d'experiance , » comme celle qui eſt plus malaiſée à decevoir : » car les ruzes de guerre valent & ſervent à » l'encontre de ceulx qui ſe voulans defendre , » & ſe tenans ſur leurs gardes , ſe doubtent & » deſſient , & par ce moyen attendent une choſe » plus toſt que une autre : la où celui qui ne

» se doubte de rien , & qui n'attend point une
» chose plus tost que l'autre , ne donne aucune
» prise à celuy qui tasche à l'abuser , non plus
» que celuy qui ne se remue point à la lûcte ,
» ne donne point de pente ny de moyen de
» l'esbranler à son adversaire qui lûcte contre
» luy ». Depuis le Mendefien mesme envoya
devers Agefilaus pour tascher à le pratiquer,
dequoy Nectanebos eut crainte & deffiance : au
moyen dequoy comme Agefilaus luy conseilla
de descendre à la bataille le plus tost qu'il pour-
roit , & ne tirer point ceste guerre en longueur
contre gens qui ne sçavoyent que c'estoit de
combatre, mais qui pour leur grande multitude
le pouvoient bien environner & l'enfermer de
trenchées , & le prevenir en plusieurs choses ,
il en entra encores en plus grand souspeçon &
plus grande deffiance de luy , tellement qu'à la
fin il se retira dedans une grande ville bien close
de bonnes murailles , & qui estoit de fort grand
pourpris : dont Agefilaus fut bien malcontent,
& luy despleut fort de voir que lon se deffiait
ainsi de sa foy : mais neantmoins ayant honte de
se tourner de rechef vers un autre , ou de s'en
retourner en fin sans rien faire , il le suyvit &
entra quant & luy dedans celle forteresse , là
où les ennemis le poursuyvirent , & arrivez
qu'ilz furent devant la place , commencerent à

trencher tout à l'entour pour le renfermer : à raison dequoy l'Ægyptien Nectanebos craignant d'un autre costé d'estre long temps assiégé, vouloit venir à la bataille, & avoit les aventuriers Grecs de son advis, qui ne demandoient autre chose, mesmement pource qu'il y avoit bien peu de bled en la place : & au contraire Agesilaus l'empeschant, & ne s'y voulant pas accorder, fut encore en plus mauvaise estime que paravant à l'endroit des Ægyptiens, jusques à dire qu'il estoit traistre à leur roy : mais il commençoit à endurer plus patiemment les injurieuses calumnies, dont on le chargeoit, attendant le temps à propos pour executer une ruze qu'il avoit en son entendement, laquelle estoit telle : Les ennemis faisoient une trenchée grande & profonde à l'entour de la ville pour de tout point l'enfermer : parquoy quand les deux bouts de la trenchée furent assez près l'un de l'autre, & qu'il s'en falut bien peu qu'ilz ne se vinsent à rencontrer, attendant que le soir de ce jour là fust venu, il commanda aux Grecs qu'ilz s'armassent & se tinssent tous prests, puis s'adressa à l'Ægyptien & luy dit : « Voicy le » point de l'occasion propre pour te sauver, » laquelle occasion je ne t'ay point voulu dire, » jusques à ce quelle fust venuë, de peur de la » perdre. Parquoy, maintenant que les ennemis

» eulx meſmes avec leurs propres mains nous
 » ont procuré le moyen de nous retirer à ſau-
 » veté, en faiſant ceſte trenchée, de laquelle
 » ce qui eſt deſja finy les empeſche de ſe pouvoir
 » ſervir de leur multitude, & ce qui eſt à faire
 » nous donne commodité de les pouvoir com-
 » battre avec nombre égal & meſure pareille ;
 » delibere toy de te monſtrer à ce coup homme
 » de cueur, & nous ſuyvant à la trace, ſauve
 » toy de viſteſſe toy & tes gens : car ceux des
 » ennemis que nous rencontrerons de front,
 » ne nous ſouſtiendront jamais, & les autres
 » à cauſe de la trenchée qui nous couvrira par
 » les coſtez, ne nous pourront porter dommage».

Ces paroles ouyes Neſtanebos ſ'eſmerveilla gran-
 dement de ſon bon ſens, & ſe mettant au milieu
 des Grecs alla donner dedans ſes ennemis, leſ-
 quelz en peu d'heure furent facilement mis en
 rouverte, au moins ceux qui attendirent, & qui
 oferent faire teſte.

LXVI. Depuis qu'Ageſilaus eut gagné ce
 point, que Neſtanebos le vouluſt croire, il
 affina encore les ennemis de la meſme ruzé,
 dont il les avoit ja affinez, ne plus ne moins
 que d'un meſme tour de lucte, dont ilz ne ſe
 ſceurent pas garder : car tantôt faiſant ſemblant
 de fouir, & les attirant après luy ; & tantôt
 tournoyant çà & là, il ſe fit tant qu'à la fin tira

toute ceste grande multitude en une chaussée estroite, serrée des deux costez de grandz fossez, larges & profonds, pleins d'eau courante : puis quand ilz furent au milieu, il leur serra soudain le pas avec le front de sa bataille, qu'il egala à la largeur de la chaussée, & en ce faisant egala aussi le nombre de ses combatans à la multitude des ennemis, pource qu'ilz ne le peurent plus environner, ny par les flancs, ny par derriere : au moyen dequoy après avoir fait bien peu de resistance, ilz furent tous tournez en fuite, & en demoura grand nombre de morts sur la place, & les autres depuis qu'ilz eurent esté une fois rompuz, se desbanderent & s'escarterent fuyans çà & là : tellement que depuis les affaires de ce roy Égyptien se porterent bien, & se trouva asseuré en son estat, dont il aima de là en avant singulierement Agefilaus, & en luy faisant tout l'honneur & toutes les caresses qu'il luy estoit possible de faire, le pria de vouloir encore demourer & passer l'hyver avec luy : mais il se voulut haster de retourner au païs, pource que la guerre y estoit, sachant que sa ville avoit faulte d'argent, attendu qu'elle estoit contrainte d'entretenir à sa soude des souldards estrangers.

LXVII. Parquoy Nectanebos luy donna en fin congé fort honorablement & fort magnifiquement, en luy faisant don, oultre tous autres

honneurs & presens, de deux cents trente talents ¹ d'argent comptant, pour survenir aux frais de la guerre que soustenoit son païs : mais estant la mer tourmentée, comme en la saison d'hyver, il mourut par le chemin, ayant toutefois ja gaigné terre avec ses vaisseaux en un lieu desert de la coste de Libye, qui s'appelle le Port de Menelaus ², après avoir vescu quatre vingts & quatre ans, desquelz il en avoit esté quarante & un roy de Sparte, & durant trente d'iceulx, & plus, avoit tousjours continuellement esté estimé le plus grand & le plus puissant homme, & quasi comme capitaine general de toute la Grece, jusques à la journée de Leuctres. Au reste estant la coustume des Lacedæmoniens; qu'ilz inhumoyent les corps de leurs citoyens qui decedoyent hors du païs, au lieu mesme où ilz mouroyent, & les y laissoyent, exceptez ceulx des roys que lon rapportoit au païs, les Spartiates qui lors estoient à l'entour d'Agésilas, à faulte de miel, feirent fondre de la cire sur son corps, & le reporterent en ce poinct à Sparte. Son filz Archidamus luy succeda en la royauté,

¹ Cent trente huit mille escus. *Amyot.* 1,073,812 livres de notre monnoie.

² Sur la Méditerranée, au-dessus du promontoire d'Ardane, dans la partie de l'Afrique appelée Marmarique, entre l'Egypte à l'orient, & la Cyrénaïque à l'occident.

laquelle

laquelle demoura par succession continuelle aux descendans, de luy, jusques à Agis que Leonidas feit mourir, à cause qu'il taschoit à remettre sus l'ancienne discipline & forme de vivre de Lacedæmone, estant le cinquieme roy de père en filz après Agefilaus.

S O M M A I R E

DE LA VIE DE POMPÉE.

*H*AINE des Romains contre Strabon ; leur amour pour Pompée son fils. II. Causes qui le faisoient aimer. III. Extrême attachement de la courtisane Flora pour Pompée. IV. Malgré sa réserve , il est accusé de trop de penchant pour les femmes. V. Sa frugalité. VI. Comment il sauve la vie à son pere , & appaise la sédition de son armée. VII. Il est cité en justice. VIII. Origine de l'usage de crier Talassio dans les mariages des Romains. IX. Cinna est tué. X. Pompée assemble des troupes pour aller se joindre à Sylla. XI. Plusieurs avantages remportés par Pompée sur les divers chefs du parti opposé. XII. Honneurs que lui rend Sylla. XIII. Pompée passe dans la Gaule pour aider Métellus. XIV. Pompée répudie sa femme Antistia pour épouser Emylia. XV. Il marche contre les chefs du parti opposé en Sicile. XVI. Sa conduite à l'égard de Carbon & de Quintus Valerius. XVII. Il pardonne à la ville d'Himère en faveur d'Athènes. XVIII. Il passe en Afrique. XIX. Remporte la victoire contre Domitius. XX. Soumet toute l'Afrique en quarante jours. XXI. Sylla le rappelle. XXII. Il lui donne le surnom de Grand.

XXIII. Il obtient l'honneur du triomphe malgré l'opposition de Sylla. XXIV. Il chasse Lépide de l'Italie. XXV. Il va en Espagne pour faire la guerre à Sertorius. XXVI. Changement que l'arrivée de Pompée apporte aux affaires de Sertorius. XXVII. Bataille du Sucron. XXVIII. Pompée écrit au sénat pour demander l'argent nécessaire à la solde de ses troupes. XXIX. Mort de Sertorius. La guerre finit par la prise & la mort de Perpenna. XXX. Pompée taille en pièces le reste des esclaves révoltés. XXXI. Il est nommé consul avec Crassus. XXXII. Il rétablit l'autorité des tribuns. XXXIII. Pompée & Crassus se réconcilient. XXXIV. Conduite de Pompée & de Crassus après leur consulat. XXXV. Origine de la guerre des pirates. XXXVI. Leurs succès. XXXVII. Leur insolence. XXXVIII. Pompée est nommé pour leur faire la guerre. XXXIX. Opposition de tous les gens de bien à l'énormité du pouvoir donné par le peuple à Pompée. XL. Pompée l'emporte. XLI. Rapidité de ses succès. XLII. Il revient à Rome, & va à Athènes. XLIII. Comment il termine toute cette guerre. XLIV. Sa conduite par rapport aux corsaires retirés en Crète. XLV. Il est nommé pour faire la guerre à Mithridate. XLVI. Fausseté de Pompée en apprenant cette nouvelle. XLVII. Conduite indécente de Pompée à l'égard de Lucullus. XLVIII. Mithridate enfermé dans son

camp par Pompée , s'échappe à son insçu. XLIX. Bataille où Mithridate est vaincu. L. Tigrane met sa tête à prix. LI. Pompée fait la paix avec Tigrane. LII. Il défait les Albaniens & les Ibériens. LIII. Nouvelle victoire de Pompée sur les Albaniens. LIV. Stratonice livre à Pompée le château où étoient les trésors de Mithridate. LV. Il prend un autre château où il trouve des lettres de Mithridate. LVI. Pompée fait la conquête de la Syrie & de la Judée. LVII. Insolence d'un affranchi de Pompée nommé Démétrius. LVIII. Pompée apprend la mort de Mithridate. LIX. Présens que Pharnace lui envoie. LX. Il va à Mitylène , à Rhodes & à Athènes. LXI. Comment il détruit les bruits qui s'étoient répandus à Rome contre lui. LXII. Caton refuse la demande en mariage que Pompée lui fait de ses deux nieces pour lui-même & pour son fils. LXIII. Triomphe de Pompée. LXIV. Réflexions sur la conduite par laquelle Pompée prépare lui-même ses disgraces. LXV. Ses liaisons avec César. LXVI. Discours très séditieux de Pompée. LXVII. Violences commises par Pompée. LXVIII. Insolence de Clodius. LXIX. Pompée fait rappeler Cicéron. LXX. Il est chargé d'approvisionner Rome de bleds. LXXI. Il en amène une très grande quantité , & rétablit l'abondance. LXXII. César vient à Lucques. LXXIII. Complot entre César , Pompée & Crassus. LXXIV. Pompée.

& Crassus se font nommer consuls par force. LXXV. Ils font prolonger pour cinq ans le gouvernement de la Gaule à César. LXXVI. Mort de Julia. LXXVII. César & Pompée se divisent. LXXVIII. Pompée est nommé consul, seul. LXXIX. Il épouse Cornelia. LXXX. Il se fait continuer son gouvernement pour quatre ans. LXXXI. Il demande le consulat pour César absent. LXXXII. Folle présomption de Pompée. LXXXIII. César s'avance vers l'Italie. LXXXIV. Préparatifs de Pompée contre César. LXXXV. César passe le Rubicon. LXXXVI. Pompée est mis à la tête de la république avec un plein pouvoir. LXXXVII. Epouvante universelle. LXXXVIII. César arrive à Rome. LXXXIX. Il se rend maître de toute l'Italie. XC. Forces de terre & de mer assemblées par Pompée. XCI. Personnages distingués qui se réunissent à Pompée. XCII. Pompée refuse un accommodement proposé par César. XCIII. Avantage de Pompée sur César dont il ne profite pas. XCIV. Présomption folle que ce succès inspire à Pompée & à son parti. XCV. Pompée poursuit César. XCVI. Propos répandus contre Pompée. XCVII. Pompée met en délibération s'il donnera bataille. XCVIII. Ordre de bataille de César. XCIX. Ordre donné par Pompée. C. Réflexions sur l'entêtement ambitieux de César & de Pompée. CI. La bataille s'engage. CII. César rem-

porte la victoire. CIII. Fuite de Pompée. CIV. Péticius le reçoit sur son vaisseau. CV. Il va rejoindre Cornélie , à Lesbos. CVI. Il conseille aux Mitylénien de se soumettre à César. CVII. Il se retire en Egypte. CVIII. Ptolémée se détermine à le faire assassiner. CIX. Il envoie au devant de lui Achillas. CX. Qui l'assassine. CXI. Son affranchi Philippe brûle son corps. CXII. César venge sa mort.

Depuis l'an 648 jusqu'à l'an 706 de Rome ,
avant Jésus-Christ 48.

La Comparaison de Pompée avec Agéfilas.

P O M P E I U S.

LE peuple Romain semble avoir eu toute pareille affection envers Pompeius dès son commencement, que Promerheus en une tragedie d'Æschylus ¹ monstre avoir envers Hercules, après avoir esté delivré par luy, quand il dit :

Du filz autant m'est la personne chere,
Comme j'ay eu à contrecueur le pere.

Car jamais les Romains ne feirent demonstration de haine plus aigre, ny plus aspre, à l'encontre d'autre capitaine, qu'ilz feirent à l'encontre de Strabon pere de Pompeius : vray est que tant qu'il vescu ilz redoubterent sa puissance en armes, pour autant que c'estoit un très grand homme de guerre : mais quand il fut mort, ayant esté frappé d'un coup de tonnerre, ilz arracherent le corps de dessus le liét, ainsi comme on le portoit en terre, & luy feirent infiniz oultrages & villanies : & au contraire, jamais Romain n'eut l'amour du peuple si vehemente, ne qui commenceast de si bonne heure, qui plus florist en sa prosperité, ne qui plus constamment perseverast en son adversité, comme l'eut Pompeius.

¹ Voyez les Observations.

II. Il n'y avoit qu'une seule cause qui feist ainsi haïr son pere, c'estoit une avarice extreme & une convoitise insatiable d'avoir, mais plusieurs, au contraire, faisoient aimer le filz, temperance en sa vie, adresse aux armes, eloquence en son parler, foy en sa parole, bonne grace en son entregens, & amiable recueil à qui avoit à faire à luy, de sorte qu'il n'y avoit homme ne qui demandast plus envie que luy, ne qui feist plus volontiers plaisir quand on l'en requeroit : car il donnoit sans arrogance, & prenoit avec dignité. Davantage en ses premiers ans son visage luy aidoit beaucoup à la premiere rencontre à gagner la bonne grace de chascun, parlant, en maniere de dire, ayant sa voix : car il y avoit ne sçay quoy de douceur agreable conjoint avec une gravité humaine, & dès la fleur & vigueur de sa jeunesse, se monstra incontinent en ses meurs & en ses façons de faire, une venerable haultesse de majesté royale. Il avoit aussi les cheveux un peu relevez, le regard & mouvement des yeulx doux, qui causoyent celle ressemblance que lon disoit qu'il avoit, plus qu'elle n'apparoist, avec les images du roy Alexandre le grand : mais pource que plusieurs luy en donnoient le nom, luy mesme ne le refusoit pas, de sorte qu'il y en avoit qui en jouant l'appelloient assez notoirement Alexandre : au moyen

dequoy Philippus, homme consulaire, ne faignit point de dire publiquement en une siene haren-gue, qu'il faisoit en sa faveur, que ce n'estoit pas de merveille, si luy estant Philippus aimoit Alexandre.

III. On dit aussi que la courtisane Flora estant devenue vieille, prenoit grand plaisir à compter ordinairement de la fréquentation qu'elle avoit eue en ses jeunes ans avec Pompeius, disant qu'il estoit impossible quand elle couchoit avec luy, qu'elle s'en departit sans le mordre. Elle comptoit aussi que l'un de ses familiers qui se nommoit Geminus, devint une fois amoureux d'elle, & qu'il luy rompoit la teste à force de la prier & solliciter continuellement : elle luy respondit qu'elle n'en feroit jamais rien, pour l'affection qu'elle portoit à Pompeius. Parquoy Geminus en parla luy mesme à Pompeius : lequel voulant luy gratifier en cela, luy permet : mais onques puis ne luy toucha ny ne parla à elle, combien qu'il semblast qu'il en fust encore amoureux : & elle ne le porta pas en femme de son mestier, ains en fut longuement malade de douleur & de regret : & neantmoins on dit que ceste Flora estoit lors si renommée pour sa grace & sa beaulté, que Cecilius Metellus faisant orner & embellir le temple de Castor & de Pollux, de beaux tableaux & de belles pein-

tres, y feit mettre entre autres le portrait d'elle au naturel pour son excellente beaulté.

IV. Qui plus est Pompeius traitta durement & illiberalement, contre son naturel, la femme d'un de ses serfs affranchis nommé Demetrius, qui en son vivant avoit eu très grand credit autour de luy, & qui estoit mort riche de quatre mille talents¹; craignant sa beaulté, qui estoit singuliere & fort renommée, de peur que lon n'estimast qu'il en fust amoureux. Mais quoy qu'il fust en cela si retenu & si prevoyant de loing, ce neantmoins encore ne peut il pas eviter que ses malvueillans ne l'en taxassent & blasmassent: car on le calumnia, que pour gratifier & complaire à ses femmes, il laissoit aller & ne faisoit pas semblant de voir beaucoup de choses qui concernoyent le bien public.

V. Quant à la facilité & simplicité de son vivre ordinaire, on en recite un mot notable qu'il dit en une siene maladie, estant desgousté & ne pouvant manger: car pour le remettre en son appetit, le medecin luy ordonna qu'il mangeast d'une grive. On en chercha par tout, & n'en peut on trouver à vendre, pource que c'estoit hors de leur saison: mais il y eut quelqu'un qui dit que lon en trouveroit chez Lu-

¹ Deux millions, quatre cents mille escus. *Anyot.* 18,675,000 livres de notre monnoie.

culus, qui en faisoit nourrir tout le long de l'an : « Comment, dit il, si Lucullus n'estoit » friant, Pompeius ne vivroit-il pas? Et laissant l'ordonnance de son medecin, se fait accoustrer de ce que lon recouvroit facilement : mais quant à cela nous en parlerons cy après.

VI. Au reste, estant encore fort jeune en camp avec son pere, qui faisoit la guerre à Cinna, il avoit pour familier & compagnon, logeant en une mesme tente avec luy, un Lucius Terentius, lequel ayant esté gagné pour un prix d'argent, avoit promis à Cinna de le tuer, & d'autres conjurez avoyent aussi promis de mettre le feu dedans la tente de leur capitaine. Ceste conspiration fut descouverte à Pompeius ainsi comme il estoit à table, dont il ne s'estonna point, ains au contraire se monstra plus deliberé, & fit meilleure chere à ce Terentius, qu'il n'avoit appris de faire : mais quand il fut heure de se retirer pour dormir, il se desrobba secrettement de sa tente, & s'en alla donner ordre à la seureté de la personne de son pere, & se teint en son logis. Terentius, quand il pensa que l'heure d'exécuter son entreprise fust venue, se leva & s'en alla l'espée nue en la main au liét où souloit coucher Pompeius, & donna plusieurs coups de poincte dedans le matterats. Cela fait il se leva une grande emeute par tout le camp, pour la

haine que lon portoit au capitaine , & vouloyent les soudards à toute force s'aller rendre à l'ennemy, commenceans ja à destendre leur tentes, à serrer bagage , & à prendre leurs armes pour y aller : & quant au capitaine, craignant ce tumulte , il n'osa pas sortir de son logis : mais son filz se jetta au milieu des soudards mutinez , en les suppliant humblement les larmes aux yeux , de ne vouloir pas faire ce mauvais tour à leur capitaine : & finablement se jetta la face contre terre tout de son long à travers la porte du camp, leur disant qu'ilz passassent par dessus son corps s'ilz avoyent si grande envie de s'en aller : dequoy ilz eurent si grande honte , qu'ilz s'en retournerent en leur logis , & changeans de volonté se reconcilierent avec leur capitaine , exceptez huit cents qui s'en allerent.

VII. Mais depuis, incontinent après le decès de son pere, qui estoit surnommé Strabon , il fut comme son heritier appellé en justice au lieu de luy, que lon accusa de male versation, & de larcin des deniers publiques : mais il decouvrit & avera que c'estoit un de ses serfs affranchiz, nommé Alexander, qui en avoit soubstrait la plus grande partie, & le representa aux juges : toutefois encore le chargea lon luy mesme en son propre & privé nom, d'avoir destourné des toiles & des pents de retz à chasser, & des

livres qui avoyent esté pris en la ville d'Asculum. Ce qui estoit vray : car son pere les luy avoit donnez à la prise de celle ville , mais il les avoit perduz depuis , quand les satellites de Cinna à son retour dedans Rome , entrèrent par force en sa maison , & la pillerent. Si y eut en ce procès plusieurs plaidoyers avant la sentence definitive , ès quelz Pompeius se faisant cognoistre aux juges aigu , de bon entendement , & constant plus que ne portoit l'aage auquel il estoit , en acquit si bonne reputation , & si grande grace , que Antistius qui pour lors estoit præteur , & qui presidoit en celle cause , pour la bonne opinion qu'il en conceut de luy , l'en aima , & luy feic offrir soubz main sa fille en mariage : & luy en ayant fait porter paroles par ses amis , Pompeius l'accepta , & en furent secrettement faites les promesses entre eux.

VIII. Dequoy toutefois le peuple s'apperceut bien , pour la peine & le soing que Antistius prenoit à luy favoriser : tellement , que quand il vint à prononcer la sentence des juges , qui estoit absolutoire , tout le peuple assistant , ne plus ne moins que si c'eust esté par un commandement , se prit à crier d'une voix Talassio , Talassio , qui est le cry que lon à accoustumé de crier de toute ancieneté aux nopces à Rome : & en est la coustume procedée , ainsi que lon dit , d'une telle

origine : Lors que les principaux & les plus nobles des Romains ravirent les filles des Sabins, estans venues à Rome pour y voir l'esbattement des jeux publiques qui s'y faisoient, il y eut quelques gens de bien petite & vile qualiré, comme des bouviers ou des bergers, qui en enleverent une fort belle & grande : & de peur que d'autres de plus grand estat qu'eulx ne la leur ostassent, allerent crians par les rues ; Talassio, Talassio, comme s'ilz eussent voulu dire, c'est pour Talassius, à cause que ce Talassius estoit un jeune gentilhomme cogneu & bien voulu de tout le monde : tellement que ceulx qui ouyrent nommer son nom, s'en prirent à frapper des mains en signe de resjouissance, & à crier aussi, Talassio comme eulx, louans le choix qu'ilz avoyent fait. De là dit on qu'est venue la coutume, que lon a tousjours depuis crié ce mot à ceulx qui se marient, pour autant mesmement que le mariage de celle belle fille fut heureux à Talassius. C'est ce qui me semble plus vraysemblable de tout ce que lon compte de ce cry nuptial de Talassio.

IX. Peu de jours donques après ce jugement, Pompeius espousa Antistia, & depuis s'en estant allé au camp de Cinna, on luy meit sus à tort & le calumnia lon de quelque chose dont il eut peur, & à ceste cause se desrobba secrettement :

& pource qu'il ne comparoissoit plus, il courut incontinent un bruit parmy le camp, que Cinna l'avoit fait mourir, qui fut occasion que ceulx qui de long temps estoient faschez de luy, & qui le haïssoient, luy coururent sus. Si cuida bien se sauver de vitesse, mais il fut tantost attainct par un des particuliers capitaines qui le suyvoit l'espée traitte en la main : quoy voyant Cinna, se jetta à ses pieds, & luy tendit son anneau duquel il seelloit & cachettoit ses lettres, qui valoit beaucoup : mais le capitaine luy dit fort outrageusement, « Je ne viens point icy » pour sceller aucun contract, ains pour chastier » un meschant & cruel tyran » : & en disant cela il le tua sur la place. Cinna ayant ainsi esté tué, Carbo luy succeda, & prit les affaires en main, estant encore plus cruel tyran que le premier, & tantost après survint Sylla desiré de la plus part des Romains, pour les griefz maux qui les oppressoient en si grande extremité, qu'ilz n'estimoient pas peu de soulagement que de changer de maistre, ayans les miseres passées reduit la ville de Rome à ce poinct, que n'esperant pas de pouvoir jamais recouvrer sa liberté, elle ne cherchoit plus que la plus doulce & plus equitable servitude.

X. Or estoit lors Pompeius en celle partie de l'Italie qui se nomme la Matque d'Ancone, là où

il avoit des terres , plus toute fois pour l'amour , & la bienveillance hereditaire de pere en filz , que luy portoyent les villes du païs , que pour autre chose : & voyant que les plus nobles & les plus gens de biens des Romains abandonnoyent leurs maisons & leurs biens pour s'en fouir de tous costez , comme en un port de salut , au camp de Sylla , il ne voulut point aller devers luy en fugitif , sans rien contribuer à l'augmentation de ses forces , comme personne destituée de tout moyen qui ne cherchast qu'à se sauver , ains y voulut aller honorablement avec armée , comme celuy qui luy vouloit à luy mesme le premier faire plaisir : si commença à sonder les voluntés , & à solliciter ceulx du païs , qui luy presterent voluntiers l'oreille , & ne voulurent rien faire pour ceulx qui venoyent de la part de Carbon , entre lesquelz y en eut un nommé Vindius , qui s'avancea de dire , que Pompeius au sortir de l'eschole estoit soudain devenu capitaine , dequoy ilz furent si courroucez qu'il se ruèrent sur luy , & le tuerent en la place. Depuis cela Pompeius qui n'avoit que vingt & trois ans , sans attendre que personne luy donnast auctorité de commander , la prit de luy mesme , & feit dresser au milieu de la place d'Auximum , grande & puissante ville , un tribunal ; là où il feit commandement à deux freres , qui s'appelloyent
les

les Ventidiens, les deux premiers hommes de celle ville, qui en faveur de Carbo resistoyent à ce qu'il faisoit, qu'ilz eussent incontinent & sans delay à fortir de la ville, & commença à lever gens, establiſſant des capitaines, sergens de bendes, centeniers & autres estats, selon les ordonnances de la discipline militaire.

XI. Puis alla par toutes les autres villes de celle marche en faire autant, là où tous ceulx qui faisoient pour Carbo en tout ce quartier là, luy cedoyent & s'ostoyent de devant luy, & les autres se joignoyent volontairement à luy, de maniere qu'en bien peu de temps il eut mis trois legions ensemble toutes entieres, assemblé munition pour les nourrir, & recouvré sommiers, chariots & autres voitures pour porter le bagage : & puis cela fait se mit en chemin pour mener tout cest equippage à Sylla, non point à grandes journées comme homme qui eust crainte d'estre rencontré, & qui eust esté bien aise que lon ne l'eust point veu par le chemin, ains sejourant aux endroits où il pouvoit endormager l'ennemy en quelque chose, sollicitant les villes par où il passoit à se rebeller contre Carbo, jusques à ce que trois capitaines de la part contraire, Carinna, Cælius & Brutus, tous trois ensemble l'allerent assaillir, non pas tous trois de front, ny d'un mesme costé, ains par

trois divers endroits , l'environnans tout à l'entour avec trois armées , cuidans bien l'emporter de primfaut : toutefois Pompeius ne s'en estonna point , ains assembla toutes ses forces en un lieu , & marcha premier contre l'armée de Brutus , ayant mis au frond de sa bataille devant les gens de pied , ceulx de cheval , entre lesquels il estoit luy mesme en personne. Et comme les hommes d'armes de l'ennemy , qui estoient Gaulois , luy marchassent aussi à l'encontre , il donna le premier au plus appatent & plus puissant d'entre eulx un si grand coup de javeline , qu'il le porta par terre : ce que voyans les autres , se tournerent aussi tost en fuitte , & rompirent eulx mesmes leurs gens de pied , de sorte que tous se meirent à fouir : à l'occasion dequoy les capitaines entreterent en dissension les uns contre les autres , & se retirerent les uns d'un costé , les autres d'un autre , au mieux qu'ilz peurent. Et adonc les villes d'alenviron , pensans qu'ilz s'escartassent ainsi de peur , se rendirent toutes à la devotion de Pompeius. Depuis le consul Scipion s'estant aussi approché de luy pour le combattre , quand les deux batailles furent l'une devant l'autre , avant qu'ilz fussent près à lancer leurs javelots , ceulx de Scipion saluans ceulx de Pompeius se tournerent de son costé , & ne peut Scipion faire autre chose que s'en fouir. Fina-

blement Carbo mesme luy ayant envoyé à la cueuë plusieurs compagnies de gens de cheval près la riviere d'Arfis , il tourna visage contre eulx , & les chargea si rudement , qu'il les mena batant jusques en des lieux dont il estoit impossible que gens de cheval se peussent tirer : au moyen dequoy eulx voyans qu'ilz n'avoient moyen de se sauver , se rendirent à sa mercy eulx , leurs armes & leurs chevaux.

XII. Sylla n'avoit encore rien entendu de toutes ces desfaittes : parquoy au premier bruit qu'il en ouit , craignant qu'il ne se perdist , estant enveloppé de tant de capitaines ennemis , il se hesta de tirer celle part pour l'aller secourir : & quand Pompeius fut adverty qu'il approchoit , il commanda à ses capitaines qu'ilz feissent armer leurs gens , & qu'ilz les rangeassent en bataille , à fin que leur general les trouvast plus braves & mieulx en poinct quand il les luy presenteroit : car il esperoit bien que Sylla luy feroit grand honneur , mais il luy en feit encore plus qu'il n'en esperoit , pource que quand il l'apperceut de tout loing venant à luy , & qu'il veit son armée si bien en ordre , où il y avoit de si beaux hommes , & qui monstroyent si bons visages , & portoyent tous les testes droittes pour tant d'avantages qu'ilz venoyent de gagner sur leurs ennemis , il descendit de cheval à pied : &

comme Pompeius le saluait en l'appellant Imperator, qui est à dire, capitaine en chef, Sylla le refalua tout de mesme, contre l'attente & l'opinion de tous les assistans, qui ne s'attendoient pas qu'il fust pour communiquer l'honneur de ce nom là à un si jeune homme, mesmement qu'il n'estoit point encore receu au corps du senat, attendu qu'il combattoit contre des Mariens & des Scipions pour ce tiltre là. Au reste le traitement que Sylla luy faisoit en toute autre chose, respondoit à ses premières caresses là: car quand Pompeius arrivoit au lieu où il estoit, il se levoit au devant de luy, & se descouvroit en retirant sa robbe de dessus sa teste, ce qu'il ne faisoit pas facilement à d'autres, encore qu'il y eust beaucoup de gens de bien & de grands personnages autour de luy: toutefois ces honneurs là n'enorgueillirent point Pompeius: ains comme Sylla le voulust incontinent envoyer en la Gaule, là où estoit Metellus, qui ne sembloit point y faire exploit digne des forces qu'il avoit, Pompeius respondit qu'il ne luy sembloit point raisonnable d'oster un ancien capitaine qui avoit plus fait & plus veu que luy: mais si Metellus de luy mesme le vouloit & l'en prioit, qu'il iroit volontiers luy aider à conduire ceste guerre.

XIII. Metellus en fut bien content, & luy

escrivir qu'il y allast, & adonc donnant dedans, il y feit à par soy de merveillex exploits d'armes, & si eschauffa davantage la hardiesse & vertu militaire de Metellus, qui commenceoit desja un peu à vieillir, ne plus ne moins que lon dit que le cuyvre ja fondu venant à couler à l'entour de celuy qui est encore froid & dur, l'amollit & le dissould plus facilement & plus tost, que ne fait le feu mesme. Mais tout ainsi comme d'un vaillant champion de lucte ou d'escrime, qui a tousjours honorablement vaincu par tout où il a combatu, on ne met point en ligue de compte les victoires pueriles qu'il a gagnées contre ses compagnons lors qu'il estoit encore jeune garson, & ne les met on point par escript : aussi ay-je craint de toucher aux faicts d'armes que Pompeius feit alors, encore qu'ilz soyent en soy mesme admirables, pource qu'ilz sont cachez, obscurcis & enfoncez sous la grandeur & le nombre infiny des guerres, batailles & affaires qu'il eut depuis, de peur que si je m'amusoye beaucoup à descrire par le menu ces premiers commencemens là, je ne passasse puis après de leger les principaux actes & plus notables accidens de ce personnage, qui plus clairement mettent & exposent son naturel en evidence.

XIV. Après donques que Sylla fut venu au dessus de ses affaires en Italie, & qu'il eut esté

declaré dictateur , il recompensa ses autres lieutenans & capitaines , qui avoyent tenu son party , en les avançant aux honneurs & aux dignitez de la chose publique , & en leur octroyant libéralement tout ce qu'ilz luy demandoient : mais quant à Pompeius , l'ayant en admiration pour sa vertu , & estimant que ce luy seroit un grand appuy pour la seureté de ses affaires , il chercha de s'en allier & de le se joindre , comment que ce fust , par alliance : en quoy Merella sa femme estant bien de son advis , ilz feirent tant qu'ilz persuaderent à Pompeius de repudier sa femme Antistia , pour espouser Æmylia fille de Metella , & de son premier mary Æmylius Scaurus , laquelle estoit aussi mariée à un autre , & enceinte. Ces nopces furent violentes & tyranniques , plus convenables au temps de Sylla , que non pas à la nature ny aux meurs de Pompeius , de voir oster ceste nouvelle espousée Æmylia à son mary legitime , pour la luy mener toute grosse , & chasser Antistia honteusement & piteusement , attendu que de nagueres elle avoit perdu son pere , & pour cause de son mary qui la repudioit : car Antistius fut occis dedans le senat mesme , à cause qu'il fut estimé tenir le party de Sylla pour l'amour de son gendre Pompeius : & sa mere voyant le grand tort que lon faisoit à sa fille , se feit volontairement mourir elle

mesme , tellement que cest inconvenient fut comme un accessoire de la tragedie de ces malheureuses nopces , & aussi la mort d'Æmylia mesme , laquelle bien tost après mourut en travail d'enfant chez Pompeius.

XV. Mais sur ces entrefaites vindrent nouvelles à Rome , que Perpenna s'estoit emparé de la Sicile , & qu'il se preparoit pour faire de ceste isle un fort & une retraite à ceulx qui estoient de la part & faction contraire à Sylla : joinct que Carbo rodoit à l'entour avec quelque nombre de vaisseaux , & que Domitius estoit passé en Afrique , & plusieurs autres grands personnages bannis , qui avoyent peu se sauver des proscriptions , s'estoyent jettez de ce costé là. Si fut envoyé Pompeius contre tous ceulx là avec grosse puissance : mais il n'eut pas plus tost mis le pied en la Sicile , que Perpenna la luy ceda & quitta toute : là où il traitta humainement & remeit sus toutes les autres villes , qui paravant avoyent esté fort travaillées & fort affligées , exceptez les Mamertins seuls habitans en la ville de Messine , lesquelz voulurent decliner son tribunal & sa jurisdiction , alleguans qu'ilz en avoyent privilege exprès & ancienne ordonnance du peuple Romain , & il leur respondit en cholere : « Nous allegueriez vous meshuy les » loix , à nous qui avons les espées au costé » ?

XVI. Aussi semble il qu'il se porta un peu oultrageusement en la calamité de Carbo : car s'il estoit necessaire, comme à l'aventure il estoit, de le faire mourir, il le falloit faire incontinent qu'il l'eut entre ses mains : car en ce faisant on eust attribué toute la haine du faict à celui qui l'avoit commandé : mais il se le feit amener devant soy, & l'interroqua publiquement à la veüe de tout le monde, dont plusieurs des assistans furent très mal contents, puis commanda que l'on l'allast faire mourir. Il fut emmené, & dit on que quand il veit l'espée desguainée, dont on luy vouloit trencher la teste, il pria les executeurs qu'on luy donnast un peu de temps & de lieu pour descharger son ventre qui le pressoit. Caius Oppius l'un des familiers de Julius Cæsar escrit aussi, qu'il se porta inhumainement envers Quintus Valerius : car sçachant, dit il, qu'il estoit homme lettré & si sçavant qu'il en avoit peu de semblables, quand on le luy amena il le tira à part, & se promena quelques tours avec luy, puis après avoir enquis & appris de luy ce qu'il vouloit, il commanda à ses satellites qu'ilz l'emmenassent & le feissent mourir incontinent : mais il ne fault pas croire legerement à tout ce qu'escrit Oppius, quand il parle des amis ou ennemis de Julius Cæsar : car Pompeius estoit contrainct de faire punir les

plus notables perſonnages des ennemis de Sylla qui rumboyent entre ſes mains, quand ilz eſtoient notoirement pris : mais au reſte , tous ceulx qu'il pouvoit laiſſer ſoy cacher , il le faiſoit , & feignoit ne les point ſçavoir : & , qui plus eſt , donna encore moyen à quelques uns de ſe fauver.

XVII. Bien avoit il delibéré de chaſtier aſprement la ville des Himeriens , à cauſe qu'elle avoit opiniaſtrement tenu le party des ennemis : mais Sthenis l'un des gouverneurs de la ville, luy ayant requis audience, luy dit, qu'il ne feroit pas juſtement , ſi pardonnant à celui qui eſtoit autheur de toute la faulte il deſtruiſoit ceulx qui n'avoient point fallly. Pompeius adonc luy demanda qui eſtoit celui, qu'il vouloit dire eſtre autheur de tout le mal : & Sthenis luy reſpondit, que c'eſtoit luy meſme, qui avoit perſuadé à ſes amis , & contrainct par force ſes ennemis de faire tout ce qu'ilz avoyent fait. Pompeius ayant pris plaifir à ouïr parler ainſi franchement & magnanimement ceſt homme , luy pardonna , remettant le crime à luy premier , & conſequemment à tous les autres Himeriens : mais eſtant adverty que ſes ſoudards faiſoyent quelques violences par les chemins , il leur ſeella à tous leurs eſpées , & en punit ceulx qui ne garderent le ſeel en ſon entier.

XVIII. Ainsi comme il estoit après à executer & ordonner ces choses en la Sicile, il receut un mandement du senat & lettres de Sylla, par lesquelles il luy estoit commandé, qu'il passast incontinent en Afrique, pour y faire la guerre avec toutes ses forces à Domitius, qui avoit ja assemblé beaucoup plus de gens de guerre, que Marius n'en avoit eu quand il estoit non gueres au paravant passé de l'Afrique en Italie, & avoit mis sans dessus dessous les affaires des Romains, estant devenu de banny fugitif aspre tyran. Parquoy Pompeius en peu de temps ayant préparé tout son equippage pour s'embarquer, laissa en son lieu gouverneur de la Sicile, le mary de sa sœur Memmius, & luy monta en mer avec six vingts vaisseaux à rames, & bien huit cents autres vaisseaux de charge pour porter les vivres, les armes, l'argent & les engins de baterie, & tout le reste du bagage. Descendu qu'il fut avec toute sa flotte, partie à Utique¹, & partie à Carthage, il y eut incontinent bien sept mille hommes de guerre des ennemis, qui se vindrent rendre à luy, oultre sept legions toutes complètes qu'il menoit quant & luy : & dit on qu'à son arrivée il luy advint un cas pour rire :

¹ Sur la côte d'Afrique, vis-à-vis l'île de Sardaigne, à gauche, & Carthage à droite du fleuve Bagrada, qui descend du mont Mampfare, & se jette dans la Méditerranée.

car il y eut, ce dit on, quelques soudards qui trouverent un tresor, là où ilz gaignerent grosse somme de deniers. Ce qu'estant venu à la cognoissance des autres, ilz prirent opinion que ce champ où le tresor avoit esté trouvé, devoit estre tout plein d'or & d'argent, que les Carthaginois y avoyent ancienement caché du temps de leurs calamitez. Si ne fut pas adonc possible à Pompeius de se servir de ses soudards à chose quelconque plusieurs jours durans, & n'y peut faire autre chose que s'en rire, voyant tant de milliers d'hommes fouillans en la terre, & renversans ce champ, jusques à ce qu'eulx mesmes s'en lasserent à la fin, & luy dirent qu'il les menast où bon luy sembleroit, pource qu'ilz avoyent suffisamment payé la peine de leur folie.

XIX. Domitius luy alla au devant avec son armée en bataille : mais il avoit au devant une fondriere d'un torrent aspre & mal aisée à passer ; avec ce que dès le matin il se leva un grand vent avec une grosse pluye, de sorte que Domitius ne pensant pas que de tout ce jour là ilz deussent combattre, commanda à ses gens que lon troufast bagage pour desloger de là. Pompeius au contraire le prenant à occasion propre pour luy, feit soudainement marcher ses gens, & passa la vallée. Ce que voyans les ennemis qui estoient en desarroy s'en troublerent, & en ce trouble

voulurent faire teste : mais ilz n'estoyent ne tous ensemble , ny egaleme[n]t rengez en bataille , joinct que le vent leur chassoit la pluye contre les visages : toutefois ceste tempeste faisoit bien aussi de l'ennuy aux Romains , pource qu'ilz ne s'entrevooyent pas les uns les autres , de maniere que Pompeius luy mesme fut en danger d'estre occis par un de ses souldards , qui ne le cognoissant pas , luy demanda le mot de la bataille , & il demoura un peu trop longuement à luy respondre. Finablement après avoir desfait les ennemis avec grande effusion de sang (car on dit que de vingt mille qu'ilz estoient , il ne s'en sauva que trois) les souldards saluerent Pompeius du nom d'Imperator : mais il leur respondit qu'il n'accepteroit point l'honneur de ce nom là , tant comme il verroit le camp de l'ennemy estant encore debout , & que s'ilz le jugeoyent digne de ce nom là , qu'il falloit donc qu'ilz abbatissent premierement ceste closture là , qui remparoit le camp de l'ennemy. Ce qu'entendans les souldards , y allerent tout de ce pas l'assaillir : là où Pompeius combatit la teste nue , de peur de tumber en l'inconvenient où il estoit desja cheut une fois : si fut adonc le camp pris à force , & Domitius luy mesme tué dedans.

XX. Depuis laquelle desfaite les villes du país se rendirent , aucunes volontairement ,

autres furent prises d'assault & par force, comme fut aussi pris le roy Jarbas qui avoit combattu pour Domitius, & son royaume donné à Hiampsal. Mais Pompeius voulant encore davantage employer ses forces & la bonne fortune de son armée, entra avant en la Numidie^{*}, & penetra plusieurs journées au dedans, gagnant & conquérant tout ce par où il passoit, & rendant par ce moyen la puissance des Romains espouventable & redoutable aux Barbares de ce pais là, qui commenceoyent desja à n'en faire plus de compte. Et si dit davantage qu'il ne falloit pas que les bestes sauvages mesmes de l'Afrique demourassent sans esprouver la force & la fortune des Romains, au moyen dequoy il employa quelques jours, mais peu, à chasser aux lions & aux elephans: car dedans l'espace de quarante jours en tout, il eut desfait les ennemis, reconquis le pais d'Afrique, & ordonné les affaires des roys & provinces de tout le pais, n'ayant encore que vingt & quatre ans.

XXI. Quand il fut de retour en la ville d'Utique, on luy apporta lettres de Sylla, qui luy mandoit qu'il eust à casser tout le reste de son armée, & demourer là avec une legion seulement, attendant un autre capitaine qui y seroit envoyé pour luy succeder au gouvernement du

^{*} Sur la gauche du fleuve Bagrada.

païs. Ce mandement luy fascha, encore qu'il n'en donnast rien à cognoistre, & en fut marry en son cueur : mais ses soudards monstrerent evidemment qu'ilz en estoient malcontents, & comme il les priaist de s'en vouloir aller devant, ilz se prirent à dire paroles oultrageuses & injurieuses de Sylla, adjoustans qu'ilz n'estoyent point deliberez, quoy qu'il y eust, de l'abandonner, & qu'ilz ne vouloyent point qu'il se fiasst à un tyran. Mais voyant qu'il ne les pouvoit gagner, quelques remonstrances qu'il leur feist, il descendit de son tribunal & se retira plorant en sa tente, là où les soudards l'allerent querir, & le rapporterent en son siege, & consumerent une bonne partie du jour, eulx à luy remonstrer qu'il voulust demourer & leur commander, & luy à les prier qu'ilz voulussent obeïr à Sylla, & ne point se mutiner, jusques à ce que voyant qu'ilz ne cessoyent point de crier au contraire, & de le presser, il jura que plus tost il se tueroit s'ilz le vouloyent forcer, encore ne cuiderent ilz jamais pour cela s'appaiser.

XXII. Si fut premierement rapporté à Sylla, que Pompeius s'estoit rebellé contre luy : ce qu'ayant entendu, il dit à ses amis : « Il estoit » donques, à ce que je voy, predestiné que j'au- » rois en mes vieux jours à combattre contre des » enfans ». Ce qu'il disoit à cause du jeune Ma-

rius qui luy avoit donné beaucoup d'affaires , & l'avoit rengé en un extreme danger. Mais quand il fut bien informé de la verité , sentant que tout le monde à Rome se deliberoit de luy aller au devant , & de le recevoir avec tout l'honneur & demonstration de bienveillance qu'ilz luy pouvoient faire : il voulut luy mesme faire encore plus que les autres , & sortant de sa maison luy alla à l'encontre , & en l'embrassant le plus affectueusement qu'il peut , le salua , en l'appellant Magnus , qui signifie le grand , & commanda aux assistans qu'ilz le nommassent aussi de même : toutefois il y en a qui disent que ce fut en Afrique où ce nom luy fut premierement donné par une publique clameur de toute son armée , mais qu'il luy fut puis après confirmé & ratifié par Sylla. Bien est il vray que luy fut le dernier long temps après , quand on l'envoya proconsul en Hespagne à l'encontre de Sertorius , qui s'escrivit en ses lettres missives , & en ses mandemens & lettres parentes , Pompeius Magnus , pource que lors ce nom estant ja tout acoustumé , ne luy causoit plus d'envie. Dont à bon droit fait à louer & à admirer la sagesse des anciens Romains , lesquelz ne recompensoyent pas de telz honorables tiltres & noms les haults faicts d'armes & exploits de guerre seulement , mais aussi les vertus civiles & louables

actions de la paix : car il y en a eu deux que le peuple a surnommé Maximi, c'est à dire, très grands, desquelz l'un fut Valerius ¹, pource qu'il remeit en union & concorde la commune avec le senat, avec lequel il estoit en discord, & l'autre estoit Fabius Rullus, pourautant qu'il osta du nombre des senateurs quelques personnages nez de serfs affranchiz, qui moyennant leur richesse, par faveur y avoyent esté mis.

XXIII. Après cela Pompeius demanda l'honneur du triumphe ², & Sylla s'y opposa, alleguant pour ses raisons, qu'il n'appartenoit d'entrer en triumphe dedans la ville de Rome, sinon aux consulz ou aux preteurs : à l'occasion dequoy le premier Scipion ayant desfait les Carthaginois en plus grandes & plus grosses batailles dedans l'Hespagne, n'avoit jamais demandé cest honneur, pource qu'il n'estoit ny consul ny præteur, & que si Pompeius s'opiniastroit à vouloir faire entrée triumpnale dedans Rome, lors que pour sa grande jeunesse, à faulte d'aage, il n'estoit pas encore du senat, cela feroit cause de faire envier à luy cest honneur, & à soy sa puissance. Voilà les raisons que Sylla luy alleguoit, en luy donnant à entendre qu'il n'estoit point delibéré de luy permettre, ains qu'il luy résis-

¹ Voyez les Observations.

² L'an de Rome 673, avant J. C. 81.

téroit & l'en engarderoit s'il se vouloit obstiner au contraire : toutefois cela ne fait point de peur à Pompeius, lequel luy dit franchement, qu'il devoit penser, que plus de gens adoroient le soleil levant, que le soleil couchant : comme s'il eust voulu dire, que son credit & son autorité venoit à croistre, & celui de Sylla à se diminuer. Sylla n'ouyt pas lors clairement ce qu'il avoit dit, mais appercevant aux visages & à la contenance de ceulx qui estoient presens qu'ilz s'en esbahissoient, il leur demanda, que c'estoit qu'il luy avoit respondu, & quand il l'eut entendu, s'esmerveillant de l'audace d'un si jeune homme, il s'escria par deux fois coup sur coup, qu'il triumphe, qu'il triumphe donques de par dieu. Dequoy plusieurs estans marris & malcontents, Pompeius, à ce que lon dit, pour leur faire encore plus grand despit, voulut estre en ce triumphe porté sur un chariot triumphal, trainné par quatre elephans : car il en avoit amené plusieurs captifz de ceulx que tenoyent les princes & roys qu'il avoit subjugués : mais la porte de la ville se trouvant trop estroite, il fut contraint de s'en deporter, & se contenta de se faire mener par des chevaux. Et comme ses souldards n'ayans pas obtenu tout ce qu'ilz esperoyent, & qu'ilz s'estoyent promis, luy voulussent faire quelque trouble, & donner quelque empesche-

ment, il dit qu'il ne s'en soucioit point, & qu'il laisseroit plus tost là tout l'appareil de son triumphe, que de se soumettre à les flatter : à raison dequoy y eut un notable personnage nommé Servilius, l'un de ceulx qui plus asprement s'estoit opposé à l'ottroy de ce triumphe, qui dit publiquement, qu'il cognoissoit alors, que Pompeius estoit veritablement Magnus, c'est à dire, grand, & digne du triumphe. Et estant tout evident, que s'il eust voulu, il eust dès lors esté facilement receu au nombre des senateurs, il ne le prochassa point, ainsi comme lon dit, cherchant honneur en ce qui estoit plus estrange & plus esloigné de l'ordinaire : car ce n'eust pas esté chose grandement esmerveillable, s'il eust esté receu au corps du senat avant l'aage legitime : mais bien estoit ce à luy une gloire illustre, de triumpher avant que d'estre senateur : ce qui encore luy servit beaucoup à gagner tousjours de plus en plus la bonne grace du commun populaire : car il estoit fort aise de le voir après son triumphe se maintenir au reng des chevaliers Romains : & au contraire Sylla estoit fort fasché de le voir monter en telle gloire & venir en si grand credit : mais toutefois ayant honte de l'empescher, il s'en teut jusques à ce, que malgré luy & par force il feit parvenir un Lepidus au consulat¹,

¹ L'an de Rome 676; Sylla mourut cette année même.

moyennant le port & la faveur qu'il luy feit en sa brigue, à cause que le peuple luy fut favorable à sa requeste & pour l'amour de luy seulement : à l'occasion dequoy Sylla le voyant retourner de l'élection à travers la place, avec une longue suite de gens qui l'accompagnoient par honneur, il ne se peut tenir de luy dire, « Je voy, jouvenceau mon amy, que tu es fort » joyeux d'avoir vaincu en ceste brigue, & aussi » y a il bien dequoy vrayment : car c'est une » belle chose & magnanime d'avoir eu tant de » pouvoir envers le peuple, que par ta faveur » le plus meschant homme du monde Lepidus, » a emporté le consulat devant Catulus, l'un » des plus hommes de bien de toute ceste ville : » mais je te veux bien advertir qu'il te fault bien » garder de dormir maintenant, & avoir bien » l'œil aux affaires, pource que tu as armé & » fait fort un dangereux adversaire contre toy » mesme ». Mais ce en quoy principalement Sylla monstra qu'il ne vouloit point de bien à Pompeius, fut en son testament : car il laissa quelque lay testamentaire à tous ses autres amis, & en institua aucuns tuteurs & curateurs de son filz, sans faire aucune mention de Pompeius : ce que toutefois il supporta fort doucement & fort civilement, de maniere que Lepidus & quelques autres voulans empescher que le corps ne

fust inhumé dedans le champ de Mars, & que ses funeraillies ne se feissent publiquement, luy teint la main au contraire, à ce que le convoi s'en feist & honorablement & seurement.

XXIV. Mais rantoist après le trespas de Sylla se veit clairement ce qu'il avoit predit : car Lepidus se voulant attribuer l'autorité & la puissance qu'il avoit eüe sans rien desguiser & sans tournoyer à l'entour, se forrifiâ d'armes incontinent, remuant de rechef les reliques de la partie contraire de Marius, que Sylla n'avoit du tout peu extirper ny esteindre, & qui de long temps estoient aux escoures, ne demandans que quelque occasion de se renouveler. Vray est que son compagnon au consulat Catulus, que la meilleure & la plus saine partie du senat & du peuple suyvoir, estoit estimé un très homme de bien, temperant, sage & droiturier : mais il estoit plus propre à gouverner affaires de paix, qu'à conduire une armée & manier une guerre : tellement que les affaires mesmes sembloient requérir Pompeius : lequel ne branla point à consulter en quelle part il inclineroit, ains se rengea tout incontinent du costé des gens de bien, & tout aussi tost fut eleu chef des forces que lon meit sus pour resister à Lepidus, lequel avoit ja reduit en son obeïssance une bonne partie de toute l'Italie, & tenoit la Gaule de deçà les

monts avec une armée qu'il avoit mise entre les mains de Brutus. Or quant à tout le demourant, Pompeius en veint facilement à bout : mais il demoura long temps devant Modene ¹ à l'encontre de Brutus. Et cependant Lepidus s'estant coulé jusques à Rome, & s'en tenant auprès, envoya demander un second consulat, effroyant ceulx qui estoient dedans la ville avec une grosse troupe de gens ramassez de toutes pieces qu'il avoit autour de luy : mais cest effroy fut tantost amorty par une lettre missive qu'escrivit Pompeius, contenant comme il avoit mis fin à toute ceste guerre sans coup ferir, pource que Brutus, soit ou que luy eust trahy son armée, ou que son armée l'eust trahy, luy mesme se rendit à la discretion de Pompeius, qui luy bailla quelque nombre de gens de cheval, qui le menerent jusques à une petite ville assise sur le Po : & un jour après y envoya Geminus qui le feit mourir, dequoy Pompeius fut depuis fort blasmé, pource que ayant escrit au senat dès le commencement de la mutation, que Brutus s'estoit volontairement rendu à luy, ilcrivit depuis d'autres lettres qui le chargeoyent après l'avoir fait mourir. Ce Brutus estoit pere de celuy qui

¹ Grec, Mutine, entre les fleuves Scultenna à droite, & Gabellus à gauche, dans la partie de l'Italie appelée Gaule Cispadane, c'est-à-dire, en deçà du Pô.

depuis occit Julius Cæsar avec l'aide de Cassius ; mais il ne se porta pas si laschement , ny en faisant la guerre , ny en mourant , comme fait son pere , ainsi comme nous avons escrit au long en sa vie. Lepidus donques estant contraint d'abandonner l'Italie , s'enfouit en l'isle de Sardaigne , là où il mourut de maladie qui luy vint , non tant du regret de la ruine de ses affaires , ainsi que lon dit , comme de la douleur qu'il receut d'une lettre qui tumba entre ses mains , par laquelle il cogneut que sa femme avoit forfait à son honneur.

XXV. Or restoit il encore Sertorius , lequel estoit bien autre homme de guerre & autre capitaine que Lepidus , & avoit occupé l'Hespagne , tenant les Romains suspendus en grande crainte , pource que toutes les reliques des guerres civiles s'estoyent retirées à l'entour de luy , ne plus ne moins qu'une derniere maladie , & avoit ja defait plusieurs autres moindres capitaines : mais pour lors estoit aux prises avec Metellus Pius , qui en son temps avoit bien esté homme de guerre & vaillant de sa personne , mais pour lors à cause de sa vieillesse , sembloit aller un peu trop laschement en besongne , & n'embrasfer pas assez vivement les occasions de la guerre , que Sertorius par sa soudaineré & sa legereté luy ravissoit d'entre les mains , en se trouvant

à tous coups devant luy. alors qu'il y pensoit le moins, plus tost en guise de capitaine de brigans qu'autrement, & en le troublant par embusches qu'il luy dressoit à toutes heures, par traverses qu'il luy donnoit, & par courses qu'il faisoit sans cesse autour de luy : là où le bon homme Metellus avoit appris à combatte de pied ferme, & en bataille rangée, & à conduire gens pesamment armez. A raison de quoy Pompeius tenant tousjours son armée ensemble, alloit pratiquant à Rome que lon l'envoyast en Hespagne pour secourir Metellus : & combien que Catulus luy mandast qu'il cassast son armée, il n'en fait rien, ains soubz quelques nouvelles couvertures qu'il inventoit, fait tant qu'il demoura tousjours en armes à l'entour de Rome, jusques à ce qu'on luy eust donné la charge qu'il demandoit, dont fut autheur Lucius Philippus, qui le meit en avant au senat : là où lon dit, que comme l'un des senateurs trouvant estrange de luy ouyr proposer cela, luy demandast, « Comment, Philippus, estimes tu donc » qu'il soit expedient d'envoyer Pompeius en » Hespagne proconsul ? c'est à dire, pour un » consul. Non pas certes, respondit Philippus, » proconsul seulement, mais pro consulibus » : c'est à dire, pour les deux consulz, Voulant dire

que tous les deux consulz de ceste année là estoient personnes de nulle valeur.

XXVI. Arrivé donc que fut Pompeius en Hespagne, les hommes, ainsi qu'il advient à la venue de tous nouveaux gouverneurs, en prirent toute autre esperance qu'ilz n'avoient eüe au paravant : tellement que les villes & les peuples qui n'estoyent pas trop fermes en la devorion de Sertorius, se rebellerent incontinent, & se tournerent contre luy : à l'occasion dequoy Sertorius fema quelques paroles fieres & orgueilleuses à l'encontré de luy, disant par maniere de moquerie, qu'il ne voudroit que des verges pour chastier cest enfant, s'il ne craignoit ceste vieille : voulant entendre Metellus : mais quelque chose qu'il dist, si se tenoit il bien plus sur ses gardes & alloit bien plus retenu à la guerre, qu'il ne faisoit auparavant, pour la doubte qu'il avoit de Pompeius. Car Metellus estoit fort dissolu en sa vie (ce que lon n'eust pas pensé) s'estant du tout laissé aller aux delices & à la volupté : mais on veit soudainement une grande mutation en luy, tant au rabaissement de la gravité & de la pompe & magnificence qu'il tenoit au paravant, qu'au retranchement de la superfluité de sa despense. Cela, oultre ce qu'il apportoit grand honneur à Pompeius, luy ac-

queroit encore de plus en plus l'amour & bienveillance du peuple, quand on voit qu'il estroiffit & resserra encore plus la simplicité de son vivre ordinaire. Il n'eut pas beaucoup de peine à s'y accoustumer, pource que de sa nature il estoit homme réglé & ordonné en ses appetits.

XXVII. Or y eut il en ceste guerre plusieurs adventures diverses, & plusieurs accidents telz que les portent les armes, mais il n'y en eut point qui le faschast tant, comme fait la prise de la ville de Lauron¹, que Sertorius prit sur luy : car là où il le cuidoit tenir enfermé, & que jà il s'en estoit laissé eschapper de la bouche quelque parole de vanterie, il fut tout esbahy qu'il se trouva luy mesme environné par derriere, de maniere que ne s'ozant bouger de là où il estoit campé, il fut contraint de voir bruster la ville devant ses yeux : mais depuis il desfeit en bataille rangée près de Valence² Herennius & Perpenna, tous deux gens de guerre & lieutenans de Sertorius, devers lequel ilz s'estoyent retirez, & en ceste rouverte leur occit plus de dix mille hommes. Ceste victoire luy ayant élevé le cueur, il se hastoit pour aller trouver Sertorius en personne, & le combattre seul, à fin que Metellus n'eust point de part à l'honneur de la

* ¹ Voyez la Vie de Sertorius & les Observations, T. V, ch. xxviii.

² *Ibid.*

viçtoire. Si vindrent au combat près la rivièrè de Sucron ¹, environ le soleil couchant, tous deux craignans que Metellus n'y survinft, l'un à fin qu'il combatift seul, & l'autre à un seul. L'iffue de ceste bataille fut douteufe, pource qu'il y eut tant deçà que delà l'une des poinçtes, qui eut avantage fur l'autre : mais quant aux capitaines, Sertorius en emporta l'honneur : car il desfeit seul tout ce qu'il trouva en teſte devant ſoy : & quant à Pompeius, il y eut un grand homme d'armes, qui eſtant à pied s'adreſſa à luy, & comme ilz vindrent à ſ'entrecharger, les eſpées croiſans gliffèrent juſques ſur leurs mains, mais non pas en meſme ſorte : car Pompeius ne fut qu'un peu blecé ſeulement, & l'homme d'armes eut la main coupée route nette, & adonc ſe jetterent pluſieurs enſemble ſur luy, pource que deſja ſes gens en ceſt endroit là eſtoient tournez en fuite : mais il ſe ſauva d'une eſtrange ſorte contre ſon eſperance, en abandonnant aux ennemis ſon cheval, lequel eſtoit richement enharnaché d'un harnois d'or, & couvert d'un caparaſon qui valoit beaucoup, & ce pendant que les ennemis le partageoyent entre eux, & ſe combatoyent à qui en auroit, il leur eſchappa. Le lendemain au poinçt du jour l'un

¹ Voyez la Vie de Sertorius & les Observations, Tome V, chap. xxvii.

& l'autre regea de rechef ses troupes en bataille, pour se confirmer la victoire que chacun d'eulx pretendoit avoir eüe : mais Metellus survint là dessus, qui fut cause que Sertorius se retira à la desbandée : car son camp se rompoit ainsi facilement, & puis se ramassoit aussi soudainement, de maniere que Sertorius alloit quelquefois errant tout seul par les champs, & puis tout à coup se trouvoit avec cent cinquante mille combattans, ne plus ne moins qu'un torrent, qui quelquefois est à sec, & puis se remplit en un instant.

XXVIII. Mais Pompeius après ceste bataille allant pour saluer Metellus, quand ilz furent assez près l'un de l'autre, commanda à ses sergens qu'ilz baissassent les faisceaux de verges & les haches qu'ilz portoyent devant luy pour honorer Metellus, comme personnage de plus grande dignité que luy : ce que Metellus ne voulut pas permettre, ains en cela & en toutes autres choses se monstra bon & equitable envers luy, sans s'attribuer rien de plus qu'à luy pour avoir esté consul, & estre son ancien, sinon que quand ilz campoyent ensemble, c'estoit luy qui donnoit le mot du guet à tout le camp : toutefois le plus du temps ilz campoyent separeement, pource que leur ennemy, qui estoit si remuant qu'il n'arrestoit jamais en une place, & en peu

de temps se faisoit voir en divers lieux, les contraignoit de se separer & diviser pour prouvoir à tout, les tirant soudainement d'un affaire en un autre, tellement qu'à la fin en leur coupant vivres de tous costez, pillant leur païs, & tenant la coste de la marine, il les chassa tous deux, & les fait fortir hors des provinces de leurs gouvernemens qu'ilz avoyent en Hespagne, les contraignant de se retirer ailleurs à faulte de vivres. Ce pendant Pompeius qui avoit employé & despendu la meilleure partie de son bien en ceste guerre, demanda de l'argent au senat pour payer ses gens, menaçant que si on ne luy en envoyoit, il s'en retourneroit en Italie avec son armée : parquoy Lucullus qui lors estoit consul ¹ encore qu'il fust adversaire à Pompeius, toutefois pource qu'il prochassoit d'avoir la charge d'aller faire la guerre au roy Mithridates, sollicita que lon luy en envoyast, craignant de donner occasion à Pompeius, lequel ne demandoit autre chose que de laisser Sertorius pour tourner ses forces contre Mithridates, la desfaitte duquel luy feroit plus glorieuse, & non pas si difficile ne si dangereuse.

XXIX. En ces entrefaittes mourut ² Sertorius occis en trahison par ceulx qu'il estimoit ses

¹ L'an de Rome 680, avant J. C. 74.

² L'année d'après.

amis, entre lesquels Perpenna estoit le principal, qui voulut après sa mort essayer de faire comme luy, ayant les mesmes moyens, le mesme equipage, & les mesmes forces que luy : mais non pas le mesme entendement pour les employer & en sçavoir user. Parquoy Pompeius marchant incontinent droit à luy, & voyant qu'il ne sçavoit par quel bout se prendre à ses affaires, luy attiltra une amorche de dix cohortes, qu'il envoya piller la campagne, leur ayant commandé, de s'escarter les uns des autres, & se resprendre le plus qu'ilz pourroyent. Perpenna ne faillit pas de donner aussi tost dedans & de les poursuivre : mais Pompeius qui l'attendoit au passage, se trouva soudain au devant avec toute son armée en bonne ordonnance, qui luy donna la bataille, par laquelle il obtint victoire finale de toute celle guerre, pource que la plus part des capitaines y fut tuée sur le champ, & Perpenna mesme le chef de tous luy fut amené prisonnier, qu'il feit mourir incontinent : en quoy il ne merite point d'estre blasmé ny condamné d'ingratitude, comme mal recognoissant les bons tours & plaisirs que Perpenna luy avoit faits en la Sicile, ainſi comme aucuns le chargent, ains plus tost fait à louer en cela, comme ayant fait acte de grande magnanimité, & usé de conseil salutaire à toute la chose publique, pource que

Perpenna s'estant saizy des papiers de Sertorius, monstroït des lettres missives des plus grands & plus puissans hommes de Rome, lesquels desirans remuer l'estat & changer le gouvernement, appelloyent Sertorius en Italie : parquoy Pompeius craignant que cela ne fust cause d'exciter encore de plus grandes seditions & guerres civiles, que celles qui estoient assopies, feit mourir le plus tost qu'il peut ce Perpenna, & brusta toutes ses lettres & tous ses papiers, sans en lire rien.

XXX. Cela faiçt il sejourna encore en Hespagne quelque temps, jusques à ce qu'il eust esteinct les plus violentes emotions, & que les affaires les plus embrouillees & plus troublees y fussent un peu appaisees & rassies, puis ramena son armée en Italie, là où il arriva comme la guerre servile y estoit encore en sa plus grande vigueur : & pourtant Crassus à qui la charge en avoit esté commise se hastia de donner vistement la bataille¹ ; laquelle il gagna, & occit bien douze mille trois cents hommes de ces serfs fugitifs : mais la fortune voulant que Pompeius, comment que ce fust, eust encore part à la decision de ceste guerre, feit que cinq mille de ces fugitifs, qui s'estoyent sauvez de la bataille, luy tumberent entre les mains, & escrivit au

¹ L'an de Rome 683.

senat le premier , que Crassus avoit bien desfait en bataille rengée les gladiateurs , mais que luy avoit couppé jusques au fond toutes les racines de la guerre : ce que les Romains estoient bien aises de dire & ouir dire , tant ilz luy portoyent d'amour & de bienvueillance.

XXXI. Mais quant au recouvrement de l'Hespagne & à la desfaite de Sertorius , il n'y avoit personne qui dist , non pas en jeu seulement , qu'autre que Pompeius y eust rien fait : toutefois quelque honneur ne quelque affection qu'ilz luy portassent , si y avoit il tousjours quelque soupçon & quelque crainte qu'il ne voudroit pas laisser son armée , ains voudroit à la descouverte prendre & suyvre le chemin qu'avoit tenu Sylla , qui estoit , par force d'armes usurper puissance & autorité souveraine : au moyen dequoy il n'y avoit pas moins de ceulx qui couroyent au devant de luy , & qui luy alloient faire les caresses de la bien venue , par crainte , que de ceulx qui le faisoient pour bonne affection : mais depuis qu'il eut retrenché toute ceste suspicion , en declarant qu'il romproit son armée tout aussi comme il auroit fait son entrée en triumphe , il ne restoit plus rien que ses envieux peussent reprendre en luy , sinon qu'il enclinoit plus en la partie du peuple , qu'il ne faisoit en celle du senat , & qu'il avoit voulu

de remettre sus l'autorité & dignité du tribunat du peuple, que Sylla avoit abbatue, pour en acquérir la bonne grace de la commune en tout ce qu'il pourroit : ce qui estoit vray : car jamais le peuple Romain ne chercha ny ne desira si ardemment chose quelconque, comme il feist de voir remettre ce magistrat là en son entier. De sorte que Pompeius mesme reputoit un grand heur à luy de s'estre rencontré à temps de pouvoir executer un tel acte, pource qu'il n'eust pas sceu imaginer ne trouver une autre grace, de laquelle il eust peu si aggreablement recompenser la bienvueillance que ses citoyens luy portoyent, si quelque autre l'eust prevenu à ce faire. Luy ayant donques par decret du senat esté ordonné un second triumphe & premier consulat, cela ne le feist point trouver plus esmerveillable ne plus grand : mais bien jugea lon estre un indice très exprès de sa grandeur, ce que Crassus, le plus riche, le plus eloquent & le plus grand de tous ceulx qui pour lors s'entremettoient du gouvernement de la chose publique, & qui s'estimoit plus que Pompeius & que tous les autres, n'osa jamais demander le consulat, qu'il n'en eust premierement prié & requis Pompeius, qui en fut bien aise, pource que de long temps il ne cherchoit que quelque occasion de luy faire plaisir : au moyen dequoy il
brigua

brigua luy mesme affectueusement en sa faveur , & en pria le peuple , promettant qu'il leur sçauroit aussi bon gré de luy donner Crassus pour compagnon , que de l'esslire luy mesme pour consul. Ce neantmoins ayans esté ensemble eleuz ¹ , ilz furent tousjours contraires l'un à l'autre en toutes choses , & ne s'accorderent jamais de rien en tout le temps de leur consulat.

XXXII. Crassus avoit plus d'autorité au senat , mais Pompeius avoit aussi plus de credit envers le peuple : cat il leur rendit l'office du tribunat , & si permit que la puissance de juger & cognoistre des causes , tant civiles que criminelles , par edict exprès fust rendue & transferée à l'ordre des chevaliers Romains : aussi fust ce chose fort plaisante & agreable à voir au peuple Romain , quand luy mesme alla se presenter devant les censeurs pour avoir exemption d'aller à la guerre , pource que la coustume estoit anciennement à Rome , que les chevaliers Romains , quand ilz avoyent hanté les armes & suyvy les guerres certain temps , qui estoit prefix par les ordonnances , amenoyent leur cheval au milieu de la place devant deux magistrats , que lon appelloit les censeurs , là où ilz nommoient les voyages , les lieux , & les capitaines soubz

¹ L'an de Rome 684, avant J. C. 70.

lesquelz ils avoyent esté à la guerre , & après avoir rendu compte de leurs deportemens , alors s'ilz s'y estoient portez en gens de bien , ilz estoient declarez exempts d'aller à la guerre s'ilz ne vouloyent , & estoit là chascun ou honoré , ou chastié selon qu'il l'avoit deservy en sa vie. Si estoient lors les deux censeurs Gellius & Lentulus assis honorablement en leur tribunal , & faisoit on la reveuë des chevaliers Romains , qui passoyent par devant eulx pour estre examinez & visitez à la monstre , quand on fut tout esbahy que lon veit d'un bout de la place venir Pompeius , ayant bien devant luy les autres marques & enseignes du consulat , mais au demourant menant luy mesme son cheval par la bride. Quand il fut assez près , & que lon cogneut certainement que c'estoit luy , il commanda aux fergens qui portoyent les haches devant luy , qu'ilz s'ouvrirent pour le laisser passer , & approcha son cheval du parquet & tribunal des censeurs. Si fut le peuple espandu tout à l'environ ravy d'esbahissement ; & se fit un très grand silence. Les censeurs mesmes furent fort joyeux de le voir ainsi se soubmettre aux loix , & luy en monstrerent une grande reverence. A la fin le plus aagé d'eulx l'interroqua en ceste sorte : « Je » te demande , Pompeius Magnus , si tu as esté » autant de temps à la guerre comme il est

» ordonné par les loix ». Adonc respondit Pompeius à haulte voix : « Ouy, je y ay esté voirement » autant de temps comme il fault, & non soubz » autre capitaine que soubz moymesme ». Le peuple ayant ouy ceste responce s'escria de joye, & ne se peut tenir d'exclamer à haulte voix, tant il en fut aise : & les censeurs mesmes descendirent de leur tribunal, & l'allerent par honneur reconduire jusques en sa maison pour gratifier & complaire à une multitude grande de peuple qui les suyvoit avec grands batemens de mains & toutes demonstrations de resjouissance.

XXXIII. Sur la fin de leur consulat comme la diffension d'entre luy & Crassus allast tousjours croissant de plus en plus, il y eut un Gaius Aurelius qui estoit bien chevalier Romain, mais au reste ne s'estoit jamais entremis des affaires publiques, jusques alors qu'en publique assemblée de ville il monta sur la tribune aux harengues, & dit publiquement devant tout le peuple, que Jupiter s'estoit la nuit apparu à luy, & luy avoit commandé de faire entendre de sa part aux deux consulz, qu'ils n'eussent point à se deposer de leur consulat, que premierement ilz ne se fussent reconciliez ensemble. Pour ces paroles Pompeius ne se bougea point : mais Crassus le prit par la main, & le saluant le

premier dit hault & clair devant tout le monde :
« Seigneurs Romains , je ne pense point faire
» chose lâche ny de cueur bas de ceder le pre-
» mier à Pompeius , attendu que vous mesmes
» l'avez estimé digne d'estre surnommé le grand ,
» avant que la barbe luy fust venuë , & auquel
» vous avez decerné l'honneur de deux triumphes
» avant qu'il fust du senat ».

XXXIV. Cela dit , ilz feirent appointment ensemble , & puis se deposerent tous deux de leur magistrat : & quant à Crassus , il continua tousjours la maniere de vivre qu'il avoit commencée : mais Pompeius fuyoit le plus qu'il pouvoit à plaider pour autrui , & commenceoit petit à petit à se retirer de frequenter la place , les jugemens , & de se mesler de procès , sortant peu souvent en public , & quand il y sortoit c'estoit tousjours en grosse troupe : car il estoit mal aisé de le voir plus hors son logis , & de parler à luy qu'il n'y eust tousjours grande multitude de personnes autour de luy , & estoit bien aise que lon veist ainsi grande suite de gens après luy , pource que cela luy donnoit une grandeur & une majesté venerable , d'estre veu tousjours ainsi grandement suyvy & accompagné , estimant qu'il falloit pour maintenir sa dignité , qu'il ne se laissast pas hanter ny frequenter familierement à petites gens : pource que ceulx

qui se font faicts grands par les armes viennent facilement en haine & en mespris, quand ilz se mettent puis après à vivre en gens de ville : car ilz ne peuvent se renger à l'egalité populaire, qui doibt estre gardée entre bourgeois d'une mesme ville, & veulent tousjours estre plus que les autres, aussi bien en la ville comme au camp. Et au contraire, ceux qui se sentent & confessent estre inferieurs en guerre, estiment que ce leur seroit un reproche intolerable, de n'estre superieurs à tout le moins en paix : au moyen dequoy s'ilz peuvent tenir au palais & en affaires de ville, un homme de guerre, qui se soit rendu illustre par triumphes & par victoires, ilz le ravallent & le tienent sous eulx, là où ilz ne portent point d'envie à la gloire militaire de ceulx qui leur cedent reciproquement le credit & l'honneur ès affaires de ville, ainsi comme il apparut evidemment peu de jours après en la personne de Pompeius.

XXXV. Par un tel moyen la puissance des courfaires escumeurs de mer prit sa premiere origine au país de la Cilicie, & n'en feit on point de cas du commencement, pource que lon ne s'en apperceut pas : mais ilz vindrent à prendre cueur & hardiesse de s'augmenter au temps de la guerre contre le roy Mithridates, là où ilz se loerent à faire quelques services à ce roy. Et

puis les Romains estans empeschez à leur querelles civiles, & se combatans entre eulx aux portes mesmes de la ville de Rome, la mer ce pendant demourant sans garde, les tira en avant, & leur donna courage de passer plus oultre qu'ilz n'avoient encore fait, de sorte que non seulement ilz destroussoyent les marchands allans & venans par la mer, ains forceoyent aussi les isles & les villes maritimes, de sorte qu'il y avoit ja des hommes opulents en biens, d'ancienne noblesse, & qui estoient tenus pour gens de fort bon sens, qui s'embarquoyent sur des vaisseaux de courfaires, & se joignoyent à eulx, comme si le mestier en fust devenu louable & honeste.

XXXVI. Si avoyent desja dressé en plusieurs lieux des arcenaux, des ports & des tours, & guettes à faire les signes de feu le long de la marine bien fortifiées, & oultre cela, de grosses flottes de vaisseaux fourniz non seulement de bords & forts galiots pour la rame, de ruzez pilotes, & d'experts mariniers, leurs vaisseaux adroits & legers pour bien servir en un bon affaire, mais aussi accoustrez si superbement, que lon haïssoit encore plus leur superfluité, que lon ne redoubtoit le danger de leurs forces : car ilz avoyent les pouppes de leurs galeres toutes dorées, les tapis & couvertures de

pourpre , les rames argentées , comme prenant plaisir à faire montre de leur brigandage. L'on ne voyoit & n'oyoit autre chose par toutes les costes de la marine , que sons d'instrumens de musique , chansons , banquets & festins , prises de capitaines & gens de grande qualité , rennemens de mille prisonniers , toutes lesquelles choses se faisoient au grand deshonneur & à la honte du peuple Romain. Car ilz avoyent bien de tous vaisseaux de coursaïres jusques au nombre de mille , & avoyent desja bien pris quatre cents villes , où ilz destruisoyent & voloyent plusieurs saints temples des dieux , qui jusques alors jamais n'avoyent esté ne polluz ne pilléz , comme celuy des Jumeaux en l'isle de Claros ¹ , celuy de Samothrace ² , celuy de la Terre en la ville de Hermione ³ , celuy d'Æsculapius en Epidaure , ceux de Neptune en Isthmos ⁴ , à Tanare ⁵ , & en Calabre , ceux d'Apollo en Actium ⁶ , en l'isle de Leucade ⁷ , ceux de

¹ Voyez les Observations.

² Ile de la mer Egée au-dessous de la Thrace , vis-à-vis l'embouchure de l'Hèbre.

³ Hermione & Epidaure sont deux villes de l'Argolide.

⁴ Grec : dans l'isthme ; c'est l'isthme de Corinthe.

⁵ Promontoire du Péloponèse entre celui de Malée , & celui de Coryphæe.

⁶ Sur le golfe d'Ambracie au nord-ouest de l'Acarnanie.

⁷ Leucade , petite île le long des côtes de l'Acarnanie.

Juno en Samos¹, en Argos & en Leucanie². Ilz faisoient aussi entre eulx quelques estranges sacrifices au mont d'Olympe, & quelques secrettes ceremonies de religion, entre lesquelles estoit celle de Mithres, qui est le soleil, laquelle dure encore jusques aujourd'huy, ayant esté montrée par eulx premierement.

XXXVII. Mais outre plusieurs insolences & injures qu'ilz feirent aux Romains sur la mer, ilz fortoyent encore en terre & alloient espier les chemins, ruiner & destruire leurs maisons de plaissance, qui estoient aux champs le long de la marine, & prirent une fois deux prêteurs Romains, Sextilius & Bellinus, vestus de leurs grandes robes de pourpre, avec leurs sergens mesmes & leurs officiers, qu'ilz emporterent tous quant & eulx. Aussi fut surprise par eulx la fille d'Antonius, personnage qui avoit eu l'honneur du triumphe, ainsi comme elle s'en alloit aux champs, & fut rachetée d'une grosse somme d'argent : mais ce en quoy il y avoit plus de mespris & de moquerie estoit, que quand ilz avoient pris quelqu'un, & qu'il se prenoit à crier qu'il estoit citoyen Romain, & qu'il nommoit son nom, alors ilz faisoient semblant d'estre tous estonnez & d'avoir bien

¹ Sur les côtes de l'Ionie.

² Voyez les Observations.

grande peur : car ilz frappoyent des mains sur leurs cuisses , & se mettoient à genoux devant luy , en luy suppliant de leur vouloir pardonner. Le pauvre prisonnier pensoit qu'il feissent tout cela à bon esciant , les voyant ainsi humiliez & contrefaisans si bien les espouventez : il en venoit aucuns qui luy mettoient des souliers aux piedz , & d'autres qui luy vestoyent une robe longue à la romaine , de peur (ce disoyent ilz) qu'il ne fust une autre fois mescogneu : puis quand ilz s'estoyent assez moquez de luy , & en avoyent assez pris leur plaisir , tant comme ilz avoyent voulu , finalement en pleine haulte mer , ilz jettoyent hors le vaisseau une eschelle , & luy disoyent qu'il montast dessus & qu'il s'en allast à la bonne heure : mais s'il ne vouloit descendre de luy mesme , ilz le poulsoyent à force en la mer , & le faisoient ainsi noyer.

XXXVIII. Ceste puissance de larrons occupoit & tenoit entierement toute la mer Mediterrane en sa subjection : tellement qu'il n'y avoit marchand de forte quelconque , qui y peust naviger ny traffiquer. Ce qui fut la cause principale qui emeut les Romains , craignans la necessité de vivres , & attendans une grande famine , d'envoyer Pompeius pour oster la domination de la mer à ces coursaïres , & celuy qui premierement en meit le propos en avant

fut Geminius , l'un de ses familiers , ne luy donnant pas par son edict l'autorité d'un admiral , ou d'un general de la marine seulement , ains manifestement puissance de monarchie souveraine sur toutes sortes de personnes , sans estre subiect à rendre compte , ny à estre puis après syndiqué de ce qu'il auroit fait en ceste charge : car la teneur de son edict luy donnoit plein pouvoir de commander souverainement en toutes les mers qui sont entre les terres , depuis les coulones de Hercules , & en toute la terre ferme à l'environ , jusques à vingt & cinq lieuës arriere de la mer. (Il y avoit pour lors bien peu de païs soubz l'empire Romain , qui en fussent reculez de plus loing que cela , ains estoient compris là dessoubz de très grandes nations , & de très puissans princes.) Davantage il luy donna aussi pouvoir d'elire du senat quinze lieutenans pour leur departir à chacun les charges particulieres , & les quartiers que bon luy sembleroit , & de prendre argent au tresor , ou ès mains des receveurs de la chose publique , pour entretenir une flotte de deux cents voiles , avec entiere puissance de lever tant de gens de guerre , tant de galiots & de gens de rame , comme il luy en plairoit.

XXXIX. Ceste proposition ayant esté leuë publiquement , le peuple l'advoua & autorisa

de merveilleuse affectjon : mais aux principaux hommes & plus gens de bien du senat, il sembla que c'estoit un pouvoir qui ne surpassoit pas seulement toute envie, mais qui leur apportoit occasion de grande crainte, de donner ainsi à un particulier puissance si absolue & si peu limitée : au moyen dequoy ilz s'y opposerent tous, excepté Cæsar, lequel y favorisa, non qu'il se souciait de faire plaisir à Pompeius, mais pource que dès lors il taschoit ja de s'insinuer en la bonne grace du peuple : mais tous les autres hommes d'honneur en tensesrent & reprirent grièvement Pompeius, jusques à tant que l'un des consulz luy reprocha qu'il vouloit ensuyvre la trace de Romulus, mais qu'à l'adventure aussi ne faudroit il pas d'avoir une mesme fin que luy. Le peuple le cuida assommer pour ceste parole. Catulus se presenta puis après pour parler à l'encontre de cest edict : le peuple du commencement luy donna paisible audience, pource que c'estoit une personne venerable : & luy commença à deduire sans aucune demonstration d'envie beaucoup de belles choses à la louange de Pompeius, & à la fin conseilla au peuple de l'espargner, & de n'exposer pas à tout propos au danger de tant de guerres les unes sur les autres un personnage, lequel ilz devoient tenir si cher : « Car si vous

» venez à le perdre , dit il , quel autre avez
 » vous que vous puissiez mettre en son lieu » ? Le
 peuple adonc escria tout haut , Toy mesme :
 parquoy voyant qu'il perdoit sa peine de cuider
 divertir le peuple de ceste voulunté , il s'en
 deporta. Roscius se presenta après pour cuider
 aussi parler , mais il ne peut onques avoir au-
 dience : & luy voyant que lon ne le vouloit
 autrement escouter , monstra par signe des doigtz
 que lon ne devoit pas bailler ceste charge à
 Pompeius seul , ains à un autre encore avec
 luy. Ce que le peuple n'ayant pas trouvé bon ,
 se prit à crier si fort , qu'un corbeau volant
 à l'instant par dessus , s'en esblouit & tumba
 emmy la presse du peuple : par où lon peut
 comprendre , que les oiseaux qui tombent de
 l'air en terre , ne cheent pas ¹ pource que l'air
 agité par aucune vehemente concussion se rompe
 ny se fende : mais pource que le coup de la
 voix , quand elle est si forte & si violente ,
 qu'elle fait comme une tourmente en l'air , les
 frappe & les atteint.

XL. Si fut pour ce jour là l'assemblée rompue
 sans y rien arrester ny conclurre , & au jour
 prefix que lon devoit faire passer le decret

¹ Il y a double lecture en cest endroit , & selon l'autre il faudroit
 traduire : pource que l'air fendu & entrouvert recoyve beaucoup de
 vuide , *καὶ τὸ κενόν ἀπολαμβάνει*. Amyot.

par les voix & suffrages du peuple , Pompeius s'en alla aux champs : là où estant adverty comme le peuple l'avoit autorisé , il retourna & rentra la nuit dedans la ville pour eviter l'envie que lon eust eue à l'encontre de luy , quand on eust veu le monde qui fust couru de toutes les parts de la ville au devant de luy , & qui l'eust accompagné jusques en sa maison. Le lendemain au matin sortant en public , il sacrifia aux dieux , & luy estant donnée audience en pleine assemblée du peuple , il feit de sorte que lon luy adjousta encore beaucoup de choses à son pouvoir , au double presque de l'appareil qui luy avoit esté ordonné au premier decret : car il obtint que le public luy armeroit cinq cents vaisseaux , & luy leva lon bien six vingts mille combatans à pied , & cinq mille à cheval , & choisit on dedans le senat vingt & quatre personnages qui tous avoyent eu gouvernemens & charges d'armées , & aussi deux tresoriers generaux. Sur ces entrefaites les vivres d'aventure ravallerent , dont le peuple estant fort aise , prit occasion de dire , que le seul nom de Pompeius avoit desja amorty ceste guerre.

XLI. Toutefois il divisa toute la mer d'entre les terres en treze regions , en chacune desquelles il ordonna certain nombre de vaisseaux , & par dessus un de ses lieutenans : ainsi ayant espandu

ses forces par tout , il enveloppa dedans ses retz tous les vaisseaux des courfaires qui se trouvoient ensemble en flotte : & les ayant pris, les feit tous tirer en terre : mais ceulx qui s'estoyent de bonne heure desbandez , ou qui autrement peurent eschapper de ceste chasse generale, s'en fouyrent tous cacher en la Cilicie , ne plus ne moins que les abeilles en leur ruche , contre lesquelz il voulut aller luy mesme en personne avec soixante des meilleurs vaisseaux : toutefois il ne passa point pour y aller , que premierement il n'eust nettoiyé toute la mer de la Thoscane , les costes de la Libye , de la Sardagne , de la Sicile & de la Corse , de tous ces larrons , qui paravant y fouloyent escumer : ce qu'il eut fait en l'espace de quarante jours : moyennant une peine infinie qu'il en prit, & la bonne diligence que firent aussi ses lieutenans.

XLII. Mais comme l'un des consulz nommé Piso, par despit & envie qu'il portoit à sa gloire, feist tout le destourbier qu'il pouvoit à son appareil, & entre autres choses, luy eust cassé ses hommes de rame , il envoya devant ses vaisseaux faire le tour de l'Italie pour se rendre en la ville de Brundisium , & luy s'en alla ce pendant par la Thoscane à Rome , là où si tost qu'il fust sceu qu'il venoit, tout le peuple s'espandit hors la ville pour luy aller au devant, comme

s'il y eust eu ja long temps qu'il en fust sorty : & ce qui augmentoit encore davantage l'aïse que le peuple avoit de le voir , c'estoit la mutation plus prompte & plus soudaine qu'ilz n'avoient esperé , des vivres qui arrivoient tous les jours en abondance de tous costez , tellement qu'il s'en fallut bien peu , que Piso ne fust privé & depose de son consulat : car Gabinus en avoit ja le decret tout escrit & prest à presenter au peuple , mais Pompeius l'en engarda : & après avoir moyenné & fait tout doucement , ce qu'il avoit à faire , il se rendit en la ville de Brundisium , là où il monta en mer & fit voile. Et combien qu'il fust si pressé du temps & de l'occasion en ce voyage , qu'il passoit au long des bonnes villes sans entrer dedans , tant il avoit de haste : ce neantmoins il ne voulut point ainsi passer la ville d'Athenes , ains y descendit en terre , & après y avoir sacrifié aux dieux , & salué le peuple , s'en retourna rembarquer , & en sortant de la ville , il leut deux escripteaux qui avoient esté faits en sa louange , l'un au dedans de la porte , qui disoit ,

D'autant es tu dieu , comme
Tu te recognois homme :

Et l'autre au dehors de la mesme porte , qui disoit ,

Nous t'attendions, nous te voyons,
 Nous t'adorons, & convoyons.

XLIII. Et pource qu'ayant pris quelques cour-faires de ceulx qui se tenans encore ensemble alloyent escumans la mer çà & là, il les traitta humainement quand ilz luy requirent pardon, & tenant leurs vaisseaux & leurs personnes en sa puissance, ne leur feit mal quelconque, leurs compagnons en prenans bonne esperance, fouyrent les autres capitaines, ses lieutenans, & s'allèrent rendre, eulx, leurs femmes & leurs enfans, entre ses mains. Pompeius leur pardonna à tous ceulx qui se rendirent volontairement, par le moyen desquelz il vint à descouvrir & à fuyvre à la trace les autres, qu'il prit à la fin, lesquelz se sentans coupables de cas irremissibles se cachoyent : toutefois le plus grand nombre d'iceulx, & les plus riches & plus puissans avoyent retiré leurs femmes, leurs enfans, leurs biens & tout leur peuple inutile à la guerre, dedans des chasteaux & petites villetes fortes du mont de Taurus, & ce qu'il y avoit d'hommes de defense s'embarqua sur leurs vaisseaux devant la ville de Coracesium ¹, là où ilz attendirent Pompeius, & luy donnerent la bataille, en laquelle

¹ Ville de Cilicie, à l'extrémité, du côté de la Pamphylie, près de la mer Méditerranée, qui s'appelloit le long de cette côte, mer de Pamphylie.

ilz furent desfaits premietement en mer, puis assiegez en terre : mais tantost après ilz requirent qu'on les prist à mercy, & se rendirent eulx, leurs villes & leurs isles qu'ilz avoyent fortifiées, de sorte qu'elles estoient bien mal aisées non seulement à forcer, mais aussi à approcher. Ainsi fut ceste guerre achevée, & tous les coursfaires, en quelque part ou endroit qu'ilz fussent, chassiez hors de la mer en l'espace de trois mois, & non plus. Si y gaigna grand nombre de tous autres vaisseaux, oultre quatre vingts & dix galeres armées d'esperons d'airain : & quant aux personnes, qui estoient plus de vingt mille, il ne meit pas seulement en deliberation, s'il les devoit faire mourir : mais aussi de les laisser aller & s'escarter à leur vouldté, ou bien se rassembler encore de rechef, veu qu'ilz estoient en si grand nombre, presséz de la pauvreté, & tous hommes de guerre, il ne luy sembla pas que ce fust sagement fait. Parquoy discourant en luy mesme que l'homme de sa nature n'est point un animal indomptable ny farouche de soy mesme, ains au contraire, qu'il sort hors de son propre & de son naturel, quand il s'adonne à vice, & qu'il s'apprivoise par accoustumance petit à petit, & par changemens de lieux & de façons de vivre : attendu que les bestes mesmes qui de leur nature sont sauvages & farouches, s'addoul-

cissent bien & despouillent leur fierté naturelle , en les accoustumant peu à peu à une vie plus douce : il resolut de transporter ces coursaïres de la mer en la terre , & leur faire goustier la vie juste & innocente , en demourant es villes , & labourant la terre. Si en logea aucuns dedans quelques petites villes des Ciliciens qui estoient à demy desertes , & qui pour ceste cause les receurent volontiers , moyennant qu'on leur bailla des terres pour les nourrir. La ville aussi des Soliens ¹ avoit nagueres esté destruite & depeuplée par Tigranes le roy des Armeniens : la voulant remettre sus , il y en mit un nombre : & en logea semblablement plusieurs en la ville de Dyme au pais de Achaïe , qui lors avoit faulte d'habitans , & tenoit grande quantité de belles & bonnes terres.

XLIV. Or quant à cela , ses envieux & malvueillans l'en blasmoient : mais quant à ce qu'il fit en Candie , ceulx mesmes qui estoient ses plus grands & meilleurs amis , ne s'en pouvoient contenter. Car Metellus qui estoit parent de celui qui avoit fait la guerre quant & luy en Hespagne à l'encontre de Sertorius , avoit esté envoyé prateur & gouverneur en Candie , avant que Pompeius fust eleu capitaine general à l'en-

¹ Soles , autre ville de la Cilicie , près l'embouchure du fleuve Cydnus.

contre des courfaires, pource que la Candie estoit comme la seconde tefniere & retraitte de ces larrons, après la Cilicie : & Metellus y en ayant trouvé un grand nombre, les alloit par tout exterminant, & les faisoit mourir là où il les rencontroit : mais ceulx qui s'estoyent peu sauver jusques là, estans estroittement assiegez, envoyerent devers Pompeius le requerir de leur vouloir pardonner & les prendre à mercy, en luy remonstrant que celle isle estoit dedans les bornes de sa charge, comme celle qui en tous endroits que lon eust sceu la prendre, venoit à se rencontrer au dedans de la mesure que lon luy avoit prefixe sur la terre arriere de la mer. Pompeius les receut à mercy, & escrivit à Metellus qu'il se deportast de continuer ceste guerre, & quant & quant feir sçavoir aux villes qu'elles n'eussent à obeïr à ses commandemens : puis envoya l'un de ses lieutenans Lucius Octavius, lequel entra dedans les villes que Metellus tenoit assiegées, & combatit pour les courfaires. Cela rendit Pompeius, non seulement envié & haï, mais aussi subject à mocquerie, de prester ainsi la sauvegarde de son nom à des meschans larrons qui n'avoient ne dieu, ne loy, & leur attacher son autorité, ne plus ne moins qu'un preservatif, à fin de les respiter de la mort, pour une envie & opiniastreté qu'il prit à l'encontre

de Metellus. Car à bon droit reprend on mesme Achilles, & dit on qu'il ne fait point en homme sage, ains en jeune fol estourdy, & transporté par convoitise d'honneur, en ce qu'il faisoit signe aux autres Grecs au fort de la bataille, & leur defendoit de tirer coup à Hector, ainsi que dit Homere,

Que cest honneur autre ne luy leuast,
Et que trop tard puis il n'y arrivast.

Mais Pompeius fait bien pis : car il combatit pour des communs ennemis de tout le monde, à fin de priver de l'honneur du triumphe un præteur Romain, qui avoit beaucoup travaillé pour les destruire & exterminer : toutefois Metellus ne desista point pour ses defenses, ains ayant pris d'assault les courfaires, les fait executer à mort, & après avoir fait & dit plusieurs oultrages & injures à Octavius parmy son camp, le laissa en fin aller.

XLV. Si tost que la nouvelle fut arrivée à Rome que ceste guerre de courfaires estoit entierement parachevée, & que Pompeius n'ayant plus que faire, alloit visitant les villes, il y eut un tribun du peuple nommé Manilius, qui proposa un autre decret au peuple, que Pompeius prennant toutes les forces & toutes les provinces, qui estoient lors dessoubs la charge de Lucullus,

& de plus toute la Bithynie , que tenoit aussi Glabrio , allaſt faire la guerre aux roys Tigranes & Mithridates , retenant oultre cela tous-jours ſon armée de mer , & ſa puiſſance ſur la marine en la meſme qualité & condition qu'il la tenoit au paravant : Cela eſtoit , à brief parler , ſoubmettre à un ſeul homme toute la puiſſance entiere de l'empire Romain : car les provinces auſquelles ſa premiere commiſſion ne ſ'eſtendoit , comme la Phrygie , la Lycaonie , la Galatie , Cappadocie , Cilicie , la haulte Colchide & l'Armenie , toutes luy eſtoient adjouſtées par ceſte ſeconde , avec les armées & les forces deſquelles Lucullus avoit deſja batu ces deux puiſſans roys. Si ne ſ'arreſtoient pas tant ceulx du ſenat au tort que lon faiſoit en cela à Lucullus , que lon privoit de la gloire de ſes propres faiſts , pour la donner à un autre , qui luy ſuccederoit plus toſt à l'honneur du triumphe , que non pas au travail ny au peril de la guerre , combien qu'ilz cogneuſſent evidemment que lon luy faiſoit une grande injuſtice , & luy uſoit on d'une très-grande ingratitude : touteſois cela , diſ-je , ne les mouvoit pas encore tant , comme il leur deſplaifoit de voir eſtablir la puiſſance de Pompeius en une manifeſte tyrannie : & pourrant alloient ſ'admoneſtans les uns les autres , & ſ'entredonnans courage de reſiſter fort & ferme à

cest edict, & de ne laisser point ainsi perdre leur liberté. Toutefois quand le jour fut escheu, auquel le decret devoit estre passé, ilz eurent si grande peur d'irriter le peuple, que le courage leur faillit à tous, & n'y eut personne qui ozaît dire un mot à l'encontre, sinon Catullus, qui l'accusa & le blasma fort longuement : mais à la fin voyant qu'il ne pouvoit gagner un seul homme du peuple, il se prit à crier aux senateurs à haulte voix par plusieurs fois, qu'ilz advisassent donques de trouver quelque montagne ou quelque haulte roche, sur laquelle ilz se peussent retirer pour sauver & defendre leur liberté, ainsi comme autrefois anciennement avoyent fait leurs ancestres. Mais nonobstant tout cela, le decret fut passé & autorisé par les voix de toutes les lignées, à ce que lon dit : & par ainsi fut Pompeius absent fait seigneur presque de tout ce que Sylla par force d'armes & effusion de sang humain, s'estant fait maistre de Rome, avoit eu en sa puissance.

XLVI. Quand il receut les lettres par lesquelles on luy mandoit ce qui avoit esté ordonné par le peuple en sa faveur, lon dit qu'en la presence de ses familiers amis, qui lors estoient autour de luy, & s'en esjouissoient avec luy, il fronça ses sourcilz & frappa sa cuisse, comme estant desormais fasché & ennuyé de tant de

charges les unes sur les autres , en disant : « O
» dieu ! ne seray-je donques jamais au bout de
» tant de travaux ? N'eust il pas mieulx valu pour
» moy , que j'eusse esté quelque petite personne
» basse & incongneue , que d'estre ainsi conti-
» nuellement à la guerre le harnois sur le dos ?
» Ne verray-je jamais le temps , que me des-
» pestrant des lacs de ceste envie, je puisse vivre
» doucement avec ma femme & mes enfans , aux
» champs en ma maison » ? Telles paroles alloit
disant Pompeius : mais ses plus privez amis mes-
mes ne peurent endurer ne supporter ceste trop
evidente simulation , cognoissans très bien que
oultre son ambition naturelle & convoitise de
dominer, il estoit très aise d'avoir obtenu ceste
charge, pour le different & la querelle qu'il avoit
avec Lucullus : aussi le descouvrirent bien incon-
tinent les effects.

XLVII. Car il envoya soudain ses mande-
mens par tout , par lesquelz il enjoignoit très
expressement à toutes sortes de gens de guerre
qu'ilz eussent à se retirer par devers luy, & fait
aussi venir tous les princes & roys compris de-
dans le destroit de sa charge, & en allant par
païs ne laissa rien qu'il ne remuast & changeast
de tout ce que Lucullus avoit fait & ordonné,
jusques à remettre à plusieurs les peines, & à
oster les graces qu'il avoit données, & s'opi-

niastra en somme à faire toutes choses pour donner à cognoistre à ceulx qui suyvoyent & honoroyent Lucullus, qu'il n'avoit autorité ne puissance quelconque : dequoy comme Lucullus feist ses plaintes, leurs amis furent d'avis qu'ilz s'entreveissent pour parler l'un avec l'autre : ce qu'ilz feirent au païs de la Galatie : & comme deux grands chefs d'armées Romaines qui avoyent fait de belles & triumpantes choses, les sergens portoyent devant eulx les faisceaux de verges entortillées de rameaux de laurier. Mais quand ilz se rencontrèrent, Lucullus venoit de lieux couverts & umbragez d'arbres & de verdure, & Pompeius au contraire avoit passé par un grand païs aride & sec, où il n'y avoit arbre quelconque : parquoy les sergens de Lucullus voyans les branches de laurier que portoyent ceulx de Pompeius toutes seiches & fenées, leur en baillerent des leurs qui estoient fresches & vertes, dont ilz ornerent & entortillerent leurs verges & leurs haches. Cela sembla proprement estre un signe que Pompeius venoit pour oster & emporter le prix d'honneur à Lucullus. Vray est que Lucullus avoit esté consul devant Pompeius, aussi estoit il plus aagé que luy : mais la dignité de Pompeius estoit plus grande, d'autant qu'il avoit desja triumpué par deux fois. Si furent leurs propos à la premiere rencontre les plus gracieux

& les plus honnestes qu'il est possible : car ilz magnifierent honorablement les haults faicts l'un de l'autre, & dirent qu'ilz s'esjouissoient chacun de la prosperité de son compagnon : mais à la fin la conclusion n'en fut ny belle ny bonne, ains vindrent jusques à grosses paroles, Pompeius reprochant à Lucullus son avarice, & Lucullus à Pompeius son ambition, de sorte que leurs amis eurent bien à faire à les departir. Sortant de là Lucullus distribua des terres en la Galatie^r, comme par luy conquises, & donna d'autres graces & presens à qui bon luy sembla : & Pompeius estant campé assez près de luy defendoit par mandement qu'il envoyoit par tout, que lon n'obeïst à chose quelconque qu'il ordonnast, & si luy osta tous ses gens de guerre, exceptez seize cents, encore estoient ce de ceulx qu'il estimoit qui luy seroyent inutiles pour leur arrogance, & qui vouloyent mal à Lucullus. Davantage pour diminuer la gloire de ses faicts, il disoit publiquement, que Lucullus avoit combatu la pompe & la monstre seulement de ces deux roys, & luy avoit laissé à combattre leur vraye, faine & assagie puissance, pource que Mithridates avoit lors mis son recours aux armes, aux pavois, espées & chevaux : & Lucullus pour sa revenge disoit, que Pompeius s'en alloit com-

^r Au midi de la Paphlagonie.

batte à un fantafme & à une ombre feulement ; ne plus ne moins qu'un oyseau de cueur lasche , ayant tousjours accoustumé de se jetter sur des corps morts , que d'autres ont portez par terre , & à venir dissiper les reliques des guerres faites par autrui , comme il avoit fait , en s'attribuant l'honneur de la desfaiite de Sertorius , de Lepidus , de Spartacus , là où Metellus , Crassus & Catullus les avoyent desfaits : & pourtant qu'il ne falloit point s'esmerveiller s'il avoit cherché les moyens de se faire supposer à la gloire & aux triumphes des royaumes de Pont & d'Arménie , veu qu'il avoit tant fait par ses menées , qu'il s'estoit ingeré , comment que ce fust , jusques au triumphe des esclaves fugitifz.

XLVIII. Depuis Lucullus s'en estant party , Pompeius disposa bonnes garnisons par toutes les costes & mers qu'il y a depuis la province de la Phœnicie ¹ , jusques au royaume du Bosphore : & cela fait , prit son chemin par terre pour aller en personne trouver Mithridates , lequel avoit en un camp trente mille hommes de pied , & deux mille chevaux ensemble , & neantmoins ne s'ozoit à tout cela presenter à la bataille , ains s'estoit campé premierement dessus une montagne forte d'affiette , & malaisée à

¹ Elle s'étend du nord au midi , depuis la Seleucide jusqu'à la Palestine.

affaillir, toutefois il l'abandonna depuis, à cause qu'il n'y trouvoit point d'eaux : mais il n'en fut pas plus tost party, que Pompeius s'en saisit incontinent : & conjecturant par la nature des plantes & des arbres qui y verdoyoyent, & semblablement par des vallons & cavains qu'il y voyoit, que selon raison il y devoit aussi avoir des sources de fontaines, il commanda que lon y creusast des puits par tout, de maniere qu'en peu d'heure son camp eut très grande abondance d'eau, & s'esmerveilla fort comment Mithridates avoit ignoré cela si longuement : à la fin, il alla camper tout à l'entour de luy, & l'enferma de muraille dedans son propre camp, là où après avoir enduré le siege quarante & cinq jours, Mithridates avec l'essite de toute son armée s'en fouit, sans que Pompeius en apperceust rien, ayant premierement fait occire toutes les personnes inutiles & les malades de son camp.

XLIX. Depuis Pompeius le retrouva une autre fois près la riviere d'Euphrates, & s'en alla loger tout joignant luy : mais craignant qu'il ne passast la riviere premier qu'il y peust estre à temps pour l'empescher, il feit desloger son armée & marcher en bataille dès la minuiet : environ laquelle heure justement, on dit que Mithridates eut en songe une vision qui luy pronostiquoit ce qui luy devoit advenir : car il luy fut advis, qu'ayant

le vent en poupe il cingloit à pleines voiles au beau milieu de la mer de Pont, & qu'il voyoit desja le destroit du Bosphore, dont il s'esjouïssoit fort, & en faisoit grande feste à ceulx qui naviguoient quant & luy, comme celuy qui pensoit estre desja certainement arrivé à port de salut, mais que soudain il se trouva destitué de toutes choses errant à la mercy des vents parmy les undes de la mer sur une petite piece de sa navire rompue. Et comme il estoit en la destresse de ceste illusion, il arriva quelques uns de ses plus familiers, qui luy dirent, que Pompeius estoit desja si près d'eulx, qu'il n'y avoit plus autre ordre, sinon qu'il falloit combattre pour defendre leur camp. Si commencerent incontinent les capitaines à renger les troupes en bataille pour combattre: & Pompeius estant adverty qu'ilz se preparoyent pour le recevoir, fait doubte d'exposer ses gens au hazard du combat en tenebres, & fut d'advis qu'il valoit mieulx les enfermer seulement tout à l'entour pour leur oster tout moyen de s'en pouvoir fouir; puis quand le jour seroit venu, qu'il les feroit alors assaillir tout à l'aise par ses gens qui estoient meilleurs combatans: mais les plus vieux capitaines & chefs des bandes luy feirent tant de prieres & tant de remonstrances, que finalement ilz l'emeurent à faire tout promptement

donner l'assault, pource qu'il ne faisoit pas si obscur que lon ne veist du tout goutte, à cause que la lune qui estoit basse, & prochaine de son coucher, rendoit encore assez de clarté pour voir les corps des hommes: mais pource qu'elle baïssoit fort, les ombres qui s'estendoyent bien plus loing que les corps, ataignoyent de tout loing les ennemis, de sorte qu'ilz ne pouvoyent pour cela juger certainement la vraye distance qu'il y avoit jusques à eulx, & comme s'ilz eussent esté tout auprès d'eulx, ilz leur lanceoyent leurs dards & javelots, dont ilz n'assenoyent personne, pource qu'ilz estoient trop loing. Ce que voyans les Romains, leur coururent sus avec grands criz: mais les Barbares ne les oserent attendre, ains s'effroyerent, & leur tournerent le dos fuyans à val de rouverte, là où il en fut fait une grande boucherie: car il y en eut de tuez là plus de dix mille, & fut leur camp mesme pris.

L. Quant à Mithridates, il fendit la presse des Romains dès le commencement de la meslée, avec bien environ huit cents chevaux, & passa outre: mais incontinent ses gens s'escarterent, les uns deçà, les autres delà, en maniere qu'il se trouva seul avec trois autres, dont l'un estoit Hypsicratia l'une de ses concubines, laquelle avoit bien tousjours esté hardie & avoit eu cueur d'homme, tellement que Mithridates pour l'a-

mour de cela l'appelloit Hypsicrates : mais lors estant vestue en homme d'armes Persien, & ayant le cheval de mesme, elle ne se trouva jamais lasse ny recreuë pour quelques longues courses que fait le roy, ny jamais ne se lassa de servir sa personne, ny de penser son cheval, jusques à ce qu'ilz arriverent en un chasteau fort, qui s'appelloit Inora, qui estoit plein d'or & d'argent & d'autres precieux meubles du roy. Si y prit Mithridates force riches accoustremens, qu'il distribua à ceulx qui se r'assemblerent là autour de luy, & donna à chascun de ses amis un mortel poison pour porter quant & eulx, à fin que nul d'eulx ne tumbast vif s'il ne vouloit, entre les mains des ennemis. De là il voulut prendre son chemin en Armenie devers le roy Tigranes : mais Tigranes le luy envoya au devant defendre, & qui plus est, fait crier à son de trompe, qu'il donneroit cent talents ¹ à qui l'occiroit : au moyen dequoy, passant la source du fleuve d'Euphrates, il s'en fouit à travers le país de la Colchide.

LI. Ce pendant Pompeius entra dedans le país d'Armenie à l'instance du jeune Tigranes, qui s'estoit desja rebellé contre son pere, & estoit allé rencontrer Pompeius sur la riviere d'Araxes, laquelle sourd ès mesmes lieux presque que fait celle d'Euphrates : mais elle prent son cours de-

¹ Soixante mille escus. *Amyot.* 466, 875 livres de notre monnoie.

vers le soleil levant , & va tumber en la mer Caspiene. Si marcherent avant en pais eulx deux ensemble, recevans les villes qui se rendoyent à eulx. Mais le roy Tigranes , qui peu avant avoit presque esté destruit & finé par Lucullus, entendant que Pompeius estoit doulx & bening de sa nature , receut garnison en ses fortes places & ses maisons royales , & prenant avec soy ses parents & amis , se meit en chemin pour aller se rendre luy mesme à Pompeius. Quand il fut arrivé estant à cheval jusques tout joignant la closture du camp , il en sortit deux sergens de Pompeius , qui luy feirent commandement de descendre de cheval , & entrer dedans à pied , pource que jamais on n'avoit veu homme à cheval dedans le camp des Romains. Tigranes non seulement obeït à cela , mais davantage desceignit son espée qu'il leur bailla : & finalement quand il fut assez près de Pompeius , ostant son chappeau royal de dessus sa teste , il le voulut mettre devant les piedz de Pompeius , & en se prosternant en terre le plus honteusement du monde se demettre jusques à luy embrasser les genoux : mais Pompeius luy mesme le prevint , & le prenant par la main le mena seoir auprès de luy à l'un de ses costez , & son filz à l'autre , puis leur dit à tous deux , « Quant » aux autres pertes que vous avez faictes , il vous

» en fault prendre à Lucullus, lequel vous a osté
 » la Syrie, la Phœnicie, Cilicie, Galatie & la
 » Sophene¹ : mais ce qui vous est demouré
 » jusques à mon temps, je le vous laisse encore,
 » en payant aux Romains pour l'amende du tort
 » que vous leur avez fait, six mille talents², &
 » veux que ton filz ait pour sa part la Sophene ».
 Tigranes accepta ces conditions de paix, &
 adonc les Romains le saluerent roy, dont il fut
 si aise, qu'il promet de donner à chasque simple
 soudard la valeur de cinq escus³, & à chasque
 centenier cent⁴, & à chaque coulommel de mille
 hommes six cents⁵ : mais son filz en fut au con-
 traire très mal content : tellement que Pompeius
 l'ayant envoyé semondre de venir soupper en
 son logis, il feit responce que ce n'estoyent pas
 de telles faveurs, ny de telz honneurs, qu'il
 attendoit de Pompeius, pource qu'il trouveroit
 assez d'autres Romains qui luy en feroient
 autant. Pour ces paroles Pompeius le feit pren-
 dre prisonnier, & garder pour estre mené en
 triumphe à Rome. Peu de temps après Phraates
 roy des Parthes envoya devers Pompeius luy

¹ Au nord de la Comagène & de la Mésopotamie.

² Trois millions six cents mille escus. *Amyot.* 28,012,500 livres de notre monnoie.

³ Une demi-mine.

⁴ Une mine.

⁵ Un talent.

demander

demander ce jeune prince , comme étant son gendre , & aussi luy remontrer qu'il se devoit contenter de terminer ses conquestes à la riviere d'Euphrates. A quoy Pompeius luy fait response, que le jeune Tigranes touchoit de plus près à son pere qu'à son beau pere : & quant aux bornes de ses conquestes , qu'il limiteroit là où le droit & la justice le requerroit.

LII. Au demourant laissant Afranius en l'Armenie pour la garde du país , il passa à travers les nations qui habitent au long du mont de Caucasus , poursuyvant Mithridates , desquelles nations les deux plus grandes & plus puissantes sont les Albaniens & les Hiberiens ; dont les Hiberiens s'estendent jusques aux montagnes Moschiques & au royaume de Pont , & les Albaniens gisent devers le soleil levant & la mer Caspiene. Ceulx cy du commencement ottroyerent passage par leurs terres à Pompeius qui le leur envoya demander. Mais l'hyver surprit les Romains en leur país , & avec cela la feste des Saturnales escheut aussi pendant qu'ilz y estoient. Et lors les Barbares s'assemblerent plus de quarante mille combatans en un camp , & passans la riviere de Cynus ; laquelle descend des montagnes Hiberienes ; & recevant celle d'Araxes qui passe à travers l'Armenie , se va descharger par douze bouches.

en la mer Caspiene : toutefois les autres disent que ce Cyrnus ne reçoit pas l'Araxes , mais qu'il va à par soy tumber en la mesme mer près des bouches de l'autre : passans , dis-je , la riviere d'Araxes , ilz allerent courir sus aux Romains. Pompeius les eust bien peu garder de passer la riviere s'il eust voulu , mais neantmoins il les laissa passer à leur aise , puis quand ilz furent tous passez , il leur alla à l'encontre & les desfeit en bataille rengée , & en occit sur le champ un très grand nombre : toutefois depuis il pardonna l'offense à leur roy , qui l'en envoya requerir par ambassadeurs exprès , & feit paix avec luy ; & partant de là tira contre les Hiberiens , qui n'estoyent pas moins en nombre que les premiers , mais bien meilleurs combatans , & qui desiroient singulierement faire quelque bon service au besoing à Mithridates , & repoulser arriere Pompeius. Ces Hiberiens ne furent jamais subjects à l'empire ny des Perses , ny des Medois , & si eschapperent la subjection mesme des Macedoniens , pour autant qu'Alexandre ne s'arresta point au país d'Hyrkanie : toutefois Pompeius alors les desfeit en une grosse & sanglante bataille : car il en demoura neuf mille morts sur la place , & en fut pris bien dix mille : puis au sortir de là il entra dedans le país de la Colchide , là où Servilius

l'alla rencontrer joignant la riviere de Phasis avec la flotte de vaisseaux, dont il gardoit la mer de Pont.

LIII. Or d'aller poursuyvre Mithridates, qui s'estoit caché parmy les nations voisines du détroit de Bosphore¹ & des maretz Mæotides, il y avoit beaucoup de difficultez : & davantage, il eut encore nouvelles que les Albaniens s'estoyent une autre fois rebellez, contre lesquels son courroux & obstiné desir d'en faire la vengeance le tiroient : à l'occasion dequoy il repassa de rechef la riviere de Cynus, avec grande peine & grand danger : pource que les Barbares avoyent remparé un long espace de l'autre rive, avec force arbres grands & gros, traversez en croix : & encore après qu'il l'eut à toute peine traversé, il se trouva en un fascheux país, où il avoit à faire bien long chemin sans trouver aïssance d'eau quelconque : au moyen dequoy il feit emplir d'eau bien dix mille peaux de chevre, & marcha en avant pour rencontrer ses ennemis, qu'il trouva auprès de la riviere d'Abas, où ilz avoyent soixante mille combatans à pied, & douze mille à cheval, mais tous mal

¹ Ce Bosphore n'est pas celui de Thrace, mais le Bosphore Cimérien qui réunit les Palus-Mæotides avec le Pont-Euxin, & sépare la Chersonèse Taurique, aujourd'hui la Crimée de la Sarmatie d'Asie.

armez , de peaux de bestes sauvages la plupart. Leur chef estoit le frere propre du roy nommé Cosis : lequel quand se vint aux coups de main , s'adressa à Pompeius mesme , & luy tira un coup de javelot qui l'assena à l'endroit propre où default la cuirace : mais Pompeius luy en tira un autre d'une javeline , dont il le percea de part en part , & le porta roide mort en terre. Aucuns disent qu'en ceste bataille il y eut des Amazones qui combattirent du costé des Barbares , estans descendues des montagnes qui sont au long du fleuve de Thermodon , pource qu'après la desconfiture , les Romains en despoillant les morts trouverent des boucliers & des brodequins , telz que souloyent porter les Amazones : mais il ne s'y trouva jamais un seul corps de femme : aussi habitent elles au costé de la montagne de Caucasus , regardant vers la mer d'Hyrkanie , & ne confinent point aux Albaniens ; ains y a entredeux les Geles & les Leleges , avec lesquelz elles hantent deux mois par chascun an seulement , se trouvant ensemble au long de la riviere de Thermodon , & tout le reste de l'année elles vivent & demeurent à part.

LIV. Après ceste dernière bataille Pompeius s'estant mis en chemin pour penetrer jusques au païs d'Hyrkanie , & à la mer Caspiene , il fut contraint de s'en retourner arriere pour la

multitude grande des serpens venimeux & mortelz qu'il y trouva, en estant approché de trois journées. Si s'en retourna en Armenie la mineur, là où il receut des presens que luy envoyerent les roys des Elymiens & des Medois, & leur rescrivit amiablement : mais il envoya Aphranius avec partie de son armée contre le roy des Parthes, lequel estoit entré en armes dans la province Gordiane, où il travailloit les subjects du roy Tigranes : mais il en fut chassé, & poursuivy jusques à l'Arbelitide. Au demourant de toutes les amies & concubines du roy Mithridates qui luy furent amenées, il n'en cogneut jamais pas une, ains les renvoya toutes à leurs parents & amis, pource qu'elles estoient la plus part filles de princes, seigneurs ou capitaines. Toutefois Stratonice, celle qui avoit plus de credit autour de luy, & à qui il avoit baillé en garde le chasteau où estoit la plus grande quantité de son or & de son argent, estoit fille d'un musicien chancre, lequel n'estoit au demourant gueres riche, sinon d'ans, dont il estoit fort chargé. Mais ayant un soir en un festin chanté devant Mithridates, elle le ravit si fort de son amour, qu'il voulut la nuit mesme l'avoir à coucher avec luy, & son vieillard de pere s'en alla en sa maison tout fâché, de ce que le roy ne luy avoit pas daigné dire seulement

une gracieuse parole : mais le lendemain matin à son réveil, il fut tout esbahy qu'il trouva en son logis les tables toutes chargées de vaisselle d'or & d'argent, une grande suite de serviteurs, de valets de chambre & de pages, & qu'on luy apporta de fort beaux & riches accoustremens, & devant la porte un cheval bien équipé, ainsi comme l'estoyent ceulx des mignons du roy, quand ilz vouloyent aller par la ville. Si pensa que ce fust un rour de mocquerie dont on luy voulust jouer, tellement qu'il s'en voulut foudre, n'eust esté que les serviteurs le reteindrent, qui luy dirent, que c'estoyent les biens d'un grand riche homme de naguères mort, que le roy luy avoit donnez, & que tout ce qu'il en voyoit là n'estoit qu'un eschantillon, par maniere de parler, au prix des autres meubles & possessions qui estoyent en celle succession : ainsi commençant petit à petit à le croire, il vestit à grande peine la robbe de pourpre que lon luy avoit apportée, & montant à cheval s'en alla promener par la ville, criant, « Tout cecy est à moy, » tout cecy est à moy ». Dequoy comme quelques uns se mocquassent, il leur dit qu'ilz ne se devoient point esmerveiller de l'ouir crier ce qu'il disoit, mais plus tost de ce qu'il ne jettoit des pierres à ceulx qu'il rencontroit parmy les rues, tant il estoit transporté de joye hors

de foy. Stratonice donques eftant née de telle race & de tel fang , livra la place entre les mains de Pompeius , & luy offrit encore plufieurs beaux & riches prefens , dont il ne prit que ceulx qui pouvoyent fervir ou à orner les temples des dieux , ou à embellir fon triumphe , & voulut que Stratonice reteintft tout le demourant pour elle.

LV. Semblablement auffi , luy ayant le roy des Hiberiens envoyé un chalit , une table & une chaire , le tout d'or maffif , en le priant de les vouloir recevoir de luy en don , il configna le tout entre les mains des treforiers pour en tenir compte à la chofe publique. En un autre chafteau nommé Canon , il trouva quelques papiers & quelques lettres miffives fecrettes de Mithridates qu'il leut avec grand plaifir , pource que par icelles il defcouvroit evidemment quelle eftoit la nature de ce roy : car il y avoit des memoires , par lefquelz il apparoiſſoit qu'il avoit empoifonné , outre plufieurs autres , fon propre filz Ariarathes , & Alcaus le Sardianien , pource qu'il avoit emporté devant luy le prix de la courſe des chevaux. Il y avoit auffi des interpretations de songes que luy ou ſes femmes avoyent songez , & des lettres laſcives d'amour , de Monime à luy , & de luy à elle. Theophanes dit davantage que lon y trouva un difcours de

Rutilius, par lequel il luy suadoit & l'incitoit à faire mourir tous les Romains qui estoient en l'Asie, ce que toutefois lon estime avec grande raison estre un mensonge malignement controuvé par cestuy Theophanes, lequel haïssoit Rutilius, pour autant à l'aventure qu'il ne luy ressembloit en chose quelconque : ou peult estre aussi pour gratifier à Pompeius, le pere duquel Rutilius décrit en ses histoires pour le plus meschant homme du monde. Au partir de là Pompeius tira vers la cité d'Amisus, là où son ambition le conduisit à faire des actes, par lesquelz il se condamnoit soy mesme en ce, que au paravant il avoit fort repris & blasmé Lucullus, de ce que vivant encore l'ennemy, il avoit fait des mandemens & ordonnances, distribué des dons, & conféré des honneurs, que les capitaines victorieux avoyent accoustumé de faire après que la guerre estoit de tout poinct achevée, & qu'ilz l'avoient conduite à fin : luy mesme, estant encore Mithridates au royaume de Bosphore le plus fort, & y ayant assemblé une grosse & puissante armée, fait tout ce qu'il blasmoit & reprenoit en autrui, ordonnant des provinces, & distribuant des dons & presens à chascun selon son merite : estans là venus devers luy douze roys Barbares, avec plusieurs autres princes, seigneurs & capitaines, pour ausquelz gratifier, en

rescrivant au roy des Parthes, il ne daigna mettre le tiltre que les autres avoyent accoustumé de luy donner en la superscription de leurs lettres, les nommans le roy des roys.

LVI. Mais il luy prit une grande envie & grand desir de recouvrer la Syrie, & de penetrer à travers l'Arabie jusques à la mer Rouge, à fin d'estendre ses victoires & conquestes de tous costez, jusques à la grande mer Oceane, qui environne la terre. Car en la Libye il fut le premier des Romains qui alla victorieux jusques à la grande mer : & d'autre costé en Hespagne il eslargit l'empire Romain, & le termina à l'Ocean Atlantique : & pour le troisieme costé, nagueres en poursuyvant les Albaniens, il s'en fallut bien peu qu'il n'atteinist jusques à la mer d'Hyrcanie. Si se meit en chemin avec intention d'estendre le circuit de son voyage jusques à la mer Rouge, mesmement qu'il voyoit que Mithridates estoit bien mal aisé à chasser & à prendre par armes, & plus difficile à vaincre quand il fuyoit, que quand il combattoit, au moyen dequoy il dit qu'il luy laisseroit à la cueüe un plus fort & plus aspre ennemy que soymesme, ce seroit la famine : car il ordonna des gardes avec nombre suffisant de vaisseaux, pour espier les marchands qui navigueroient au pais de Bosphore pour y porter vivres ou autres marchan-

difes, ayant estably peine de mort à ceulx qui le feroient : puis avec la meilleure partie de son armée, se meit en chemin, sur lequel il trouva les corps des Romains qui avoyent esté desfaits par Mithridates sous la charge de Triarius, & n'avoient point encore esté inhumez : si les feit tous recueillir & enterrer honorablement & magnifiquement. Ce qui ayant esté omis par Lucullus, fut, à mon advis, l'une des principales causes de le faire haïr à ses gens : & ayant subjugué par Afranius les Arabes habitans autour du mont d'Amanus, il descendit luy mesme en personne dedans la Syrie, de laquelle il feit un gouvernement & une province acquise à l'empire Romain, pource qu'elle n'avoit nul roy legitime : & conquist aussi la Judée, où il prit le roy Aristobulus, & y fonda aucunes villes, & en affranchit & delivra de servitude d'autres, qui estoient usarpées & detenues à force par des tyrans qu'il feit punir : mais le plus du temps qu'il y consuma, fut à juger les différens, & à pacifier par arbitrage les querelles & différens qui estoient entre les villes franches, les princes & les roys, envoyant de ses amis aux lieux où il ne pouvoit aller luy mesme. Comme ayant esté élu arbitre entre les Parthes & les Armeniens, touchant un certain païs qu'ilz pre-tendoyent les uns & les autres, il y envoya trois

deputez , pour en decider & juger definitive-
ment : car si la renommée de sa puissance estoit
grande, celle de sa vertu, de sa justice & bonté,
ne l'estoit pas moins, tellement qu'elle couvroit
beaucoup de fautes , que commettoient ses
familiers, & ceulx qui avoyent credit autour
de luy : car il estoit de si bonne nature , qu'il
ne les pouvoit engarder de mal faire , ny chas-
tier & punir quand ilz avoyent forfait : mais il
se deportoit en sorte vers ceulx qui s'en venoyent
plaindre , ou qui avoyent à faire à luy , qu'ilz
estoyent contraincts d'endurer patiemment leurs
convoitises , avarices & importunitéz.

LVII. Celuy de ses domestiques qui avoir
plus de credit autour de luy , estoit un serf affran-
chy nommé Demetrius , lequel estoit bien advisé
au demourant, excepté qu'il abusoit un peu de
sa fortune , auquel propos on fait de luy un tel
compte : Cato le philosophe estant encore jeune,
mais ayant desja grande reputation de sagesse &
tenant bien son renc , s'en alla en Antiochie pour
voir la ville , n'y estant point Pompeius , & quant
à luy , selon sa coustume , il cheminoit à pied ,
& ses amis qui l'accompagnoient par honneur,
estoyent à cheval. Si apperçeut à l'entrée de la
ville une troupe de gens vestus de robes blan-
ches , & le long de la rue d'un costé des en-
fans , & de l'autre costé des garçons rengez en

manière de haye , dont il se courroucea , pensant que ce fust pour l'amour de luy & pour luy faire honneur , que lon feist ceste procession , ce qu'il ne vouloit aucunement. Si commanda à ses amis qu'ilz descendissent de cheval & marchassent à pied comme luy : mais quand ilz furent près la porte de la ville , le maistre des ceremonies qui conduisoit toute celle procession , ayant un chapeau de fleurs sur sa teste , & une verge en la main , leur vint au devant , qui leur demanda , où ilz avoyent laissé Demetrius , & quand il viendrait. Les amis de Caton se prirent à rire de ceste demande : mais Caton ne fit que dire , « O pauvre malheureuse ville » ! & passa oultre. Toutefois Pompeius mesme estoit cause qu'on luy portoit moins d'envie que lon n'eust fait autrement , pource que l'on voyoit l'audace , dont ce Demetrius ufoit envers luy , & qu'il ne le prenoit point à mal , ny ne s'en courrouçoit point. Car lon dit que bien souvent , quand Pompeius avoit convié quelques gens de venir manger en son logis avec luy , il recueilloit luy mesme les conviez , & attendoit qu'ilz fussent tous venus , que ce Demetrius estoit desja à table , & avoit presumptueusement sa robbe sur la teste baissée jusques aux oreilles. Et avant qu'il fust de retour de ce voyage en Italie , il avoit desja acquis les plus belles maisons de plaïssance , &

les plus beaux parcs & vergers qui fussent à l'entour de Rome, & avoit aussi de très sumptueux jardins, que lon surnommoit communement les jardins de Demetrius, combien que son maistre Pompeius jusques à son troisieme consulat, fust logé simplement & petitement. Mais depuis ayant fait bastir ce tant magnifique & tant renommé theatre, que lon appelle le theatre de Pompeius, il feit aussi edifier auprès, comme un appenry de son theatre, une autre maison, laquelle fut bien plus honorable que la premiere, mais où il n'y eut rien de trop pourtant : de sorte que celui qui en fut seigneur après luy, quand il entra dedans, s'esmerveilla, & demanda : « Et où est-ce que » mangeoit le grand Pompeius » ? ainsi le compte lon.

LVIII. Au demourant le roy des Arabes habitans à l'entour de la forteresse qui se nomme Petra, n'ayant jusques là jamais fait compte de la puissance des Romains, en eut alors grande peur, & escrivit à Pompeius qu'il estoit prest & appareillé de faire tout ce qu'il luy plairoit luy commander : & Pompeius voulant esprouver ce qu'il avoit sur le cueur, mena son armée devant ceste place de Petra : mais ce voyage ne fut approuvé de gueres de gens, pource que lon l'interpretoit, que c'estoit une occasion cherchée pour

éviter d'aller après Mithridates, contre lequel on vouloit qu'il tournast plus tost toutes ses forces, comme contre l'ancien ennemy, qui commenceoit à se remettre sus, & se preparoit pour mener, à ce que lon entendoit, une grosse & puissante armée à travers la Tartarie & la Hongrie, en Italie. Mais Pompeius estimant que plus tost il luy mineroit sa puissance, en luy laissant faite la guerre, qu'il ne le prendroit au corps en fuyant, ne se voulut pas travailler pour neant à le poursuyvre : & à ceste cause alloit cherchant ces entrejects d'autres guerres, & tirant ainsi le temps en longueur, jusques à ce que finalement la fortune luy denoua la difficulté de ce nœud : car estant ja près de la place de Petra, & ayant ja logé son camp pour ce jour là, ainsi comme il s'exercitoit à picquer & manier un cheval à l'entour de son camp, il arriva des messagers du royaume de Pont, qui luy apportoyent de bonnes nouvelles, comme lon pouvoit cognoistre & juger de tout loing aux fers de leurs javelines, pourco qu'ilz estoient entortillez de branches de laurier. Ce que les soudards ayans apperceu, s'en coururent incontinent devers luy, qui vouloit premierement achever son exercice, que lire ses lettres : mais comme ilz criaissent & le pressassent, il descendit de cheval, & prenant les lettres s'en retourna en son

camp, là où il n'y avoit point de perron hault élevé, dont il peust harenguer, & si n'avoient pas les soudards la patience d'en faire un à la mode du camp, que les gens de guerre font eulx mesmes avec de gros gazons & grosses mottes de terre qu'ilz entassent les unes sur les autres : mais de haste & d'affection grande qu'ilz avoient d'entendre ce que portoyent ces lettres, ilz amasserent en un monceau les bastines & selles des chevaux, sur lequel Pompeius montrant leur declara, comme Mithridates estoit mort, s'estant luy mesme fait mourir, pourautant que son filz Pharnaces s'estoit soubslévé & avoit pris les armes contre luy, & s'estoit emparé de tout ce que possedoit son pere, luy escrivant qu'il le tenoit & gardoit pour soy & pour les Romains.

LIX. Ces nouvelles entendues, tout le camp, comme lon peult penser, en demena grande joye : & se meit tout le monde à sacrifier aux dieux pour leur rendre graces, & à faire bonne chere, comme si en la personne seule de Mithridates, il leur fust mort un nombre infiny d'ennemis : & Pompeius par ce moyen ayant trouvé fin à ceste guerre plus facilement qu'il n'avoit esperé, se partit incontinent de l'Arabie, & ayant traversé en peu de rems les provinces qui sont entre deux, feit tant par ses journées, qu'il arriva

en la ville d'Amisus, là où il trouva force presens que lon luy avoit apportez de la part de Pharnaces, & plusieurs corps de sang royal, entre lesquelz estoit celuy mesme de Mithridates, que lon ne pouvoit pas bien recognoistre au visage, à cause que ses serviteurs avoyent oublié d'en faire escouler ou dessécher la cervelle, toutefois encore le recognoissoit on bien à quelques cicatrices qu'il avoit en la face, au moins ceulx qui desiroient le voir : car quant à Pompeius, il ne le voulut jamais regarder, de peur d'irriter encontre soy l'ire vengeresse des dieux, ains l'envoya en la ville de Sinope : mais bien s'esmerveilla il de voir la grandeur, & la sumptuosité & magnificence des vestemens & des armes qu'il portoit : toutefois il y eut un nommé Publius, qui ayant defrobbé le fourreau de son espée ; lequel avoit cousté trois cents talents¹ à faire, le vendit à Ariarathes : & un autre nommé Caius, qui avoit de jeunesse esté nourry avec Mithridates, ayant semblablement defrobbé le chappeau, qui estoit fait d'un merveilleux artifice, le donna à Faustus, filz de Sylla, qui le luy demanda, dont Pompeius ne sceût rien pour lors : mais Pharnaces l'ayant descouvert, en feit punir ceulx qui les avoyent defrobbez.

¹ Cent quatre vingts mille escus. *Amyot.* 1,073,811 livres de notre monnoie.

LX. Après donques avoir donné ordre aux affaires de delà , & y avoir estably toutes choses , il se meit alors en chemin pour s'en retourner en toute joye & toute feste : car en passant par Mitylene , il affranchit de toutes charges la ville pour l'amour de Theophanes , & assista à un jeu de prix qu'ilz ont accoustumé de faire tous les ans , où les poëtes recitent de leurs œuvres à l'envy les uns des autres , n'ayans ceste fois là pris autre subjest de leurs compositions que les faicts & gestes de Pompeius. Il trouva le theatre où se faisoient ces jeux , de belle façon , & en fit prendre le plan & la forme pour en faire un pareil à Rome , mais bien plus grand & plus magnifique. En passant aussi par la ville de Rhodes , il voulut ouyr harenguer & declamer tous les maistres de rhetorique , & leur fit à chascun present d'un talent ¹. Posidonius a redigé par escript le discours & la dispute qu'il eut en sa presence à l'encontre de Hermagoras le rhetoricien , sur le subjest que Pompeius mesme leur donna , touchant la question generale ² & universelle : & à Athenes il en fit tout autant aux philosophes , mais il donna davantage à la ville cinquante talents ³ pour la faire reparer.

¹ Six cents escus. *Amyot.* 4668 liv. 15 s. de notre monnoie.

² Voyez les Observations.

³ Trente mille escus. *Amyot.* 233,437 liv. 10 s. de notre monnoie.

LXI. Si pensoit bien à son retour en Italie y devoir arriver le plus honoré homme du monde, & desiroit se retrouver en sa maison avec sa femme & ses enfans, comme aussi il cuidoit bien y estre attendu d'eux en grande devotion : mais le dieu qui a soing de mesler tousjours parmy les grandes & illustres faveurs de la fortune, quelque chose de sinistre, le guettoit en chemin, & luy dressoit embusche en sa propre maison pour luy rendre son retour douloureux : car sa femme Muria en son absence s'estoit mal gouvernée. Or pendant qu'il en estoit loing, il ne teint compte des rapports que lon luy en fait : mais quand il approcha de l'Italie, & qu'il eut, ainsi comme je pense, l'entendement plus à delivre pour penser de près aux mauvais rapports qu'on luy en avoit faits, alors il luy envoya denoncer qu'il la renonceoit & repudioit pour femme, sans avoir lors escrit, ny jamais dit depuis pour quelle cause il la repudioit : mais la cause en est escrite es epistres de Ciceron. Au demourant avant son arrivée il courut plusieurs bruits de luy par la ville de Rome, qui en estoit en peine & en trouble, pource que lon y disoit qu'il meneroit son armée tout droit en la ville, & se feroit certainement seigneur de tout l'empire Romain : tellement que Crassus en sortit à la desrobée,

emportant quant & luy ses enfans & son argent, soit ou pource que veritablement il en eust crainte, ou plus tost, comme il sembloit, pour faire la calumnie vray-semblable, & rendre l'envie plus aspre à l'encontre de luy. Parquoy si tost qu'il eut le pied en Italie, il feit assembler tous ses gens de guerre, & après les avoir preschez & remerciez, selon que le temps & l'occasion le requeroit, leur commanda qu'ilz se desbandassent & se retirassent chascun en sa maison pour donner ordre à leurs affaires, pourveu qu'ilz eussent souvenance de se retrouver ensemble à Rome, au jour de son triumphe. Ainsi s'estant son armée incontinent rompue, & la nouvelle en estant aussi tost courüe par tout, il advint une chose merveilleuse: car les villes voyans Pompeius le grand, sans compagnie de gens de guerre, avec petite suite de ses domestiques & familiers amis seulement, ne plus ne moins, que s'il fust retourné, non de ses grandes conquestes, mais de quelque voyage où il fust allé pour son plaisir, se vuiderent routes pour aller au devant de luy, tant les peuples lay portoyent d'amour & de bienvueillance, & l'accompagnerent, voulust ou non, jusques dedans Rome, avec plus grande puissance que celle qu'il avoit ramenée en Italie, de maniere que s'il eust eu envie de remuer

quelque chose en l'estat de la chose publique ; il n'eust point eu besoing de son armée.

LXII. Et pource que la loy & coustume defendoit d'entrer dedans la ville devant le triumphe, il envoya requerir le senat, de vouloir differer pour quelques jours l'election des consuls, & luy faire ceste grace, à fin que present il peust assister & favoriser à Piso, qui demandoit ceste année là le consulat : mais il fut debouté de sa requeste, par la resistance que luy feit Caton qui l'empescha, dont Pompeius s'esbahissant, & s'esmerveillant de sa franchise de parler, & de la roideur, de laquelle seul il ufoit à souffrenir & defendre les choses justes & raisonnables, il eut envie de le gaigner, comment que ce fust. Parquoy ayant Caton deux niepces, il en demanda l'une en mariage pour soy, & l'autre pour son filz : mais Caton se doubtant qu'il faisoit ceste poursuite pour le gaigner & le corrompre, sous couleur de ceste pretendue alliance, l'en esconduisit. Sa sœur & sa femme estoient très mal contentes, de ce qu'il refusoit ainsi l'alliance du grand Pompeius. Mais environ ce mesme temps, il advint que luy, desirant par toutes voyes promouvoir Afranius au consulat, feit distribuer quelque argent par les lignées du peuple, & fut l'argent delivré es jardins mesmes de

Pompeius, de sorte que la chose en fut toute divulguée par la ville, & le blasma lon fort de ce qu'il vouloit rendre venal, & faire acheter par argent, à ceux qui ne le pouvoient acquerir ne meriter par vertu, le souverain magistrat de la chose publique, que luy mesme avoit obtenu en recompense de ses haultz faictz : & adonc Caton remonstra à sa femme & à sa sœur, « Voyez » vous, il nous eust fallu maintenant participer » à ce blasme là, si nous eussions pris l'alliance » de Pompeius ». Ce qu'elles ayans entendu, confesserent que son advis avoit esté le meilleur, eu esgard au devoir & à l'honneur.

LXIII. Au reste quant à la magnificence de son triumphe, encore qu'il fust departy en deux jours, il n'y eut pas du temps assez, ains y eut plusieurs choses que lon avoit préparées pour estre portées à la monstre, qui demourerent, de maniere qu'il y en avoit largement pour honorer, embellir & orner encore un autre triumphe. Entre autres choses, on y porta devant des escritteaux où estoient contenus les noms des nations dont il triumphoit, qui estoient celles qui s'ensuyvent, le royaume de Pont, l'Armenie, la Cappadocie, la Paphlagonie, la Medie, la Colchide, les Hiberiens, les Albaniens, la Syrie, la Cilicie, la Mesopotamie, la Phœnicie, la Palestine, la Judée, l'Arabie, les coursaïres & escumeurs de

mer desfaits par tous les quartiers du monde , tant par mer que par terre : en tous lesquelz païs il prit jusques au nombre de mille chasteaux , & non gueres moins de neuf cents villes & citez : & de vaisseaux de coursaïres , environ huit cents : & de villes au paravant desertes , par luy repeuplées , trente neuf. Davantage les escritteaux portoyent aussi , que paravant ses conquestes , le revenu ordinaire de la chose publique ne montoit par chascun an , qu'à cinq millions d'escus , & que lors de ce qu'il avoit adjousté & acquis à l'empire Romain , ilz en recevoient huit millions & cinq cents mille escus , & qu'il apportoit presentement au tresor de l'espargne publique , tant en or & argent monnoyé , qu'en bagues & joyaux , la valeur de deux millions d'or , sans ce qui avoit esté donné & distribué aux gens de guerre , dont celuy qui en avoit eu le moins selon sa qualité , en avoit reçu cent cinquante escus. Les prisonniers que lon mena en la monstre de ce triumphe , oultre les capitaines de coursaïres , furent le filz de Tigranes roy d'Armenie , avec sa femme & sa fille , & la femme mesme du roy Tigranes , laquelle s'appelloit Zosime , le roy des Juifs Aristobulus , la sœur de Mithridates avec cinq de ses enfans , quelques dames de la Scythie , les ostages des Hiberiens & Albanien , & ceulx du roy de la

Commagene, & oultre cela grand nombre de trophées, autant comme luy ou ses lieutenans avoyent gaigné de batailles en divers lieux.

LXIV. Mais encore ce qui luy tournoit à plus grande gloire, & qui n'advint jamais ny devant ny après à autre capitaine Romain qu'à luy, fut qu'en ce troisieme triumphe, il triumpha de la troisieme partie du monde : car il y avoit bien eu d'autres Romains paravant luy qui avoyent triumphé par trois fois : mais luy triumpha la premiète fois de l'Afrique, la seconde de l'Europe, & la troisieme de l'Asie, tellement qu'en ces trois triumphes, il semble avoir, par maniere de dire, triumphé de toute la terre habitable entierement, & si estoit lors, ainsi que disent ceulx qui le comparent, & qui le veulent faire en toutes choses ressembler à Alexandre le grand, au dessoubs de trente & quatre ans : toutefois, à la verité, quoy qu'ilz dient, il approchoit lors des quarante¹ : & bien heureux eust il esté, si sa vie ne se fust point prolongée oultre le poinct que luy dura la fortune d'Alexandre, pource que tout le temps qu'il vescu depuis ne luy apporta que ou des prosperitez odieuses, ou des adversitez irremediables : car en

¹ Il étoit né l'an de Rome 648; il triumpha de Mithridate l'an de Rome 693, le jour même de l'anniversaire de sa naissance. Il avoit donc précisément 45 ans.

employant le credit & l'autorité qu'il avoit acquis par bons moyens pour favoriser à d'autres injustement, autant comme il leur adjousta de puissance, autant se diminua il de sa gloire, & ne se donna garde qu'il se trouva ruiné par sa propre grandeur, ne plus ne moins que les villes qui laissent entrer leurs ennemis jusques dedans les plus forts endroits & meilleurs quartiers qu'elles ayent, leur adjoustant leurs propres forces d'elles mesmes : aussi Cæsar s'estant aggrandy moyennant la faveur de la puissance de Pompeius, le desfeit & le ruina puis après luy mesme, avec les propres moyens dont il l'avoit fait fort contre les autres : ce qui advint en ceste maniere : Lucullas à son retour de l'Asie, où Pompeius l'avoit injurieusement traité, fut dès lors bien veu & bien receu du senat ; & encore plus depuis quand Pompeius fut aussi arrivé : car le senat mesme l'incita à se faire valoir & à prendre les matieres à cueur à bon esciant : mais il rebouchoit desja au demourant, & estoit sa chaleur active ès affaires de la chose publique ja toute refroidie, pour s'estre trop adonné à l'aïse de sa personne, & au plaisir de jouir de sa richesse & de ses biens en repos : toutefois Pompeius ne fut pas plus tost de retour, qu'il s'attacha vivement à luy, touchant les choses qu'il avoit establies & ordonnées en

Asie, que Pompeius avoit toutes cassées & annullées, & l'emportoit au senat, moyenant le port & la faveur que Caton luy faisoit : à l'occasion de quoy Pompeius se trouvant ainsi rebutté & harassé au senat, fut contrainct de recourir aux Tribuns du peuple, & de s'accointer de jeunes hommes esventez, dont le plus meschant, le plus audacieux & le plus temeraire estoit un nommé Clodius, qui le vous prit incontinent & le bailla en proye au peuple, l'ayant tousjours à ses costez, & le trainant à tout propos par la place après luy, contre sa dignité, pour luy faire confirmer toutes les nouvelletez que luy proposoit & mettoit en avant pour flatter la commune, & s'insinuer en la grace du menu populaire : mais davantage encore luy demanda il pour son salaire, comme si ce n'eust pas été une honte, ains une grace qu'il luy eust requise, qu'il abandonnast Cicéron, qui estoit son amy, & qui avoit fait beaucoup pour luy en l'administration de la chose publique : ce qu'il obtint de luy, tellement que quand Cicéron se voyant appellé en justice en danger de sa personne, l'envoya requerir de luy aider, il feit fermer la porte de devant de son logis à ceulx qui venoyent de sa part, & s'en sortit par une autre porte de derriere : à l'occasion dequoy, Cicéron craignant l'issue du jugement, s'en alla

vouluntairement ¹ hors de Rome. Environ lequel temps Cæsar retournant ² de sa prature d'Hespagne, commença dès lors à mener une pratique, qui promptement luy acquit une singuliere bienvueillance, & depuis luy apporta une grande puissance, mais au contraire un très grand dommage à Pompeius & à la chose publique: car il estoit après à poursuyvre son premier consulat: & voyant que tant comme Pompeius seroit en inimitié avec Crassus, en se joignant à l'un, il auroit l'autre pour ennemy, il chercha les moyens de les mettre d'accord: chose qui de prime face sembloit la meilleure & la plus honeste du monde; mais qui estoit entreprise finement & malicieusement à mauvaise intention. Car la force qui paravant estant divisée en deux parts maintenoit la chose publique en egal contrepoids, ne plus ne moins qu'un bateau également chargé autant d'un costé que d'autre, tellement qu'il ne peult pancher ny çà ny là, venant à se conjoindre en un corps, & à n'estre plus qu'une, feit l'inclination si forte, qu'il ne se trouva personne qui y peust contrepezer, de maniere qu'à la fin aussi renversa elle tout sans dessus dessous.

¹ L'an de Rome 696.

² Un peu avant; car il revint d'Espagne l'an de Rome 694, & fut consul pour la premiere fois l'an de Rome 695,

LXVI. Pourtant disoit le sage Caton à ceulx qui alloient discourans, que la querelle & inimitié de Pompeius & de Cæsar avoit ruiné la chose publique, qu'ilz se mescomproyent grandement de s'en prendre à ce qui avoit esté le dernier, pource que ce n'avoit pas esté leur discord ny leur inimitié, qui avoit esté premiere & principale cause de ceste ruine, ains plus tost leur amitié & concorde : car par icelle Cæsar fut eleu consul, lequel se meit incontinent à caresser & flatter le menu populaire & la multitude des souffreteux & indigens, mettant en avant des repeuplemens de villes, des distributions de terres à ceulx qui n'en avoyent point, derogant en cela à la dignité du souverain magistrat, & rendant, par maniere de dire, le consulat un tribunat du peuple. Son compagnon Bibulus luy resistoit le mieulx qu'il pouvoit, & Caton se deliberoit bien de seconder & aider Bibulus de toute sa puissance, jusques à ce que Cæsar amena en la tribune des harengues, Pompeius, devant toute l'assistance du peuple, & en l'appellant par son nom, luy demanda s'il approuvoit pas tous les decrets qu'il avoit mis en avant. Pompeius respondit que ouy. « Si donc » que il se treuve quelqu'un, dit Cæsar, qui par » force vueille empescher qu'ilz ne soyent autorisez par les voix du peuple, ne viendras

» tu pas pour soustenir & defendre le bien du
» peuple ? Ouy, respondit Pompeius, je y vien-
» dray voirement : & contre ceulx qui me-
» naçent de l'espée, j'apporteray l'espée & le
» bouclier ».

LXVII. Jamais Pompeius n'avoit en toute sa vie ne fait ne dit chose si importune que celle là, de sorte que ses amis mesmes, pour le cuider excuser, disent que ceste parole luy eschappa sans y penser : toutefois par ce qui s'ensuyvit puis après, il apparut bien evidemment qu'il s'estoit du tout donné à Cæsar, pour en faire tout ce que bon luy sembleroit : car à peu de jours de là il espousa Julia sa fille, sans que personne s'en fust jamais doubté, combien qu'elle fust fiancée à Servilius Cæpio, qui la devoit bien tost espouser : & pour appaiser le mal talent de Cæpio, Pompeius luy donna en mariage sa fille, qu'il avoit aussi au paravant promise à Faustus filz de Sylla, & Cæsar espousa Calpurnia fille de Piso. Cela fait, Pompeius emplissant toute la ville de gens de guerre, feit à force tout ce qu'il voulut : car ainsi comme le consul Bibulus s'en alloit en la place accompagné de Lucullus & de Caton, ilz se ruerent sur luy à l'improuveu, & rompirent les faisceaux de verges que lon portoit devant luy, & y eut quelqu'un qui par derision luy jetta un plein panier de fiente sur la teste :

deux des tribuns du peuple qui estoient en sa fuite, y furent blecez. Et par ce moyen ayans vuidé la place de ceulx qui leur contrarियोient, ilz feirent à leur aise passer le decret de la distribution des terres : duquel appast le menu peuple estant alleché, se laissa mener par eulx à tout ce qu'ilz voulurent, & ne s'enquit plus de rien à l'encontre, ains sans mot dire au contraire, il donna sa voix pour autoriser tout ce qu'il leur plaisoit proposer. Si furent là ratifiées les ordonnances, pour lesquelles Pompeius avoit debat avec Lucullus, & decreta lon à Cæsar le gouvernement des Gaules, rant deçà que delà les monts des Alpes, & de l'Esclavonnie, pour l'espace de cinq ans, avec quatre legions complètes. Et pour l'année ensuyvant furent designez consuls Piso beaupere de Cæsar, & Gabinius le plus grand flatteur que Pompeius eust à l'entour de luy.

LXVIII. Or pendant que ces choses se passoyent, Bibulus se mainteint renfermé dedans sa maison sans en ozer sortir huit mois durans, quoy qu'il fust consul, & envoyoit seulement dehors des affiches pour attacher ès lieux publiques, par lesquelles il chargeoit & accusoit Pompeius & Cæsar : d'autre part Caton, ne plus ne moins qu'il eust esté inspiré de quelque esprit prophétique, alloit preschant & predisant

publiquement en plein senat, ce qui estoit pour en advenir à la chose publique, & à Pompeius mesme : mais Lucullus ne se voulant plus travailler se tenoit coy, & jouissoit de son repos comme n'estant plus pour porter la peine, ny d'aage pour se mesler d'affaires : & fut lors que Pompeius dit, qu'il estoit plus hors de saison à homme vieil de vacquer à son plaisir, que vacquer aux affaires de la chose publique : & neantmoins luy mesme fut aussi tantost amolli de l'amour de sa nouvelle espouse, & n'entendit plus à autre chose la plus part du temps qu'à luy complaire, se tenant le plus souvent avec elle en ses maisons de plaisance qu'il avoit aux champs, ou bien en ses jardins, sans plus se soucier de ce que lon faisoit en l'administration de la chose publique, de maniere que Clodius, qui lors estoit tribun du peuple, vint à l'enmespriser, & à entreprendre des choses fort seditieuses : car ayant chassé Cicéron, & envoyé Caton hors de Rome en Cypre, soubz couleur d'une commission & administration publique, & d'un autre costé Cæsar s'en estant allé es Gaules, voyant que le commun peuple luy obeïssoit, à cause qu'il faisoit & disoit tout ce qu'il pouvoit imaginer pour le flatter & luy aggreer, il attenta incontinent à l'encontre des ordonnances de Pompeius, taschant en faire casser & annuller quel-

ques unes : comme entre autres il tira par force le jeune Tigranes hors de prison, lequel il menoit tousjours par la ville quant & luy, & alloit fuscitant tous les jours des querelles & procès aux amis de Pompeius, pour esprouver en leur faict quel credit & quelle puissance il auroit. Finablement un jour que Pompeius estoit sorti de sa maison en public, pour assister au jugement de l'un de ces procès, ce Clodius ayant autour de luy une catterve de vagabonds, hommes abandonnez, à qui il ne chaloit qu'ilz feissent, se planta dessus un endroit relevé, où il estoit veu de tous costez de la place, & commença à faire tout hault de telles interrogatoires : « Qui » est le capitaine de ceste ville, le plus luxurieux ? » Qui est l'homme qui cherche l'homme ? Qui » est celuy qui gratte sa teste avec un doigt » ? Et ses satellites luy respondoyent, crians à haulte voix à chasque demande qu'il faisoit, comme si c'eust esté un chœur qui eust alternativement respondu au presbtre à chasque fois qu'il secouoit un pan de sa robbe, « C'est Pompeius ».

LXIX. Cela grevoit fort Pompeius, qui n'avoit point accoustumé d'ouïr ainsi publiquement mesdire de soy, & n'avoit point appris de combattre de ceste sorte : mais encore estoit il plus marry de ce qu'il appercevoit que le senat estoit bien aise de luy voir faire ceste honte & cest oul-

trage , en vengeance de ce qu'il avoit lâchement trahy & abandonné Cicéron. Parquoy s'estant davantage fait quelque baterie sur la place mesme , là où il y eut des gens blecez , & ayant esté surpris un des serfs de Clodius , avec une espée , qui s'estoit à force coulé à travers la presse , jusques auprès de la personne de Pompeius , prenant la couverture de cette occasion , mais à la verité craignant l'insolence & les paroles injurieuses de Clodius , il ne voulut onques puis se trouver en la place , tant que son tribunat dura , ains se teint tousjours en sa maison , consultant avec ses amis , comment il pourroit faire pour appaiser l'ire du senat à l'encontre de luy : & y en eut un nommé Culeo , qui luy conseilla de repudier sa femme Julia , pour renoncer du tout à l'amitié de Cæsar , & se retourner entièrement du costé du senat : ce qu'il ne voulut pas faire. Mais bien presta il l'oreille à ceulx qui luy conseillerent de faire rappeler Cicéron , personnage qui estoit ennemy mortel de Clodius & très aimé du senat. Si conduisit le frere de Cicéron , qui en devoit faire la requeste au peuple , sur la place , avec bon nombre de gens de defense , là où il y eut des coups ruez & des hommes tuez d'une part & d'autre : toutefois il demoura à la fin plus fort que Clodius.

LXX. Et ainſi Ciceron eſtant rappellé ¹ par decret expreſ du peuple, ſi toſt qu'il fut de retour remeit Pompeius en la bonne grace du ſenar, & perſuada la propoſition que lon avoit ja miſe en avant, de donner à Pompeius commiſſion de faire venir des bledz à Rome, par laquelle il remeit une autre fois en la puiſſance de Pompeius tout tant de met & de terre, par maniere de dire, qu'il y avoit deſſoubs l'empire Romain: cat par la teneur du decret qui en fut paſſé, ſe trouverent en ſa main tous les ports, toutes les eſtappes & marchez, toute la vente des grains & des fruitſ de la terre, & pour dire en un mot, tout le faiſt & traffic des marchands trafficquans ſur la mer, & des laboureurs cultivans la terre. Ce que Clodius calumniant, alloit diſant que la cherté & faulte de bledz n'avoit point fait inventer, ny propoſer le decret de ceſte commiſſion: mais au contraire, que pour avoir ceſte commiſſion, lon avoit fait naiſtre la faulte de bledz, à fin de faire revenir comme d'une paſmoiſon & remettre un petit ſus par ceſte nouvelle charge l'autorité de Pompeius & ſa puiſſance, qui ſ'en alloit languiſſant. Les autres diſent que ce fut une ruze du conſul Spinther, lequel voulut employer Pompeius en ceſte plus grande charge, à fin que luy fuſt envoyé pour ſecourir

¹ L'an de Rome 697.

& remettre en son royaume le roy Ptolomæus¹ : toutefois Canidius tribun du peuple meit encore en avant d'y envoyer Pompeius sans armée, avec deux sergens portans les haches devant luy seulement, pour remettre d'accord ce roy Ptolomæus avec ceulx d'Alexandrie : laquelle charge n'eust pas esté desaggreable à Pompeius : mais le senat rejetta ceste proposition soubz honeste couleur, faignant qu'il avoit peur qu'en ce faisant Pompeius ne meist sa personne en danger. Ce neantmoins on trouvoit souvent par la place & emmy le senat de petits billets, ès quelz estoit escrit, comme Ptolomæus requeroit qu'on luy baillast Pompeius au lieu de Spinther pour le remener : toutefois Timagenes escrit que Ptolomæus s'en alla à Rome, & laissa l'Égypte sans qu'il en fust autrement besoing, à la suasion & fuscitation d'un Theophanes, qui luy meit en teste de ce faire, à fin de donner nouveaux moyens à Pompeius de bien faire ses besongnes & matière de nouvelles guerres : mais la malignité de ce Theophanes n'a pas tant rendu cela croyable ; comme le naturel de Pompeius l'a fait tenir pour incroyable, pource que son ambition n'avoit rien de si maling ny de si meschant comme cela.

LXXI. Luy ayant donques esté donnée la commission de faire venir des bledz, il envoya par

¹ Aulérius.

tout ailleurs ses lieutenans & amis, & luy en personne s'en alla en Sicile : & comme il fut prest à s'en revenir, il se leva un grand vent en mer, tellement que les mariniers faisoient doubte de lever les ancras : mais luy mesme le premier monta dedans la navire, & commanda que l'on meist les voiles au vent incontinent, criant tout hault, « Il est nécessaire que j'aïlle, non pas nécessaire que je vive » : & ainsi par sa bonne diligence & sa hardiesse, joinct la bonne fortune qui luy favorisa, il emplit toutes les estappes & marchez de bledz, & toute la mer de navires, de maniere que l'abondance qu'il en feit venir, fournit non seulement à la ville de Rome, mais aussi aux environs, & en sourdir comme une vive fontaine, & un large ruisseau qui s'espandit par toute l'Italie.

LXXII. Or environ ce mesme temps, les grandes conquestes que Cæsar faisoit ès Gaules, l'elevoyent bien fort hault : mais là où il sembloit qu'il fust bien loing de Rome attaché à faire la guerre aux Belges¹, aux Sueviens² & aux Anglois³, on ne se donna garde qu'il la faisoit par secrettes menées au milieu du peuple Romain & ès principaux poincts des affaires de la chose publique contre Pompeius, pource qu'il avoit

¹ Peuples des Pays-bas.

² Peuples au-delà de l'Elbe.

³ Grec : Bretons.

autour de sa personne les forces d'une armée comme un corps militaire qu'il aguerrissoit & endurcissoit au travail, non point en intention de s'en valoir contre les Barbares seulement : car les combats qu'il avoit contre eulx, ne luy estoient que comme une maniere de chasse, par lequelz il tendoit à la rendre invincible & redoutable à tout le monde : mais au demourant l'or & l'argent, les despouilles & autres richesses qu'il gaignoit en si grande abondance sur les ennemis qu'il desfaisoit, luy estoient comme l'ame de ce corps, par le moyen de laquelle il gaignoit & corrompoit beaucoup d'hommes : en envoyant de grands presens à Rome à ceulx qui venoyent à estre ædiles, præteurs, ou consulz, & à leurs femmes mesmes : tellement qu'ayant repassé les Alpes, & estant venu faire son hyver en la ville de Luques, il y eut une grande multitude d'autres personnes, hommes & femmes, qui y coururent à l'envy les uns des autres : mais du senat mesme il y en eut deux cents qui y furent devers luy, entre lequelz nommeement furent Crassus & Pompeius : & veit on pour un coup six vingts sergens portans les haches devant præteurs ou proconsulz à la porte de son logis.

LXXIII. Si renvoya tous les autres pleins d'argent & de promesses : mais avec Pompeius

& Crassus il feit une paction qu'eulx deux ensemble demanderoyent encore le consular, à quoy Cæsar les devoit aider, en envoyant à Rome au jour de l'élection bon nombre de ses gens de guerre pour y donner leurs voix en leur faveur, & que si tost qu'ilz auroyent esté eleuz, il pratiqueroyent de se faire donner à eulx, par decret du peuple, les gouvernemens de quelques nouvelles provinces & nouvelles armées aussi, & feroient confirmer & prolonger en son nom, celles qu'il tenoit, pour autres cinq années. Quand la nouvelle de ceste marchandise fut divulguée parmy le peuple de Rome, les plus gens de bien & les principaux de la ville en furent fort desplaifans, tant que Marcellinus en pleine assemblée du peuple leur demanda à eulx deux s'ilz poursuyvroient le consular à la prochaine election: à quoy le peuple mesme leur commandant de respondre, Pompeius respondit le premier, que peult estre le demanderoit il voirement, & peult estre aussi que non: mais Crassus respondit plus civilement, qu'il en feroit ce qu'il verroit estre le plus expedient pour le bien & l'utilité de la chose publique.

LXXIV. Marcellinus adonc s'attacha à Pompeius, & parla de grande vehemence contre luy, jusques à tant que Pompeius luy reprocha à la fin en courroux, qu'il estoit le plus injuste &

le plus ingrat homme du monde, veu qu'il ne recognoissoit point en son endroit, que par son moyen il estoit devenu de muet, eloquent, & de pauvre affamé, saoul jusques à rendre souvent sa gorge. Ce neantmoins tous ceulx qui paravant avoyent proposé de demander le consulat, s'en deporterent adonc, excepté Lucius Domitius, auquel Caton conseilla & donna courage de ne desister point, pource (luy disoit il) que tu ne combats point pour obtenir un magistrat, ains pour defendre la liberté publique à l'encontre de deux tyrans. Parquoy Pompeius & ses adherens, craignans la vehemence de Caton, de peur qu'ayant ja tout le senat à sa devotion, il n'attirast aussi de son costé la plus saine partie du peuple, penserent qu'il ne falloit pas laisser venir Domitius jusques en la place, & à ceste fin envoyerent des gens en armes contre luy, qui d'arrivée occirent celuy qui portoit la torche devant luy, & contraignirent les autres de prendre la fuite, entre lesquelz Caton fut le dernier à se retirer, ayant esté blecé au coude du bras droit en defendant Domitius.

LXXV. Estans doncques Pompeius & Crassus parvenus au consulat par telle voye¹, ilz ne se porterent de rien plus modestement, ny plus honestement au demourant. Car premierement

¹ L'an de Rome 699.

comme le peuple fust après à eslire Caton præteur; Pompeius qui presidoit en l'assemblée de l'election, voyant qu'il s'en alloit estre eleu, la rompit, alleguant faulxement qu'il avoit observé quelques mauvais presages pour avoir occasion de la rompre, & depuis ilz cortompirent par argent les lignées du peuple pour faire eslire præteurs Antias & Vatinius, & consequemment firent proposer par un tribun du peuple des edicts, par lesquels la charge que Cæsar avoit, luy estoit prolongée pour autres cinq ans, suyvant ce qu'ilz avoyent contracté ensemble : & le gouvernement de la Syrie, avec la charge de faire la guerre aux Parthes, estoit commis à Crassus : & à Pompeius toute l'Afrique & toutes les Hespagnes, avec quatre legions, dont il en presta lors deux à Cæsar, qui les luy demanda pour la guerre qu'il avoit en la Gaule. Cela fait, Crassus se partit pour aller en son gouvernement, au sortir de son consulat : & Pompeius demourant à Rome, à la dedication de son theatre fit jouer de beaux jeux de prix, tant d'exercices de la personne, comme de lettres & de la musique, & fit aussi faire des chasses & combats de bestes sauvages, ès quelles il y eut bien jusques au nombre de cinq cents lions tuez : mais après tout, il n'y eut rien si esmerveillable ne si espouventable, que les combats des elephans.

LXXVI. Ces liberalitez & despenſes faites pour donner paſſetemps au peuple, le firent de rechef beaucoup eſtimer, & luy apporterent une grande bienveillance de la commune : mais d'un autre coſté, il ne ſe ſuscita pas moins d'envie, quand il commeit la charge de ſes gouvernemens & de ſes legions à ſes lieutenans, pendant que luy alloit çà & là ſe donnant du bon temps avec ſa femme par tous les beaux lieux de plaifance de l'Italie, ſoit ou qu'il fuſt amoureux de ſa femme, ou qu'elle eſtant amoureuse de luy, il n'eufſt pas le cueur de la laiſſer. Car lon diſoit par tout, & eſtoit choſe aſſez notoire, que ceſte jeune dame Julia aimoit ſon mary plus ardemment, que ne ſembloit porter l'aage où il eſtoit : dont il m'eſt advis que la cauſe eſtoit l'honneſte continence de luy, qui ne cognoiſſoit autre femme que celle qu'il avoit eſpouſée, joint que ſa gravité naturelle n'eſtoit point faſcheuſe, ains eſtoit ſa compagnie & ſa converſation fort plaifante & fort agreable aux femmes, ſi en cela nous ne voulons reprouver le teſmoignage de la courtiſane Flora : mais il eſt bien certain qu'en une election d'ædiles, eſtans quelques uns venus juſques à mettre la main aux armes, il y eut pluſieurs hommes tuez tout contre Pompeius, de maniere que luy en eſtant tout ſouillé de ſang, il fallut qu'il changeaſt d'habillemens :

à raison dequoy ses serviteurs coururent à grande haste en son logis reporter ses accoustremens ensanglantez pour luy en porter d'autres. La jeune dame se trouvant pour lors enceinte, apperceut d'aventure sa robbe toute sanglante, dont elle entra soudain en si grande frayeur, qu'elle en tumba toute pâmée, & eut on beaucoup de peine à la faire revenir de ceste pasmoison, mais elle en avorta sur l'heure : au moyen dequoy ceulx mesmes qui estoient les plus aspres à reprendre l'amitié qu'il avoit avec Cæsar, ne le pouvoient blasmer de l'amour qu'il portoit à sa femme. Elle devint encore une autre fois grosse depuis, dont elle mourut en travail d'enfant, & l'enfant ne survescut gueres de jours après la mere. Et comme Pompeius se disposast pour l'aller inhumer en une siene terre qu'il avoit près la ville d'Alba, le peuple par force en emporta le corps au champ de Mars, plus pour la pitié & compassion qu'il eut de la jeune dame, que pour envie de gratifier, ny à Cæsar, ny à Pompeius : & neantmoins encore de ce que le peuple en faisoit pour le regard d'eulx, il sembloit en faire plus pour l'amour de Cæsar absent, que de Pompeius present.

LXXVII. Mais aussi tost que ceste alliance ; laquelle couvroit plus tost, qu'elle ne refrenoit leur ambitieuse convoitise de dominer, fut es-

teincte, il se leva incontinent dedans Rome une tourmente, & commencerent toutes choses à branler, & à se semer parmy le peuple des paroles & propos de sedition & de division : puis tantost après survint aussi de renfort la nouvelle de la mort & desfaitte de Crassus, qui fut comme une grande barriere ostée, laquelle empeschoit que ces deux parts ne s'entreheurtaissent & n'entraissent en guerre civile : car l'un & l'autre des deux chefs le redoubtant, se rengeoit encore aucunement à la raison envers son compagnon. Mais aussi tost que la fortune leur eut osté ce tiers, qui eust encore peu contester contre celui des deux qui fust demouré vainqueur, alors eust on peu veritablement dire de ces deux qui demourèrent, ce que le poëte comique dit,

L'un contre l'autre adonc se met en point,
Ses mains saupoudre & d'huile son corps oint.

Tant est la fortune peu de chose au pris de la nature, dont elle ne peult jamais assouvir la cupidité, veu que si grande longueur & largeur d'empire, & si vaste estendue de païs, ne peut encore arrester ne borner la convoitise de ces deux personnages : ains combien qu'ilz eussent souvent ouy dire, & souvent leu eulx mesmes, que

Les dieux ayans le monde en trois party,
Chascun se tient content de son party :

ilz ne penſoyent pas neantmoins, que l'empire Romain fuſt ſuffiſant pour eulx qui n'eſtoient que deux : toutefois Pompeius dit lors en une harangue qu'il feit devant le peuple, que tous les eſtats & toutes les charges qu'il avoit eûes en l'adminiſtration de la choſe publique, ce avoit tousjours eſté plus toſt qu'il n'avoit eſperé, & les avoit auſſi tousjours quittées plus toſt que lon n'avoit attendu. Ce qu'à la verité teſmoignent toutes les armées qu'il avoit eûes entre mains, leſquelles il avoit tousjours caſſées de bonne heure : mais lors voyant bien que Céſar ne caſſeroit pas la ſienne, il chercha de ſe fortifier des eſtats & offices de la ville contre luy, ſans remuer autre choſe, ny monſtrer autrement qu'il ſe deſſiaſt de luy, ains plus toſt faiſant ſemblant de le meſpriſer & de n'en faire point de compte : mais quand il veit que ces magiſtrats de la ville ne ſe distribuoyent pas à ſon gré ny à ſa volonté, pour autant que les citoyens qui les eliſoyent, eſtoient corrompus par argent, il laiffa adonc tout aller en abandon, de maniere qu'il n'y avoit plus de magiſtrat qui commandaſt, ny auquel on obeïſt en la ville.

LXXVIII. A l'occafion de laquelle confuſion il courut incontinent par la ville un grand bruit, qu'il eſtoit beſoing d'elire un dictateur : & fut le premier qui l'oza mettre en avant un tribun

du peuple nommé Lucillius, qui suada que l'on eleust Pompeius : à quoy Caton contredit si vivement, que le tribun fut en danger d'estre sur le champ depose de son office : mais plusieurs des amis de Pompeius se tirerent lors en avant, qui l'excuserent, remonstrans qu'il n'avoit ny recherché ny desiré aucunement cest estat de dictature, dont Caton le loua grandement, & le pria & enhorta de vouloir tenir la main à ce que les choses se peussent remettre en bon estat. Pompeius eut honte de reculer à chose si raisonnable, & y eut l'œil, si bien que l'on eleut deux consuls, Domitius & Messala¹ : mais depuis les choses estans retombées encore en plus grande confusion que jamais, de sorte que l'on ne pouvoit elire de nouveaux magistratz : & à l'occasion de ce, plusieurs remettant en avant le propos d'elire un dictateur plus audacieusement que paravant, Caton craignant d'estre forcé à ceste fois, delibera de jetter à Pompeius quelque magistrat de puissance & autorité limitée, pour le destourner de celui qui avoit autorité excessive & tyrannique. Bibulus mesme qui estoit ennemy de Pompeius, fut le premier qui mit en avant au senat que l'on l'eleust seul consul, « Pource, » dit-il, que par ce moyen, ou la chose publique que sortira du trouble, auquel elle est main-

¹ L'an de Rome 701.

» tenant, ou si elle doit tumber en servitude,
» au moins servira elle à celuy qui est le plus
» homme de bien». Ceste opinion fut trouvée bien
estrange, mesmement pour le regard de celuy
qui la proposa : & Caton s'estant dressé en piedz,
chascun imagina soudain que ce fust pour y con-
tredire : mais luy estant fait silence, il dit hault
& clair, que quant à luy il n'eust jamais pro-
posé le premier celle opinion, mais puis qu'elle
estoit proposée par un autre, qu'il estoit bien
d'avis qu'on la suyvist, « Pour autant, dit-il,
» qu'il vault mieulx avoir un magistrat qui com-
» mande, qui qu'il soit, que de n'en avoir point
» du tout, & qu'il ne voyoit personne qui fust
» pour sçavoir bien commander en si grands trou-
» bles que feroit Pompeius ». Le senat approuva
ceste opinion, & ordonna que Pompeius seroit
eleu seul consul, & que s'il voyoit qu'il eust
besoing de compagnon, qu'il en pourroit nommer
un tel que bon luy sembleroit, mais non de-
vant deux mois. Ainsi fut Pompeius déclaré seul
consul ² par Sulpitius, qui ce jour là estoit à
son tour entreroy : & adonc Pompeius caressa
fort amiablement Caton, en le remerciant de
l'honneur qu'il luy avoit fait, & le priant de
le vouloir en particulier aider de son conseil aux
affaires de son consulat. Caton luy respondit qu'il

² L'an de Rome 702.

ne falloit point qu'il le remerciaſt, pource qu'il n'avoit rien dit en tout ce qu'il avoit opiné, pour l'amour de luy, ains pour l'amour de la choſe publique ſeulement, & que là où il l'en requerroit, il le conſeilleroit volontiers en particulier : mais quand il ne l'en requerroit point, il ne laiſſeroit pas de dire en public ce que bon luy ſembleroit. Tel eſtoit Caton en toutes choſes.

LXXIX. Mais Pompeius retournant en la ville, eſpouſa Cornelia, la fille de Metellus Scipion, non fille, ains de nagueres demourée veufve de Publius Craſſus le filz, qui fut occis par les Parthes, auquel elle avoit eſté mariée la première fois. Ceſte dame avoit beaucoup de graces pour attirer un homme à l'aimer, outre celles de ſa beaulté : car elle eſtoit honeſtement exercitée aux lettres, bien appriſe à jouer de la lyre, & ſçavante en la geometrie, & ſi prenoit plaifir à ouïr propos de la philoſophie, non point en vain ny ſans fruit : mais, qui plus eſt, elle n'eſtoit point pour tout cela ny faſcheuſe, ny glorieuſe, comme le devienent ordinairement les jeunes femmes, qui ont ces parties & ces ſciences là. Davantage elle eſtoit fille d'un pere, auquel on n'eult ſceu que reprendre, ny quant à la nobleſſe de ſa race, ny quant à l'honneur de ſa vie : toutefois les uns reprenoyent en ce mariage, que l'aage n'eſtoit point fortable, pource

que Cornelia estoit jeune assez pour estre plus tost mariée à son filz : & les plus honestes estimoyent, qu'en ce faisant il avoit mis à nonchaloir la chose publique au temps qu'elle estoit en si grands affaires, pour ausquelz remedier elle mesme l'avoir choisi comme medecin, & s'estoit jettée entre les bras de luy seul : & ce pendant il s'amusoit à faire nopces & festes, là où plus tost il devoit penser, que son consulat estoit une publique calamité, pource qu'il ne luy eust pas esté ainsi baillé extraordinairement à luy seul, contre la coustume & les loix, si les affaires publiques se fussent bien portez.

LXXX. Au demourant, il se meit à faire proceder à l'encontre de ceulx qui par voyes indeuës de bourse desliée & d'argent distribué, estoient parvenus aux honneurs, & avoyent obtenu des magistrats : & ayant fait des loix & ordonnances, selon lesquelles les procès & jugemens s'en devroyent faire, il administra bien dignement & syncerement toutes autres choses au reste, donnant seureté, ordre, silence & gravité aux jugemens, en y assistant luy mesme en personne, avec force d'armes, excepté que quand son beaupere en fut aussi, entre les autres, appellé en justice, il envoya querir en sa maison les trois cents soixante juges, & les pria de luy vouloir estre en aide, tellement que l'accusa-

teur se deporta de son accusation , quand il veit Scipion accompagné & convoyé par ses juges mesmes , en retournant de la place. Cela donna de rechef mauvais bruit à Pompeius , & encore fut il blasmé davantage , de ce qu'ayant par ordonnance expresse defendu que lon ne louast plus publiquement ceulx qui seroyent appelez en justice pour aucun crime , pendant que lon feroit leur procès, luy mesme un jour entra au parquet, où se faisoient les jugemens, pour louer publiquement Plancus : à l'occasion de quoy , Caton qui lors estoit l'un des juges, se boucha les oreilles avec les deux mains, disant qu'il ne luy estoit pas loisible de ouïr louer un criminel, veu qu'il estoit defendu expressement par les loix : ce qui fut cause de faire recuser Caton à juge , avant qu'il donnast sa sentence : mais nonobstant cela Plancus fut condamné par tous les autres juges , à la grande honte & vitupere de Pompeius : car peu de jours après, Hypseus homme consulaire , estant aussi semblablement accusé, l'attendit un jour comme il fortoit du baing pour s'aller mettre à table , & luy embrassant les genoux le supplia de luy vouloit estre en aide : mais il passa oultre superbement , sans luy respondre autre chose, sinon , qu'il luy gastoit son soupper, & ne faisoit autre chose : pour laquelle inconstance & inégalité de faire faveur aux uns,

&c

& tenir rigueur aux autres, il fut à bon droit repris & blasmé : mais au reste il reduisit toutes autres choses en bon estat, & opta pour compagnon au consulat son beau pere Scipion, pour les cinq derniers mois : puis se feist continuer ses gouvernemens pour autres quatre ans, avec estat de prendre à l'espargne ¹ mille talents par chascun an, pour entretenir & soudoyer ses gens de guerre.

LXXXI. Ce que voyans les amis de Cæsar commencerent à s'attacher là, & requirent que lon eust donques aussi quelque regard à Cæsar, qui menoit de si grandes & si lourdes guerres pour l'empire Romain, disans qu'il estoit bien raisonnable, attendu ses grands services, que lon luy donnast un autre consulat, ou que lon luy prolongeast encore le temps de son gouvernement, durant lequel il peust au moins jouir en paix de l'honneur de commander à ce que luy mesme avoit acquis, sans qu'un autre successeur luy vinst oster le fruit de son labeur. Sur quoy s'estant meüe grande dispute & grande contention à Rome, Pompeius comme voulant réparer à l'envie que lon en eust peu concevoir contre Cæsar, pour l'amitié qu'il luy portoit, dit qu'il avoit lettres de luy, par lesquelles il

¹ Six cents mille escus, *Amyot*, 4,668,775 livres de notre monnoie.

demandoit qu'on luy envoyast un successeur, & que lon le deschargeast de la guerre : & au surplus, qu'il luy sembloit bien raisonnable que lon luy ottroyast privilege de demander un second consulat, encore qu'il fust absent : à quoy Caton s'opposa formellement, disant qu'il falloit qu'il s'en retournast homme privé, & que posant les armes il vinst luy mesme prochasser d'obtenir quelque bien & quelque recompense de ses citoyens. Mais pourautant que Pompeius ne reплика ny ne contesta point à cela, ains se teut comme n'ayant que dire à l'encontre, on soupçonna & interpreta lon davantage, qu'il n'avoit point bonne opinion de la vouldté de Cæsar, joint qu'il luy envoya redemander les deux legions qu'il luy avoir prestées, sous couleur de la guerre des Parthes : toutefois Cæsar, encore qu'il entendist bien pour quelle occasion on les luy redemandoit, les luy renvoya grandement honorées de beaux & bons presens.

LXXXII. Environ ce temps Pompeius tumba malade à Naples d'une grosse & dangereuse maladie, de laquelle toutefois il guarit : & les Neapolitains à la persuasion d'un des principaux de leur ville nommé Praxagoras, sacrifierent publiquement aux dieux pour leur rendre graces de sa convalescence : leurs prochains voisins en firent après autant, de sorte que cela de main en

main s'estendit par toute l'Italie, & n'y eut ne petite ne grande ville qui n'en fait feste & resjouissance publique par plusieurs jours : & ne trouvoit on lieu assez capable pour tenir ceulx qui luy alloient de tous costez au devant, ains en rompoient les chemins : tous les villages, les bourgs, les ports de mer estoient pleins de gens qui sacrifioient aux dieux, & faisoient festin pour la joye du recouvrement de sa santé. Il y en avoit mesme plusieurs qui luy alloient au devant & le recueilloient avec des torches allumées, portans chapeaux de fleurs sur leurs testes, & puis le convoyoyent & l'accompagnoient, en luy jettant force bouquets & force fleurs dessus luy, tellement que le convoy qu'il eut à ce retour là, tout le long du chemin, fut l'une des plus belles, plus honorables & plus magnifiques choses à voir qu'il eut onques en sa vie : mais aussi tient on qu'elle fut cause, autant que nulle autre occasion, de susciter la guerre civile : car l'opinion presumptueuse de soy mesme qui luy entra en la teste, avec l'extreme joye qu'il sentit de se voir ainsi honorer & aimer, surmontra le discours de la raison qu'il devoit fonder sur les choses vrayes, non sur l'apparence, & luy faisant oublier la diligence de soy tenir sur ses gardes, qui luy avoit toujours auparavant assuré ses prosperitez & ses

faicts, la changea en audacieuse braverie, qui luy feit mespriser la puissance de Cæsar, jusques à dire qu'il n'auroit que faire d'armes ny d'autre laborieuse sollicitude à l'encontre de luy, & qu'il le desferoit quand il voudroit beaucoup plus facilement qu'il ne l'avoit fait premierement. Davantage Appius retourna là dessus de la Gaule ; qui luy ramena les gens de guerte qu'il avoit prestez à Cæsar, rabaisant fort de paroles les choses qu'il avoit faictes par delà, & tenant plusieurs propos outrageux & injurieux à l'encontre de Cæsar : car il disoit que Pompeius ne cognoissoit pas bien ses propres forces ny sa reputation, de se vouloir fortifier d'autres armes contre luy ; pource qu'il le desferoit avec les siennes propres, si tost que lon le verroit ; tant les souldards, disoit il, portoyent de haine à Cæsar, & avoyent grand desir de voir Pompeius. Ces propos enflerent si fort Pompeius, & le remplirent de si grande nonchalance, par se fier & presumer trop de soy, qu'il se mocqua de ceulx qui craignoyent trop la guerre : & à ceulx qui luy disoyent, si Cæsar s'en venoit droit à Rome, qu'ilz ne voyoyent pas avec quelles forces ilz luy peussent resister, il respondit d'un visage riant & avec une chere ouverté, qu'ilz ne se donnassent point de soucy quant à cela : « Car toutes & quantes fois, dit il, que je frapperay du pied seule-

» ment la terre d'Italie , je feray soudre de
 » toutes parts gens de guerre à pied & à cheval ».

LXXXIII. Ce pendant Cæsar au contraire entendoit à bon esciant à ses affaires s'approchant de l'Italie , & envoyant tousjours de ses souldards à Rome pour estre à l'election des magistrats , en gaignant soubz main & corrompant tousjours plusieurs de ceulx qui estoient en office , à force d'argent , entre lesquelz fut Paulus l'un des consulz¹ , auquel il feit tourner sa robbe , moyennant la somme de mille cinq cents talents² , & Curio tribun du peuple qu'il acquitta d'une infinie somme de debtes , & Marcus Antonius qui pour l'amitié qu'il portoit à Curio , avoit aussi part à ses debtes , en estant obligé comme luy. Il fut davantage trouvé que l'un des capitaine venus de la part de Cæsar estant auprès du senat³ , & entendant que le conseil ne luy vouloit pas ottroyer la prolongation de son gouvernement qu'il demandoit , en frappant de la main sur le pommeau de son espée : « Ceste cy , » dit il , la luy baillera ». Brief tout ce qu'il ourdissoit & qu'il faisoit , rendoit à ceste fin là : toutefois les demandes & requestes que faisoit Curio au nom de Cæsar , sembloient un peu

¹ L'an de Rome 704.

² Neuf cents mille escus. Amyot. 7,003,162 liv. de notre monnoie.

³ Du lieu où le senat s'assembloit.

la teste hault levée de joye comme victorieux, & fut recueilly par ceulx de sa ligue avec haults cris & grands battemens de mains en signe de resjouissance, & avec force festons, bouquets & chappeaux de fleurs qu'ilz jetterent sur luy. Pompeius n'estoit pas present à ceste epreuve qui se feit de la volonté du senat, pource que ceulx qui ont charge & commandement sur des armées, ne peuvent par les loix Romaines entrer dedans la ville : mais Marcellus se levant, dit qu'il ne vouloit pas demourer assis s'amusant à ouir des harengues & des disputes, & pendant qu'il sçavoit de vray que dix legions passoyent desja les monts des Alpes pour venir en armes droit contre eulx, & qu'il envoyeroit au devant homme qui leur feroit teste pour la defense de la chose publique.

LXXXIV. Depuis cela lon changea de robes à Rome, comme lon a accoustumé de faire en un dueil public : & Marcellus passant à travers la place suyvy du senat, s'en alla devers Pompeius, devant lequel estant arrivé, il luy dit tout hault, « Je te commande, Pompeius, que » tu ayes à secourir la chose publique, avec les » forces que tu as ja toutes prestes, & que tu en leves encore d'autres ». Autant luy en dit aussi Lentulus l'un de ceulx qui estoyent designez consulz pour l'année ensuyvant : mais comme

Pompeius cuida lever & enrroller gens de guerre dedans Rome, les uns ne vouloyent point obeir à son mandement, les autres y venoyent à regret en petit nombre, froidement, & avec peu d'affection : & la plus part crioient, « Appointement, appointment », à cause que Antonius avoit leu devant tout le peuple, malgré le senat, une lettre missive de Cæsar, contenant certaines demandes & offres fort à propos pour attraire le menu peuple : car il requeroit que Pompeius & luy sortissent tous deux hors de leurs gouvernemens, & qu'ilz laissassent leurs armées pour ester à droit, & se remettre entierement au jugement du peuple, en luy rendant compte & raison de tout ce qu'ilz avoyent fait. Lentulus qui estoit desja entré en possession de son consulat, ne faisoit point assembler le senat : mais Ciceron nagueres retourné de la Cilicie alloit taschant de moyener accord, mettant en avant que Cæsar laissast les Gaules, & tout le reste de son armée, exceptées deux legions seulement, qu'il retiendrait avec le gouvernement de l'Esclavonie, attendant un second consulat. Pompeius trouva cest expedient mauvais : & les amis de Cæsar se laisserent conduire jusques à conceder que Cæsar laisseroit encore l'une de ses legions : mais Lentulus s'y opposa, & Caton d'un autre costé aussi, criant que Pompeius s'abusoit

& se mescontoit, de maniere que toutes ces voyes d'appointement n'eurent point de lieu.

LXXXV. Et ce pendant nouvelles vindrent à Rome que Cæsar s'estoit desja faisi d'Ariminum ¹ bonne & grande ville de l'Italie, & qu'il s'en venoit avec toute sa puissance droit à Rome : ce qui estoit faulx : car il n'avoit pas encore avec luy plus de trois cents chevaux, & cinq mille hommes de pied, n'ayant voulu attendre le reste de son armée, qui estoit encore delà les monts en la Gaule, ains se hastant pour surprendre ses adversaires au desproveu pendant qu'ilz estoient en trouble & en effroy, & qu'ilz ne se doubtoient pas que sa venue deust estre si soudaine, plus tost que de leur donner temps de se prouvoier, & les combattre lors qu'ilz seroyent tous preparez : car quand il fut arrivé sur le bord de la riviere de Rubicon ² qui fait la separation du

¹ Arimin, aujourd'huy Rimini, ville située sur la mer Adriatique, dans la province d'Ombrie, à l'embouchure de la riviere du même nom, à 58 lieues de Rome. C'est là que se tint l'an 359 de Jesus-Christ, ce fameux concile, où plus de quatre cens évêques vaincus par les violences de Taurus, préfet de l'empereur Constance, signerent cette formule par laquelle, selon l'expression de S. Jérôme, tout l'univers fut surpris de se trouver Arien, mais qui fournit au pape Libère, en refusant d'y souscrire, une heureuse occasion de réparer la faute qu'il avoit faite, deux ans auparavant, en adhérant à la condamnation de S. Athanase, & en signant une formule de foi Arienne, suivant l'expression de S. Hilaire; qui l'anathématisa avec son auteur.

² Un peu au-dessus du fleuve Arimin.

gouvernement qui luy avoit esté baillé d'avec l'Italie, il s'arresta tout coy un espace de temps sans mot dire, & différa un peu, pensant en soy mesme la grande & hardie entreprise où il s'alloit jeter : puis tout soudain, ne plus ne moins que ceulx qui se lancent d'un hault rocher en abyssme de profondeur infinie, fermant la bouche à la raison, & clouant les yeux à l'imagination du peril, il escria à ceulx qui estoient à l'entour de luy en langage grec, « Le dé soit » jetté », (* comme s'il eust voulu dire, prenons ne l'aventure : à tout perdre n'y a qu'un coup périlleux :) & fait passer son armée.

LXXXVI Si tost que la nouvelle en fut divulguée à Rome, il y eut un si grand effroy que lon n'en avoit encore point veu de pareil : car tout le senat s'en courut incontinent devers Pompeius, & s'y en fouirent aussi tous les magistrats de la ville, là où Tullus¹ luy demanda quelles forces & quelle armée il avoit pour les defendre : Pompeius luy respondit avec quelque demeure, & d'une parole mal assurée, qu'il avoit les deux legions, que Cæsar luy avoit renvoyées, toutes prestes, & qu'il pensoit que de ceulx qu'il avoit nagueres fait lever à la haste, il feroit bien jusques au nombre de trente mille combatans. Tullus adonc

¹ Lucius Volcatius Tullus, qui avoit été consul l'an de Rome 688.

* Ceci n'est point dans le texte.

s'escria tout hault : « Tu nous as abusez, Pompeius » : & conseilla que lon envoyast des ambassadeurs devers Cæsar. Il y avoit en celle compagnie un nommé Faonius, lequel n'estoit pas mauvais homme au demourant, sinon que par une opiniastrété & une audace, il cuidoit bien contrefaire la franche liberté de parler dont usoit Caton : celui la luy dit alors, qu'il frappast du pied contre la terre, pour en faire soudre les gens de guerre qu'il leur avoit promis. Pompeius supporta doucement l'importunité outrageuse de cest homme : & comme Caton luy ramenast en memoire ce qu'il luy avoit predit de Cæsar dès le commencement, il luy respondit, « En ce que tu m'en as predit, tu as certes prophétizé plus veritablement : mais ce que j'en ay fait, je l'ay fait à la bonne foy plus amiablement ». Si fut adonc Caton d'avis que lon eleust Pompeius capitaine general de la chose publique, avec plein pouvoir & puissance souveraine de toutes choses, disant, « Que les mesmes hommes qui font les grands maux, font ceulx qui mieulx y sçavent remedier » : & incontinent se partit pour aller en la Sicile, le gouvernement de laquelle luy estoit escheur par le sort, & chascun des autres senateurs pareillement s'en alla aux provinces qui leur estoient advenues.

LXXXVII. Ainsi estant presque toute l'Italie esbranlée, il n'y avoit ordre ny raison quelconque en tout ce qui s'y faisoit : car ceulx qui estoient hors de Rome, y accouroient fuyans de tous costez : & au contraire, ceulx qui habitoient dedans, en sortoyent à grande haste, & l'abandonnoient en tel trouble & telle confusion, que ce qui pouvoit servir ayant bon-vouloir d'obeïr, se trouvoit debile, & ce qui nuisoit pour la desobeïssance, y estoit puissant & malaisé à regir & à manier aux magistrats qui avoyent loy de commander. Car il n'y avoit moyen quelconque d'appaiser leur effroy, & ne laissoit on pas à Pompeius ordonner des choses à son jugement, ains selon que chascun se trouvoit passionné de douleur, de crainte ou de doute, il l'en alloit remplissant : tellement que bien souvent en un mesme jour se prenoient toutes contraires resolutions de conseil. Il ne pouvoit entendre rien de certain des ennemis, pource que les uns luy rapportoyent tantost d'un, & les autres tantost d'un autre, & s'il ne les vouloit croire, ilz s'en courrouceoyent à luy. Finalement ayant arresté qu'il voyoit le tumulte & la confusion si grande à Rome, qu'il n'y avoit ordre d'en venir à bout, il commanda à tous ceulx du senat qu'ilz s'en allassent après luy, denonceant à ceulx qui demoureroient qu'il les

tiendroit pour adherents de Cæsar, & sur les vespres abandonna la ville. Les deux consuls sans sacrifier aux dieux, ainsi que lon a accoustumé de faire, avant que partir pour aller à la guerre, s'en fouirent aussi, de façon que Pompeius au plus fort de ses affaires & au milieu du peril, se pouvoit dire heureux, pour voir la grande affection & bienvueillance que tout le monde luy portoit : car encore que plusieurs reprissent la maniere de sa conduite, il n'y en avoit neantmoins pas un qui haïst le conducteur, ains en eut on trouvé plus de ceulx qui ne pouvoient abandonner Pompeius pour l'amour qu'ilz luy portoyent que de ceulx qui le suyvoyent pour maintenir leur liberté.

LXXXVIII. Peu de jours après qu'il fut party, Cæsar arriva à Rome, lequel se saisissant de la ville, parla humainement à tous les autres qu'il y trouva, appaisant leur effroy, excepté qu'il menaça de faire mourir Metellus l'un des tribuns du peuple, qui le voulut empescher de prendre de l'argent au tresor de la chose publique : & si adjousta à ceste cruelle menace une parole encore plus aspre : car il luy dit, que le dire luy estoit plus difficile que le faire. Ainsi ayant reboutté Metellus, & pris ce qu'il voulut, il se mit à suyvre Pompeius à la trace, taschant à le chasser dehors de l'Italie, premier que

l'armée qu'il avoit en Hespagne luy peust arriver. Ce pendant Pompeius s'estant saisi de la ville de Brundisium , & ayant recouvré quelques vaisseaux , feit incontinent embarquer dessus les deux consulz avec trente enseignes de gens de pied , qu'il envoya devant oultremer , à Dyrachium : & despescha quant & quant Scipion son beaupere , & Gneus Pompeius son filz , pour aller en Syrie faire provision de navires : & luy ayant bien remparé les portes de la ville , & disposé sur les murailles les plus vistes & plus legers de ses souldards , avec exprès commandement à ceulx de la ville qu'ilz ne bougeassent de leurs maisons , il feit encore fossoyet & trencher par le dedans de la ville les rues en plusieurs endroits , & remplir les dittes fosses & trenchées de paux pointus aguisez par les bouts , exceptés deux rues par lesquelles il devoit se rendre sur le port. Puis le troisieme jour après , ayant desja embarqué à loisir toute l'autre multitude de ses gens , il feit soudainement haulser un signe en l'air à ceulx qu'il avoit laissez pour la garde des murailles , lesquelz accoururent aussi tost à luy , & les ayant habilement recueillis en ses vaisseaux , il leva les ancrs & traversa la mer.

LXXXIX. Incontinent que Cæsar apperceut les murailles denuées de gens , il se doubta bien

que Pompeius s'en estoit fouy , & voulant courir après , s'en fallut bien peu qu'il ne s'enferrast en ces paux fchez , & qu'il ne tumbast dedans les trenchées , n'eust esté que ceulx de la ville l'en advertirent : ainsi se garda il de passer par le travers de la ville , & tournoya à l'entour pour aller au port , où il trouva que toute la flotte avoit desja fait voile , exceptez deux vaisseaux seulement , sur lesquels il y avoit peu de gens de guerre. Or y en a qui mettent ce departement de Pompeius entre les meilleures ruzes de guerre dont il usa jamais : toutefois Cæsar mesme s'esbahissoit comment , ayant une ville forte en sa puissance , & attendant son armée qui luy venoit d'Hespagne , & estant maistre de la mer , il abandonna onques l'Italie. Cicéron aussi le reprend de ce qu'il ensuyvoit plus tost le gouvernement & la conduite de Themistocles , que de Pericles , veu que les affaires ressembloyent plus au temps de cestuy cy , que de celuy la : & Cæsar mesme monstra bien par effect qu'il craignoit fort le temps : car ayant surpris Numerius l'un des amis de Pompeius , il l'envoya à Brundusium devers Pompeius , luy faire offre d'appointer avec égales conditions : mais ce Numerius feit voile quant & Pompeius. Par ce moyen donques , Cæsar s'estant emparé & fait seigneur de toute l'Italie

en soixante jours , sans coup ferir , ny sang esandre , vouloit bien tout promptement aller après Pompeius : mais pour autant qu'il n'avoit point de vaisseaux prests , il s'en deporta , & tira en diligence vers Hespagne , pour trouver moyen de gagner l'armée qui y estoit.

XC. Et ce pendant Pompeius assembla une très grosse puissance par mer & par terre : celle de mer estoit de tout poinct invincible : car y il avoit de vaisseaux pour combattre jusques au nombre de cinq cents , & de galiottes , fustes & fregates un nombre infiny : & quant à celle de terre , il y avoit toute la fleur de la chevalerie Romaine & de l'Italie aussi , jusques au nombre de sept mille chevaux , tous hommes riches , de grandes maisons , & de hault courage : mais ses gens de pied estoient hommes ramassez de toutes pieces , qui avoyent besoing d'estre aguerriz & exercitez à loisir au faict des armes , comme aussi les faisoit Pompeius exercer continuellement , estant de sejour près la ville de Berœe¹ , là où il ne se tenoit point luy mesme oisif , ains travailloit autant de sa personne , que s'il eust esté en la fleur de son age : ce qui estoit de grande efficace pour asseurer & encourager les autres , de voir le grand Pompeius âgé de soixante ans , il ne s'en falloit que deux , com-

¹ Ville de Macédoine au pied du Mont Bermius.

batre à pied tout armé , & puis à cheval desguainer son espée sans difficulté , pendant que son cheval couroit à bride abatuë , & puis la rengainer tout aussi facilement , lancer le javelot , non seulement avec dextérité de donner à point nommé , mais aussi avec force de l'envoyer si loing , que peu de jeunes gens le pouvoient passer.

XCI. A luy se venoyent rendre les roys , princes & seigneurs de pais : & de capitaines Romains qui avoyent eu charges , il s'en trouva autour de luy un nombre de sénat complet : entre lesquels s'y en alla Labienus même , qui estoit paravant l'un des amis de César , & qui avoit tousjours esté quant & luy es guerres de la Gaule : & Brutus le filz de celui qui fut occis en la Gaule , homme de grand cueur , & qui jamais au paravant n'avoit parlé à Pompeius , ny ne l'avoit salué , pource qu'il le reputoit avoir esté meurtrier de son pere : & neanmoins s'allors volontairement soubmettre à luy , comme à celui qui combattoit pour la liberté de Rome. Cicéron même , combien qu'il eust autrement escrit & conseillé , eut honte de n'estre pas du nombre de ceulx qui vouloyent hazarder leur vie pour la defense du pais. Aussi y alla Tadius Sextius jusques en Macedoine , encore qu'il fust extremement vieil , & qu'il fust boiteux d'une jambe : tellement que les autres s'en gaudissoient.

& mocquoyent : mais Pompeius quand il l'aperceut se leva & luy courut au devant, estimant que c'estoit un bien evident tesmoignage de la bonne opinion que lon avoit de luy, que de si vieilles gens, faisans plus que leur aage ny leur force ne porçoit, aimassent mieulx estre en peril avec luy, qu'en toute seureté en leurs maisons. Davantage il fut tenu une assemblée de conseil, en laquelle suyvant l'opinion de Caton, lon arresta que lon ne feroit mourir pas un citoyen Romain, sinon en bataille; & ne saccageroit lon ville quelconque qui fut subjecte à l'empire Romain. Cela fait que la part de Pompeius en fut encore bien plus aimée : car ceulx qui ne se mesloyent aucunement de ceste guerre, ou pource qu'ilz en habitoient trop loing, ou pource qu'ilz avoyent si peu de force & de moyen, que lon n'en faisoit pas autrement compte, encore favorisoyent ilz de vouldté & de parole la plus juste partie, estimans celuy estre ennemy des dieux & des hommes qui ne desiroit que Pompeius vainquist.

XCII. Toutefois Cesar aussi de sa part se monstrois doux & gracieux, là où il estoit le plus fort : car ayant pris & gaigné toute l'armée de Pompeius, qui estoit en Hespagne, il en laissa aller les capitaines où bon leur sembla, & se servit des souldards : puis repassant de rechef les monts, il traversa à grandes journées

toute l'Italie, tant qu'il arriva en la ville de Brundisium¹ qu'il estoit desjà au cueur d'hiver, là où passant la mer, il alla prendre terre en la ville d'Oricum², menant quant & luy Vibius l'un des amis de Pompeius qu'il avoit pris prisonnier, & l'envoya devers luy pour luy offrir de rechef qu'ilz se trouvassent ensemble, & que dedans trois jours ilz eussent à casser & rompre leurs armées tous deux, & que s'estans reconciliez l'un avec l'autre, & s'estans donné la foy l'un à l'autre, ilz s'en retournassent ensemble bons amis en Italie. Pompeius estima de rechef que ce fust un aguët & une embusche pour le surprendre, & descendant soudainement vers la marine se saisit de tous les lieux propres & assiettes fortes de nature pour loger un camp à seureté, & semblablement de tous les ports, plages & rades de bon abry pour les navires, & où l'on pouvoit seurement aborder, de maniere que tout vent souffloit bon pour luy, apportant en son camp, ou gens, ou vivres & argentr.

XCIII. Au contraire, César estoit si pressé & si à destroit, tant par terre que par mer, qu'il estoit contrainct de chercher la bataille en allant assaillir Pompeius jusques dedans ses forts pour essayer de l'attirer au combat, où il avoit du

¹ Brindes dans la Calabre.

² Dans l'Épire sur la mer Ionienne.

meilleur la plus part du temps, & emportoit l'avantage presque en toutes les escarmouches qui s'y faisoient, excepté une fois qu'il faillit à perdre toute son armée, & à estre du tout ruiné, par ce que Pompeius rembarra si vaillamment ses gens, qu'il leur feit à tous tourner le dos, après en avoir tué deux mille sur le champ : mais il ne peut, ou pour mieulx dire, à mon advis, il n'osa entrer pêle-mêle de dans leur camp parmi les fuyans, tellement que le soir César en son privé dit à ses amis, que ce jour là les ennemis eussent emporté la victoire finale, s'ilz eussent eu un chef qui eust sceu vaincre.

XCIV. Ceste victoire eleva le cueur à ceulx du party de Pompeius, de maniere qu'ilz voulurent à toute force hazarder la bataille. Pompeius mesme escrivit aux roys estrangers, princes, seigneurs & villes de son alliance, comme s'il eust eu desja tout gagné, combien qu'il redoubtast grandement l'issue d'une bataille, & voulust plus tost miner ses ennemis par longueurs de temps à faulte de vivres, voyant bien qu'autrement ilz estoient, en maniere de dire, invincibles par armes, attendu que de long temps ilz avoient rousjours accoustumé de demeurer victorieux quand ilz combatoyent ensemble, & que desormais pour leur vieillesse ilz se faschoient de faire d'autre sorte la guerre, comme d'aller errans çà & là par divers païs,

remuer souvent de logis, creuser des trenchées, bastir des clostures & remparemens de camp, tellement que pour ceste cause ilz ne demandoient autre chose que de venir bien tost aux mains, & attacher une bataille. Ce neantmoins au paravant encore persuadoit aucunement Pompeius à ses gens, par les remonstrances qu'il leur faisoit, qu'ilz ne bougeassent : mais quand ilz veirent qu'après ceste derniere rencontre, César forcé par la necessité de vivres, se leva de là où il estoit campé, pour aller en la Thessalie à travers le païs des Athamaniens¹, alors n'y eut il plus ordre de contenir la fierté & la gloire de ses gens, qui crioyent que César s'enfuyoit, & vouloyent les uns que lon allast après, & que lon le poursuyvist vivement, les autres que lon repassast en Italie. Il y en eut qui envoyerent devant à Rome de leurs serviteurs & de leurs amis, pour retenir les logis & maisons plus prochaines de la place, pource qu'ilz avoyent bien intention qu'incontinent qu'ilz seroyent de retour en la ville, ilz demanderoyent des offices & estats de la chose publique : & y en eut d'autres, qui de guayeré de cueur naviguerent en l'isle de Lesbos.²

1. Canton de l'Epire près du Pinde.

2. Ile de la mer Egée, près les côtes de la partie d'Asie, appelée Eolie, au-dessus de la Troade, entre 39 & 40 degrés de latitude.

devers Cornelia, que Pompeius avoit fait retirer là, pour luy porter ceste bonne nouvelle que la guerre estoit achevée.

XCV. Mais estant le conseil assemblé là dessus, pour resoudre ce que lon avoit à faire, Afranius fut d'avis que lon devoit entendre à retourner le plus tost qu'on pourroit en Italie, pource que c'estoit le principal prix que lon pre-
tendoit en ceste guerre, & que ceux qui en seroyent seigneurs, auroyent incontinent après à leur devotion la Sicile, la Sardagne, la Corsique, l'Hespagne & la Gaule : & davantage qu'il n'estoit pas honeste (ce qui plus devoit emouvoir Pompeius que nulle autre chose) de laisser tyranniquement outrager & injurieusement traiter leur pais, qui leur tendoit, par maniere de dire, les mains de si près, estant detenu en servitude par des esclaves & des flatteurs de tyrans. Mais Pompeius ne jugea pas qu'il fust ny honorable pour luy de fouir une autre fois devant Cæsar, & de se faire suivre, là où la fortune luy donnoit moyen de le chasser & poursuivre luy mesme; ny saint envers les dieux d'abandonner Scipion son beupere, & plusieurs autres personnages consulaires, qui estoient en la Grece & en la Thessalie, lesquelz ne faudroyent pas de tumber incontinent entre les mains de Cæsar, qui ne les secourroit, avec toute la chevance & les forces

qu'ilz avoyent, lesquelles n'estoyent pas petites, & que ceulx provoyoyent le mieulx au bien de la ville de Rome, qui en tyroyent le plus loing la guerre, à fin que sans souffrir, voir ny ouir rien des maulx que la guerre apporte quant & foy, elle attendist en paix celuy qui finablement demoureroit victorieux. Cela conclut, il se remeit à suyvre Cæsar à la trace, delibéré de ne luy donner point de bataille, mais bien de le tenir assiegé, & le miner à faulte de vivres; en le poursuyvant & ferrant tousjours de près, estimant qu'il luy estoit expedient d'ainsi le faire encore pour une autre raison, à cause qu'il luy fut rapporté un propos qui s'estoit tenu entre les chevaliers Romains, lesquels discourroyent qu'il falloit desfaire le plus vistemment que lon pourroit Cæsar; à fin de le desfaire luy mesme aussi incontinent après: & dit on que cela fut la cause, pour laquelle Pompeius n'employa onques Caton en chose de consequence durant toute ceste guerre: car quand il se meit à marcher après Cæsar, il le laissa sur la coste de la marine à la garde du bagage, craignant que soudain qu'ilz auroyent ruiné Cæsar, il ne le voulust contraindre de quitter aussi tost toute son auctorité.

XCVI. Ainsi se mettant à marcher tout bellement à la cueü de Cæsar, il fut calumnié, &

commencea lon à crier contre luy qu'il ne faisoit pas la guerre à Cæsar, ains à son propre païs & au senat, à fin qu'il demourast tousjours en autorité de commander, & que jamais il ne cessast d'avoir autour de luy comme ses satellites & ses ministres, ceulx qui pretendoyent devoir estre eulx mesmes seigneurs de tout le monde. Davantage Domitius Ænobarbus l'appelloit à tous coups Agamemnon & le roy des roys, ce qui luy suscitoit envie : & Faonius n'estoit pas moins fascheux en se mocquant importunement, que ceulx qui parloyent librement : car il alloit criant, « Messieurs, je vous advise » que vous ne mangerez point encore pour ceste » année des figues de Thusculum ». Et Lucius Afranius, lequel avoit perdu l'armée qui estoit en Hespagne, & en estoit soupçonné de trahison, voyant que Pompeius lors reculoit à la bataille : « Je m'esmerveille (disoit il) que ceulx » qui m'accusent, ne vont franchement trouver » celuy, qu'ilz appellent marchand & acheteur » de provinces, pour le combattre incontinent ». Par ces langages & beaucoup d'autres semblables ilz contraignirent à la fin Pompeius, lequel ne pouvoit endurer que lon mesdist de luy, & ne pouvoit rien refuzer à ses amis, de süyvre leurs esperances & leurs appetits, en se departant de ses sages conseils : ce que ne devoit

pas faire un pilote de navire seulement, tant s'en faut qu'il fust excusable en un capitaine general, ayant entier pouvoir & autorité souveraine sur tant de nations, & sur de si puissantes armées : & là où il souloit louer les medecins, qui ne complaisoyent jamais aux vultez & appetits desordonnez de leurs patiens ; luy mesme se laissa aller à obtemperer à la plus mal saine partie de son armée, craignant de leur desplaire, là où il estoit question de leur vie & de leur salut. Car qui jugeroit ne sains ne sages ceulx qui en se promenant par leur camp, briguoyent desja les offices & estats de consulz & de preteurs, & veu que Spinther, Domitius & Scipion debatoyent desja entre eulx, & faisoient des brigues & menées pour la prelature de souverain pontife, que tenoit Cæsar, comme s'ilz eussent eu à faire à un roy d'Armenie Tigranes, ou à un roy des Nabateiens qui fust campé auprès d'eulx, non pas à Cæsar, & à son armée, laquelle avoit pris à force d'assault mille villes, avoit subjugué plus de trois cents diverses nations, avoit gagné infinies batailles contre les Allemans & Gaulois, sans jamais avoir esté vaincue, avoit pris un million d'hommes prisonniers, & en avoit occis un autre million en batailles rengées.

XCVII. Mais nonobstant tout cela, ceulx

du party de Pompeius estans tousjours à crier après luy & à luy rompre la teste, finalement quand ilz furent descendus en la plaine de Pharsale^r, ilz le forcerent de mettre la chose à la deliberation du conseil, auquel Labienus estant chef de la chevalerie, se dressa le premier sur ses piedz, & jura devant tout le monde, qu'il ne retourneroit point de la bataille qu'il n'eust desfait & mis en rouverte les ennemis : autant en jurèrent aussi tous les autres après luy. Et la nuit ensuyvant il fut advis à Pompeius en dormant, qu'il entroit dedans le theatre, là où le peuple le recueilloit avec grands batemens de mains par honneur, & que luy ornoit le temple de Venus victorieuse de plusieurs despoilles. Ceste vision de songe d'un costé luy donnoit bon courage, & d'un autre costé le luy rompoit aussi, pour autant qu'il avoit peur, qu'estant la race de César descendue de la deesse Venus, son songe ne voulust signifier qu'elle seroit anoblíe & illustrée par la victoire & par les despoilles qu'il gagneroit sur luy. Qui plus est, il y eut en son camp des bruits & tumultes effroyans, sans aucune cause apparente, que lon

^r Dans la Thessalie, au-dessus de Larisse. Elle est traversée par le fleuve Apidanus, qui va se jeter dans le golfe Thermaïque, après avoir passé avec le Pénée & l'Enipée par les vallées du mont Olympe, connues sous le nom de Tempé.

appelle vulgairement frayeurs paniques, qui l'esveillerent en sursault : & environ l'heure que lon remue le guet au matin, lon apperceut dessus le camp de Cæsar, dont lon n'oyoit bruit quelconque, une grande clarté, & s'en alluma comme un flambeau ardent qui vint fondre sur le camp de Pompeius : ce que Cæsar luy mesme dit avoir veu ainsi comme il alloit visiter ses guets. Et sur l'aube du jour ayant proposé de desloger pour rirer vers la ville de Scotuse ^x, ainsi comme les soudards abbatoyent desja leurs tentes & leurs logis, & envoyoyent devant leurs sommiers & leurs valets, il vint des coureurs qui rapportèrent qu'ilz avoyent apperceu dedans le camp des ennemis force armes que lon portoit çà & là, & que lon y entendoit une emeute & un bruit, comme de gens qui se preparoyent à la bataille : après ces premiers il en arriva encore d'autres, qui rappporterent que les premiers renga estoient desja ordonnez en bataille.

XCVIII. Parquoy Cæsar se prit à dire que le jour donques qu'ilz avoyent tant désiré estoit venu, auquel ilz auroient à combattre contre des hommes, non pas contre la faim ny contre la disette de vivres, & incontinent ordonna que

^x Ville de Theffalie, un peu au nord de Pharfale, qu'il ne faut pas confondre avec Scotuse, ville de Thrace sur le fleuve Strymon.

lon estendist devant sa tente une coite d'armes rouge : car c'est le signe , duquel usent les Romains pour signifier qu'il doit avoir bataille : ce que voyans les souldards , laisserent là leur bagage & leurs tentes , & avec grands cris de joye s'en coururent prendre leurs armes , & les cheffz des bandes menans leurs gens chascun aux lieux où ilz devoient estre , les rengerent en leurs rengs , sans trouble ne tumulte quelconque , tout aussi paisiblement & aussi aiseement , comme s'ilz eussent ordonné une danse. Si avoit Pompeius pris à conduire la poincte droite de son armée , ayant en teste devant luy Antonius : son beau pere Scipion menoit le milieu de la bataille , qui venoit à rencontrer de front Domitius Calvinus : & la poincte gauche estoit commandée par Lucius Domitius Ænobarbus , avec un gros renfort de gendarmerie , pource que les gens de cheval s'estoyent presque tous jettez en ce costé là , pour tascher à forcer Cæsar qui estoit à l'opposite , & rompre la dixieme legion , dont on faisoit compte , comme de la plus belliqueuse qui fust en tout l'ost de l'ennemy , de maniere que Cæsar combattoit tousjours de sa personne au milieu d'elle : mais voyant la poincte gauche de ses ennemis ainsi fortifiée de chevalerie , & craignant leur bel equipage & la lueur de leurs harnois fourbis

à blanc , il feit venir six enseignes de renfort qu'il meit derriere sa dixieme legion , leur enjoignant qu'ilz ne bougeassent aucunement , de peur que les ennemis ne les descouvrirent : mais si tost que la gendarmerie des ennemis viendroit à charger , qu'alors courans de roideur ilz se jettassent à costé des premiers rengs , sans toutefois lancer leurs javelots de loing , comme ont accoustumé de faire les plus vaillans combatans ; à fin de plus tost venir à l'escrime des espées : ains les dresser contremont , & en donner aux yeux & aux visages des ennemis , « Pourcé ; dit il , que ces beaux danseurs icy » mignons n'attendent jamais , de peur que » vous ne leur gastiez leurs beaux visages & » leurs beaux teincts , ny ne pourront jamais » endurer la lueur de voz ferremens , quand » vous les leur approcherez près des yeux ». Voilà ce que faisoit Cæsar.

XCIX. Mais Pompeius estant à cheval alloit considerant l'ordonnance & la contenance des uns & des autres , & observa que ses ennemis attendoyent tous de pied quoy sans bouger de leurs rengs , le temps & le signe de charger : & au contraire , que la plupart de ses gens n'avoit pas la patience d'attendre ferme en un lieu , ains branloit & flotloit à faulte d'experience & de bien sçavoir le mestier de la guerre : à

l'occasion dequoy il eut peur qu'il ne se débendaſſent , avant meſme que la bataille fuſt commencée : ſi enjoignit expreſſement à ceulx des premiers reſs , qu'ilz demouraffent fermes ſur leurs marches en déſenſe , & que ſoy tenans bien ſerrez enſemble ilz attendiſſent ſans bouger le choc de l'ennemy. Céſar depuis blaſma ce commandement là , pour autant (diſoit-il) que cela affoiblit la violence que le courir donne aux premiers coups , & quant & quant oſté l'eſlan cement des combatans les uns contre les autres , qui a accouſtumé de les remplir d'impetuoſité & de fureur plus que nulle autre choſe , quand ilz viennent à ſ'entrechoquer de roideur , leur augmentant le courage par le cry & la courſe , & rend la chaleur des ſoudards , en maniere de dire , refroidie & figée. Il pouvoit avoir en l'armée de Céſar environ vingt & deux mille combatans , & en celle de Pompeius un peu plus que deux fois autant.

C. Comme donques le mot de la bataille euſt ja eſté donné d'une part & d'autre , & que les trompettes commencerent à ſonner , donnez dedans , le commun ne penſa plus qu'à ſon affaire particulier : mais quelques uns des plus gens de bien Romains , & quelques Grecs qui ſe trouverent ſur les lieux , hors toutefois des batailles , voyans les choſes ſi près du peril ,

allerent considerans en eulx mesmes , à quelz termes la convoitise & l'opiniastreté de deux hommes avoit conduit les forces de l'empire Romain : car c'estoyent mesmes armes , ordonnances de batailles toutes semblables , enseignes communes & en tout pareilles , la fleur de tant de vaillans hommes d'une mesme cité , & une si grosse puissance qui s'alloit destruire elle mesme , servant de notable exemple pour monstrier combien la nature de l'homme est aveuglée , furieuse & forsenée , depuis qu'elle se laisse une fois transporter à quelque passion : car s'ilz eussent voulu regir & gouverner en paix ce qu'ilz avoyent conquis , & se contenter de jouir de ce qu'ilz avoyent tout acquis , la plus grande & la meilleure part du monde , de la mer & de la terre estoit soubz leur obeissance. Ou bien encore s'ilz eussent voulu servir à leurs cupiditez de victoires & de triumphes , & en rassasier leur soif , ilz avoyent assez matiere de faire la guerre contre les Parthes & contre les Allemans , & si ne leur restoit pas peu d'affaire à conquérir & subjuguër toute la Scythie , ou les Indes : & si avoyent en cela honeste couleur pour couvrir leur avarice : car ilz eussent peu dire que c'estoit pour enseigner la vie civile à ces nations là barbares. Et quelle chevalerie de la Scythie , ny quelles fiesches des Parthes , ou richesse des

Indiens eust peu soustenir l'effort de soixante & dix mille combatans Romains, mesmement sous la conduite de deux tels capitaines, comme Pompeius & Cæsar? desquelz ces estranges & loingtains nations là, ont plus tost entendu les noms, que celuy mesme des Romains, tant ilz ont penetré avant par leurs victoires, en subjuguant des peuples farouches, sauvages & barbares. Et lors estoit l'un devant l'autre en armes pour s'entredesfaire, sans avoir, à tout le moins, pitié de souiller & maculer leur gloire, dont ilz estoient si ambitieux, que pour elle ilz n'espargnoient pas leur propre païs, ayans jusques à ce jour là esté de faict & de renom invincibles. Car l'affinité qu'ilz avoyent contractée ensemble, l'amour de Julia & ses nopces dès le commencement furent suspectes de n'estre que tromperie, & plus tost ostage & plege d'une conspiration faite entre eulx pour le regard de quelque commodité particuliere, que non pas arre de vraye amitié.

CI. Quand donques la plaine de Pharsale² fut couverte d'hommes, de chevaux & d'armes, & que le signe de choquer eut esté donné d'une part & d'autre, le premier de l'armée de Cæsar qui se prit à courir pour charger, fut

² L'an de Rome 706, avant J. C. 48.

Caius Crassianus capitaine de cent vingt & cinq hommes, voulant satisfaire à une grande promesse qu'il avoit faite à César, lequel l'ayant veu le matin sortir le premier du camp, luy avoit demandé en le saluant par son nom, qu'il luy sembloit de l'issue de ceste bataille, & le capitaine luy tendant la main luy cria tout hault, « Tu la gaigneras bravement, César, n'en fais » point de doute, & me loueras aujourd'hui » ou vif ou mort ». Se souvenant donques de ceste parole, il fut le premier qui se jetta hors des rangs, & en tirant plusieurs autres après luy; alla donner la teste baissée au beau milieu des ennemis: si vindrent incontinent au combat des espées à coups de main, & s'y faisoit grand meurtre d'hommes: car ce capitaine pouloit tousjours en avant, & alloit fendant la presse; & mettant en pieces tout ce qu'il rencontroit au devant de luy, jusques à ce qu'il y en eut un qui l'arresta d'un coup d'estoc qui luy donna droit dedans la bouche, & le perça de part en part, tellement que la pointe de l'espée venoit à sortir au chinon du col. Ainsi estant cestuy Crassianus tombé mort en terre, le combat vint à estre egal en cest endroit là.

CII. Mais Pompeius ne fit pas soudainement marcher la pointe gauche de sa bataille où il estoit, ains differoit tousjours, & jettoit ses

yeux çà & là pour voir ce que feroient ses gens de cheval , lesquelz estendoyent desjà leurs troupes , en intention d'envelopper Cæsar , & de renverser les gens de cheval , qu'il avoit en petit nombre devant luy , dessus le bataillon de ses gens de pied. Au contraire , si tost que Cæsar eut fait lever en l'air le signe de la bataille , ses gens de cheval se tirèrent un peu arriere , & les six cohortes qu'il avoit mises en aguet , où il y avoit trois mille combatans , se prirent soudainement à courir pour charger l'ennemy par le flanc : & comme ilz furent joignant les chevaux , ilz dresserent les fers de leurs vouges & javelots contremont , ainsi que Cæsar leur avoit enseigné de faire , & en donnerent droit aux visages de ces jeunes gentilzhommes , qui ne s'estoyent jamais trouvez en combat quelconque , & n'attendoyent point ceste escrime là , ny ne l'avoyent point apprise : aussi n'eurent ilz pas la hardiesse de parer ny soustenir les coups , qui leur estoyent ainsi tirez aux yeux & à la face , ains destournans les testes , & mettans les mains au devant de leurs visages se tournerent honteusement en fuite. Ceulx là estans rompus , les gens de Cæsar ne teindrent compte de courir après , ains s'allerent ruer sur le bataillon des gens de pied , mesmement à l'endroit où il estoit denué de gens de cheval , & consequemment

plus aisé à coustoyer & environner. Ainsi estans chargez en flanc par ceulx là, & de front par la dixieme legion, ilz ne peurent resister ny faire teste longuement, voyans qu'au rebours de ce qu'ilz avoyent esperé, qui estoit d'envelopper leurs ennemis, ilz se trouvoyent eulx mesmes enfermez. Ceulx là estans donques aussi tournez en fuitte, quand Pompeius en veir la poulciere en l'air, il se doubta incontinent bien que c'estoit la desfaitte de sa chevalerie. Et seroit mal aisé de dire, quelle pensée luy vint adonc en l'entendement : mais bien peult on asseurer que à sa contenance, il ressembloit proprement à une personne estonnée ou abestie, & qui a perdu le sens & l'entendement, ne se souvenant plus qu'il estoit le grand Pompeius : car sans mot dire à personne il se retira pas à pas en son camp, representant au vif ce qui est descript en ces vers d'Homere :

Le hault tonant Jupiter envoya
Au preux Ajax la peur, qui l'effroya :
Dont esperdu il s'arresta tout coy,
Et sur son dos jetta derriere soy
Son large escu, où estoient par dessus
Sept cuirs de bœuf, l'un sur l'autre tissus :
Puis se tira hors la presse en fuyant,
Tousjours les yeux çà & là tournoyant.

CIII. En tel estat entra Pompeius dedans sa

R 2.

tente , là où il demoura assis quelque temps sans parler , jusques à ce que plusieurs des ennemis entrèrent pesle mesle avec ses gens fuyans dedans son camp : & lors encore ne dit il autre parole sinon , « Comment jusques en nostre » camp » ! & non autre chose : ains se levant prit une robbe convenable à sa fortune , & s'en sortit. Les autres legions fouirent aussi : & fut fait un grand meurtre des valets & des gardes que lon avoit laissez dedans le camp. Car de soudards , Asinius Pollio qui combatit luy mesme en ceste bataille du costé de Cæsar , escrit qu'il n'en mourut en tout que six mille. Mais à la prise de leur camp les gens de Cæsar cogneurent bien evidemment la folie , la vanité & legereté de ceux de Pompeius : car il n'y avoit ny tente , ny pavillon qui ne fust plein de festons & de chappeaux de meurtre ^r , les lits tous couverts de fleurs , les tables chargées de pots & de coupes pleines de vin , & un appareil & preparatif de gens , qui veulent sacrifier & faire feste , plus tost que s'armer pour aller au combat : tant ilz alloient abusez de vaine esperance , & pleins de folle outrecuidance , à ceste bataille. Quand Pompeius fut un peu loing de son camp , il laissa son cheval ayant peu de gens autour de luy : & voyant que personne ne le poursuyvoit , il

^r Myrte.

marcha à pied lentement , avec telles imaginations en son entendement , que lon peut penfer que devoit avoir un personnage , lequel avoit accoustumé par l'espace de trente & quatre ans de vaincre continuellement , & d'estre tousjours le plus fort , là où il commenceoit lors ptemier à essayer sur sa vieillesse , que c'est de se trouver vaincu & de fouir , & qui discouroit en luy mesme , comment il avoit perdu en une seule heure , la gloire , la puissance & l'autorité qu'il avoit acquise par tant de guerres & tant de batailles : & pour laquelle il estoit nagueres suyvy & obeï de tant de milliers d'hommes de guerre , de tant de chevaux & d'une si grosse flotte de vaisseaux : & lors il s'en alloit ainsi petit & reduit à si peu de train , que ses ennemis mesmes qui le cherchoyent l'en mescognoissoyent. Passé qu'il eut la ville de Larisse , il entra dedans la vallée de Tempé , là où ayant soif il se coucha sur le ventre , & beut en la riviere , puis se relevant chemina tant qu'il arriva sur le bord de la mer dedans une pauvre cabane de pescheurs , puis environ l'aube du jour entra dedans un petit bateau de riviere avec ceulx qui l'avoient suyvy estans de condition libre : car quant aux serfs , il les renvoya & leur conseilla qu'ilz se retirassent devers Cæsar hardiment , & qu'ilz n'eussent point de peur.

CIV. Ainsi comme il alloit rengeant la coste avec ce petit bateau, il apperceut une grosse navire de charge au large de la mer à la rade, qui estoit preste à lever l'ancre pour faire voile : le maistre de la navire estoit un Romain, lequel combien qu'il ne fust familier de Pompeius, le cognoissoit bien de veuë. Il s'appelloit Peticius, & la nuit precedente avoit songé qu'il voyoit Pompeius, non tel comme il avoit accoustumé de le voir, mais bien plus ravalé & plus affligé, parlant avec luy. Si avoit raconté son songe à ceux qui naviguoient avec luy, ainsi comme lon fait souvent, mesmement quand lon songe choses de grande consequence, & que lon se treuve de loisir : & à l'instant y eut quelqu'un des mariniers qui luy dit qu'il voyoit un bateau de riviere, qui venoit droit à toute vogue vers eux, & qu'il y avoit dedans des personnes qui secouoyent leurs habillemens, & leur rendoyent les mains. Parquoy Peticius se dressant sur ses piedz recogneut incontinent Pompeius, tout tel comme il l'avoit veu la nuit en songeant : & se batant la teste de douleur, commanda aux mariniers qu'ilz devallassent l'esquif, & rendit la main, appellant Pompeius par son nom, se doubtant bien à le voir en tel estat, de ce qui luy estoit advenu, & que fortune luy avoit couru sus : au moyen dequoy, sans attendre

qu'il le priaſt ne qu'il luy parlaſt de ſa deſconvenue , il le recueillit en ſa navire , & tous ceulx qu'il voulut quant & luy , puis ſe meit à la voile. Avec luy eſtoient les deux Lentules & Faonius : & tantotſt après apperceurent encore ſur le rivage le roy Dejotarus , qui ſe debatoit à leur faire ſigne qu'ilz le receuſſent auſſi , comme ilz feirent : & quand l'heure du ſouper fut venue , le maïſtre de la navire leur appreſta à ſouper de ce qu'il avoit : & Faonius voyant que Pompeius à faulte de valets , commenceoit à ſe laver ſoy meſme , courut à luy & le lava & oignit , & depuis continua tousjours à le ſervir & luy miniſtrer tout ce que font les ſerfs à leurs maïſtres , juſques à luy nettoyer les pieds & à luy appreſter à ſouper : au moyen dequoy y eut quelqu'un qui voyant comme il faiſoit ce ſervice liberalement avec une ſimplicité naïſſe , ſans affecterie ny feintife quelconque, luy dit ce vers ,

Que tout ſiet bien à un gentil courage!

CV. Ainſi Pompeius paſſant par devant la ville d'Amphipolis ¹ traversa de là en l'isle de Lesbos pour y prendre ſa femme Cornelia & ſon filz , qui eſtoient en la ville de Mitylene ² : parquoy ayant

¹ Près de l'embouchure du fleuve Strymon.

² Capitale de l'île de Lesbos.

posé l'ancre en la rade, il envoya un messager en la ville devers elle, non pas tel comme elle l'attendoit : car selon les nouvelles que lon luy escrivoit pour luy gratifier, & que lon luy rapportoit tous les jours, elle esperoit que la guerre eust esté entierement decidée près la ville de Dyrrachium ¹, & qu'il ne restast plus à Pompeius que de poursuyvre Cæsar qui s'en seroit foy. Le messager donques la trouvant en telle esperance, n'eut pas le cueur assez ferme pour la saluer seulement, ains luy donnant à entendre plus par ses larmes que par ses paroles, le principal du malheur, luy dit, qu'elle se hastast vistement si elle vouloit voir Pompeius en une navire seule, & encore non siene, mais empruntée. La jeune dame oyant ceste nouvelle, tumba tout à plat contre terre, où elle demoura long temps evanouye sans parler ny muer : & après qu'elle se fut revenue de pasmoison, considerant qu'il n'estoit pas temps de lamenter ny larmoyer, elle descendit en diligence par le travers de la ville sur le bord de la mer, là où Pompeius luy alla au devant, & la prit entre ses bras, pource qu'elle ne se pouvoit pas soustenir, ains se laissoit tumber de douleur, en disant, « Helas ! c'est

¹ Dyrrachium ou Epidamne, sur la mer Ionienne au-dessous des montagnes qui séparent l'Illyrie de la Macédoine. C'est aujourd'hui Durazzo.

» bien une œuvre de ma fortune , non pas de
» la tienne , cher mary , que je te voy mainte-
» nant reduit à une seule pauvre petite navire ,
» là où devant que tu espoufasses la malheu-
» reuse Cornelia , tu foulois cingler en ceste
» mer avec cinq cents voiles. Helas ! pourquoy
» m'es tu donques venu voir ? Et que ne m'as
» tu laissée avec ma sinistre & malencontreuse
» destinée , puis que c'est moy qui t'ay apporté
» tant de malheur ? Helas ! tant j'eusse esté femme
» heureuse , si je fusse morte avant que de en-
» tendre la mort de Publius Crassus mon premier
» mary , que les Parthes me tuerent ! Et tant
» j'eusse esté sage , si comme j'en fus en pro-
» pos , je eusse abandonné ma vie incontinent
» après luy , là où je suis demourée pour porter
» encore malheur au grand Pompeius » ! Lon dit
que Cornelia prononça lors de telles paroles ,
& que Pompeius luy respondit : « Tu ne cognois-
» fois à l'adventure que la bonne fortune , Cor-
» nelia , laquelle t'a , peult estre , abusée , pour
» autant qu'elle avoit demouré avec moy plus
» longuement que elle n'a accoustumé de s'arrester
» en un lieu : mais puis que nous sommes nez
» hommes , il est force que nous supportions
» patiemment ces adversitez cy , & que nous ten-
» tions encore la fortune : car il n'est pas hors
» d'esperance , que nous ne puissions de la cala-

» mité présente retourner en la prospérité passée ,
» aussi bien que de la prospérité passée nous
» sommes tombés en la calamité présente ».

CVI. Ces paroles ouyes, Cornelia renvoya en la ville querir son bagage & sa famille, & les Mityleniens vindrent publiquement visiter & saluer Pompeius, en le priant de vouloir descendre en terre, & se venir refreschir en leur ville : ce qu'il ne voulut faire : ains luy mesme leur conseilla d'obeïr au vainqueur, sans avoir peur de rien, pource que Cæsar estoit homme equitable & de benigne nature : & se tournant devers le philosophe Cratippus, qui estoit aussi descendu de la ville entre les autres citoyens pour le voir, se plaignit & disputa un peu avec luy touchant la providence divine : en quoy Cratippus luy cedoit tout doucement, le remettant tousjours en meilleure esperance, de peur qu'il ne luy fust trop ennuyeux & importun ; s'il eust voulu à bon escient contester à l'encontre de ses raisons : pource que Pompeius luy eust peu demander quelle providence des dieux il y avoit en son faict, & Cratippus luy eust respondu, que pour le mauvais gouvernement des affaires à Rome, il estoit besoing que la chose publique tombast entre les mains d'un prince souverain : & puis il luy eust à l'adventure demandé, « Comment & à quelles enseignes veux

» tu, Pompeius, que nous croyons, que tu eusses
» mieulx usé de la fortune, si tu fusses demouré
» vainqueur, que ne fait ou fera Cæsar ? Mais
» il fault laisser cela ainsi comme il plaist aux
» dieux en ordonner ».

CVII. Ayant donques Pompeius pris sa femme & ses amis, il se meit à la voile sans aborder nulle part, sinon où il estoit contrainct à ce faire, pour prendre vivres, ou faire eau. La premiere ville où il entra fut Attalie ¹, au país de la Pamphylie, là où quelques galeres de Cilicie l'allerent trouver, & se rassemblèrent autour de luy quelques gens de guerre, & se trouverent de rechef soixante senateurs Romains en sa compagnie : mais entendant que son armée de mer estoit encore en estre, & que Caton avoit recueilly bon nombre de soudards de la desfaiite, qu'il avoit transportez quant & luy en Afrique, il se prit à lamenter en se plaignant à ses amis, de ce que lon l'avoit contrainct à combattre par terre, & n'avoit on pas souffert qu'il s'aidast de l'autre puissance, en laquelle il estoit sans point de doubte le plus fort, & qu'il se teinst tous-jours auprès de son armée de mer, à fin que si la fortune luy disoit mal sur terre, il eust incontinent ses forces de la marine toutes prestes

¹ Sur la côte méridionale de l'Asie, regardant presque l'île de Cypre, quoiqu'un peu plus occidentale.

pour en refister à son ennemy : aussi, à la verité ; jamais Pompeius ne feit en celle guerre une plus grande faulte , ny Cæsar ne s'advisa d'une meilleure ruze , que de tirer son ennemy à la bataille ainsi loing du secours de son armée de mer. Mais estant Pompeius contrainct de remuer & faire quelque chose selon le peu de moyen qu'il avoit , il alloit çà & là par les villes prochaines, & à aucunes alloit luy mesme en personne leur demander de l'argent, dont il equipoit & armoit des vaisseaux : & neantmoins redoublant la viffesse & soudaineté de son ennemy, qu'il ne le previnst avant qu'il peust mettre sus aucun suffisant appareil pour luy faire teste, il se meit à considerer quelle retrairte & quel recours il pouvoit avoir pour lors, où il se peust retirer à seureté : & après avoir le tout bien consulté, il luy sembla qu'il n'y avoit pas une province de l'empire Romain qu'ilz peussent garder ny maintenir : & quant aux royaumes estrangers , luy fut advis que pour le present il n'y en avoit point qui les peust mieulx recueillir ny couvrir plus seurement , ainsi foibles qu'ilz estoient, pour puis après les remettre sus & les accompagner de plus de forces, que feroit celuy des Parthes. Les autres de son conseil tournoient leur opinion devers l'Afrique & le roy Juba : mais Theophanes Lesbien , disoit que ce luy sembloit une

grande folie, que de laisser le royaume d'Égypte, qui n'estoit qu'à trois journées de navigation loing de là, & le roy Ptolomæus¹ qui ne faisoit encore que sortir de son enfance, estant débiteur hereditaire de l'amitié & de la grace que son pere avoit receuës de Pompeius, pour s'aller jeter entre les mains des Parthes, la plus infidele & plus desloyale nation du monde, & ne se vouloir pas demettre jusques à seconder seulement un homme Romain, qui auroit esté son beau-pere, & au demourant pouvoir estre le premier de tous les hommes, ny ne vouloir esprouver son equité, & plustost aller soumettre sa propre personne à la puissance de Arsaces², qui n'avoit pas seulement peu avoir celle de Crassus vivant, & mener une jeune femme de la maison des Scipions entre des Barbares, qui ne mesurent leur puissance ny leur grandeur, sinon à la licence de commettre toutes les villanies & toutes les infamies qu'il leur plaist : car posé encore qu'elle ne soit point violée par eulx, si est ce neantmoins chose indigne, que lon puisse penser qu'elle l'ait peu estre, pour avoir esté en la puissance de ceulx qui ont eu moyen de le faire. Il n'y eut que ceste raison seule, ainsi comme lon dit, qui destournast Pompeius de prendre

¹ Surnommé Dionysius, frere de Cléopâtre.

² Voyez la note sur la Vie de Crassus, th. xxxv, p. 331, T. V.

le chemin d'Euphrates, au moins si nous voulons consentir que ce ait esté le discours de la raison, & non sa mauvaïse fortune qui l'ait guidé à prendre le chemin qu'il suyvit. Ayant doncques esté resolu au conseil, que le meilleur estoit de s'enfouir en Ægypte, il se partit de Cypre en une galere Seleuciene avec sa femme : & les autres de sa compagnie s'embarquerent semblablement, les uns sur des galeres aussi, & les autres dedans de grosses naves de marchands, où ilz traverserent la mer sans danger : & ayans nouvelles que le roy estoit en la ville de Pelusium * avec son armée, où il faisoit la guerre à sa sœur, il teint celle route, & envoya devant faire sçavoir au roy qu'il estoit là arrivé, & le prier de le vouloir recevoir.

CVIII. Ce roy Ptolomæus estoit encore fort jeune, mais celuy qui menoit tous ses affaires nommé Pothinus, assembla un conseil des principaux hommes & plus advisez de la cour, lesquels avoyent autorité & credit selon qu'il luy plaisoit leur en departir : & assemblez qu'ilz furent, leur commanda de la part du roy de luy dire chascun son advis, touchant ceste reception de Pompeius, à sçavoir si le roy le devoit recevoir ou non. Si estoit ce desja une grande pitié de voir un Pothinus valet de chambre du

* Sur la mer Méditerranée, à l'embouchure la plus orientale du Nil.

roy d'Égypte, & un Theodotion¹ maître d'école, natif de Chio, que lon avoit loé pour enseigner la rhétorique à ce jeune roy, & un Achillas Égyptien, consulter entre eulx, ce que lon devoit faire du grand Pompeius : car ceulx là estoient les principaux conseillers & entremetteurs des affaires du roy, entre les autres valets de chambre, & ceulx qui l'avoient nourry. Si attendoit Pompeius, ayant posé l'ancre en la rade assez loing de la coste, la resolution de ce conseil : auquel les opinions des autres furent différentes, en ce que les uns vouloyent que lon le renvoyast, les autres que lon l'appellast & que lon le receust. Mais le rhétoricien Theodotion voulant monstrier son éloquence, alla discourir que ny l'un ny l'autre n'estoit seur : « Pource dit
» il, que s'ilz le recevoient, ilz auroient Cæsar
» pour ennemy, & Pompeius pour maître, &
» que s'ilz l'esconduisoient, Pompeius leur tour-
» neroit à crime, ce qu'ilz l'auroient chassé,
» & Cæsar ce qu'ilz ne l'auroient retenu : à rai-
» son de quoy le meilleur estoit le mander pour
» le faire mourir, pource qu'en ce faisant ilz
» acquerroyent la bonne grace de l'un, & ne
» craindroient plus la male grace de l'autre » :
encore dit on qu'il adjousta à son dire ce trait de
risée. « Un homme mort ne mord point. »

¹ Grec, Théodote.

CIX. Ayans donques arresté cela entre eulx ; ilz donnerent la commission de l'executer à Achillas : lequel prenant avec foy un Septimius , qui autrefois avoit eu charge de gens sous Pompeius , & Salvius un autre centenier aussi , avec trois ou quatre autres satellites , se fait mener à la galere où estoit Pompeius , dedans laquelle s'estoyent aussi rendus tous les principaux personnages de sa fuite , pour voir que ce seroit : mais quand ilz veirent ceste maniere de recueil , qui n'estoit royale , ny magnifique , ny en chose quelconque respondant à l'esperance que leur avoit donnée Theophanes , attendu qu'ilz ne voyoyent que bien peu de gens qui venoyent à eulx dedans une barque de pescheur , ilz commencerent à avoir suspect le peu de compte que lon faisoit d'eulx , & conseillerent à Pompeius de tourner arriere & s'essargir en haulte mer , pendant qu'ilz estoient encore hors la volée du traict. Ce pendant la barque s'approcha , & Septimius se leva le premier en pieds qui salua Pompeius en langage Romain du nom d'imperator , qui est à dire , souverain capitaine , & Achillas le salua aussi en langage Grec , & luy dit qu'il passast en sa barque , pource que le long du rivage il y avoit force vase & des bancs de sable , tellement qu'il n'y avoit pas assez eau pour sa galere : mais en mesme temps on voyoit
de

de loing plusieurs galeres de celles du roy, que lon armoit en diligence, & toute la coste couverte de gens de guerre, tellement que quand Pompeius & ceulx de sa compagnie eussent voulu changer d'advis, ilz n'eussent plus sceu se sauver, & si y avoit davantage qu'en monstrant de se deffier, ilz donnoient au meurtrier quelque couleur d'exécuter sa meschanceté. Parquoy prenant congé de sa femme Cornelia, laquelle desja avant le coup faisoit les lamentations de sa fin, il commanda à deux centeniers qu'ilz entraissent en la barque de l'Ægyptien devant luy, & à un de ses serfs affranchiz qui s'appelloit Philippus, avec un autre esclave qui se nommoit Scynes. Et comme ja Achillas luy tendoit la main de dedans sa barque, il se retourna devers sa femme & son filz, & leur dit ces vers de Sophocles;

Qui en maison de prince entre, devient
Serf, quoy qu'il soit libre quand il y vient.

CX. Ce furent les dernières paroles qu'il dit aux siens, quand il passa de sa galere en la barque: & pource qu'il y avoit loing de la galere jusques à la terre ferme, voyant que par le chemin personne ne luy entamoit propos d'amiable entretien, il regarda Septimius au visage, & luy dit: « Il me semble que je te recognois, compagnon, » pour avoir autrefois esté à la guerre avec moy ».

Tome VI.

S

L'autre luy fait signe de la teste seulement, qu'il estoit vray, sans luy faire autre response ne caresse quelconque : parquoy n'y ayant plus personne qui dist mot, il prit en sa main un petit livret, dedans lequel il avoit escript une harengue en langage Grec, qu'il vouloit faire à Ptolomæus, & se mit à la lire. Quand ilz vindrent à approcher de la terre, Cornelia avec ses domestiques & familiers amis se leva sur ses pieds, regardant en grande destresse quelle seroit l'issue. Si luy sembla qu'elle devoit bien esperer quand elle apperceut plusieurs des gens du roy, qui se presenterent à la descente comme pour le recueillir & l'honorer : mais sur ce point ainsi comme il prenoit la main de son affranchy Philippus pour se lever plus à son aise, Septimius vint le premier par derrière qui luy passa son espée à travers le corps, après lequel Salvius & Achilles desguainerent aussi leurs espées, & adonc Pompeius tira sa robbe à deux mains au devant de sa face, sans dire ne faire aucune chose indigne de luy, & endura vertueusement les coups qu'ilz luy donnerent, en soupirant un peu seulement, estant aagé de cinquante^{*} neuf ans, & ayant achevé sa vie le jour ensuyvant celui de sa nativité. Ceulx qui estoient dedans les vaisseaux à la rade, quand ilz apperceurent ce meur-

* Cinquante-huit ans & un jour.

tre, jetterent une si grande clameur, que lon l'entendoit jusques à la coste, & levans en diligence les ancres se meirent à la voile pour s'enfouir, à quoy leur servit le vent qui se leva incontinent frais aussi tost qu'ilz eurent gaigné la haulte mer, de maniere que les *Ægyptiens* qui s'appareilloyent pour voguer après eulx, quand ilz veirent cela, s'en deporterent, & ayans couppé la teste en jetterent le tronc du corps hors de la barque, exposé à qui eut envie de voir un si miserable spectacle.

CXI. *Philippus* son affranchy demoura toujours auprès, jusques à ce que les *Ægyptiens* furent affouviz de le regarder, & puis l'ayant lavé de l'eau de la mer, & enveloppé d'une siene pauvre chemise, pource qu'il n'avoit autre chose, il chercha au long de la greve, où il trouva quelque demourant d'un vieil bateau de pescheur, dont les pieces estoyent bien vieilles, mais suffisantes pour brusler un pauvre corps nud, & encore non tout entier. Ainsi comme il les amasloit & assembloit, il survint un Romain homme d'aage, qui en ses jeunes ans avoit esté à la guerre sous *Pompeius* : si luy demanda, « Qui » es tu, mon amy, qui fais cest apprest pour les » funerailles du grand *Pompeius* ? *Philippus* luy respondit, qu'il estoit un sien affranchy. « Ha, » dit le Romain, tu n'auras pas tout seul cest » honneur, & te prie vueille moy recevoir pour

» compaignon en une si saincte & si devote ren-
» contre : à fin que je n'aye point occasion de
» me plaindre en tout & par tout de m'estre
» habitué en païs estranger , ayant en recom-
» pense de plusieurs maulx que j'y ay endurez ,
» rencontré au moins ceste bonne adventure ,
» de pouvoir toucher avec mes mains , & aider à
» ensepvelir le plus grand capitaine des Romains ».
Voilà comment Pompeius fut ensepulturé. Le
lendemain Lucius Lentulus ne sachant rien de
ce qui estoit passé , ains venant de Cypre , alloit
cinglant au long du rivage , & apperceut un
feu de funerailles , & Philippus auprès , lequel
il ne recogneut pas du premier coup : si luy
demanda , « Qui est celuy qui ayant icy achevé
» le cours de sa destinée , repose en ce lieu ?
» Mais soudain jettant un grand soupir , il
» adjousta : Helas ! à l'adventure est-ce toy ,
» grand Pompeius » ? Puis descendit en terre ,
là où tantost après il fut pris & tué. Telle fut
la fin du grand Pompeius.

CXII. Il ne passa gueres de temps après que
César n'arrivast en Ægypte ainsi troublée & es-
tonnée , là où luy fut la teste de Pompeius pre-
sentée , mais il tourna la face arriere pour ne
la point voir , & ayant en horreur celuy qui la
luy presentoit comme un meurtrier excommu-
nié , se prit à plorer : bien prit il l'anneau , du-

quel il cachettoit ses lettres, qui luy fut aussi présenté, & où il y avoit engravé en la pierre un lion tenant une espée : mais il feit mourir Achilles & Pothinus : & leur roy mesme Ptolomæus ayant esté desfait en une bataille au long de la riviere du Nil, disparut, de maniere que lon ne sceut onques puis qu'il estoit devenu. Quant au rethoricien Theodotus, il eschappa la punition de Cæsar : car il s'en fouit de bonne heure, & s'en alla errant çà & là par le païs d'Egypte, estant miserable & haï de tout le monde. Mais depuis Marcus Brutus après avoir occis Cæsar, se trouvant le plus fort en Asie, le rencontra par cas d'aventure, & après luy avoir fait endurer tous les tourmens dont il se peut adviser, le feit finablement mourir. Les cendres du corps de Pompeius furent depuis rapportées à sa femme Cornelia, laquelle les posa en une siene terre qu'il avoit près la ville de Alba.

LA COMPARAISON

DE POMPEIUS AVEC AGESILAUS.

AYANS donques exposé les vies d'Agésilas & de Pompeius, venons maintenant à les conférer ensemble, en touchant legerement les dif-

ferences qu'il y a entre eulx, qui sont telles : la premiere est, que Pompeius parvint à sa gloire & puissance par une très juste voye, s'estant luy mesme poulcé en avant, & ayant en plusieurs grandes choses aidé Sylla à delivrer l'Italie de la domination des tyrans : là où il semble qu'Agésilas usurpa la royauté de Lacedæmone contre tout droit & des dieux & des hommes, ayant fait declarer Leotychides bastard, que son frere avoit advoué pour son filz legitime : & ayant tourné en motquerle la prophetie des dieux, qui parloit d'une royauté boitteuse. La seconde est, qu'il porta tousjours honneur & reverence à Sylla, tant comme il vescu : & encore quand il fut mort en ensepultura le corps honorablement malgré Lepidus, & donna sa fille en mariage à Faustus Sylla son filz : là où Agésilas chassa & deshónora Lyfander pour bien legere occasion, & neantmoins Pompeius n'avoit pas moins fait pour Sylla, que Sylla pour luy. Au contraire, Lyfander avoit fait Agésilas roy de Lacedæmone, & capitaine general de toute la Grece. La troisieme est, que les injustices, que comemit Pompeius au gouvernement de la chose publique, furent pour ses alliez : car la plus part des erreurs qu'il y feit, fut pour complaire à Cæsar & à Scipion ses deux beauxperes. Là où Agésilas pour gratifier à l'amour de son filz,

ſauva la vie à Sphodrias, qui avoit mérité la mort pour le tort qu'il avoit fait aux Atheniens, & ſouſteint affectueuſement Phœbidas, non pour autre choſe, que pour le crime meſme qu'il avoit commis outrageant les Thebains en pleine paix. Brief, les meſmes maux que Pompeius ſuscita aux Romains par ignorance, ou par n'avoir rien peu refuſer à ſes amis, Ageſilaus les feit par cholere & par opiniaſtreſté aux ſiens, ayant allumé la guerre contre les Bœotiens.

II. Et ſ'il faut compter la fortune de l'un & de l'autre entre les erreurs qu'ilz ont commis, les Romains ne pouvoyent eſperer ny craindre celle de Pompeius : là où Ageſilaus ne permet pas aux Lacedæmoniens d'éviter les inconveniens qu'ilz ſçavoyent & prevoyoyent leur devoir advenir par un roy boitteux. Car quand bien Leotychides euſt eſté dix mille fois prouvé & avéré baſtard, la race des Eurytionides pour cela ne fuſt pas demourée courte, qu'elle n'eût peu fournir un autre roy legitime, qui euſt marché droit, ſi n'eût eſté que Lyſander en faveur d'Ageſilaus deſguiſa aux Lacedæmoniens la vraye intelligence de l'oracle. Mais auſſi de l'autre coſté, il ne fut onques trouvé une ſi ſage invention en matiere de gouvernement, que fut celle que trouva Ageſilaus pour remedier à la doubte & difficulté où eſtoient les Lacedæmoniens, tou-

chant ceux qui s'en estoient fouys de la bataille de Leuctres quand il conseilla que lon laissast dormir les loix pour ce jour là , ny ne sçauroit on en mettre à l'encontre un semblable de Pompeius , lequel au contraire ne voulut pas observer les loix que luy mesmes avoit faittes , pour monstrier à ses amis combien il avoit de pouvoir. Là où Agesilaus se trouvant en un tel destroit , qu'il estoit contraint d'abolir les loix pour sauver la vie à ses citoyens , inventa un tel expedient , par lequel les loix ne feirent point de dommage au public , ny ne furent point abolies de peur qu'elles n'en feissent.

III. Je donne aussi tiltre de vertu civile & d'acte de sage gouvernement à ce faict incomparable d'Agesilaus , quand il abandonna toutes les conquestes qu'il avoit faittes en Asie , soudain qu'il eut receu le petit buletin , qu'on luy envoya de son païs pour le faire retourner : car il ne fait pas comme Pompeius , lequel se rendit grand en profitant à la chose publique , ains à l'opposite pour le regard du bien de la chose publique , il abandonna une telle gloire & si grande puissance , que nul capitaine , ny devant ny depuis ne l'eut pareille en ces quartiers là , excepté Alexandre le grand. Et pour reprendre un autre commencement , touchant les faicts de guerre & exploits d'armes : quant au nombre

des triumphes pour les victoires gaignées, & à la puissance des armées que Pompeius a conduites, je pense que Xenophon mesme, s'il vivoit, ne sçauroit y comparer les victoires d'Agésilas, encore que pour les autres belles & bonnes qualitez qu'il a en luy, on luy ait concedé cela, comme un privilege special, de pouvoir dire & escrire tout ce qu'il luy a pleu de ce prince là : & si me semble qu'il y a encore difference entre ces deux personnages icy, quant à l'equiré & bonté qu'ilz garderent envers leurs ennemis : car l'un voulant asservir la ville de Thebes, & de tout poinct exterminer & destruire celle de Mefene, l'une estant en tout & par tout cité ancienne de son país, & l'autre ville mere & capitale de toute la nation Bœotiene, il s'en fallut bien peu qu'il ne perdist luy mesme celle de Sparte : car au moins en perdit il la principaulté qu'elle avoit sur le demourant de la Grece. Et l'autre à l'opposite, donna des villes pour habiter aux coursfaires, qui voulurent changer leur maniere de vivre : & estant en sa puissance de mener Tigranes à Rome en triumphe, il aima mieulx le faire allié & confederé des Romains, disant qu'il avoit plus chere la gloire de tout un siecle, que celle d'un jour.

IV. Mais s'il est raisonnable d'attribuer le premier lieu & le premiet prix d'honneur de la

vertu militaire d'un capitaine, aux plus grands exploits & conseils d'armes de plus grande consequence, le Lacedæmonien laisse le Romain beaucoup derriere : car premierement il n'abandonna jamais sa ville, ny n'en sortit point, encore qu'elle fust assaillie par soixante & dix mille combatans, & qu'il y eust dedans peu de gens de defenses, lesquels avoyent encore un peu devant esté desfaits en la bataille de Leuctres : & Pompeius pour avoir entendu que Cæsar avec cinq mille hommes de pied seulement avoit pris une ville d'Italie, s'en fouit de Rome, si fort il estoit effroyé : en quoy il ne se peult sauver de l'un des deux, ou qu'il ne s'en soit fouy laschement pour si peu de gens, ou qu'il n'en ait imaginé davantage faulxement : car il emmena bien sa femme & ses enfans, mais il abandonna ceux des autres sans defense en s'enfuyant, là où il falloit ou vaincre en combatant pour son païs, ou recevoir les conditions de paix que luy offroit celui qui estoit le plus fort : car quand tout est dit, c'estoit un sien citoyen & un sien allié. Et luy qui avoit estimé estre chose insupportable que de luy prolonger le terme de son gouvernement, ou luy ottroyer un second consulat, luy donna moyen & occasion, en luy laissant prendre la ville de Rome, de dire à Metellus & aux autres, qu'il les estimoit ses prisonniers de guerre,

V. Ce qui est donc le principal en un bon chef d'armée , de contraindre ses ennemis à venir au combat quand il se sent le plus fort , & quand il est le plus foible , se garder d'y pouvoir estre contraint, Agesilaus le bien observant , se maintient tousjours invincible : & Cæsar sceut bien eviter de n'estre point endommagé en ce où il estoit le moins puissant , & au contraire , sceut si bien faire qu'il contraignit Pompeius de hazarder à sa totale ruine la bataille par terre , où il estoit le plus foible , & se rendit par ce moyen incontinent seigneur de l'argent , des vivres & de la mer , là où ses ennemis avoyent le tout en leurs mains sans combattre. Et ce que lon allegue pour le cuider excuser , c'est ce qui plus grièvement l'accuse & le condamne , mesmement pour un si grand & si expérimenté capitaine. Car comme il est bien croyable , qu'un jeune chef d'armée puisse estre destourné d'un sage & seur conseil par les crieries & importunitez de rompeurs de teste , qui luy pourroyent mettre devant les yeux , que ce luy seroit une grande honte & une lacheté de cueur s'il faisoit autrement , aussi luy seroit celle faulte aucunement pardonnable. Mais le grand Pompeius , le camp duquel les Romains appelloyent leur païs , & sa tente le senat , & nommoyent ceulx qui estans à Rome

manioient les affaires de la chose publique, præteurs & consuls, rebelles & traistres à l'empire Romain : celuy que lon n'avoit jamais veu commandé par autrui, ains qui avoit tousjours esté capitaine en chef en tant de guerres où il s'estoit trouvé & où il avoit tousjours bien fait : qui le pourroit excuser de s'estre laissé, par maniere de dire, forcer aux brocards de Faonius & de Domitius, jusques à hazarder une bataille où il estoit question de tout l'estat de l'empire, & de la liberté de Rome, de peur que lon ne l'appellast le roy Agamemnon ?

VI. Car s'il ne regardoit seulement qu'au deshonneur & à l'infamie presente, il devoit faire teste, & combattre dès le commencement pour les murailles mesme de la ville de Rome, non pas pretendre que sa fuite fust une imitation de la ruze, dont jadis avoit usé Themistocles, & puis après reputer que ce luy fust honte de sejourner en la Thessalie quelque temps sans venir au combat : car la plaine de Pharfale n'estoit point une lice ny un camp clos que dieu leur eust préparé, pour y combattre necessairement à qui demoureroit l'empire : & n'y avoit point de herault qui l'appellast au combat, comme il y a ès jeux de prix, là où il fault respondre à son nom & venir combattre, ou bien quitter l'honneur de la couronne à un

autre, ains y avoit assez d'autres campagnes & des villes innombrables, où, pour mieulx dire, toute la terre habitable, dont la commodité qu'il avoit de la marine, luy donnoit le choix & l'option, s'il eust plus tost voulu ensuyvre Fabius Maximus, ou Marius ou Lucullus, ou bien Agefilaus mesme, lequel ne soustient pas de moindres tumultes dedans la propre ville de Sparte, quand les Thebains l'y allerent semondre d'en sortir pour defendre le plat pais, & semblablement en Ægypte, où il supporta doucement plusieurs faulces & calumnieuses imputations, dont le roy mesme le chargeoit, en le priant & admonestant tousjours qu'il eust un peu de patience : & à la fin ayant suyvy le meilleur conseil, selon ce qu'il avoit dès le commencement resolu en son entendement, il sauva les Ægyptiens malgré eulx, & maintint luy seul la ville de Sparte sur ses pieds en un si violent esbranlement, & dressa un trophée dedans la ville mesme de Sparte à l'encontre des Thebains, ayant donné moyen à ses ciroyens de vaincre depuis, en ne s'estant pas laissé contraindre de les mener lors à leur perte & ruine certaine, dont il advint que depuis il fut hault loué par ceulx qu'il avoit ainsi sauvez malgré eulx. Et à l'opposite Pompeius fut blasfé par ceulx mesmes, à l'appetit & à la suasion

desquelz il avoit fait la faulte : toutefois il y en a qui disent qu'il fut deceu par son beaupere Scipion , lequel voulant desrober la pluspart de l'argent qu'il avoit apporté de l'Asie , & le retenir pour soy , le hastâ & sollicita de donner la baraille , en luy donnant à entendre qu'il n'y avoit plus d'argent. Mais encore que cela fust vray , si ne devoit pas un bon capitaine tumber en cest erreur , ny pour s'estre laissé ainsi facilement mesconter , s'exposer au peril de perdre tout. En les mettant donques ainsi l'un devant l'autre , nous les pouvons mieulx considerer.

VII. Au demourant quant à leur allée en Égypte , l'un s'y en fouit par force , l'autre y alla volontairement avec peu d'honneur , pour gagner de l'argent à servir des Barbares , en intention d'en faire puis après la guerre aux Grecs. Et puis ce que nous reprochons aux Égyptiens pour le tort qu'ilz feirent cruellement à Pompeius , cela mesme reprochent les Égyptiens à Agefilaus pour le mauvais tour qu'il leur feit : car l'un fut desloyalement outragé à mort par ceulx à qui il s'estoit fié de sa vie : & l'autre abandonna au besoing ceulx qui s'estoient fiez en luy , & se tourna contre ceulx mesmes , au secours desquelz il estoit premièrement venu.

S O M M A I R E

DE LA VIE DE PHOCION.

*L*ES circonstances ont ôté à la vertu de Phocion une partie de la gloire qu'elle méritoit. II. Les républiques sont dangereuses à manier dans l'adversité. III. Tempérament délicat, mais aussi difficile à trouver que nécessaire en pareilles conjonctures. IV. Austerité excessive de Caton. V. Pourquoi Plutarque compare Phocion à Caton. VI. Naissance & caractère de Phocion. VII. Diverses réparties de Phocion. VIII. Commencemens de Phocion sous la conduite de Chabrias. IX. Attachement de Phocion pour Chabrias. X. Phocion étudie également la politique & la guerre. XI. Il ne flattoit jamais le peuple. XII. Bons mots & sages réponses de Phocion. XVI. Estime des alliés des Athéniens pour Phocion. XVII. Il remporte une victoire complète sur l'armée de Philippe. en Eubée. XVIII. Les alliés d'Athènes refusent de recevoir dans leurs ports la flotte commandée par Charès. XIX. Phocion est nommé à sa place ; ses succès. XX. Il rend les Athéniens maîtres de la ville de Mégare. XXI. Il conseille aux Athéniens de faire la paix avec Philippe. XXII. Il est mis à la tête de la république. XXIII. Prudentes réponses de Phocion.

XXIV. Conseil de Phocion relativement aux dix citoyens qu'Alexandre demandoit qu'on lui livrât. XXV. Il conseille à Alexandre de tourner ses armes contre les Perses. XXVI. Il refuse un présent considérable d'Alexandre. XXVII. Nouveaux refus de Phocion. XXVIII. Femmes de Phocion. XXIX. Il mène son fils à Sparte pour y être formé à la discipline des Lacédémoniens. XXX. Conduite de Phocion à l'égard d'Harpalus. XXXI. Prudente conduite de Phocion à la nouvelle de la mort d'Alexandre. XXXII. Ce qu'il pensoit de la guerre appelée Lamiaque. XXXIII. Il donne ordre d'enrôler jusqu'aux hommes de soixante ans. XXXIV. Il bat Micion. XXXV. Victoire & ensuite défaite des Grecs confédérés. XXXVI. Phocion est envoyé en qualité d'ambassadeur vers Antipatre & Cratère. XXXVII. Nouvelle ambassade de Phocion. XXXVIII. Les Athéniens sont obligés de recevoir garnison. XXXIX. Plus de douze mille Athéniens sont privés du droit de bourgeoisie. XL. Dureté & tyrannie d'Antipatre. XLI. Sage conduite de Phocion. XLII. Son noble désintéressement. XLIII. Mort de Démade & de son fils. XLIV. Phocion engage Nicanor à traiter les Athéniens avec douceur. XLV. Polyssperchon trompe les Athéniens par des lettres qui leur rendent leur liberté. XLVI. Nicanor entreprend de s'emparer du Pirée. XLVII.

Phocion

Phocion accusé de trahison. XLVIII. Polysperchon l'envoye lié sur un chariot à Athènes. XLIX. Le peuple le condamne à mort. L. Constance de Phocion. LI. Un pauvre homme nommé Conopion lui rend les devoirs funèbres. LII. Repentir des Athéniens, honneurs rendus à Phocion. Punition de ses accusateurs.

Depuis la troisieme année de la 94^e olympiade, jusqu'à la troisieme année de la 115^e, avant J. C. 318.

P H O C I O N.

L'ORATEUR Demades eut un temps grand credit à Athenes, à cause qu'il disoit & faisoit, en son entremise du gouvernement de la chose publique, tout ce qu'il pensoit aggreer & servir aux Macedoniens & à Antipater : au moyen dequoy il estoit contraint bien souvent de conseiller & suader beaucoup de choses derogeantes à la dignité de sa ville, & contraires au naturel d'icelle : & puis pour s'excuser souloit dire, que l'on luy devoit pardonner s'il le faisoit ainsi, pource qu'il n'avoit à gouverner que les reliques du naufrage de son pais. Ce propos, encore qu'il soit dit un peu trop cruement & temerairement, pourroit sembler veritable, qui le transfereroit au gouvernement de Phocion : car, à dire la verité, Demades estoit luy mesme le naufrage de sa ville, vivant si dissoluëment, & se conduisant si honteusement en son gouvernement, qu'Antipater mesme disoit de luy, après qu'il fut devenu vieil, qu'il n'en estoit demouré, non plus que d'une hostie immolée, que la langue & le ventre : mais la vertu de Phocion ayant eu à combattre¹ un puif-

¹ Ayant eu à lutter contre un tems orageux, comme contre un terrible antagoniste.

fant & violent ennemi, que le temps, les calamitez de la Grece furent cause qu'elle n'a pas esté si renommée ne si célébrée qu'elle meriroit d'estre : car il ne faulr pas adjouster foi aux patoles de Sophocles, faisant la vertu foible, quand il dit,

Point ne demeure aux affligés, seigneur,
Le sens tout tel, qu'ilz l'avoient en bon heur :

Ains fault seulement conceder à la fortune, quand il luy plaist de s'opposer aux hommes vertueux & aux gens de bien, qu'elle ait tant de puissance, qu'au lieu qu'ilz deussent recevoir l'honneur & la grace qu'ilz meritent, elle met sus à aucuns d'eulx des faulses imputations & malignes calumnies, qui sont causes que l'on ne croit pas leur vertu telle comme elle est.

II. Et toutefois il semble à plusieurs que les peuples frans sont plus violents & plus outrageux envers leurs bons citoyens en temps de prospérité, pource que l'heureux succès de leurs affaires, & l'accroissement de leur puissance leur esleve le cueur : mais c'est tout le contraire. Car ordinairement les adversitez rendent les hommes despits, chagrins & aïsez à mettre en cholere, & leur ouïe difficile, aspre & s'offensant de tout propos & de toute parole un peu rondement ditte. Celuy qui reprend ceulx qui

faillent, semble proprement leur reprocher leurs mesadventures, & celui qui parle franchement, semble les calumnier. Car tout ainsi que le miel, qui est doux de sa nature, engendre neantmoins douleur quand on l'applique aux ulcères ou aux bleceures & parties entamées : aussi bien souvent les sages & vrayes remonstrances mordent & irritent ceux qui sont en malheur, si elles ne sont bien addoucies, & qu'elles ne ployent & obeïssent un petit. C'est pourquoy le poëte Homere appelle le doux, Menoices, qui vault autant à dire comme, cedant & obeïssant à la partie de l'ame, qui est enflée de despit & de courroux, & ne luy résiste, ny ne la combat point : ne plus ne moins que l'œil malade s'arreste plus volontiers à regarder les couleurs sombres, obscures & non reluyfantes, & refuit celles qui sont vives ; guayes & brillantes : aussi en une cité, de laquelle les affaires ne vont pas au gré des citoyens, le peuple a les oreilles trop delicates & trop craintives, à cause de son imbécillité, pour supporter patiemment une langue disant la vérité librement, lors qu'il demande principalement à ouïr les choses qui ne luy ramenant point sa faulte devant ses yeux : & pourtant est-ce un temps dangereux pour ceulx qui gouvernent, en toutes sortes ; car il perd avec la chose publique, celui qui flatte : & devant, celui qui ne flatte point.

III. Tout ainsi donques comme les mathématiciens disent, que le soleil ne suit point totalement le cours du firmament, n'y aussi n'a pas son mouvement du tout opposite ne contraire, ains en biaisant un peu & cheminant par une voye oblique, fait une ligne torse, qui n'est point trop violement roide, ains va tournoyant tout doucement, & par son obliquité est cause de la conservation de toutes choses, maintenant le monde en très bonne temperature. Aussi en matière de gouvernement d'une chose publique, la trop roide sevérité de contrevenir à tout propos & en toutes choses à la vouldté du peuple est trop dure & trop rude : comme aussi la facilité de se laisser tirer à l'erreur de ceulx qui faillent, pource qu'ilz voyent le peuple affectionné & enclin en celle part, est un précipice fort glissant & très dangereux. Mais la voye du milieu, de céder aucunefois au gré du peuple pour le faire obeïr ailleurs, & de luy ottroyer une chose plaisante pour luy en demander une utile, est un moyen salutaire pour bien regir & gouverner les hommes, lesquelz se laissent à la fin conduire doucement & utilement à executer beaucoup de bonnes choses, quand on ne les veult pas avoir en tout & par tout de haulte luste, ny par une violente & seigneuriale autorité. Il est bien vray que ce moyen est fort malaisé &

difficile à garder , à cause qu'il y a de la majesté qui se melle avec la gracieuseté : mais aussi quand elles sont une fois mêlées ensemble , il n'y a harmonie si musicale , ne consonance si bien accordée ne si parfaite , qu'est celle là : aussi dit on que c'est le stile que le dieu de nature garde au gouvernement de ce monde , sans rien forcer , addouciissant par remonstrance & persuasion de raison la contrainte de luy obeir.

IV. Ce default de l'austerité estoit en Caton le jeune , car il n'avoit pas la nature , ny les meurs agreables à un peuple , ny propres pour se faire aimer à une commune : aussi ne vint il point en credit pour avoir flatté le peuple. C'est pourquoy Ciceron dit , qu'en se gouvernant ne plus ne moins que s'il eust esté en la ville & en la chose publique , que forme Platon , & non pas en la lie & au marc de celle de Romulus , il fut debouté ¹ , & faillit à obtenir le consulat. Si m'est advis qu'il ressemble proprement aux fruiets qui viennent hors de saison : car tout ainsi que lon les voit voluntiers & les louë lon , mais on n'en use point : aussi l'innocence ancienne estant ja de si long temps sortie hors d'usage , & venant lors après si long intervalle à se monstrier parmy les vies corrompues & les meurs gastées de ce temps là , luy

¹ Voyez les Observations.

acquît une grande gloire & grande renommée : mais au demourant elle ne se trouva pas fortable à mettre en œuvre , ny propre à employer aux affaires , pource que la gravité & perfection de sa vertu estoit trop disproportionnée à la corruption de ce siecle là.

V. Car il ne vint pas à s'entremettre du gouvernement des affaires estant desja la chose publique ruinée , comme fait Phocion en la siene , ains y vint comme elle estoit desja fort esbranlée & travaillée de grande tourmente : & si n'eut jamais le timon ny l'authorité de pilote en main , ains s'attacha seulement à manier les voiles & le cordage , en assistant & secondant ceulx qui avoyent plus de credit & de puissance que luy : & neantmoins encore donna il beaucoup d'affaire à la fortune , laquelle ayant entrepris de ruiner & abolir la chose publique , le fit bien à la fin par d'autres , mais ce fut à grande peine , lentement & avec un long traict de temps , encore fut elle bien près de demorer dessous , par le moyen de Caton & de sa vertu : à laquelle je compare celle de Phocion , non qu'il me soit advis , qu'ilz ayent esté semblables de similitude generale & universelle seulement comme de dire qu'ilz ont tous deux esté gens de bien , tous deux bien entendus en matiere d'estat & de gouvernement : car

encore y a il difference de prouesse à prouesse , comme entre celle d'Alcibiades & celle d'Epaminondas : & de prudence à prudence , comme de celle de Themistocles à celle d'Aristides : & de justice à justice , comme de celle de Numa à celle d'Agefilaus : mais les vertus de ces deux personnages cy montrent tout un mesme traict , un mesme moule , un mesme tainct & mesme couleur empreinte en leurs meurs , jusques aux plus menues & dernieres particularitez , ayans tous deux eu l'austerité presque en egale mesure conjointe avec la douceur , la prouesse avec la prudence , la vigilance craintifve pour les autres , avec l'assurance resoluë pour eulx mesmes , fuitte des choses honteuses , & zeile de la justice , si semblablement annexées en tous deux , qu'il fault un bien subtil & delié jugement comme un util ; pour en trouver & sçavoir discerner les diversitez.

VI. Or quant à Caton , c'est chose confessée de tous , qu'il estoit de grande & noble maison , comme nous dirons plus au long en sa vie : & quant à Phocion , je conjecture qu'il ne soit point issu de bas ny de vil lieu : car s'il eust esté filz d'un faiseur de cuilliers , comme dit Idomeneus ² , Glaucippus le filz d'Hipperides ³

² Historien , de Lampsaque , vivoit au tems de la vieillesse de Phocion.

³ Un des dix orateurs dont Plutarque a écrit les Vies , qu'on trouvera parmi ses Œuvres mêlées.

ayant recueilly en l'investive qu'il a escrite contre luy, tous les maulx qu'il a peu, n'eust pas oublié à luy reprocher la bassesse roturiere de son lignage, ne luy n'eust pas esté si honestement ne si liberalement institué comme il fut : car en sa premiere jeunesse il fut disciple de Platon, & depuis de Xenocrates en l'eschole de l'Academie, où il s'addonna dès son commencement à toutes perfections de bonnes meurs : car comme Duris a escrit, jamais Athenien ne le veit ne rire ne plorer, ny se laver en estuvé publique, ny ayant les mains hors du couvert de sa robbe quand il estoit vestu de long : car quand il alloit par les champs estant à la guerre, il cheminoit tousjours pieds nuds & sans robbe, s'il ne faisoit un froid extreme & insupportable, de sorte que les soudards, par maniere de jeu & de commun proverbe, disoyent entre eulx, que c'estoit signe de grand hyver, quand ilz voyoyent Phocion vestu.

VII. Et combien qu'il fust fort doulx & fort humain de sa nature, si est-ce qu'à le voir au visage, il monstroist estre austere & mal accointable, de sorte qu'un homme qui n'eust point en de familiarité avec luy, ne l'eust pas facilement abordé seul : & pourtant un jour que l'orateur Chares se mocquoit de la severité de ses sourcilz,

comme le peuple Athenien s'en fut pris à rire ; il respondit publiquement , « Ces miens sourcilz , » seigneurs Atheniens , ne vous ont jamais fait » mal , mais les risées de ces mignons icy vous » ont souventefois fait plorer ». Son parler sem- blablement , pour les bonnes conceptions & les beaux discours qu'il contenoit , estoit plein de très utile & salutaire instruction , mais c'estoit avec une briefveté imperative , austere & nulle- ment addoucie : car , comme disoit le philosophe Zenon , « Que l'homme sage doit tremper sa » parole en sens & en raison , premier que de » la prononcer » : aussi le parler de Phocion , en bien peu de langage , comprenoit beau- coup de substance : & semble que ce soit la raison pour laquelle Polyeuëtus Sphetien , dit » Que Demosthenes estoit très bon orateur , mais » que Phocion estoit très eloquent ». Car tout ainsi comme les pieces d'or ou d'argent sont les meilleures , qui sous moins de masse ont plus de prix & plus de valeur : aussi la force du parler gist à signifier beaucoup en peu de paroles. Auquel propos on racompte , qu'un jour estant tout le theatre plein de peuple , Phocion se promenoit à part tout seul pensant en luy mesme au dessous de l'eschaffault d'où parlent les joueurs , & y eut un de ses amis , qui le voyant ainsi pensif luy dit : « Tu penses

» à quelque chose, Phocion ». « Ce fais mon, » certes, répondit il : car je pense si je pourrois » point retrencher quelque chose de ce que j'ay » à dire au peuple Athenien ». Et Demosthenes mesme faisant bien peu de compte de tous les autres orateurs de son temps, quand Phocion se levoit pour parler, souloit dire tout bas en l'oreille à ses amis : « Voylà la hache retren- » chante mes paroles qui se leve ». Toutefois cela se pourroit à l'adventure aussi bien referer à ses meurs : pource que non seulement une parole, mais aussi un clin d'œil, ou un signe de teste d'un homme de bien, a force de persuader contrepe- sante & de plus de poids, que ne sont infinis arguments & clauses artificielles de rhetorique.

VIII. Au demourant en sa jeunesse il accointa le capitaine Chabrias, & le suyvit, apprenant de luy beaucoup de choses appartenantes au faict de la guerre, & reciproquement aussi le corrigeant de quelques imperfections qu'il avoit de nature. Car estant Chabrias, au demou- rant, homme lent & difficile à emouvoir, quand ce venoit au combat il brusloit d'ardeur de cou- rage, tellement qu'il se jettoit à clos yeux au danger, entre les plus temeraires : aussi luy en cousta il la vie dedans l'isle de Chio, ¹ où il

¹ Dans la guerre qu'on appella Sociale, la troisieme année de la cent cinquieme olympiade, avant J. C. 358.

voulut abborder le premier avec sa galere & descendre en terre malgré les ennemis : mais Phocion estant prudent à se garder , & vif à executer , eschauffoit d'un costé la tardité de Chabrias , & de l'autre attiedissoit son ardente impetuosité : à raison de quoy Chabrias estant homme doux & debonnaire , l'en aimoit & l'avançoit aux affaires , le faisant cognoistre aux Grecs , & se servant de luy ès choses de plus grande consequence , comme il luy feit acquerir grand honneur & grande reputation en la bataille navale qu'il gagna près l'isle de Naxos , ¹ où il luy donna à conduire la poincte gauche de son armée : & fut la meslée plus aspre en cest endroit là , que nulle part ailleurs , aussi y furent les ennemis plus tost rompus. Ceste bataille estant la premiere que la ville d'Athenes gagna avec ses forces seules depuis sa prise , fut cause que le peuple en aima fort Chabrias , & commença à faire compte de Phocion , comme d'un personnage de service , & digne d'avoir charge. Ceste bataille fut gagnée le jour propre de la feste des grands mysteres , en memoire de laquelle Chabrias tous les ans le seizieme jour d'Aoust donnoit à boire à qui en vouloit du peuple Athenien. Depuis Chabrias l'ayant choisy

¹ La quatrieme année de la centieme olympiade , avant J. C. 577.

pour l'envoyer recevoir l'argent & les vaisseaux que les alliez insulaires devoient contribuer, luy bailla vingt galeres pour y aller, & dit on que Phocion luy respondit, que s'il l'envoyoit pour combattre des ennemis, il avoit besoing de plus grand nombre de vaisseaux, & s'il l'envoyoit comme ambassadeur devers des alliez & amis, qu'une galere seule luy suffisoit. Ainsi y allant avec sa galere seule, après avoir parlé aux villes & communiqué avec les officiers & gouverneurs d'icelles doucement & simplement, il s'en retourna avec une bonne flotte de vaisseaux, que fournirent les alliez, & de l'argent aussi pour porter aux Atheniens.

IX. Si ne continua pas seulement Phocion à honorer Chabrias tant comme il vescu, ains encore après sa mort embrassa la protection de ceulx qui luy appartenoyent, & s'estudia de rendre son filz Ctesippus, homme de bien, quoy qu'il le veist fort depravé & fort incorrigible, & ne cessa point pour cela d'essayer tousjouts à le reduire & à couvrir son infamie : toutefois lon dit que comme ce jeune homme estant sous sa charge en quelque guerre où il estoit capitaine, luy rompist la teste & l'importunast, en luy faisant tout plein de questions fascheuses, s'ingerant de le vouloir conseiller, reprendre, & enseigner l'office & le devoir de capitaine,

il ne se peut tenir de dire : « O Chabrias, Chabrias ! Je paye bien maintenant l'amitié que tu m'as portée en ton vivant , en endurent l'importunité de ton filz •.

X. Et voyant que ceulx qui s'entremettoient lors du gouvernement des affaires à Athenes , avoyent departy entre eulx ne plus ne moins que au sort , les charges de la guerre & de la ville , tellement que les uns , comme Eubulus , Aristophon , Demosthenes , Lycurgus & Hyperides , ne faisoient que haranguer devant le peuple , & mettre les matieres en avant , & les autres comme Diopithes , Menestheus , Leosthenes & Chares , se faisoient grands pour aller à la guerre , & avoir charge des armées , il aima mieulx se proposer à imiter & ensuyvre la maniere de gouverner , qu'avoyent tenue Pericles , Aristides & Solon , comme estant plus entiere & composée de l'un & de l'autre egalemant : car chascun d'eulx , à mon advis , comme dit le poëte Archilochus ,

Ensemble estoit bon serviteur de Mars ,

Et si sçavoit des Muses les doux arts .

Aussi n'ignoroit il pas , que la deesse tutrice de Athenes , Pallas , estoit & s'appelloit Polemique & Politique tout ensemble , c'est à dire , ayant

les parties requises pour gouverner en guerre & en paix.

XI. S'estant donques ainsi préparé, le but, auquel il tendit tousjours en toute son entremise du gouvernement de la chose publique, fut, qu'il suada tousjours le repos & la paix, & neantmoins fut plus souvent eleu capitaine, & eut plus de fois charge d'armées, non seulement que tous les hommes de guerre de son temps, mais aussi de tous ceulx qui ont esté devant luy, ne prochassant ny ne demandant point telles charges, ny aussi ne les fuyant ny rejettant point quand le besoing de la chose publique l'y appelloit : car c'est chose certaine qu'il a esté par quarante-cinq fois eleu capitaine, sans qu'il se soit jamais trouvé une seule fois aux assemblées des elections, estant tousjours esleu en son absence, & tousjours envoyé querir absent : tellement que les hommes de bon sens s'esmerveilloyent de ceste façon de faire du peuple, veu que jamais Phocion ne faisoit ny ne disoit chose quelconque pour luy complaire, ains le plus souvent contredisoit à sa volonté, comment il ufoit neantmoins des autres gouverneurs, qui estoient plus gracieux, plus joyeux & plus agreables en leurs harengues, pour une maniere d'esbatement & de passe temps, ne plus ne moins que lon dit des roys, qu'ilz se

servent de leurs flatteurs & plaisants , après qu'ilz ont lavé les mains pour se mettre à table : mais quand il estoit question de donner les charges de la guerre , alors y pensant sobrement & à bon esciant , il y appelloit tousjours le plus austere & le plus sage homme de la ville , & celuy qui seul ou plus que nul autre , s'opposoit à tous ses appetits , & à toutes ses vouluntez. Car un jour ayant esté publiquement leu un oracle de Delphes , lequel disoit , « Que tous les autres » Atheniens estans d'accord , il y en avoit un » seul qui estoit contraire à tout le reste de la » ville , Phocion se tirant en avant dit publi- » quement , que lon ne se donnaist point autre- » ment peine d'enquerir qui c'estoit , & que » c'estoit luy , pource qu'il ne trouvoit rien bon » de tout ce que lon faisoit » .

XII. Une autre fois il luy advint de dire une opinion devant l'assemblée du peuple , laquelle fut universellement approuvée & receüe de tout le monde , & voyant que toute l'assistance se trouvoit ainsi tost de son advis , il se retourna devers ses amis , en leur demandant , « Helas ! » mes amis , ne m'est il point eschappé de dire » quelque mauvaise chose en n'y pensant pas » ? Une autre fois comme les Atheniens deman- dassent quelque contribution liberale & voulun- taire d'argent à chascun , pour faire un sacri- fice ,

fice, les autres de sa qualité ayans desja baillé leur part, il fut aussi nommeement appelé par plusieurs fois pour contribuer la siene : mais il leur dit, « Demandez en à ceulx qui sont riches, » car quant à moy, j'aurois honte de vous en » bailler, n'ayant pas encore payé cestuy cy » : en montrant l'usurier Callicles, qui luy avoit presté de l'argent : mais comme ilz ne cessassent point pour cela de crier & de braire contre luy, il se meit à leur faire ce compte : « Il y eut un » jour quelque homme couard, qui se preparoit » pour aller à la guerre, & sur le poinct qu'il » vouloit partir, il entendit crier des corbeaux, » & pensant que ce fust un mauvais presage » pour luy, il posa ses armes, & s'arresta tout » court au logis. Depuis il les reprit une autre » fois, & se meit en chemin pour aller au camp : » les corbeaux recommencerent à crier arriere » de plus belle, & lors il demoura à faiçt, & » dit finablement, vous crierez tant & si hault » que vous vouldrez, mais si ne mangerez vous » point de mon corps ».

XIII. Quelque autre fois les Atheniens estant à la guerre sous sa charge, vouloyent à toute force qu'il les menast pour aller chocquer & charger leurs ennemis. Il n'en voulut rien faire : à l'occasion de quoy ilz l'appelloyent lasche de cueur & couard, & il leur respondit, « Ny vous

» ne me sçauriez faire hardy , ny moy vous
» couards : toutefois nous nous entrecognoissons
» bien les uns les autres ». Une autre fois en
temps fort dangereux , le peuple le rudoyoit à
merveilles , & vouloit qu'il rendist promptement
compte de son administration & de sa charge :
il leur respondit , « O mes amis , sauvez vous ,
» sauvez vous premierement ». Et comme durant
la guerre ilz fussent humbles & souples de belle
peur qu'ilz avoyent , mais tout soudain la paix
faite , ilz bravassent de paroles & criaissent à
l'encontre de Phocion , qu'il leur avoit osté la
victoire toute assurée d'entre les mains : il ne
leur feit que dire , « Vous estes bien heureux
» d'avoir un capitaine qui vous cognoist , car au-
» trement vous fussiez piece a perdus ». Ilz eurent
d'aventure quelque different pour leurs confins à
l'encontre des Bœotiens , lequel ilz ne vouloyent
point plaider en justice , ains le combatre en
champ de bataille : mais Phocion leur dit qu'ilz
ne l'entendoyent pas , leur conseillant de com-
batre plus tost de paroles , en quoy ilz estoient
les plus forts , que non pas avec les armes , en
quoy ilz estoient les plus foibles. Son opinion
en une assemblée de conseil despleut quelque-
fois tant aux Atheniens , qu'ilz ne vouloyent pas
seulement avoir la patience de l'ouir parler : &
il leur dit adonc , « Vous me pouvez bien forcer ,

» feigneurs Atheniens, de faire ce qui ne se de-
» vroit pas faire : mais de me faire dire contre
» mon opinion chose qui ne se doit pas dire ;
» vous ne m'y sçauriez contraindre ». Il rembarroit
aussi bien vivement les orateurs qui luy estoient
contraires , quand ilz s'attachoyent à luy , com-
me il respondit une fois à Demosthenes , qui
luy disoit, « Le peuple te tuera quelque jour ;
» Phocion, s'il entre en sa fureur : mais bien
» toy, dit il, s'il entre jamais en son bon sens ». Et à Polyuctus le Sphettien, lequel un jour qu'il
faisoit grande chaleur , suadoit au peuple d'en-
treprendre la guerre contre le roy Philippus , &
estant presque hors d'aleine, souffloit & suoit à
grosses gouttes, comme celuy qui estoit fort gras ,
de sorte qu'il falloit qu'il beust de l'eau par
plusieurs fois pour achever sa harengue : « Vraye-
» ment, dit il, c'est bien raison que vous decerniez
» la guerre à la persuasion de cestuy cy : car ,
» que pensez vous qu'il fera quand il aura le
» harnois sur le dos, & que les ennemis seront
» près en bataille, veu que maintenant en pro-
» nonceant seulement une harengue qu'il a es-
» tudiee de longue main, il est en danger de
» crever & estouffer devant vous » ? Et comme
en une assemblée de conseil, Lycurgus luy eust
dit plusieurs oultrages en presence de tout le
peuple , & après tout , que Alexandre ayant

demandé dix des citoyens d'Athenes pour en faire ce que bon luy sembleroit, il avoit conseillé de les livrer : il respondit, « J'ay souvent » conseillé plusieurs choses bonnes & belles à » ceulx cy, mais ilz n'en veulent rien faire ».

XIV. Il y avoit lors à Athenes un nommé Archibiades qui contrefaisoit le Lacedæmonien avec une barbe longue & forte à merveilles, une meschante cappe, & une mine & contenance tousjours triste. Phocion se trouvant un jour en assemblée de ville rabroué par le peuple, l'appella à tesmoing pour prouver & confirmer son dire : mais l'autre se levant, alla tout au contraire conseiller ce qu'il sentoit estre agreable au peuple : ce qu'entendant Phocion, le prit à la barbe, & luy dit : « Que ne faisois tu don- » ques raire ceste barbe, puis que tu te voulois » mesler de flatter ? Il y avoit un autre grand plaideur nommé Aristogiton, qui en toutes assemblées de ville ne faisoit autre chose que corner la guerre ordinairement & prescher les armes au peuple. Puis quand il fallut lever gens & enroller les noms de ceulx qui devroyent aller à la guerre, il s'en vint en la place, appuyé sur un baston, les deux jambes bandées, pour faire à croire qu'il estoit malade : & Phocion l'appercevant de tour loing dessus la tribune aux harengues, cria tout hault au secretaire qui

écrivait les rolles, « Escry aussi Aristogiton lasche & meschant, qui contrefait le boirteux ».

XV. Tellement que quelquefois je mesmerveille, comment ne pourquoy, un homme si aspre & si severe, comme il appert par ces exemples qu'il a esté, eut onques le surnom de bon. Toutefois à la fin je trouve que c'est bien chose difficile, mais non pas impossible de trouver un homme comme un vin, qui soit gracieux & un peu ferme tout ensemble, comme des autres au contraire, qui de prime face semblent doux au hanter, & puis se trouvent fort fascheux & dommageables à ceulx qui conversent avec eulx. Ce neantmoins on lit, que l'orateur Hyperides dit un jour au peuple d'Athenes, « seigneurs » Atheniens, ne regardez pas seulement si je » suis aigre, mais considerez si je le suis sans » y avoir profit » : comme si les hommes n'estoyent fascheux & ennuyeux que pour l'avarice seulement, & comme si le peuple ne craignoit & ne haïssoit pas plus tost, tous ceulx qui par arrogance, envie, insolence, cholere & opiniastrété, abusent de leur credit & autorité. Phocion donques ne fait jamais mal ne desplaisir à citoyen quelconque pour inimitié privée qu'il eust à l'encontre de luy, ny n'en haït onques pas un, ains estoit seulement aspre, rude & aigre à l'encontre de ceulx qui resistoyent à quel-

quelque chose qu'il entreprenoit de faire pour le bien public : car au demourant il se monstroit en toute autre chose doulx & gracieux, courtois & humain à tout le monde, jusques à hanter priveement avec ceulx qui luy estoient adversaires, & les secourir en leurs affaires s'ilz venoyent à tumber en quelque danger & en quelque adversité. Suyvant lequel propos, ses amis le tenferent un jour de ce qu'il defendoit en jugement un meschant, à qui lon faisoit le procès criminel : il leur respondit, « Que les gens de bien » n'avoient point besoing de telle defense ». Une autre fois Aristogiton le calumniateur estant en la prison, après avoir esté desja condamné, envoya devers luy le supplier de le venir voir : ce qu'il feir, & alla jusques dedans la prison, dont ses amis le vouloyent divertir : mais il leur dit : « Laissez moy faire, car en quel lieu » pourrois je voir Aristogiton plus voluntiers » qu'en la prison » ?

XVI. Au reste, quand il partoit d'Athenes quelque armée de mer, s'il y avoit un autre capitaine qui en fust chef que Phocion, les villes maritimes alliées des Atheniens & les insulaires, munissoient leurs murailles, combloient leurs ports, & apportoyent des champs dedans la ville, leurs femmes, leurs enfans, leurs esclaves, leur bestail & tout le reste de

leurs biens , comme si c'eussent esté ennemis declarez en guerre ouverte : mais au contraire , si Phocion en estoit chef , ilz alloyent jusques bien loing au devant avec leurs vaisseaux couronnez de festons & de chapeaux de fleurs en signe de resjouissance publique , & le conduisoient eulx mesmes en leurs maisons. Et comme le roy Philippus taschant à s'emparer secrettement de l'isle d'Eubœe , y feist passer une armée de la Macedoine , & y allast prattiquant les villes par le moyen de quelques particuliers tyrans , Plutarchus Eretrien y appella les Atheniens , en les priant de vouloir oster des mains de ce roy , l'isle qu'il alloir tous les jours de plus en plus occupant , si bien tost on n'y remedioit. Phocion y fut envoyé pour capitaine avec peu de gens , pource que lon faisoit compte , que ceulx du pais se joindroyent incontinent fort affectueusement à luy : mais au contraire , y rencontrant à son arrivée tout plein de traistres , tout corrompu , gualté & miné à force d'argent , que Philippus y despendoit , il se trouva en tres-grand danger : au moyen dequoy il se retira dessus une motte separée de la plaine de Tamynes , par une grande & profonde vallée , là où il se fortifia , & y arresta toute l'elite des gens de guerre qu'il avoit avec luy , admonestant les particuliers capitaines , qu'ilz

ne se fouciaſſent point des autres mutins & ſeditionieux, qui ne faiſoyent que babiller, & ne valoyent rien au beſoing, ains qu'ilz les laiſſaſſent aller & ſ'eſcarter hors du camp là où ilz voudroyent : « Pour autant, diſoit-il, que telz » ſoudards auſſi bien nous ſeroyent inutiles par » deçà pour leur deſobeiſſance, & nuïroyent » à ceulx qui auroyent bonne voulunté de faire » le devoir : & par delà ſe ſentans coupables » d'avoir abandonné le camp, & de ſ'en eſtre » allez ſans congé, ilz n'oſeront crier à l'encontre de nous, & ſe garderont bien de nous » calumnier ».

XVII. Puis quand les ennemis vindrent en bataille pour le charger, il commanda à ſes gens qu'ilz ſe teinſent tous preſts en armes ſans bouger, juſques à ce qu'il euſt achevé de ſacrifier aux dieux, là où il demoura bien longuement ; ſoit ou pource qu'il ne peuſt avoir les ſignes heureux des ſacrifices, ou qu'il taſchaſt à attirer plus près les ennemis : mais Plutarchus Eretrien cuidant qu'il dilayaſt ainſi à marcher par faulte de cueur, ſe jetta aux champs le premier ; avec quelques aventuriers qu'il avoit à ſa ſoude : quoy voyans les gens de cheval ne ſe peurent non plus contenir, ains marcherent auſſi après luy vers les ennemis en mauvais ordre, eſcartez les uns çà, les autres là, comme ilz

estoyent sortis du camp : parquoy les premiers ayant esté rompus par les ennemis , tous les autres se desbanderent aussi tost d'eulx mesmes , & Plutarchus mesme se meit à fouir , de sorte que quelques troupes des ennemis pensans avoir desja tout gaigné , donnerent jusques dedans le camp , & tascherent à en abbattre la closture : mais cependant les sacrifices de Phocion estans parachevez , les Atheniens sortirent sur eulx , qui les tournerent incontinent en fuite , après en avoir tué un grand nombre tout joignant les trenchées de leur camp. Cela fait , Phocion ordonna que la bataille demourast ferme sans se bouger , pour attendre & recueillir ceulx de leurs gens qui estoyent encore espandus çà & là par les champs de la premiere rouverte : & luy ce pendant avec une troupe de combatans choisiz en toute son armée , alla donner à travers les ennemis. Si fut la meslée fort aspre ; car les Atheniens y combattirent tous courageusement , sans point espargner leurs personnes : mais sur tous les autres , deux jeunes hommes combattans aux costez du capitaine , Glaucus filz de Polymedes , & Thallus filz de Cineas , y emporterent le prix de prouesse. Toutefois Cleophanes ce jour là monstra bien aussi sa valeur : car il cria tant après leurs gens de cheval qui avoyent esté rompus , & les somma tant d'aller

secourir leur capitaine , qu'il disoit estre en danger , qu'il les rallia & ramena au combat : en quoy faisant il fut cause de donner la victoire assurée & entiere aux gens de pied.

XVIII. Depuis ceste bataille il chassa Plutarchus mesme hors d'Eretrie : & ayant pris le chasteau de Zaretta assis en lieu très opportun pour ceste guerre, à l'endroit où l'isle se va estroissant en une longue chaussée ferrée d'un costé & d'autre de la mer , il defendit ¹ que lon ne prist pas seulement des Grecs prisonniers , de peur que les harangueurs d'Athenes ne contraignissent quelquefois le peuple Athenien par une soudaine cholere , d'exercer aucune cruauté contre eulx. Ces choses ainsi faites , Phocion s'en retourna à la maison : mais il n'eust pas plus tost le dos tourné , que les alliez & confederes d'Athenes regretterent incontinent bien sa justice & sa bonté : & les Atheniens cogneurent aussi sa valeur & sa suffisance : car Molossus , celuy qui luy succeda en la charge de capitaine au gouvernement du reste des affaires , s'y porta de sorte que luy mesme y fut pris prisonnier. A raison dequoy , Philippus embrassant toutes grandes choses en son esperance , s'en alla avec toute son armée au pais de l'Hellef-

¹ Lisez d'après les variantes des manuscrits , renvoya tous les Grecs qui avoient été pris.

pont, en opinion qu'il y prendroit incontinent toute la Cherronese, les villes de Perinthe & de Byzance¹ : & pourtant ceulx d'Athenes estans tous resolus d'y envoyer du secours, pour l'empescher de venir au dessus de son entente, esleurent Chares pour capitaine, à l'instance & poursuite grande des orateurs qui le meirent en avant : mais y estant allé avec bon nombre de vaisseaux, il n'y fait exploit quelconque digne des forces qu'il y avoit menées, pource que les villes ne vouloyent pas seulement recevoir sa flotte dedans leurs ports, à raison dequoy il estoit contrainct d'aller rodant çà & là le long des costes, suspect à tout le monde, rençonnant les amis, & mesprisé des ennemis. Ce qu'entendant le peuple, joint aussi que les hargneurs l'irriterent par leurs preschemens ordinaires, fut fort courroucé, se repentant d'avoir envoyé secours aux Byzantins : mais Phocion adonc se tirant en avant leur monstra que ce n'estoit pas à leurs alliez & confederez se deffians, qu'il se falloit courroucer, ains à leurs capitaines, qui se portoyent de sorte que lon avoit occasion de se deffier d'eulx : « Ce sont ceulx là (disoit il) » à qui il vous en fault prendre, car ilz vous

¹ Toutes deux dans la partie de la Thrace qui formoit le royaume des Odrysiens ; Perinthe, sur la Propontide, & Byzance, sur le Bosphore de Thrace.

» rendent odieux & redoutables à ceulx mes-
» mes qui ne se sçauroyent sauuer sans vostre
» secours».

XIX. Ces paroles emeurent le peuple de façon que sur l'heure mesme elles luy feirent changer d'advis, tant qu'ilz baillerent à Phocion un autre renfort qu'ilz envoyèrent celle part pour secourir leurs alliez : ce qui fut de très grande consequence, pour preserver la ville de Byzance : car oultre ce que ja sa reputation estoit grande, Cleon le premier homme de Byzance en vertu & en autorité, ayant esté compagnon & familier de Phocion en l'eschole de l'Academie, le plegea envers sa ville : & adonc les Byzantins ne voulurent pas qu'il campast au dehors, ains ouvrans leurs portes le receurent au dedans de leur ville, & meslerent parmy eulx les Atheniens : lesquelz voyans que ceulx de la ville se foyent ainsi d'eulx, se porterent si honestement en leur conversation ordinaire, qu'il n'y eut plainte aucune d'eulx, & si vaillamment en tous combats & assaults, que Philippus, lequel on estimoit paravant si terrible en armes, que rien n'arrestoit devant luy, & ne se trouvoit personne qui s'ozast presenter en bataille contre luy, s'en retourna de l'Hellepont sans rien faire, sinon perdre beaucoup de sa reputation, là ou Phocion gaigna quelques uns de ses vaisseaux, &

recouvra les places fortes où il avoit mis garnisons : & faisant des descentes en plusieurs endroits de ses terres , courut & pilla tout le plat païs , jusques à ce que s'estant assemblé bon nombre de gens pour le defendre , il y fut blecé , & pour ceste occasion contraint de s'en retourner à la maison.

XX. Quelque temps après les Megariens envoyèrent secrettement devers luy , pour luy livrer leur ville entre ses mains : mais Phocion craignant que les Bœotiens , s'ilz en estoient advertiz , ne le previnsent avant qu'il y peust estre à temps , il feit tenir une assemblée de conseil de ville au plus matin , en laquelle il declara au peuple ce qu'on luy avoit mandé de Megare : & comme le peuple eust promptement arresté d'y entendre à bon esçiant , Phocion feit tout aussi tost sonner la trompette , & au partir de l'assemblée sans leur donner autre loisir que de prendre leurs armes seulement , il les mena incontinent droit à Megare ¹ , là où ayant esté receu , il enferma de muraille le port de Nisæe ² , & tira deux longues murailles depuis la ville jusques là , moyenant lesquelles il joignit la ville

¹ A l'extrémité occidentale de l'Attique , au-dessous du mont Cithéron.

² Un peu au-dessous de Mégare. C'étoit une petite ville qui servoit de port & d'arsenal de marine à Mégare.

à la marine , & fait en sorte que du costé de la terre , ne craignant gueres plus ses ennemis (* du costé de la mer), elle fut entierement en la disposition & devotion des Atheniens.

XXI. Et comme les Atheniens s'estans ja tout ouvertement declarez ennemis de Philippus, eussent esleu en son absence d'autres capitaines , pour luy aller faire la guerre, luy si tost qu'il fut de retour à Athenes , venant des isles , suada au peuple, attendu que Philippus avoit bien bonne envie de vivre en paix avec eulx , redoubtant le danger que les forces d'Athenes pouvoient apporter à ses affaires , que lon devoit recevoir les articles & conditions de paix qu'il presentoit. A quoy s'opposant un plaideur ordinaire , qui ne bougeoit jamais des plaids , à calumnier & chicaner tousjours quelqu'un , jusques à luy dire , « Comment , Phocion , oses tu bien tascher à divertir les Atheniens de la guerre , quand ilz ont desja les armes en main » ? « Ouy vrayement, » luy respondit Phocion , encore que je sache très bien , que s'il y a guerre , je te commanderay : & s'il y a paix , tu me commanderas. Ce neantmoins il ne peut obtenir , & le gaigna Demosthenes encontre luy pour celle fois, conseillant aux Atheniens d'aller donner la bataille à Philippus , le plus loing qu'ilz pourroyent du

* Ceci n'est point dans le grec.

païs d'Attique : & Phocion luy dit adonc ,
« Mon amy , ne nous amusons point à dispu-
» ter en quel lieu nous luy donnerons la bataille ,
» mais regardons seulement comme nous la gai-
» gnerons : car en ce faifant , nous reculerons
» la guerre bien loing de nous : car ceulx qui
» font vaincus , quelque part qu'ils foyent , ont
» tousjours tout mal & danger auprès d'eulx ».

XXII. Après la bataille ¹ perdue contre Phil-
lippus , les feditieux qui ne demandoient que
toutes nouvelletez en la ville , tirerent Charis-
demus² en avant pour le faire eslire capitaine ge-
neral d'Athenes , dequoy les gens de bien &
d'honneur eurent grande peur , & prenans avec
eulx toute la cour & le senat d'Areopage , prie-
rent si affectueusement le peuple , avec les lar-
mes aux yeux , qu'à la fin ilz impetrerent , mais
ce fut à grande peine , que lon meist les affaires
de la ville entre les mains de Phocion : lequel
fut bien d'advis de recevoir au demourant la
forme de vivre , & les humaines conditions d'ap-
pointement qu'il leur offroit : comme l'orateur
Demades eust mis en avant , que la ville d'A-
thenes entraist au commun traité de paix , &

¹ De Chéronée apparemment.

² Celui qui se retira dans la fuite auprès de Darius , & qui y reçut
la mort pour prix de la noble franchise avec laquelle il lui avoit fait
sentir la différence de ses troupes brillantes d'or , avec les soldats
Macédoniens tout couverts de fer. Voyez Q. Curt. L. III, ch. 5.

en la commune assemblée des estats de la Grece, qui se devoit assembler à l'instance de Philippus, Phocion n'en fut pas d'avis, ains le dissuada, jusques à ce que lon entendist ce que Philippus demanderoit aux Grecs en celle assemblée. Toutefois son opinion pour lors n'eut point de lieu à cause de la mauvaistié du temps : & bien tost après voyant que les Atheniens se repentoyent de ce qu'ilz n'avoient pas creu son conseil, quand ilz veirent qu'il leur falloit fournir des vaisseaux & des gens de cheval à Philippus, il leur dit adonc : « La crainte de ce dont » vous vous plaignez maintenant, me faisoit op- » poser à ce que vous avez consenty : mais puis » que vous l'avez accordé, il le vous fault sup- » porter patiemment, & ne perdre pas le cou- » rage pour cela, vous reduisans en memoire, » que vos ancestres par le passé ont quelques fois » donné la loy aux autres, & quelques fois l'ont » aussi receue d'autrui : & en se portant bien » & sagement en l'une & en l'autre fortune, » ont preservé non seulement ceste cité, mais » aussi tout le demourant de la Grece ».

XXIII. Depuis estans venue la nouvelle de la mort de Philippus ¹, le peuple tout incon- tinent en voulut faire les feux de joye, & des

¹ La premiere année de la cent onzieme olympiade.

factifices aux dieux, comme pour une très bonne nouvelle, mais Phocion ne le voulut point permettre : « Pour autant, dit-il, que ce seroit un » signe de trop bas & trop petit cueur, que de » se resjouir de la mort d'autrui, avec ce que » l'armée qui vous a desfaits à Chéronée¹, n'en » est diminuée que d'une teste seulement ». Et comme Demosthenes en ses harengues ordinaires dist des paroles injurieuses d'Alexandre, lors qu'il approchoit desja avec son armée de la ville de Thebes, il luy dit ces vers d'Homere,

« O malheureux, que vas tu irritant

» Un si farouche & aspre combattant,

» & qui ne convoite autre chose que grandeur
 » de gloire ? veux tu, estant un si grand feu
 » allumé, jeter ceste ville dedans ? quant à moy,
 » si bien les Atheniens se vouloyent perdre, je
 » ne leur permettray pas pourtant : car à ceste
 » fin ay-je pris la charge de capitaine ».

XXIV. Et depuis, la ville de Thebes ayant esté entierement destruite & rasée, comme Alexandre demanda à ceulx d'Athenes qu'ilz luy livrassent entre ses mains Demosthenes, Lycurgus, Hyperides & Charidemus, l'assemblée du peuple ne sachant que respondre à ceste sommation, jetta ses yeux sur Phocion seul, & l'ap-

¹ La troisième année de la cent dixieme olympiade.

pella plusieurs fois par son nom , pour en dire son opinion : parquoy il se leva , & approchant de luy l'un de ses amis nommé Nicocles , ce-luy qu'il aimoit le plus chèrement , & en qui il avoit plus de fiance , dit hault & clair , « Ceulx » qu'Alexandre vous demande , ont conduit ceste » ville en tel destroit de necessité , que si bien » il demandoit cestuy Nicocles , je serois d'ad- » vis qu'on luy delivrast : car moy mesme re- » puterois que ce me feroit un grand heur , si » je pouvois mourir , de sorte que ma mort sau- » vait la vie à tous mes autres citoyens : & en- » core que j'aye en mon cueur grande pitié & » compassion de ces pauvres desolez qui s'en sont » fouys de la ruine de Thebes en ceste ville , si » est-ce pourtant que je suis d'avis , qu'il vault » mieulx que les Grecs lamentent la perte d'une » seule ville , que de deux , & me semble pour » ceste raison , qu'il vault mieulx en l'un & en » l'autre poinct tascher par prieres & remonstran- » ces à impetrer grace de celuy qui est le plus » fort , que de s'opiniasttrer à vouloir combattre » à sa certaine ruine ».

XXV. Si dit on qu'Alexandre rejetta le pre-mier decret qui fut arresté par le peuple sur sa demande , & se destourna pour ne point voir les ambassadeurs qui le luy avoyent apporté : mais il receut le second qui luy fut porté par Pho-

cion meſme , entendant dire aux plus vieux ſerviteurs de ſon pere , qu'il faisoit grand compte de ce personnage : à raiſon dequoy Alexandre non ſeulement luy donna audience , & luy octroya ſa requeſte , mais davantage ſuyvit ſon conſeil. Car il luy conſeilla ſ'il aimoit le repos , qu'il poſaſt du tout les armes & ceſſaſt de faire la guette : mais ſ'il aimoit la gloire , qu'il tournaſt ſes armes contre les Barbares , & non pas contre les Grecs. Et en luy deduiſant pluſieurs raiſons & remonſtrances accommodées au plus près du naturel , & de ce qu'il penſoit qu'Alexandre deſiroit , il le changea & l'addoucit tellement , qu'Alexandre au departir luy dit , que les Atheniens devoyent avoir l'œil aux affaires , pource que ſi luy venoit à mourir , il ne cognoiſſoit point d'autre peuple à qui l'empire fuſt deu , qu'à eulx : & voulant avoir particuliere amitié & alliance d'hospitalité avec Phocion , il luy feit tant d'honneur , qu'il y avoit bien peu de ſes plus familiers , à qui il en feiſt autant. Auquel propos l'historien Duris eſcrit , qu'après qu'il fut devenu grand , & qu'il euſt deſfait le roy Darius , il oſta de la ſalutation de toutes ſes lettres miſſives ce mot que lon a accouſtumé d'y mettre , Chærin , c'eſt à dire , joye & ſalut , ſinon en celles qu'il eſcrivoit à Phocion , & qu'il ne faiſoit plus ceſt honneur de ſaluer ainſi ceulx

à qui il escrivoit, qu'à Phocion & Antipater : ce que Chares a aussi escrit.

XXVI. Bien est-ce chose confessée de tous, qu'il luy envoya bonne somme d'argent en don : car il luy envoya cent talents ¹. Lequel argent ayant esté apporté à Athenes, Phocion demanda à ceulx qui le luy avoyent apporté, pourquoy, veu qu'il y avoit tant de bourgeois à Athenes, Alexandre luy envoyoit ce present à luy seul. Pource (respondirent ilz) qu'il l'estime seul homme de bien & d'honneur. Et Phocion leur repliqua, « Or qu'il me laisse donques le sembler » & l'estre toute ma vie ». Non pour cela les messagers ne laisserent pas d'aller après luy jusques en sa maison, où ilz veirent une très grande simplicité : car ilz trouverent sa femme qui paistrisoit elle même, & luy en leur presence tira de l'eau de son puis pour se laver les pieds : à raison dequoy ilz luy feirent encore plus grande instance que devant, qu'il voulust recevoir le present du roy, se courrouceans à luy, en disant que c'estoit une grande honte de le voir vivre ainsi pauvrement & estroittement, attendu qu'il estoit amy d'Alexandre. Parquoy Phocion voyant passer par la rue un pauvre vieillard affublé d'une meschante robbe, sale & orde, il leur demanda s'ilz

¹ Soixante mille escus. Amyot. 466,875 livres de notre monnoie.

l'estimoyent moins que ce pauvre bon homme là, ja dieu ne plaife, respondirent ilz incontinent : « Et toutefois, leur repliqua il, il vit » encore de moins que je ne fais, & si se contente, & a assez. Brief, leur dit il, quand » je prendray une si grosse somme d'or, ou je ne » m'en servirai point, & lors il vaudroit autant que » je n'en eusse du tout point pris : ou je m'en serviray, & lors je feray que toute ceste ville » en parlera mal & du roy & de moy ».

XXVII. Ainsi fut reporté le present hors d'Athenes, servant de notable exemple à tous les Grecs, pour leur donner à cognoistre, que plus riche estoit celuy, qui n'avoit que faire de tant d'or & d'argent, que celuy qui le luy donnoit. Alexandre ayant entendu que son present avoit ainsi esté refusé, en fut malcontent, & escrivit de rechef à Phocion, qu'il ne pouvoit estimer ses amis, ceulx qui refusoient à prendre de luy : toutefois pour cela encore ne prit il point d'argent, ains seulement le requit de vouloir en faveur de luy, delivrer Echecratides rhetoricien, Arhenodorus natif de la ville d'Imbros, & deux Corinthiens, Demaratus & Spartus, qui avoient esté retenus prisonniers en la ville de Sardis, pour aucunes charges que lon leur mettoit sus. Alexandre les feit incontinent delivrer, & envoyant Craterus en la Macedoi-

ne, luy commanda de donner à Phocion l'une de ces quatre villes de l'Asie qu'il aimeroit le mieulx, Cios¹, Gergite², Mylasse³, ou Elées⁴: luy mandant qu'il se courrouceroit bien plus aigrement qu'il n'avoit fait à la premiere fois, s'il les refusoit : toutefois Phocion n'en voulut onques accepter pas une. Et Alexandre bien tost après s'en alla mourir. L'on voit encore aujourd'hui au quartier de Melite⁵ la maison de Phocion lambrissée de lames de cuyvre, mais au demourant fort simple & sans aucune superfluité.

XXVIII. Quant aux femmes qu'il eut espousées, on ne treuve rien par escript de la premiere, sinon que Cephisodotus mouleur d'images estoit son frere : mais la seconde ne fut pas moins renommée à Athenes pour son honnesteté & sa simplicité en toutes ses actions, que Phocion pour sa justice & bonté. Suyvant lequel propos, on dit qu'un jour comme les Atheniens estoient assemblez au theatre pour voir jouer des Tragedies nouvelles, l'un des joueurs, à

¹ Ce n'est pas l'île dont il s'agit ici; mais une ville sur un fleuve du même nom, dans la Bithynie ou la Mysie, qui lui est contigue.

² Gergithe est dans la Mysie.

³ Mylasse dans la Carie.

⁴ Elée dans l'Eolie, au-dessous du fleuve Calcus, & de Pergame qui est de l'autre côté du fleuve.

⁵ C'est un quartier du Pirée. Voyez Meursius, T. I, p. 552 & suiv.

l'heure mesme qu'il devoit entrer sur l'eschafault pour jouer son rolle, demanda au deffrayeur des jeux un masque de royne, & une suite de damoiselles accoustrées magnifiquement pour l'accompagner, à cause qu'il jouoit le rolle d'une princesse : le deffrayeur ne luy en bailloit point, & le joueur s'en courrouceoit & faisoit cesser les jeux : à cause qu'il ne vouloit pas sortir sur l'eschafault. Melanthius qui estoit le deffrayeur l'y poulsa par force, criant tout hault, « Ne vois » tu pas la femme de Phocion qui va tousjours » avec une chambriere seule par la ville, & tu » veux faire le glorieux, & corrompre les meurs » des dames d'Athenes » ? Ces parolles furent ouyes du peuple qui seoit au theatre attendant, qui par le grand bruit qu'il en mena en batant des mains, monstra les avoir trouvées fort bonnes. Ceste dame, comme une siene amie & hofresse du pais d'Ionie, estant venue à Athenes, luy feist monstre de ses joyaux & bagues d'or enrichies de pierres pretieuses, luy feist response, « Tout mon parement est mon mary » Phocion, qui depuis vingt ans en ça a tous » jours esté continuellement esleu capitaine des » Atheniens ».

XXIX. Son filz luy feist un jour entendre, qu'il desiroit combattre avec les autres jeunes hommes, à qui emporteroit le prix de l'exercice

de descendre & remonter sur les chariots courants à toute bride, aux jeux de la feste, que lon appelloit à Athenes Panathenea : ce que le pere luy permet, non pource qu'il appetast aucunement l'honneur de telle victoire, mais à fin qu'en s'adressant & s'exercitant à cest honeste exercice, il en devinst mieulx conditionné, pource qu'il estoit assez dissolu jeune homme, & qui aimoit le vin : toutefois pour ce coup là il emporta le prix, & y eut plusieurs des amis du pere qui le prierent de leur faire cest honneur, qu'en leurs maisons ilz feissent le festin de celle victoire. Phocion le refusa à tous les autres, excepté à un seul, auquel il permet de faire ceste demonstration de bonne volonté envers sa maison, & y alla luy mesme au soupper, là où entre les autres delices & superfluités de l'appareil, il trouva que lon avoit appresté des lavemens de vin & d'espicerics odorantes pour laver les pîeds des conviez ainsi qu'ilz entreroyent au festin. Si appella son filz, & luy dit, « Com-
 » ment souffres tu, Phocius ¹, que cestuy nos-
 » tre amy gaste & deshonore ainsi ta victoire
 » par ceste superfluité de delices » ? Et desirant retirer de tout poinct ce jeune homme de ceste dissoluë maniere de vivre, il le mena à Sparte ;

¹ Les savans s'accordent avec raison à lire Phocus, comme on le trouvera écrit plus loïn.

& le meit avec les enfans quī y font nourris en la discipline que lon appelle Laconique. Cela despleut aux Atheniens , de voir que Phocion mesprisast ainsi les meurs , coustumes & façons de faire de son païs : & comme Demades l'orateur luy dist, « Que ne suadons nous » au peuple Athenien de recevoir la forme du » gouvernement & la discipline de Lacedæmon » ne ? Quant à moy , si tu veux estre de la partie » je m'offre à le proposer & à le mettre en avant » le premier ». « Vrayement, respondit adonc Phocion , il feroit bien seant, de suader aux Atheniens de vivre en commun , ainsi que font les » Lacedæmoniens en leurs convives , & de louer » les ordonnances de Lycurgus , qui sont austeres , à toy qui es ordinairement ainsi per-fumé & si delicatement vestu ».

XXX. Une autre fois Alexandre leur ayant mandé qu'on luy envoyast quelque nombre de galeres , les harangueurs à l'encontre preschoyent que lon n'en devoit rien faire : le peuple appella nommeement Phocion pour en dire son advis , lequel leur respondit franchement , « Je suis d'advis , ou que vous donniez ordre à estre les plus » forts en armes , ou que vous taschiez d'estre » amis de ceulx qui le sont ». Pytheas l'orateur à son advenement , qu'il ne faisoit encore que commencer à harenguer devant le peuple , ba-

billoit desja à tout propos audacieusement & presumptueusement, & Phocion luy dit : « Dea ce » nouveau venu icy se taira il jamais ? Et comme Harpalus, lieutenant d'Alexandre en la province de Babylone, s'en estant foy de l'Asie, avec grosse somme d'or & d'argent, fust venu descendre au païs de l'Attique, incontinent ceulx qui avoyent accoustumé de faire marchandise de leur langue à prescher le peuple, coururent à l'envy les uns des autres devers luy : lequel ne faignit pas de leur jeter à chascun quelque somme d'argent, pour les attirer & appaster : car ce luy estoit peu de chose, veu la grande quantité qu'il en avoit apportée : mais à Phocion, il en envoya de luy mesme sept cents talents¹, voulant encore mettre le surplus de son avoir & sa personne propre en la protection & sauvegarde de luy seul. A quoy Phocion luy fit une bien dure responce, « Qu'il le feroit repentir s'il » ne se deportoit de gaster & corrompre la ville » d'Athenes ». A l'occasion dequoy Harpalus se retira lors bien esbahy devers ceulx qui avoyent pris argent de luy : mais peu après les Atheniens mettans son affaire en deliberation, il veit que ceulx qui avoyent pris argent de luy, avoyent tourné leur robbe, tellement qu'au lieu de le

¹ Quatre cents quatre vingt dix mille escus. *Amyot*, 3,268,125 livres de notre monnoie.

defendre, ilz l'accusoyent, à fin que lon ne les soupçonnaſt d'avoir pris argent de luy : & au contraire, que Phocion qui l'avoit ſi rudement renvoyé ſans vouloir rien prendre, ayant en ſes conſeilz le principal regard à l'utilité publique, avoit encore eu en quelque conſidération le ſauvement de ſa vie, il ſe remeit de rechef à eſſayer de le gagner par tous moyens, & le conſiderant & recognoiſſant de tous coſtez, trouva que c'eſtoit une place imprenable par argent : mais il ſe feit amy de Charicles, gendre de Phocion, qui fut cauſe de luy donner bien mauvais bruit, pource que lon voyoit qu'il ſe fioit de routes choſes en luy, & l'employoit en tous ſes affaires, juſques à luy commettre la charge de faire baſtir une magnifique ſepulture à la courtiſane Pythonice ¹, dont il avoit eſté amoureux, & en avoit eu une fille. Mais ſi l'accepter une telle charge eſtoit ignominieux à Charicles, encore le diffama l'œuvre davantage, quand elle fut parachevée : car on voit juſques aujourd'huy la ſepulture au lieu qui s'appelle Hermium ²; ainſi que l'on va d'Athenes à Eleuſine, n'ayant rien d'excellence digne de la deſpenſe de ³ trente

¹ Pauſanias l'appelle Pythionice, & aſſure que ce monument eſt un des plus beaux de la Grèce. L. I, p. 90, éd. Kuhn.

² Voyez les Observations.

³ Dix-huit mille eſcus. Amyot. 140,062 livres de notre monnoie.

talents , que lon dit qu'il luy compta pour la fabrique de celle sepulture. Qui plus est , après le trespas de Harpalus , ce Charicles & Phocion mesme prirent la fille , & la feirent soigneusement nourrir : toutefois estant depuis Charicles appellé en justice pour respondre de l'argent que lon l'accusoit avoir pris de Harpalus , il pria son beaupere Phocion de luy vouloir aider , & luy assister en jugement , pour favoriser sa defense : mais Phocion luy refuza tresbien , en luy disant : « Je t'ay, Charicles, pris pour mon gendre » à toutes choses justes & honestes seulement ».

XXXI. Au surplus , le premier qui apporta à Athenes la nouvelle de la mort d'Alexandre , fut un Asclepiades filz de Hipparchus , auquel Demades disoit qu'il ne falloit point adjouster de foy , « Pource , dit il , que s'il fust vray , » toute la terre pieça sentiroit l'odeur d'un tel » mort ». Mais Phocion voyant que le peuple levoit ja la teste , ne demandant que toutes nouvelles , taschoit à le moderer & contenir : & comme plusieurs des harengueurs montassent incontinent en la tribune aux harengues , & criassent que la nouvelle d'Asclepiades estoit certaine , & qu'Alexandre estoit veritablement mort , Phocion leur respondit , « Si elle est vraye aujourd'huy , elle sera » donques encore vraye demain , & après de » main : & pourtant , seigneurs Atheniens , ne

» vous hastez point, ains deliberez tout à loisir,
» & prouvoyez seurement à ce que vous avez
» à faire. Et comme Leosthenes eust tant fait
par ses menées qu'il eust jetté la ville d'Athe-
nes en la guerre, que lon appella la guerre des
Grecs, & demanda en se mocquant à Phocion
qui en estoit marry, quel bien il avoit fait à la
chose publique, en tant d'années qu'il avoit esté
capitaine general d'Athenes, Phocion luy respon-
dit, « Le bien que j'ai fait n'est pas petit : car
» ce pendant que j'ay esté capitaine, les citoyens
» d'Athenes ont esté enterrez en leurs paternelles
» sepultures ». Ce Leosthenes parloit tousjours
haultement & avantageusement devant le peu-
ple, au moyen dequoy Phocion luy dit un jour,
« Tes propos, jeune homme mon amy, ressem-
» blent proprement aux cyprez : car ilz sont grands
» & haults, mais ilz ne portent point de fruit »,
Adonc Hyperides se dressant en piedz, luy de-
manda, « Quand donques, Phocion, conseilleras
» tu aux Aheniens de faire la guerre » ? « Quand
» je verray, dit il, les jeunes hommes bien de-
» liberez de n'abandonner point leurs rens, les
» riches contribuer argent volontairement, &
» les orateurs s'abstenir de desfrober la chose pu-
» blique ».

XXXII. Ce neantmoins plusieurs s'esmer-

¹ La guerre Lamiaque.

veilloient de voir la belle & grosse armée que Leosthenes avoit levée , & demandoient à Phocion ce qu'il luy sembloit d'un tel preparatif. « Il est beau , dit il , pour une course & carriere : » mais je crains le retour & la continue de la » guerre , pource que je ne voy point que ceste » ville ait plus d'autre moyen de recouvrer argent , » ny autres vaisseaux , ny autres gens de guerre , » que ceulx là ». Ce qui fut depuis resmoigné par l'evenement , pource que du commencement Leosthenes fait de grands exploits d'armes : car il desfeit en bataille les Bœotiens , & renga Antipater dedans la ville de Lamia : ce qui eleva les Arheniens en grande esperance , de sorte que lon ne faisoit à Athenes autres choses , que festes & sacrifices continuellement , pour rendre grace aux dieux de tant de bonnes nouvelles : & y en avoit quelques uns qui cuidans bien convaincre Phocion , de maniere qu'il ne sçauroit que respondre , luy demandoient s'il voudroit pas bien avoir fait toutes ces belles choses là : « Ouy vraiment , leur respondit il , je les vou- » droye bien avoir faittes , mais non pas n'avoir » conseillé ce que j'ay conseillé ». Et comme lon escriviſt & apportast tous les jours de bonnes nouvelles les unes sur les autres , il dit : « O dieux ! » quand cesserons nous de vaincre & de gai- » gner » ? Toutefois Leosthenes à la fin estant

mort en ce voyage, ceux qui craignoient que Phocion ne fust substitué capitaine au lieu de luy, & qu'il ne pacifiast ceste guerre, attilrent un personnage peu cogneu & de petite qualité, qui en pleine assemblée de conseil vint dire, qu'estant amy de Phocion, & son compagnon d'eschole, il supplioit le peuple de l'espargner & le contregarder, pource qu'ilz n'en avoyent point d'autre semblable à luy, & qu'ilz envoyassent plus tost au camp Antiphilus. Dequoy le peuple estant bien d'avis, Phocion se tira en avant qui dit, qu'il n'avoit jamais esté à l'eschole avec cest homme là, & qui plus est, qu'il ne le cognoissoit du tout point, ny n'avoit onques esté son familier : « Mais pourtant, qui » que tu sois, dit il, je te tien desormais pour » mon amy & pour mon bienvueillant, car tu » as conseillé au peuple ce qui m'est le plus » expedient ».

XXXIII. Ce neantmoins le peuple à toute force voulant aller contre les Bæotiens, Phocion y résista le plus qu'il peut, de paroles premiere-ment : & comme ses amis luy remontrassent qu'il se feroit tuer, de contrevenir ainsi ordinairement à la volonté du peuple, il leur répondit, « A tort me feront ilz mourir, si je » fais & procure ce qui leur est utile : & à bon » droit aussi si je fais le contraire ». Mais voyant

que pour cela ilz ne se laschoyent point, ains crioyent de plus en plus encontre luy, alors il commanda au herault qu'il proclamast à son de trompe, que tous bourgeois, manans & habitans d'Athenes, depuis l'aage de quatorze ans¹, jusques à soixante, eussent promptement au partir de l'assemblée à le suyvre en armes, portans avec eulx des vivres pour cinq jours. Ceste criée entendue, il y eut un grand trouble par toute la ville, & s'en coururent incontinent les vieillards devers luy se plaindre de la dureté de son commandement : il leur respondit, « Je ne vous fais » point de tort, car moy mesme qui suis aagé » de quatre vingts ans, seray quant & vous ».

XXXIV. Ainsi les reteint il pour lors, & leur fait perdre leur folle envie de guerroyer : mais estant la coste de la marine courue & pillée par le capitaine Micion, lequel avec bon nombre de Macedoniens naturelz & d'autres estrangers, estoit descendu au territoire du bourg de Rhamnus, & gastoit tout le plat país à l'environ, Phocion y mena les Atheniens, là où comme plusieurs accourussent à luy, l'un deçà, l'autre delà, entreprenans sur son estat de capitaine, & s'ingerans de luy conseiller les uns de loger son camp sur une telle motte, les autres d'envoyer en tel endroit les gens de cheval, les

¹ Voyez les Observations.

autres de camper icy : « O Hercules , dit il , com-
 » bien je voy de capitaines , & peu de souldards » !
 Puis quand il eut rengé ses gens de pied en
 bataille , il y en eut un qui se jetta bien loing
 devant les autres hors de son renc : mais s'é-
 tant aussi avancé l'un des ennemis pour le charger ,
 l'Athenien eut peur , & se retira en sa place ;
 & lors Phocion luy dit : « N'as tu point de honte ,
 » jeune estourdy que tu es , d'avoir ainsi par
 » deux fois abandonné ton renc , l'un auquel
 » tu avois esté mis par ton capitaine , & l'autre
 » auquel tu t'estois planté toymesme ? Et allant
 tout aussi tost charger l'ennemy , le rompit à
 force , & tua sur le champ le capitaine mesme
 Micion avec bon nombre de ses gens.

XXXV. Or estoit pour lors l'armée de la
 ligue des Grecs en la Theffalie , là où elle gaigna
 une bataille ¹ contre Antipater , & contre Leon-
 natus , qui s'estoit joint à luy avec les Mace-
 doniens qu'il avoit nagueres ramenez de l'Asie ,
 & y fut occis sur la place Leonnatus , estant
 Antiphilus chef des gens de pied , & Menon
 Theffalien coulonna de la chevalerie. Mais peu
 de temps après estant Craterus repassé de l'Asie
 en Europe avec grosse puissance , il y eut une

¹ La seconde année de la cent quatorzieme olympiade , avant
 J. C. 323.

autre bataille près la ville de Cranon ¹ en laquelle les Grecs furent desfaits : toutefois la desfaite ne fut pas grande, & n'y mourut pas beaucoup de gens, encore fut ce par la desobeïssance des souldards aux capitaines, qui leur estoient trop doux, aussi estoient ilz trop jeunes, joint aussi que si tost comme Antipater tenta leurs villes, ilz se desbanderent tous, & abandonnerent très honteusement la defense de la liberté commune : parquoy Antipater s'achemina incontinent droit pour aller avec son armée devant la ville d'Athenes. Ce que sentans Demosthenes & Hyperides, abandonnerent la ville : mais Demades ne pouvant fournir à payer l'argent qu'il devoit au public, ayant esté condamné en sept amendes envers la chose publique, pour avoir autant de fois proposé au peuple, & mis en avant des choses contraires aux loix, en demouroit infame, & ne luy estoit pas loisible de parler & harenguer en public : toutefois pour lors en estant dispensé, il proposa que lon envoyast des ambassadeurs avec plein pouvoir devers Antipater, pour rascher à traiter quelque paix avec luy.

XXXVI. Le peuple craignant de commettre

¹ L'année suivante. Cranon est dans le canton de la Thessalie, appelé Tempé.

ceste absolue puissance de traiter à qui que ce fust, appella nommeement Phocion, disant qu'il n'y avoit que luy seul à qui il se peust confier. Et adonc leur respondit Phocion, « Si » j'eusse esté creu ès conseils que je vous ay » tousjours donnez, vous ne seriez pas mainte- » nant en peine de consulter de si grandes choses ». Ainsi estant le dectet autorisé par le peuple, il fut envoyé luy mesme devers Antipater, lequel estoit pour lors campé en la Cadmée, s'apprestant pour de là entrer au premier jour dedans le país d'Attique. Si luy requit Phocion, que premier qu'il deslogeast de là, il feist appointment avec eulx. A quoy Craterus respondit promptement, Phocion, « Tu ne nous demandes pas » chose raisonnable, que demourans icy nous » mangions & foulions le país de noz alliez & » amis, là où nous pouvons aller vivre & nous » enrichir ès terres de noz ennemis » : route-fois Antipater prenant Craterus par la main : « Il » fault, dit il, que nous facions ce plaisir à » Phocion ». Mais au demourant, quant aux capitulations de là paix, il voulut que les Arhe- niens leur envoyassent la carte blanche, & remeissent les conditions du traité à leur plaisir, ne plus ne moins que luy estant assiégré dedans la ville de Lamia avoit remis tout pouvoir de capituler à la discretion de leur capitaine Leof-

thenes. Ceste réponse ouye, Phocion s'en retourna à Athenes, où le peuple se voyant contrainct, accepta par force la condition de traiter, que luy offroit l'ennemy.

XXXVII. Ainsi retourna de rechef Phocion à Thebes devers Antipater avec d'autres ambassadeurs : entre lesquelz les Atheniens eleurent le philosophe Xenocrates, pource que le renom, l'estime & la reputation de la vertu de ce personnage estoit si grande par tout le monde, que lon pensoit qu'il n'y avoit arrogance, ny cruauté, ny cholere si grande en cuer d'homme, qui qu'il fust, que le regard seul de Xenocrates n'amollist, jusques à le contraindre de luy porter quelque honneur & quelque reverence. Ce nonobstant il en advint tout au contraire par la malignité de la nature d'Antipater ennemie de toute vertu : car tout premierement, il ne le daigna oncques seulement saluer, là où il embrassa tous les autres. Sur quoy lon trouve que Xenocrates dit adonc, « Antipater fait bien » d'avoir honte de me voir tesmoing du mauvais » tour & traitement inique, qu'il veut faire » aux Atheniens ». Puis quand il commença à parler, il n'eut jamais la patience de l'ouïr, ains l'entrerompant à tous propos, & le rabrouant, il luy commanda à la fin de se taire du tout : mais après que Phocion eut parlé, il leur feit

responſe, que les Atheniens auroient paix, alliance & amitié avec luy, prouueu qu'ilz luy livraſſent Demosthenes & Hyperides entre ſes mains, qu'ilz gouvernaſſent leur choſe publique ſelon la forme de gouvernement inſtituée par leurs anceſtres, là où il n'y euſt que ceulx qui auroient dequoy, qui fuſſent admis aux eſtats & offices de la choſe publique, & qu'ilz receuſſent garniſon dedans le port de Munychia¹ : qu'ilz rembourſaſſent l'argent qui auroit eſté deſpendu en ceſte guerre, & oultre cela, qu'ilz en payaſſent encore une ſomme pour l'amende. Tous les autres ambassadeurs s'en contenterent, & accepterent ces conditions de paix comme doulces & humaines, excepté Xenocrates, lequel dit, que pour eſclaves, il les traittoit aſſez doulcement : mais pour un peuple franc & libre, trop durement. Parquoy Phocion le ſupplia qu'il vouluſt à tout le moins leur remettre la garniſon : à quoy lon dit que Antipater luy reſpondit, « Phocion, nous deſirons te gratifier en toutes » choſes, fors en celles qui ſeroient cauſe » de ta ruine & de la noſtre ». Les autres eſcrivent qu'il ne reſpondit pas ainſi, mais qu'il luy demanda, s'il vouloit pleger & cautionner

¹ Entre celui de Phalère vers l'orient, & celui du Pirée vers l'occident. C'eſt un des dèmes de l'Attique, mais on ne fait de quelle tribu.

les Atheniens, qu'ilz entretiendroyent loyaument les articles & conditions de ceste paix, sans plus remuer aucune nouvellété, s'il les exemptoit de recevoir garnison. A quoy comme Phocion se teust & dilayast à respondre, il y eust un Calimédon surnommé Carabos, homme violent, & haïssant la liberté populaire, qui se jettant à la traverse dit, « Et si cestuy estoit si fol que » de pleger cela, Antipater, luy croirois tu pour- » tant, & laisserois tu pour cela de faire ce que » tu as deliberé » ?

XXXVIII. Ainsi furent les Atheniens contraincts de recevoir garnison des Macedoniens, de laquelle fut capitaine Menyllus un honeste homme & familier amy de Phocion. Ce commandement de recevoir garnison dedans le port de Munychia fut trouvé superbe, & fait par Antipater plus tost par une vaine gloire de monstrier oultrageusement sa puissance, que pour bien qui en peust advenir à ses affaires. Mais encore le jour auquel il s'en saisit & empara, augmenta davantage le regret : car ce fut justement le vingtième d'août¹, que la garnison y entra : lors que lon celebre la feste des Mysteres, en laquelle on a accoustumé de faire la procession qui s'appelle Jacchus, depuis la ville d'Athenes jusques à celle d'Eleusine, de sorte

¹ Grec, boëdromion, septembre.

qu'estant la solennité de ceste sainte cerimonie confuse, il vint en pensée à plusieurs de considérer, comme anciennement es plus heureux temps de la chose publique, avoyent esté ouyes & veuës des voix & visions divines à tel jour, dont les ennemis estoient demourez estonnez & effroyez : & lors, au contraire, en la mesme solennité les dieux voyoyent la plus triste calamité qui eust peu eschoir à la Grece, & venoit le plus saint & le plus plaissant jour qui fust paravant en toute l'année, à estre contaminé du tiltre du plus malheureux evenement, qui advint onques aux Grecs, c'estoit la perte de leur liberté.

XXXIX. Or peu d'années au paravant avoit on apporté un oracle de Dodone¹ à Athenes, « Que lon gardast bien les rochers de Diane, de » peur que des estrangers ne s'en emparassent : » & environ ce mesme temps, les rideaux² dont on environne tout à l'entour les saints liës mystiques, estans baignez en l'eau, prirent une couleur jaunastre & passe comme celle d'un trespaslé, au lieu de la vive couleur de pourpre qu'ilz fouloyent au paravant avoir : & qui plus

¹ Forêt de la Thesprotide ou de la Molossie ; car les limites de ces deux provinces ont varié. Elle étoit consacrée à Jupiter, & fameuse par les oracles qui y étoient rendus par des chênes, ou par des colombes.

² Ou les bandes, dont on lie à l'entour les berceaux mystiques de Bacchus. Amyot.

est, les autres draps non sacrez des particuliers que lon trempoit tout auprès dedans la mesme eau, retenoyent leur naïfve vivacité de couleur. Er comme l'un des ministres du temple lavast un petit cochon dedans la mer en un endroit du rivage¹ pur & net, il sortit soudain un grand poisson de la mer qui luy vint oster d'entre les mains, & en avalla tout le derriere : par où lon conjectura que les dieux leur donnoyent à entendre qu'ilz perdroyent le bas de leur ville; & ce qui estoit le plus prochain de la mer, mais qu'ilz sauveroyent les parties haultes : toutefois ceste garnison pour l'honesteté du capitaine Menyllus ne fascha point les Arheniens. Mais il y eut plus de douze mille citoyens qui furent deboutez de la jouissance du droit de bourgeoisie, à raison de leur pauvreté, desquelz une partie demoura à Athenes, à qui il semble que lon faisoit un grand tort & une grande injure : & une autre partie s'en alla en Thrace, là où Antipater leur assigna villes & terres pour demourer. Ceulx là sembloient proprement gens que lon eust pris d'affault, ou par siege dedans une ville, que lon contraignist d'abandonner leur país.

XL. Au demourant la mort de Demosthenes en l'isle de Calauria² & de Hyperides près la

¹ Voyez les Observations.

² A l'extrémité du golfe Argolique & du golfe Saronique.

ville de Cleones¹, dont nous avons escrit ailleurs ; furent presque cause de faire regretter le temps des regnes de Philippus & d'Alexandre : ne plus ne moins , que depuis lon dit que ayant esté Antigonus desfait , ceulx qui l'avoient vaincu & occis, oppresserent & traitterent si rudement leurs subjeçts , que au païs de la Phrygie un laboureur fouillant en terre, & estant interrogué, que c'estoit qu'il cherchoit, respondit en souspirant « Je cherche Antigonus ». Aussi venoit il lors en pensée à plusieurs d'en dire autant , quand ilz rememoroyent la magnanimité & generosité de ces deux grands princes , en leur courroux , comme ilz pardonnoyent facilement, & remettoyent leur maltalent, non pas ainsi comme Antipater, qui sous le masque de se comporter en homme privé, d'aller simplement vestu, & vivre sobrement & à peu de despenſe, dissimuloit la puissance tyrannique qu'il usurpoit , & ce pendant s'en monstroït plus violent seigneur & plus cruel tyran envers ceulx à qui la fortune avoit couru sus. Toutefois Phocion impetra de luy le rappel de plusieurs qu'il avoit bannis, & à ceulx qu'il ne peult faire rappeler , au moins leur procura il que leurs confins ne fussent point si loingtains, comme des autres qui estoient releguez par

¹ Ville de l'Argolide.

delà les monts Acrocerauniens ¹, & le chef de Ténarus, hors de la Grece, ains qu'il leur fust à tout le moins loisible de demourer au dedans du Peloponese, entre lesquelz fut un Agnonides fauls accusateur.

XLI. Au reste gouvernant ceulx qui estoient demourez dedans la ville en grande justice, & avec grande humanité, quand il en cognoissoit aucuns doulx & paisibles de nature, il les tenoit tousjours en quelque magistrat : mais ceulx qu'il sçavoit estre remuans, seditieux & amateurs de nouvelletez, il les engardoit de pouvoir parvenir à office quelconque, & leur ostoit tout moyen d'exciter troubles, de sorte qu'ilz se fenoient d'eulx mesmes, & apprenoyent avec le temps à aimer les champs, & à s'addonner au labourage. Et voyant que Xenocrates payoit un certain tribut à la chose publique, que payoyent par chascun an les estrangers habitans à Athenes, il luy voulut faire donner droit de bourgeoisie, & le faire enregistrer au nombre des citoyens : mais Xenocrates ne voulut pas, disant qu'il ne vouloit point avoir de part à celle bourgeoisie, pour laquelle empescher il avoit esté envoyé ambassadeur.

XLII. Et comme Menyllus luy envoyast de

¹ Grande chaîne de montagnes dans l'Epire.

l'argent en don , il feit response que Menyllus n'estoit point plus grand seigneur qu'avoit esté Alexandre , ny luy n'avoit point lors plus grande occasion d'accepter son present , que quand il avoit refuzé celui du roy : & comme Menyllus luy repliquast , que s'il n'en avoit besoing pour soy , à tout le moins qu'il le prist pour son filz Phocius , il respondit , « Si mon filz Phocius ; » changeant de façon de vivre veult estre homme » de bien , il aura assez pour vivre de ce que » je luy laisseray : mais s'il se veult tousjours gouverner comme il fait de present , il n'y a richesse » qui luy peust suffire ». Mais une autre fois il respondit bien plus roidement à Antipater , qui luy vouloit faire faire quelque chose , laquelle n'estoit point honeste : « Antipater , dit il , ne » me scauroit avoir pour amy & pour flatteur » tout ensemble ». Antipater mesme souloit dire qu'il avoit deux amys à Athenes , Phocion & Demades , à l'un desquelz il n'avoit jamais sceu faire rien prendre , & n'avoit jamais peu assouvir l'autre. Aussi estoit la pauvreté de Phocion un grand argument & grand tesmoignage de sa preudhommie , attendu qu'il estoit envieux en icelle après avoir esté tant de fois en sa vie capitaine general des Atheniens , & avoir eu l'amitié de tant de princes & de roys : là où Demades prenoit plaisir à faire monstre de sa richesse ès choses

mesmes qui sont defendues par les loix de la ville : car y ayant lors une ordonnance à Athenes, par laquelle il estoit prohibé, que nul estrangier ne peust estre des danseurs qui dansoyent ès jeux publiques, sur peine de ¹. mille drachmes, que le deffrayeur desdictes danses payeroit pour l'amende à la chose publique, Demades faisant quelques jeux à ses despens, y en fait venir cent baladins estrangers pour un coup, & apporta quant & quant l'argent pour payer l'amende publiquement au theatre devant tout le peuple, à mille drachmes pour chasque teste. Une autre fois quand il maria son filz qui s'appelloit Demas, il luy dit, « Mon filz, quand j'espousay ta mere » il y eut si peu de feste, que nostre prochain » voisin n'en ouyt rien : là où maintenant les » princes & les roys contribuent aux frais de » tes nopces ».

XLIII. Au surplus les Atheniens rompoient ordinairement la teste à Phocion d'aller requerir Antipater, qu'il voulust retirer sa garnison de leur ville : mais il trouvoit tousjours quelque moyen de rejeter ceste ambassade, fust ou pource qu'il n'esperast pas pouvoir obtenir ceste grace, ou plus tost pource qu'il veist que le peuple en estoit plus humble & plus souple à mener à la raison, pour la crainte de celle garnison : mais

¹ Cent escus. Amyot. 778 liv. de notre monnoie.

bien impetra il d'Antipater, qu'il ne demandast pas promptement son argent, ains en differast encore le payement : parquoy voyans que Phocion n'y vouloit autrement entendre, ilz se tournerent devers Demades, lequel en prit la charge bien volontiers, & s'en alla avec son filz en Macedoine, là où sans point de doubte sa destinée le conduisit à sa male heure, sur le point que Antipater estoit desja tombé malade de la maladie dont il mourut, & passoyent les affaires par les mains de son filz Cassander, lequel avoit surpris une lettre missive de ce Demades, par laquelle il mandoit à Antigonus en Asie, qu'il s'en vinst à toute diligence pour s'emparer de la Grece & de la Macedoine, qui ne pendoyent plus qu'à un vieil filet, encore tout pourry, en se mocquant ainsi d'Antipater. Parquoy Cassander, adverty qu'il fut de son arrivée, le fit incontinent saisir au corps¹, & luy approchant premierement son filz tout joignant luy, le tua devant ses yeux, si près de luy, que le sang en jalit sur luy, & fut le pere tout ensanglanté du meurtre de son filz : puis, après luy avoir bien reproché son ingratitude & sa desloyale trahison, & luy avoir fait & dit toutes les vilanies & oultrages dont il se peut ad-

¹ La quatrième année de la cent quatorzième olympiade, avant J. C. 321 ans.

vifer, il le tua auffi finablement luy meſme.

XLIV. Mais combien qu'Antipater à ſon decès euſt eſtably Poliperchon capitaine general de l'armée des Macedoniens, & Caſſander ſeulement coulonnell de mille hommes de pied, ce neantmoins Caſſander incontinent qu'il fut decedé, prenant les affaires en main, & s'en faiſiſſant le premier, envoya tout ſoudain Nicanor pour ſucceder à Menyllus en la charge de capitaine de la garniſon d'Athenes, avant que la mort de ſon pere fuſt divulguée, luy commandant de ſe faiſir, comment que ce fuſt, de la forterreſſe de Munychia : ce qu'il feit. Et peu de jours après entendirent les Atheniens la nouvelle de la mort de Antipater, dont Phocion fut fort blaſmé, & accuſé d'avoir ſçeu long temps au paravant ceſte mort, & de l'avoir celée pour gratifier à Nicanor : toutefois il ne feit compte de ces imputations là, ainss'accointa de Nicanor, & l'entretint ſi bien, que non ſeulement il le rendit doux & gracieux aux Atheniens, mais, qui plus eſt, luy perſuada encore de faire quelque deſpenſe pour donner au peuple le paſſertemps de quelques jeux qu'il feit jouer à ſes deſpens.

XLV. Sur ces entrefaites Polyperchon, qui avoit la charge de la perſonne du roy, voulant donner une trouſſe à Caſſander, envoya au peuple d'Athenes une patente, par laquelle eſtoit porté,

comme le jeune roy rendoit aux Atheniens la pleine & entiere liberté de l'estat populaire, voulant & entendant que tous Atheniens indifferemment gouvernassent leur chose publique, selon les loix, us & coustumes de tout temps gardées en leur país, ainsi comme avoyent fait leurs predecesseurs. Cela estoit un piege dressé à Phocion : car Polyperchon ourdissant ceste menée pour s'emparer de la ville d'Athenes, comme il apparut bien tost après par effect, n'esperoit pas pouvoir venir au dessus de ceste sienne entente, s'il ne trouvoit moyen de chasser premierement Phocion : & pensoit bien qu'il en feroit chassé si tost que ceulx qui avoyent esté privez & deboutez par son moyen du droit de bourgeoisie, viendroyent à s'entremettre de rechef du gouvernement, & que les harengueurs & calumniateurs auroyent alors loy de dire tout ce qu'ilz voudroyent. Les Atheniens ayans ouy le contenu en ceste patente, commencerent incontinent à s'esmouvoir un petit : à raison dequoy Nicanor desirant parler à eulx en leur senat, qui s'estoit assemblé dedans le Piræe, il s'y en alla, & meit sa personne entre leurs mains sous la foy de Phocion : dequoy estant secrettement adverty Dercyllus capitaine pour le roy, qui estoit aux champs près de la villè, se meit en devoir & tascha de le ptendre au corps : mais

Nicanor en sentit le vent de bonne heure, & se sauva.

XLVI. Si estoit bien evident qu'il se voudroit incontinent ressentir de cest oultrage, & s'en venger sur la ville, & accusoit on Phocion de ne l'avoir pas voulu retenir, & l'avoir laissé échapper : à quoy il respondit, qu'il se fioit aux promesses de Nicanor, & qu'il n'estimoit pas qu'il y eust aucun danger à craindre de ce costé là : toutefois s'il en advenoit autrement, qu'il aimoit en toutes sortes mieulx, que lon cogneust manifestement que c'estoit luy qui recevoit, & non pas qui faisoit le tort. Ceste responce, s'il eust esté question de chose qui n'eust concerné que luy seul, pourroit sembler à qui la considereroit de près, estre partie d'une grande bonté & grande magnanimité : mais attendu qu'il mettoit en hazard le salut de son païs, en estant mesmement capitaine general, & tenant lieu d'autorité publique, je ne sçay s'il transgressoit point un autre droit, & ne violoit point une autre foy prealable & de plus grande obligation, c'est à sçavoir, le regard qu'il devoit avoir sur toutes choses au bien & à la seureté de ses citoyens. Car cela ne sçauroit on alleguer pour sa defense, qu'il ne voulut pas mettre la main sur Nicanor, de peur de jeter sa ville en guerre toute manifeste : mais que pour une couverture, il mettoit

en avant la foy qu'il luy avoit promise & jurée, & la justice qu'il vouloit observer en son endroit, à fin que pour reverence de luy, Nicanor puis après se teinst en paix, & ne feist point de dommage aux Atheniens : mais à la verité il semble qu'autre chose ne l'abusa, que la trop grande confiance qu'il eut en ce Nicanor, comme il appert par ce que combien que plusieurs luy vinsent deferer qu'il espioit les moyens de pouvoir surprendre le port de Piræe, & qu'il faisoit tous les jours passer des gens de guerre en l'isle de Salamine, & taschoit à corrompre par argent aucuns des habitans dedans l'enceinte du port, il n'y voulut jamais prester l'oreille, ny en croire rien. Qui plus est, ayant Philomedas Lamprien^r mis en avant un decret, que les Atheniens se teinsent prests en armes, pour faire ce que le capitaine Phocion leur commanderoit, il n'en fait compte, jusques à ce que Nicanor sortant en armes du fort de Munychia, commença à enfermer de trenchées le port de Piræe : mais lors quand il y cuida mener le peuple pour l'empescher, il le trouva mutiné à l'encontre de luy, de maniere que personne ne faisoit semblant d'obeïr à son commandement.

XLVII. Sur ces entrefaites Alexandre filz de Polyperchon arriva avec une armée, soubz cou-

^r Il y avoit deux dèmes du nom de Lampra dans l'Attique.

leur de venir au secours de ceulx de la ville contre Nicanor , mais à la verité en intention de se saisir luy mesme du reste de la ville s'il pouvoit, mesmement lors qu'elle estoit en combustion une partie contre l'autre , par ce que les bannis y entrerent pesse mesle quant & luy, & y accoururent aussi force estrangers , & autres gens notez d'infamie , de maniere qu'il se teint une assemblée de ville confuse de gens ramassez de toutes pieces , sans ordre quelconque , en laquelle Phocion fut depose de son estat , & furent esleuz autres capitaines en son lieu , & si n'eust esté que lon apperceut cest Alexandre , qui parla seul à seul à Nicanor , & y retourna par plusieurs fois tout joignant les murailles de la ville (ce qui meit les Atheniens en deffiance & souspeçon) jamais la ville ne se fust sauvée qu'elle n'eust esté prise. Si fut incontinent Phocion accusé de trahison bien asprement par l'orateur Agnonides : ce que craignans Callimedon & Pericles¹ s'absenterent de bonne heure de la ville , & Phocion avec ses autres amis , qui ne s'en estoient pas fouys , s'en allerent devers Polyperchon , & l'accompagnerent aussi Solon Plataëien & Dinarchus Corinthien , qui pensoient avoir quelque amitié & quelque privauté avec Polyperchon : mais estant par le chemin Dinarchus tumbé malade

¹ Il faut lire, je crois, Chariclès. Voyez ch. 2.

en la ville de Elatie, ilz y demourerent plusieurs jours, attendans qu'il fust guarý, durans leſquelz à la perſuaſion de l'orateur Agnonides, & à l'inſtance d'Archeſtratus, qui en propoſa le decret, le peuple envoya devers Polyperchon des ambaffadeurs pour accuſer Phocion, tellement que les deux parties y arriverent en un meſme temps, & le trouverent par les champs avec le roy, près d'un village de la Phocýde nommé Pharyges, aſſis au pied du mont Acrorion, que lon ſurnomme maintenant le Gaulois.

XLVIII. Là feit Polyperchon tendre un dais d'or fait en façon de ciel, ſoubs lequel il feit ſeoir le roy, & les principaulx de ſes ſerviteurs & amis autour de luy : mais d'entrée avant toute autre œuvre, il feit prendre au corps Dinarchus, & commanda que lon le menaſt mourir, après luy avoir donné la torture : puis cela fait, il commanda aux Atheniens qu'ilz propoſaſſent ce qu'ilz avoyent à dire. Et lors ilz commencerent à crier & à mener un grand bruit, en s'entreaccuſans les uns les autres en la preſence du roy & de ſon conſeil, juſques à ce qu'Agnonides ſe tira en avant, qui dit, « Seigneurs Macedoniens, faites nous mettre tous en une cage, » & nous envoyez piedz & poings liez à Athenes » au peuple, pour nous y faire rendre compte » de noſtre faict ». Le roy ſe prit à rire de

ceste parole : mais les seigneurs Macedoniens assistans à ceste audience , & quelques estrangers qui estoient là venus pour ouyr l'accusation , faisoient signes de la teste aux ambassadeurs qu'ilz deduisissent là presentement devant le roy , les articles de leurs accusations , plus tost que de les remettre devant le peuple à Athenes. Mais les parties n'estoyent point également ouyes , pource que Polyperchon rabrouoit souvent Phocion , & luy rompoit à tous coups son propos , ainsi comme il cuidoit deduire ses justifications , jusques à frapper par cholere d'un baston qu'il tenoit en la main contre terre , & à luy commander à la fin qu'il se teust & qu'il se retirast. Et comme Hegemon luy^e dist , qu'il pouvoit luy mesme estre bon tesmoing , comme il avoit tousjours loyaument aimé & servy le peuple , il luy respondit en courroux , « Ne viens point ici mentir » faulxement contre moy en la presence du roy ». Le roy adonc se leva de son siege , & prenant une lance en cuida donner à Hegemon , n'eust esté que soudainement Polyperchon l'embrassant par derriere , le retint : & ainsi se rompit ceste audience & assemblée de conseil : mais aussi tost il y eut des gardes qui faisirent Phocion & ceulx qui estoient auprès de luy. Ce que voyans quelques autres de ses amis , qui en estoient un peu loing , s'affublerent le visage , & s'en fuyrent

vistement hors de là : les autres furent menez prisonniers à Athenes par Clitus, non tant pour leur faire & parfaire leur procès, comme lon disoit, que pour les executer comme ja condamnez à mort. Encore fut la façon, dont on les mena, ignominieuse : car on les trainna dessus des chariots tout le long de la grande rue de Ceramique, jusques au theatre, là où Clitus les reïnt tant que les magistrats eussent fait assembler le peuple, sans forclorre de ceste assemblée ny serf, ny étranger, ny homme noté d'infamie : ains laissant le theatre ouvert à tous & à toutes, de quelque condition qu'ilz fussent, & la tribune aux harengues libre à quiconque vouloit parler contre eulx.

XLIX. Si furent premierement les lettres du roy leuës publiquement, par lesquelles il mandoit au peuple, qu'il avoit bien trouvé ces criminelz attaincts & convaincus de trahison, mais neantmoins qu'il leur en avoit renvoyé le jugement & la cognoissance pour les condamner, comme à ceulx qui estoient francs & libres. Adonc representa Clitus ses prisonniers devant le peuple ; là où les gens de bien & d'honneur, aussi tost qu'ilz veirent Phocion, baïsserent les yeulx contre terre, & se couvrans la face de peur de le voir, se prirent à plorer : toutefois il y en eut un qui se levant sur ses pieds dit hault & clair : « Sei-

» gneurs, puis que le roy renvoye au peuple le
» jugement de si grands personnages, il seroit
» à tout le moins bien raisonnable, que lon feist
» retirer de ceste assemblée les serfs, & les estran-
» gers qui ne sont point bourgeois d'Athenes ». Mais la commune ne le voulut point consentir, ains se prit à crier que lon devoit charger sur ces traistres ennemis du peuple, qui luy vouloyent oster l'autorité souveraine pour la donner à un petit nombre de tyrans, tellement qu'il n'y eut plus personne qui oüst parler pour Phocion. Mais ayant difficilement & à grande peine obtenu audience, il leur demanda, « Seigneurs
» Atheniens, comment nous voulez vous faire
» mourir, justement, ou injustement? Quelques
» uns luy respondirent, justement: & comment;
» repliqua il, le pouvez vous faire: si vous ne
» nous oyez premierement en noz justifications»? Non pour cela encore ne peuvent ilz avoir audience. Et adonc Phocion s'approchant de plus près, leur dit: « Bien, seigneurs, je confesse vous
» avoir fait tort, & que les fautes que j'ay
» faites en l'administration de vostre chose publi-
» que, meritent la mort: mais ceulx cy qui
» sont avec moy, pourquoy les voulez vous faire
» mourir, attendu qu'ilz n'ont rien forfait»? La commune luy respondit, « Pource qu'ilz sont tes
» amis ». Ceste response ouye, Phocion se retira

sans plus dire un seul mot. Et l'orateur Agnonides tenant un decret tout escript, le leut au peuple, par lequel estoit porté, que le peuple jugeast à la pluralité de ses voix, si ces prisonniers avoyent forfait contre la chose publique; ou. non : & là où il seroit d'advis qu'ilz eussent forfait, qu'ilz fussent tous executez à mort. Quand ce decret fut leu, il y en eut qui crierent tout hault, que lon adjoustast davantage à ce decret, que Phocion avant que d'estre executé, fust premierement gehenné : & de faict commanda lon, que lon apportast la rouë à donner la torture, & que lon feist venir les bourreaux : mais Agnonides voyant que Clitus mesme estoit malcontent de cela, & avec ce, pensant que ce seroit une cruauté barbare & detestable, dit tout hault, « Quand vous aurez entre voz mains un tel » pendart comme Callimedon, seigneurs Athe- » niens, alors vous le ferez gehenner : mais » contre Phocion, je ne sçauois en estre au- » theur ». Adonc y eut quelque homme d'honneur en la compagnie qui adjousta, « Tu fais » bien, Agnonides, de dire cela : car si nous » donnons la gehenne à Phocion, que te de- » vrons nous faire à toy » ? Ce decret estant authorisé, & suyvant la teneur d'iceluy, le jugement mis à la pluralité des voix du peuple, il n'y eut pas un en l'assemblée qui demourast assis,

ains se leverent tous , & la plus part meirent encore des chapeaux de fleurs sur leurs testes pour l'affection qu'ilz avoyent de condanner ces prisonniers à mort.

L. Il y avoit avec Phocion Nicocles , Thudippus , Hegemon & Pythocles : mais Demetrius le Phalerien , Callimedon & Charicles furent aussi absens condamnez à mourir. Ainsi l'assemblée finie furent les condamnez conduits en la prison pour y estre executez , là où tous les autres embrassans pour la dernière fois leurs parents & amis qu'ilz trouvoient par le chemin , alloient plorans & lamentans leur miserable fortune : mais Phocion y allant d'un mesme visage qu'il souloit faire au paravant estant capitaine , quand on le convoyoit par honneur de l'assemblée jusques en sa maison , emouvoit à grande compassion les cueurs de plusieurs , quand ilz alloient considerans avec admiration la constance & force de courage qui estoit en luy : & au contraire aussi y en avoit il d'autres siens ennemis & malvueillans , qui couroyent au plus près qu'ilz pouvoient de luy pour luy dire villanie , entre lesquels y en eut un qui l'allant aborder par devant , luy cracha au visage : & adonc Phocion se tournant devers les magistrats leur dit , « Ne ferez vous meshuy cesser l'insolence de cest homme » ? Quand ilz furent en la prison , Thudippus voyant

La ciguë que lon leur broyoit pour leur faire boire , se prit à lamenter & à se tourmenter defespereement, disant qu'on le faisoit à grand tort mourir quant & Phocion, « Comment ; » luy respondit Phocion, & ne le prens tu pas » à grand reconfort, que lon te fait mourir avec » moy » ? Et comme quelqu'un des assistans luy demanda s'il vouloit mander aucune chose à son filz Phocius^{*} : « Ouy certes, dit il, c'est qu'il » ne cherche jamais à venger le tort que me » font les Atheniens ». Adonc Nicocles, qui estoit le plus fidele de ses amis, le pria de luy permettre qu'il beust le poison premier que luy. Phocion luy respondit, « Tu me fais une re- » queste qui m'est bien douloureuse & bien » grieve, Nicocles : mais pource que jamais en » ma vie je ne te refusay rien, encore te con- » cede-je maintenant à ma mort ce que tu me » demandes ». Quand tous les autres eurent beu, il se trouva qu'il n'y avoit plus de ciguë, & dit le bourreau qu'il n'en broyeroit plus d'autre, si on ne luy bailloit douze drachmes d'argent ; pour ce qu'autant luy en coustoit la livre, de sorte que lon demoura long temps en ceste estar ; jusques à ce que Phocion mesme appellant l'un de ses amis, luy pria de bailler à ce bourreau ce peu d'argent qu'il demandoit, puis que lon ne

^{*} Lisez Phocus.

peult pas seulement mourir à Athenes pour néant, sans qu'il couste de l'argent.

LI. C'estoit le dix neuvieme jour du mois de mars^{*} auquel les chevaliers ont accoustumé de faire une procession en l'honneur de Jupiter : mais les uns osterent les chapeaux de fleurs qu'ilz devoient porter sur leurs testes, & les autres regardans la porte de la prison en passant par devant, se prirent à plorer. Si sembla à ceulx qui n'estoyent pas despouillez de toute humanité, & qui n'avoient pas le jugement par rancune & envie totalement depravé, que c'estoit un très grief sacrilege encontre les dieux, que de n'avoir pas à tout le moins souffert passer ce jour là, à fin que une feste si solennelle comme celle là, ne fust point pollue ny contaminée de la mort violente d'homme : toutefois ses ennemis n'ayans pas encore leur ire assouvie, feirent ordonner par le peuple, que son corps seroit banny & porté hors des bornes du païs de l'Attique, & defendu aux Atheniens d'allumer feu quelconque pour faire ses funerailles : au moyen de quoy il n'y eut pas un de ses amis qui y ozast mettre la main. Mais un pauvre homme nommé Conopion, qui avoit accoustumé de gagner sa vie à cela, pour quelque piece d'argent

^{*} Grec, munychion (avril), la troisieme année de la cent quinzieme olympiade.

qu'on luy bailla, prit le corps & l'emporta par delà la ville d'Eleusine, & prenant du feu sur la terre des Megariens le brussa : & y eut une dame Megarique, laquelle se rencontrant de cas d'aventure à ces funeraillies avec ses servantes, releva un peu la terre à l'endroit où le corps avoit esté ars & brulé, & en fait comme un tumbeau vuide, sur lequel elle respendit les effusions que lon a accoustumé de respendre aux trespassez, mais recueillant les os, elle les porta dedans son giron la nuit en sa maison, & les enterra auprès de son foyer, en disant, « O cher » foyer, je depose en ta garde ces reliques d'un » homme de bien, & te prie que tu les conserves fidelement pour les rendre un jour aux » sepultures de ses ancestres, quand les Atheniens viendront à recognoistre la faulte qu'ilz » ont faite en cest endroit ».

LII. Il ne passa gueres de temps après que les affaires ne feissent bien sentir aux Atheniens, qu'ilz avoyent fait mourir celuy qui maintenoit la justice & l'honesteté à Athenes. A raison de quoy ilz luy feirent dresser une statue de cuyvre, & ensepulturerent honorablement ses os aux despens de la chose publique : & quant à ses accusateurs, ilz en feirent eulx mesmes mourir Agnonides : les deux autres Epicurus & Demophilus s'en estans fouys, furent depuis trouvez

par son filz Phocius ¹, qui en feit la vengeance. Cestuy Phocius n'estoit au demourant pas chose qui gueres valust, mais il devint amoureux d'une jeune garce que nourrissoit un macquereau, & se trouvant d'aventure un jour dedans l'eschole du Lyceum, il ouit faire un tel discours & un tel argument à Theodorus, celuy qui fut surnommé l'Atheïste, cest à dire, mescreant, qui nioit qu'il y eust des dieux: « Si ce n'est point de honte de delivrer » de servitude un sien amy, aussi n'est ce point de » honte de delivrer une siene amie, & si ce » n'est point mal fait de tirer de captivité un » sien compagnon, aussi peu est-ce mal fait d'en » tirer une siene compagne ». Ce jeune homme accommodant cest argument à sa passion, & faisant son compte que c'estoit chose qu'il pouvoit faire avec raison, tira des mains de ce maquignon la jeune garce dont il estoit amoureux. Au demourant ceste mort de Phocion renouvela aux Grecs la memoire de celle de Socrates, & estima lon que c'estoit une faulxte & une calamité toute pareille à la ville d'Athenes.

¹ Lisez Phocus.

S O M M A I R E

DE LA VIE DE CATON D'UTIQUE.

NAISSANCE & premiers traits du caractère de Caton. II. Genre de son esprit ; sa docilité. III. Sa constance intrépide. IV. Il sauve la pudeur d'un enfant de son âge. V. Estime que les enfans avoient pour lui. VI. Il regrette qu'on ne lui eût pas donné une épée pour tuer Sylla. VII. Son amitié pour son frere. VIII. Il se livre à l'étude de la philosophie morale & politique. IX. Il monte pour la premiere fois sur la tribune aux harangues. X. Il endurecit son corps à toute sorte de fatigues. XI. Il passe une grande partie de la nuit à conférer à table avec des philosophes. XII. Il affecte une maniere de vivre toute opposée aux mœurs & aux usages de son tems. XIII. Il épouse Attilia. XIV. Campagnes de Caton sous le préteur Gellius. XV. Comment il discipline la légion qu'il commande. XVI. Il va chercher le philosophe Athénodore. XVII. Honneurs funebres qu'il rend à son frere Cæpion. XVIII. Il visite l'Asie ; sa maniere de voyager. XIX. Il est témoin des honneurs qu'on rendoit à Démétrius, affranchi de Pompée. XX. Accueil que Pompée fait à Caton. XXI. Il refuse les présens du roi Déjotarus. XXII. Il est nommé

questeur. XXIII. Sévérité de son administration dans cette charge. XXV. Il fait condamner ceux qui avoient tué des citoyens pros crits par Sylla. XXVI. Affiduité de Caton à ses fonctions. XXVII. Il efface une donation enregistrée par Marcellus. XXVIII. Il achete des livres où étoit le compte du revenu public depuis Sylla. XXIX. Il déclare qu'il ne vaqueroit à aucune affaire les jours d'assemblée du sénat. XXX. Sa grande réputation ; le nom de Caton passe en proverbe. XXXI. Il va en Lucanie. XXXII. Il revient à Rome pour demander le tribunat. XXXIII. Il accuse Murena. XXXIV. Services qu'il rend à Cicéron dans l'affaire de Catilina. XXXV. Il détermine le sénat à prononcer la mort contre les conjurés. XXXVI. Des sœurs & des femmes de Caton. XXXVII. Caton déclare dans le sénat qu'il ne souffriroit jamais que Pompée entrât avec son armée à Rome. XXXVIII. Intrépidité avec laquelle il se présente à l'assemblée du peuple. XXXIX. Murena l'entraîne dans le temple de Castor & de Pollux. XL. Metellus n'ayant pu faire passer son décret va joindre Pompée en Asie. XLI. Caton fait accorder le triomphe à Lucullus. XLII. Il refuse de marier ses deux nieces à Pompée & à son fils. XLIII. Alliance & intrigues de César & de Pompée. XLIV. Caton jure , à la sollicitation de Cicéron , l'exécution d'une loi agraire. XLV. César fait saisir Caton

pour le conduire en prison , & le fait mettre en liberté par un tribun. XLVI. Caton est envoyé en Cypre. XLVII. Bons conseils qu'il donne à Ptolémée , roi d'Egypte. XLVIII. Il fait vendre les meubles de Ptolémée , roi de Cypre. XLIX. Il se brouille avec Munatius. L. Il se reconcilie avec lui. LI. Comment Caton rapporte à Rome l'argent provenu de la vente faite en Cypre. LII. Honneurs qu'on lui rend à son arrivée. LIII. Il contredit Cicéron , qui prétendoit annuler le tribunat de Clodius. LIV. Caton anime Domitius à demander le consulat en concurrence de Pompée & de Crassus. LV. Il demande lui-même , mais n'obtient pas la préture. LVI. Il s'oppose au partage des provinces que Trébonius vouloit décerner à Pompée & à Crassus. LVII. Inutiles représentations de Caton à Pompée. LVIII. Décret qu'il fait rendre par le sénat pour vérifier les moyens employés par les candidats pour se faire élire. LIX. Convention qu'il fait faire aux candidats pour empêcher qu'on n'achetât les suffrages. LX. Envie qu'excite la vertu de Caton. LXI. Caton accuse ouvertement Pompée d'aspirer à la puissance souveraine. LXII. Il fait nommer Faonius édile , & lui fait observer la plus grande simplicité dans les jeux qu'il donne au peuple. LXIII. Il est d'avis de nommer Pompée , seul consul. LXIV. Sévérité de Caton dans les jugemens. LXV. Il se met sur les rangs pour

demander le consulat ; mais il échoue. LXVI. Il dévoile au sénat tous les projets de César. LXVII. Il conseille de remettre toutes les affaires entre les mains de Pompée. LXVIII. Pompée & Caton sortent de Rome. LXIX. Bons conseils que Caton donne à Pompée. LXX. Pourquoi Pompée ne lui donne pas le commandement de sa flotte. LXXI. Victoire de Pompée due aux exhortations de Caton. LXXII. Pompée laisse Caton à Dirrachium pour garder ses bagages. LXXIII. Après la bataille de Pharsale , Caton se rend en Afrique. LXXIV. Il va rejoindre Scipion & Varus. LXXV. Il se charge de garder la ville d'Utique. LXXVI. Il reçoit la nouvelle de la défaite de Scipion. LXXVII. Il ranime le courage des Romains qui étoient avec lui. LXXIX. La plupart changent bientôt d'avis. LXXX. Il refuse la proposition de tuer ou de chasser tous les habitans d'Utique. LXXXI. Soins & démarches de Caton pour sauver les sénateurs qui étoient avec lui. LXXXII. Il refuse la démarche que trois cens marchands Romains établis à Utique vouloient faire en sa faveur auprès de César. LXXXIII. Il fait partir les sénateurs & pourvoit à la sûreté de leur fuite. LXXXIV. Il refuse l'offre que Lucius César lui fait de demander grace à César pour lui. LXXXV. Entretien philosophique de Caton pendant son souper. LXXXVI. Il demande son épée. LXXXVII.

S O M M A I R E. 369

Il s'indigne contre les efforts qu'on fait pour l'engager à conserver sa vie. LXXXVIII. Il se tue. LXXXIX. Belle parole de César en apprenant la mort de Caton. XC. Mort de Caton son fils.

Depuis l'an 660 jusqu'à l'an 708 de Rome ,
avant Jesus-Christ 46.

CATON D'UTIQUE.

LA maison de Caton^{*} prit le commencement de sa gloire & renommée à son bisayeul Caton le Censeur, qui pour sa vertu fut un des plus puissans & des mieulx estimez personnages de Rome en son temps, ainsi comme nous avons plus amplement escript en sa vie, & demoura celui, duquel nous escrivons presentement, orphelin de pere & de mere, avec un sien frere nommé Capion, & Porcia leur sœur. Servilia estoit bien aussi sœur de Caton, mais c'estoit de par sa mere seulement : mais tous ensemble estoient nourriz en la maison de Livius Drusus leur oncle du costé maternel, ayant pour lors grande autorité au gouvernement de la chose publique, pource qu'il estoit très eloquent & fort homme de bien, & qui au demourant en grandeur de courage ne cedit à nul des Romains. Lon dit que Caton dès le commencement de son enfance, tant en sa parole, qu'à son visage & en tous ses jeux & passetemps, monstra toujours un naturel constant, ferme & inflexible en toutes choses : car il vouloit venir à bout de tout ce qu'il entreprenoit de faire, & s'y

^{*} Voyez les Observations.

obstinoit plus que son aage ne portoit : & s'il se monstroit rebours à ceulx qui le cuidoyent flatter , encore se roidissoit il davantage contre ceulx qui le pensoyent avoir par menaces. Il estoit difficile à emouvoir à rire , & luy voyoit on bien peu souvent la chere guaye , aussi n'estoit il point cholere , ny prompt à se courroucer : mais depuis qu'une fois il l'estoit , on avoit beaucoup affaire à le rappaiser.

II. Et pourtant quand il commença à apprendre les lettres , il se trouva dur d'entendement , & tardif à comprendre : mais aussi ce qu'il avoit une fois compris , il le retenoit fort bien , & avoit la memoire ferme , comme il advient ordinairement à tous autres : car ceulx qui ont l'esprit prompt & vif , ont communement faulte de memoire , & ceulx qui apprennent difficilement & avec peine , retiennent mieulx ce qu'ilz ont une fois appris , pource que l'apprendre est comme un eschauffer & allumer l'ame. Mais outltre cela , il ne croyoit pas de leger , & semble que cela le rendoit aussi tardif à comprendre : pource qu'il est tout evident que l'apprendre est recevoir quelque impression , dont il advient que ceulx qui moins resistent , sont ceulx qui plus tost croient : pourtant sont les jeunes plus aisez à persuader que les vieux , les malades que les sains , & generalement tant plus.

372 CATON D'UTIQUE

ce qui debat & qui doubte, est debile, tant plus est il aisé d'y mettre & adjouster ce que lon veult. Toutefois Caton, à ce que lon dit, obéissoit bien à son pædagogue, & faisoit tout ce qu'il luy commandoit : mais il luy demandoit la cause de toutes choses, & vouloit tousjours sçavoir le pourquoy : aussi estoit-ce un honeste homme, & qui avoit la raison plus prompte pour remontrer à son disciple, que le poing levé pour le frapper, & s'appelloit Sarpedon.

III. Au demourant estant Caton encore jeune enfant, les peuples de l'Italie alliez des Romains, prochassoyent d'avoir droit de bourgeoisie dedans Rome : pour lequel prochas Pompædus¹ Sillo ; homme de guerre, vaillant de sa personne, & de grande autorité entre les alliez, estant particulierement amy de Drusus, fut logé par plusieurs jours en sa maison, durant lesquels ayant pris familiarité avec ces jeunes enfans, il leur dit un jour : « Or sus, mes beaux enfans, inter- » cederez vous pas pour nous envers vostre on- » cle, qu'il nous vueille aider à obtenir le droit » de bourgeoisie que nous demandons ? » Cæpion en se soubriant luy fit signe de la teste qu'il le feroit : mais Caton ne respondit rien, ains regarda seulement ces estrangers au visage d'un

¹ Popædus Silo, comme je l'ai observé dans la Vie de Marius, chap. LIX.

regard fiché sans ciller. Adonc Pompædius s'adressant à luy à part: « Et toy, dit il, le beau » filz, que dis tu? Ne veux tu pas prier ton » oncle de favoriser à ses hostes, comme ton » frere »? Caton ne respondit point encore pour cela, ains par son silence & par son regard monstra qu'il rejettoit leur priere. A l'occasion dequoy Pompædius l'empoignant le mèit hors de la fenestre, comme s'il l'eust voulu laisser aller, en luy disant d'une voix plus aspre & plus rude que de coustume, & le secouant par plusieurs secouffes en l'air au dehors de la fenestre: « Promets nous donc, ou je te jetteray à bas ». Ce que Caton endura, & longuement, sans monstrier de s'effroyer ny s'estonner de rien¹. Parquoy Pompædius le remettant à terre, dit adonc; en se tournant vers ceulx qui estoient avec luy: « O quel heur fera un jour cest enfant pour » l'Italie, s'il vit! Bien nous prent de ce qu'il est » ores enfant: car s'il estoit homme, je croy que » nous ne aurions pas une seule voix en tout le » peuple pour nous ».

IV. Une autre fois il y eut quelqu'un de leurs

¹ Il ne pouvoit avoir alors que quatre ans au plus. Car il étoit né l'an de Rome 660, & Drusus, chez qui cette scene se passe, étoit mort l'an de Rome 663, & la guerre des Marfes dont ce Popædius fut général, commencée cette même année 663, avant J. C. 91.

374. CATON D'UTIQUE.

parens, qui faisant le festin de sa nativité y convia plusieurs enfans, & entre autres Caton. Ces enfans ne sachans que faire en attendant que le soupper fust prest, se meirent à jouer pesse messe grands & petits, en quelque endroit reculé de la maison : leur jeu estoit de représenter les plets, en s'accusant les uns les autres, & de mener en prison ceux qui estoient condamnés : si y eut un de ceux que lon avoit condamnés, beau jeune enfant, qui fut emmené en une petite chambrette, par l'un des plus grands garçons. L'enfant se voyant enfermé, se prit à crier en appellant Caton : lequel se doubtant bien que c'estoit, y courut incontinent, & repoussant à force ceux qui se mettoient au devant de luy pour l'empescher d'entrer dedans la chambre, len tira l'enfant & l'emmena quant & luy, tout courroucé en sa maison, & les autres enfans le suivirent aussi.

V. Si estoit Caton tant renommé entre les jeunes enfans, que Sylla voulant faire le jeu de la monstre & course des enfans à cheval, que les Romains appellent Troye², & les-dresser devant, à fin qu'ilz fussent plus adroits au jour de la monstre, ayant assemblé tous les jeunes enfans de noble maison, il leur donna deux

² Voyez-en la description au cinquieme livre de l'Enéide de Virgile, depuis le vers 545 jusqu'au vers 603.

capitaines, desquelz les enfans acceptèrent l'un à cause de sa mere, qui estoit Metella, femme de Sylla : mais ilz ne voulurent point de l'autre, combien qu'il fust nepveu du grand Pompeius, & s'appelloit Sextus, ny ne voulurent s'exerciter soubz luy, ny le suyvre. Parquoy Sylla leur demanda lequel ilz vouloyent donques : & ilz crièrent tous, Caton : & Sextus mesme de son bon gré luy ceda cest honneur, comme au plus digne.

VI. Or avoit esté Sylla amy de leur pere, à l'occasion dequoy il les envoyoit aucunesfois querir & parloit à eulx, laquelle caresse il faisoit à bien peu de gens pour la magnificence & la hautesse du magistrat qu'il tenoit, & de la puissance qu'il avoit. Et Sarpedon estimant que cela estoit de grande consequence, pour l'avancement & aussi pour la seureté de ses disciples, menoit ordinairement Caton au logis de Sylla, pour luy faire la cour : mais son logis en ce temps là ressembloit proprement à voir un enfer ou une geole, pour le grand nombre de prisonniers que lon y menoit, & que lon y gehennoit ordinairement. Caton estoit desja au quatorzieme an de son aage, & voyant que lon apportoit leans des testes que lon disoit estre de personages notables, de forte que les assistens souspiroyent & gemissoient de les voir : il demanda à son

maistre, comment il estoit possible qu'il ne se trouvast quelque homme qui tuaist ce tyran là :
 « Pource , luy respondit Sarpedon , que tous
 » le craignent encore plus qu'ilz ne le haïssent ».
 « Que ne m'as tu donques, repliqua il , baillé
 » une espée à fin que je le tuasse, pour delivrer
 » nostre païs d'une si cruelle servitude » ? Sarpedon oyant ceste parole , & voyant son visage & ses yeux pleins de fureur de cholere , se trouva bien estonné , & eut depuis l'œil bien soigneusement sur luy , & le garda de près, de peur que temerairement il n'attentast quelque chose à l'encontre de Sylla.

VII. Mais estant encore petir enfant, quelques uns luy demanderent, qui estoit celuy qu'il aimoit le plus. Il respondit, son frere : & comme l'autre continuaist à luy demander, qui après : il respondit semblablement , son frere : & qui le troisieme, son frere encore : jusques à ce que celuy qui l'interroguoit fut las de luy demander tant de fois. Et quand il fut en aage , alors il confirma par effect ceste amitié envers son frere : car il avoit vingt ans , que jamais il n'avoit souppé sans son frere Cæpion : jamais ne fust fortý du logis pour aller sur la place , ny aux champs , sans luy : mais si d'aventure son frere se faisoit quelquefois huyler d'huyles de parfum , jamais luy n'en prenoit : & estoit en tout le reste

de son vivre ainsi austere & severe, tellement que son frere Cæpion, qui estoit loué de chacun, pour la temperance, honnesteté & sobriété de sa vie, confessoit qu'il estoit voirement sobre & temperant à comparaisson des autres : « Mais » quand, disoit il, je viens à comparer ma façon » de vivre à celle de Caton, il m'est alors ad- » vis que je ne suis point different d'un Sippius ». Ce Sippius estoit en ce temps là, un qui pour sa delicatesse, & sa maniere de vivre trop molle & effeminée, estoit monstre au doigt.

VIII. Depuis ayant esté Caton eleu presbtre d'Apollo, il se departit d'avec son frere, & eut son partage des biens de leur pere, qui monta à la somme de ² six vingts talents : & alors encore referra il plus que jamais sa maniere de vivre, & s'accointa de Antipater Tyrien, philosophe stoïque, s'addonnant principalement à l'estude de la philosophie morale & politique, & embrassant l'exercice de toute vertu, avec une si grande affection, qu'il sembloit proprement qu'il y fust poulsé par quelque divine inspiration : mais sur toute autre vertu, il aimoit la severité de justice, qui ne feschit, ny pour grace, ny pour faveur quelconque. Il estudia aussi & s'exercita à l'eloquence, pour pouvoir parler en public devant le peuple, vou-

² Soixante & douze mille escus. Amyot. 560,250 livres de notre monnoie.

lant qu'en la philosophie civile, ne plus ne moins qu'en une grosse cité, il y eust des forces entretenues pour la guerre : toutefois il ne s'exercitoit point en presence d'autres, ne n'y avoit jamais personne à l'ouyr harenguer quand il s'apprenoit : ains comme quelqu'un de ses amis l'admonestast un jour, que lon trouvoit mauvais ce qu'il parloit si peu en compagnie : « C'est » tout un, respondit il, pourveu qu'ilz ne puissent » reprendre ma vie : je commenceray à parler, » quand je sçauray dire choses dignes de non » estre teuës ».

IX. Or y avoit il tout joignant la place un palais public, que lon appelloit vulgairement Basilica Porcia, pource que Porcius Caton¹ l'avoit fait bastir durant le temps de sa censure : là souloyent les tribuns du peuple tenir leur audience : & pour autant qu'il y avoit une coulonne qui empeschoit les sieges de leur parquet, ilz la vouloyent oster du tout, ou la remuer de là ailleurs. Cela fut la premiere cause de faire aller Caton malgré luy sur la place, & de monter sur la tribune aux harengues pour leur contredire, là où ayant donné ce premier essay de son eloquence & de sa magnanimité, il en fut grandement estimé, pource que son langage n'avoit rien de fard, ny d'affetterie de jeunesse, ains

¹ L'ancien, dont on a déjà lu la Vie au tome III.

estoit roide , plein de sens & de vehemence : & neantmoins parmy la brieveté de ses sentences , y avoit une grace , qui donnoit plaisir aux escoutans ; & son naturel se monstrant à travers grave & venerable leur apportoit ne sçay quoy de affection agreable , qui les convioit à rire. Sa voix estoit pleine , forte , & suffisante pour fournir à se faire ouyr d'un si grand peuple , & si avoit une vigueur & fermeté telle ; qu'elle ne se rompoit , ny ne s'esclattoit jamais : car souvent il estoit tout un jour sans cesser de parler , & si ne s'en lassoit point.

: X. Mais pour lors ayant gagné son procès à l'encontre des tribuns , il se remeit de rechef à garder estroittement silence , & à endurcir sa personne aux laborieux exercices du corps , s'accoustumant à supporter les chaleurs , les froidures & la neige sans couvrir sa teste , & aller en tout temps à pied par les champs , là où ses amis qui l'accompagnoient , alloyent à cheval , & luy s'approchoit tantost de l'un , tantost de l'autre ; pour deviser en allant avec eulx. Il avoit aussi une merveilleuse patience & continence en ses maladies : car quand il avoit fievre , il demouroit seul tout le long d'un jour , & ne souffroit que personne l'allast visiter jusques à ce qu'il sentist un certain changement de sa maladie , & asseuré retour en convalescence. Quand il soup-

poit avec ses familiers & privez amis, ilz tiroient au fort à qui choisiroit les parts, & si le fort de choisir ne luy escheoit, ses amis neantmoins luy deferoient l'honneur de choisir : mais il ne le vouloit pas faire, disant qu'il n'estoit pas raisonnable, puis qu'il n'aggreoit pas à la deesse² Venus.

XI. Et du commencement il n'aima pas à tenir longuement table, ains après qu'il avoit beu une fois seulement il se levoit : mais depuis il apprit à y demourer fort longuement, de sorte que bien souvent il y demouroit avec ses amis toute la nuit jusques au matin, dont ses familiers disoyent que les affaires & occupations pour la chose publique estoient cause, pource qu'il y vacquoit tout le long du jour, à raison dequoy n'ayant pas loisir d'estudier, quand la nuit estoit venue il prenoit plaisir à conférer & disputer avec les gens de lettres & les philosophes à la table : parquoy, comme quelquefois en une compagnie, Memmius eust dit que Caton ne faisoit que yvrongner toutes les nuits, Ciceron prenant la parole luy respondit, « Tu n'y adjoustes pas, que tout le long du jour il ne fait que jouer au dez ».

² C'estoit pource que le fort se tiroit avec des osselets, lesquels quand ilz se trouvoient avec le VI dessus, le sect s'appelloit Venus.
Amyot.

XII. En somme, Caton estimant que les meurs & façon de vivre de son temps estoient si corrompues, & avoyent si grand besoing de mutation, que pour aller droit il falloit tenir un chemin du tout contraire en toutes choses, pource qu'il voyoit que la pourpre la plus rouge & de plus haulte couleur, estoit en plus grand prix & plus en requeste, luy au contraire aimoit à en porter de tirante sur le noir : & bien souvent après le dîner sortoit en public sans souliers les pieds nuds, & sans faye, non qu'il cherchast gloire par telles nouvelletez, mais pour s'accoustumer à avoir honte des choses vergongneuses de soy & deshonestes seulement, & à mespriser celles qui n'estoyent reprouvées que par opinion des hommes. Et luy estant advenue une succession de cent talents par la mort d'un sien cousin qui s'appelloit Caton comme luy, il la reduisit toute en argent comptant pour en prester à qui en auroit affaire de ses amis, sans en prendre usure : & y en avoit qui engageoyent pour leurs propres affaires au public ses terres & possessions, ou ses esclaves, que luy mesme leur donnoit pour engager, ou bien confirmoit l'engagement puis après.

XIII. Au reste quand il pensa estre arrivé à l'aage de se devoir marier, il fiança Lepida, n'ayant jamais cogueu femme auparavant. Ceste

Lepida avoit premierement esté promise & fiancée à Metellus Scipion : mais il la quitta depuis , & en fut le contract rompu , tellement qu'elle estoit toute libre quand Caton la fiança : toutefois avant qu'il l'espousast , Scipion se repentit de l'avoir refusée , & fit tout ce qu'il peut pour la ravoit , & l'eut de fait : dequoy Caton fut si fort indigné & courroucé , qu'il fut entredeux de l'en poursuyvre par justice : mais ses amis l'en destournerent. A ceste cause pour contenter un peu sa cholere & l'ardeur de sa jeunesse , il se mit à escrire des vers iambiques à l'encontre de Scipion , ès quelz il luy dit toutes les injures qu'il peut , usant bien de l'aspreté & amertume qui est ès vers d'Archilochus , mais non pas des impudiques , sales , ny aussi pueriles reproches qui y sont. Depuis il espousa Attilia fille de Soranus , & fut celle qu'il cogneut la premiere , mais non pas seule , comme avoit fait Lælius l'amý de Scipion , qui fut plus heureux en cela , d'autant qu'ayant vescu longuement , jamais il ne cogneut autre femme que celle qu'il espousa premierement.

XIV. Au demourant la guerre servile , autrement appellée la guerre de Spartacus estant esmeuë , il y eut un Gellius qui fut esleu prateur pour la conduite d'icelle , soubz lequel fut Caton de son bon gré seulement pour l'amour de son

frere Cæpion, lequel avoit en celle armée charge de mille hommes de pied : si ne peut pas Caton y monstrier son affection de bien faire, ny y employer sa vertu, comme il eust bien voulu, pour la faulte & l'insuffisance du chef qui conduisoit mal les affaires : mais neantmoins se monstrant parmy les delices effeminées & la dissolution trop molle de ceulx qui estoient en ce camp là, homme réglé en tous ses faicts, hardy où il estoit besoing, asseuré par tout, & homme de bon sens, il fut estimé de tous n'estre de rien moindre que l'ancien Caton, à raison dequoy le præteur Gellius luy ordonna plusieurs honneurs & prix de vaillance, que lon a accoustumé de decerner aux gens de bien, lesquels toutefois il ne voulut pas recevoir, disant qu'il ne s'estoit rien fait digne de telz honneurs. Ces choses le faisoient trouver homme estrange : & davantage ayant esté faite une ordonnance, par laquelle il estoit defendu à ceulx qui briguoient quelques estats de la chose publique, qu'ilz n'eussent ès assemblées aucuns protocollés pour leur souffler aux oreilles les noms des particuliers citoyens, luy seul poursuyvant un estat de capitaine de mille hommes de pied, obeït à l'ordonnance, s'estudiant de retenir en sa memoire les noms de tous les particuliers citoyens, pour les nommer & saluer tous par leurs noms,

de sorte qu'il en estoit facheux à ceulx mesmes qui le louoyent : car d'autant que plus ilz connoissoyent combien estoient louables les choses qu'il faisoit, d'autant s'ennuyoyent ilz plus de ce qu'ilz ne les pouvoyent imiter.

XV. Ainsi estant eleu capitaine de mille hommes, il fut envoyé en la Macedoine devers le præteur Rubrius, & dit on qu'à son partement sa femme estant dolente & explorée de le voir en aller, il y eut un de ses amis Munatius qui luy dit, « Ne te soucie, Attilia, ne plore point, » car je te promets que je te garderay bien ton » mary ». C'est bien dit, respondit Caton. Puis quand ilz furent à une journée de Rome, après soupper il se prit à dire à ce Munatius. « Il » fault que tu regardes de tenir la promesse que » tu as faite à Attilia, que tu me garderois » bien : & pource ne m'abandonne ne nuit ne » jour » : & commanda à ses gens que de lors en avant ilz dressassent tousjours deux lits en sa chambre pour y faire coucher Munatius, qui estoit luy mesme plus tost gardé en jouant par Caton, que Caton par luy. Il menoit quant & luy quinze serviteurs, deux affranchis & quatre de ses amis, lesquelz alloyent à cheval, & luy cheminoit à pied, s'approchant tantost de l'un, & tantost de l'autre, pour deviser par le chemin avec eulx. Arrivé qu'il fut au camp, où il y
avoit

avoit plusieurs legions Romaines, le præteur luy donna incontinent la charge de l'une. Si pensa lors que c'estoit chose legere, non pas royale ny magnifique de se monstrer seul vertueux, attendu qu'il n'estoit qu'une seule personne: mais il s'estudia de rendre tous ceulx qui estoient soubz sa charge, semblables à luy. Pour à quoy parvenir, il ne leur osta pas la crainte de son autorité, mais il y adjousta la raison, en leur remonstrant & les instruisant sur chaque point, accompagnant tousjours neantmoins ses remonstrances de remuneration de ceulx qui faisoient bien, & de punition de ceulx qui faisoient mal: de maniere que lon n'eust sceu dire s'il les avoit rendus plus paisibles, ou plus aguerris, plus vail-lans, ou plus justes, tant ilz se monstroyent à l'es-preuve rudes & aspres aux ennemis, & doux & gracieux aux amis, traintifs à mal faire, & prompts à acquerir honneur: dont il advint, que ce dequoy il se soucioit le moins, fut ce qu'il y gagna le plus, c'est à sçavoir, gloire avec amour & bienvueillance: car les souldards l'honorèrent souverainement, & l'aimerent singulierement, pourautant que luy mesme mettoit le premier la main à faire ce qu'il commandoit, & qu'il s'egalait en son vestir, en son vivre ordinaire, en son cheminer par les champs, plus tost aux simples souldards, que non pas aux capi-

taines : & , au contraire , en gentillesse de nature , grandeur de courage , vehemence & efficace de parole , surmontoit rous ceulx qui se faisoient appeller colonnelz & capitaines. Car le vray zele de la vertu , c'est à dire , l'affection de l'imiter , ne s'imprime point ès cueurs des hommes , sinon avec une singuliere bienvueillance & reverence du personnage qui en donne l'impression : mais ceulx qui louent les hommes vertueux sans les aimer : ceulx là reverent bien leur renommée , mais ilz ne portent point d'affection à leur vertu , ny n'ont cure de l'imiter.

XVI. Environ ce temps Caton estant adverty que Athenodorus surnommé Cordylion , personnage qui avoit longuement versé en l'estude & profession de la philosophie stoïque , se renoit pour lors en la ville de Pergamum , estant ja vieil , & ayant rousjours obstineement refuzé de s'aller tenir à la cour des seigneurs , des princes & des roys qui avoyent recherché de l'avoir auprès d'eulx , il pensa bien , que de luy escrire pour le faire venir devers luy , ce seroit peine perdue : parquoy ayant par les ordonnances Romaines , vacation de deux mois , durant lesquelles il pouvoit estre absent du camp pour ses propres affaires , il monta sur mer pour aller en Asie le trouver , se confiant qu'il viendroit à bout de

ceste chafse pour les grandes & vertueufes qualitez qu'il fentoit en foy. Si parla à luy, difputa & combatit de raifons tellement avec luy, que finablement il le tira hors de fa refolution, & l'emmena au camp quant & luy, fe refjouiffant plus de cefte victoire, & l'eftimant plus que toutes les conquelftes de Lucullus, ny celles de Pompeius, qui alloient lors fubjugans par armes toutes les provinces & royaumes de l'Orient.

XVII. Mais comme il eftoit encore en cefte charge de capitaine de mille hommes, fon frere fe preparant pour faire un voyage en Afie, rumba malade en la ville de *Ænus*¹ au païs de Thrace, dont il fut incontinent adverty par lettres, & tout foudain, encore qu'il feift fort mauvais & rude temps fur la mer, & qu'il ne peuft promptement trouver de vaiffeau aflez grand pour faire ce voyage feurement, il s'embarqua deffus une petite navire marchande de Theffalonique² avec deux de fes amis & trois ferveurs feulement, & s'en fallut bien peu qu'il ne fust noyé par la tormente : toutefois eftant à la fin efchappé par eſtrange adventure, il arriva un peu après que fon frere fut trespaffé : la mort duquel il porta un peu plus impatiemment qu'il ne fembloit eſtre

¹ Autrefois appellée Abſynthe, auprès de l'embouchure orientale de l'Ebre, dans le canon des Ciconiens.

² Dans la Macédoine fur le golfe Thermaïque.

convenable à un philosophe : ce qu'il monstra ; non seulement par le grand dueil qu'il en mena , & les regrets & lamentations qu'il en feit , en embrassant le corps mort , & la grieve douleur qu'il en porta en son cueur , mais aussi par la despenſe superflue qu'il feit à ses funerailles en parfums , drogues odorantes , & sumptueux draps qui furent bruslez avec le corps , & aussi en la structure & fabrique de son monument , qu'il luy feit faire de marbre Thassien ¹ sur la grande place des Æniens , & cousta la somme de huit talents ². Il y en avoit qui calumnioient ceste despenſe , veu sa sobriété & simplicité en toute autre chose , ne considerans pas jusques au fond la naïve bonté & charité envers les siens , qui estoit en luy meslée parmy sa roideur ferme & dureté inflexible à l'encontre des voluptez , des craintes , & des prieres illicites & des-honestes. Plusieurs villes , princes & seigneurs luy envoyerent adonc force presens pour honorer les funerailles de son frere , mais il ne prit argent de pas un , ains seulement espiceries & drogues odorantes , & paremens dont on honore les obseques des trespassez , encore en paya il la valeur à

¹ De l'île de Thafos près la côte méridionale de la Thrace. Ce marbre de plusieurs couleurs étoit alors fort estimé.

² Quatre mille huit cents escus. *Amyot.* 37,350 livres de notre monnoie.

CATON D'UTIQUE. 389

ceulx qui les avoyent apportées, sans qu'il vou-
lust neantmoins mettre en ligne de compte pas
un denier de tous les frais qu'il feist à cest enterre-
ment, au partage de la succession de son frere,
qui l'avoit institué son heritier pour egale por-
tion, avec une siene petire fille : ce nonobstant,
quoy qu'il eust fait, & qu'il feist toutes ces choses,
encore y eut il quelqu'un ² qui escrivit, qu'il
passa & coula par un tamis les cendres du feu,
où le corps de son frere avoit esté consumé, pour
en retirer l'or & l'argent fondu : ainsi croyoit
il que lon ne deust non plus contreroller ny syn-
diquer ce qu'il avoit escript avec la plume, que
ce qu'il avoit fait avec l'espée.

XVIII. Mais après que le temps de sa charge
fut expiré, Caton au partir du camp fut con-
voyé non seulement avec louanges, & vœux &
prieres aux dieux pour son salut, ce qui est ordi-
naire, ains avec embrassemens, larmes & pleurs
infinis des souldards, qui estendoyent leurs veste-
mens par terre là où il devoit passer, & luy
baïsoyent les mains, ce qui estoit un honneur
que les Romains alors faisoient à bien peu de
capitaines generaux. Er voulant avant que s'en
retourner à Rome pour se remettre aux affaires,
aller visiter le país de l'Asie, en partie pour

² Cela semble se devoir entendre de César, en son livre qu'il ap-
pella *Anticato*. Amyot.

voir à l'œil les meurs, les coustumes & les forces de chacune province, & en partie aussi pour gratifier en cela au roy Dejotarus, qui ayant esté hôte & amy de son pere, l'avoit fort requis & prié de l'aller voir en son païs, il se meit en chemin, & fait le voyage en ceste maniere : Il envoyoit devant dès le matin au point du jour son boulenger & son cuisinier au lieu où il devoit aller coucher, lesquelz entrans dedans la ville ou village simplement & modestement, s'enqueroient s'il y avoit point quelque hôte, amy ou cognoissant de Caton, & s'ilz n'y en trouvoient point, alors ilz luy apprestoient son logis en l'hostellerie, sans en empescher personne : & s'il n'y avoit point d'hostellerie, alors ilz s'adressoyent aux magistrats & officiers du lieu, ausquelz ilz demandoient logis, & se contentoient du premier qu'on leur bailloit : mais bien souvent on ne croyoit pas qu'ilz fussent serviteurs de Caton, & n'en faisoit on point de compte, pource qu'ilz ne menoyent point de bruit, & ne menaçoient point les officiers, tellement que Caton arrivoit quelquefois qu'il n'y avoit encore rien de prest : & quand luy mesme estoit arrivé, encore en faisoit on moins de compte, pource que lon le voyoit assis dessus son bagage sans dire mot, & pensoit on que ce devoit estre quelque homme de basse & petite

qualité, craintif & de petit cueur : toutefois il les appelloit aucunesfois, & leur remonstroit en leur disant, « O pauvres gens, apprenez à estre » plus courtois à recevoir les Romains passans : » ce ne seront pas tousjours des Catons qui » passeront par voz terres, & pourtant advisez » à leur faire tant de courtoisie, & si gracieux » traitement, que vous rabbatiez la poincte de » la licence qu'ilz auront sur vous : car il y en » aura beaucoup qui ne demanderont pas mieulx » que d'avoir quelque couleur pour vous oster » par force ce qu'ilz voudront avoir, comme si » vous ne leur aviez pas voulu de gré offrir & » bailler ».

XIX. Auquel propos on conte, qu'en la Syrie il luy advint un cas pour rire. Ce fut qu'en arrivant à Antioche, il trouva devant la porte de la ville grande multitude de gens mespartis en deux rens deçà & delà de la rue : les jeunes hommes à part, vestus de beaux manteaux, & les enfans à part aussi en belle ordonnance, & y en avoit d'autres vestus de belles robes neuves, portans chapeaux de fleurs sur leurs testes, qui estoient les presbtres ou les officiers de la ville. Caton pensa incontinent que ce fust la ville qui eust fait faire ceste procession pour l'honorer, & en sçavoit desja fort mauvais gré à ses gens qu'il avoit envoyez devant, pource qu'ilz n'a-

voyent pas empesché que cest appareil ne se feist. Si feit descendre ses amis, qui l'accompagnoyent, à pied pour marcher quant & luy : mais quand ilz furent tout auprès de la porte de la ville, le maistre des cerimonies qui conduisoit toute ceste entrée, & qui tenoit toute ceste multitude en ordonnance, homme ja tirant sur l'aage, tenant en sa main une verge & une couronne, s'adressa à Caton devant les autres, & sans le saluer, seulement luy demanda, là où ilz avoyent laissé Demetrius, & quand il arriveroit. Ce Demetrius avoit esté serf de Pompeius, & pourautant que tout le monde lors jettoit les yeux sur le maistre, le serviteur en estoit aussi honoré & caressé plus qu'il ne meritoit, à cause du credit qu'il avoit à l'entour de son maistre. Les amis de Caton oyans cela, s'en prirent si fort à rire, qu'ilz ne se pouvoyent pas contenir en passant à travers la multitude de ceste procession : mais Caton en ayant fort grande honte, ne feit que dire sur l'heure, « O malheureuse ville » ! & non autre chose. Mais depuis quand il le comptoit à d'autres, ou qu'il y pensoit tout seul, il s'en prenoit luy mesme à rire.

XX. Toutefois Pompeius redressa bien ceulx qui par ignorance failloyent ainsi à honorer Caton. Car estant arrivé en la ville d'Ephese, Caton alla devers luy pour le saluer, comme celuy qui

estoit plus aagé & en plus grande dignité & plus grande reputation que luy, & qui lors commandoit à une très grosse & très puissante armée: mais Pompeius l'ayant apperceu de tout loing, n'attendit pas qu'il vinst jusques à luy, ny ne demoura pas assis en son siege, ains se levant de bout, luy alla au devant comme à l'un des principaulx personnages de Rome, & le prenant par la main après l'avoir salué & embrassé, dit sur l'heure de grandes louanges de sa vertu en sa présence, & encore davantage en son absence, après qu'il se fut retiré, de sorte que depuis tout le monde en fait grand compte, & l'eut on en merveilleuse estime pour les mesmes choses qui au paravant le faisoient mespriser, quand on vint à considerer de près sa clemence & sa magnanimité: joint que les assistens cogneurent bien evidemment, que le bon recueil que Pompeius luy faisoit, estoit caresse d'homme qui le reveroit & observoit par une maniere de devoir, plus qu'il ne l'aimoit, & apperceurent facilement qu'il luy portoit bien grand honneur tant qu'il fut auprès de luy, mais neantmoins qu'il estoit bien aise de quoy il s'en alloit: car il s'efforceoit de retenir tous les jeunes gentilzhommes Romains qui l'alloyent voir, & desiroit qu'ilz demourassent auprès de luy: mais il n'en pria nullement Caton, ains comme si luy

present, il eust pensé avoir un syndique, qui luy eust contrerollé son autorité, il fut bien aise de le laisser aller, luy recommandant sa femme & ses enfans, ce qu'il n'avoit encore fait à nul de ceulx qui s'en retournoient à Rome : il est bien vray qu'aussi luy appartenoit il de quelque parenté. Depuis, toutes les villes par où il passa, s'estudierent à l'envy les unes des autres, à qui luy feroit plus d'honneur, & luy faisoit on partout banquets & festins, ès quelz il prioit ses amis d'avoir l'œil & prendre garde à luy, s'il confirmoit point un propos, que luy avoit dit autrefois Curion, lequel se sachant de voir Caton, qui estoit son amy & son familier, ainsi austere, luy demanda un jour, s'il avoit point de volonté d'aller voir le país d'Asie, après que le temps de sa charge seroit expiré. Caton luy fait response, qu'il en estoit bien delibéré. « Tu feras » fort bien, luy repliqua Curion : car tu en retour- » neras un peu plus gay & plus apprivoisé, que » tu n'es ». Car il luy usa d'un terme Romain, qui signifie proprement cela.

XXI. Au demourant Dejotarus roy de la Galatie, estant desja fort vieil, l'envoya semondre de le aller voir en son país, pour luy re commander ses enfans & sa maison : en laquelle si tost qu'il fut arrivé, ce roy luy fit de beaux & riches presens de toutes sortes, le priant &

solicitant par tous moyens de les prendre. Cela despleut tant à Caton, & l'irrita si fort, que y estant arrivé le soir, après y avoir demouré un jour seulement, il s'en partit le lendemain dès les trois heures du jour : mais il n'eut pas fait une journée, qu'il trouva en la ville de Pessinunte ¹ d'autres presens encore plus grands qui l'attendoient avec des lettres de Dejotarus, par lesquelles il le prioit bien instamment de les accepter : & s'il n'en vouloit point, à tout le moins qu'il permist à ses amis de les prendre, attendu qu'ilz le valoyent & le meritoient bien pour toutes raisons, mais spécialement pour l'amour de luy, de tant plus mesmement que ses biens n'estoyent point si grands, qu'il peust suffire à tous ses amis. Toutefois jamais Caton ne leur voulut permettre non plus que devant, qu'ilz en acceptassent rien, encore qu'il apperceust bien qu'il y en avoit aucuns d'entre eulx amolliz de desir, & se plaignans de ce qu'il ne leur en laissoit prendre : car il leur remonstra, que jamais autrement la corruption & concussion n'auroit faulte de quelque honeste couverture & couleur de prendre : & au demourant que ses amis auroient tousjours part aux biens qu'il possederait justement. Ainsi renvoya il à Dejotarus tous ses

¹ Ville de la province d'Asie appelée Galatie ou Gallo-Grèce, près du fleuve Sangar.

presens. Et comme il fut prest à s'embarquer pour repasser à Brundisium, il y eut quelques uns de ses amis qui l'admonesterent qu'il valoit mieulx mettre les cendres & les os de son frere Cæpion dedans un autre vaisseau : mais il leur fit responce qu'il laisseroit plus tost sa propre vie, que de laisser ces reliques là : & incontinent se meit à la voile, là où lon dit qu'il passa en très grand danger, & les autres vaisseaux eurent assez commode traverse.

XXII. Retourné qu'il fut à Rome, il estoit tousjours ou en sa maison à conferer de la philosophie avec le philosophe Athenodorus, ou sur la place à faire plaisir à ses amis. Puis quand son temps fut echeut de demander un estat de quæsteur, jamais il ne se meit à le demander, que premierement il n'eust leu diligemment les edicts & ordonnances concernantes le faict & l'office d'un quæsteur, & qu'il n'eust particulièrement enquis sur tous les poincts, ceulx qui en avoyent plus longue experience, pour sçavoir en somme quelle estoit la puissance & l'autorité dudit office. Si ne fut pas plus tost installé en l'estat, qu'il y introduisit une grande mutation quant aux clerks & ministres de l'espargne, lesquelz ayans tousjours entre leurs mains les papiers & registres des comptes, & les edicts sur le faict des finances, & puis ayans à besongner ordinairement soubz

de jeunes hommes, que lon elisoit à ces offices de quæsture, qui avoyent eulx mesmes pour leur ignorance & faute d'experience, plus tost besoing de maistres qui les enseignassent, que de suffisance pour redresser les autres, ilz ne leur cedoyent point en autorité, ains estoyent eux mesmes les magistrats, jusques à ce que Caton prenant à bon esciant les matieres à cueur, & ne se contentant pas d'avoir le tiltre & l'honneur de magistrat seulement, ains en ayant aussi le sens, le cueur & la parole, voulut que les clerks & greffiers se portassent pour telz qu'ilz estoyent, c'est à sçavoir, ministres des magistrats seulement, leur monstrant & verifiant des meschancetez qu'ilz commettoient en leurs estats, & leur enseignant les fautes qu'ilz faisoient par ignorance. Mais en voyant aucuns audacieux & superbes, qui alloyent flattant & gaignant les autres quæsteurs pour luy resister, il en feit condamner le principal d'entre eulx, de male foy commise au partage d'une succession entre des coheritiers, & consequemment le feit priver de jamais pouvoir exercer charge aucune de finances.

XXIII. Il en meit aussi en justice un autre, le chargeant de falsification de testament, & Catulus Luctatius se trouva en jugement pour le defendre, estant pour lors censeur, & au demourant personnage de très grande dignité, non

seulement pour l'autorité du magistrat qu'il tenoit, mais beaucoup plus pour sa propre vertu, pource qu'il estoit tenu pour l'un des plus justes & des plus hommes de bien qui fust de son temps à Rome, & si estoit l'un de ceulx qui plus hault louoyent Caton, & le hantoit volontiers pour l'honesteté de sa vie : & voyant qu'il ne pouvoit defendre son homme par raison, il requit ouvertement, que lon luy pardonnast pour l'amour de luy. Caton ne le voulut pas permettre : mais comme il en feit encore plus chaulde instance, il luy dit adonc franchement, « C'est une honte à toy, Catulus, attendu » que tu es censeur, qui devrois rigoureusement » examiner noz vies, de te laisser ainsi jeter » hors du devoir¹ de ton office, pour gratifier » à noz ministres ». Caton ayant prononcé ceste parole, Catulus le regarda bien, comme pour luy respondre, mais neantmoins il ne luy dit rien, ains fust ou de courroux, ou de honte, s'en alla tout confus, sans mot dire. Toutefois l'accusé ne fut pas condamné, car il se rencontra que les voix des juges qui le condamnoient, estoyent une de plus que celles qui l'absolvoient : mais Marcus Lollius, l'un des compagnons de Caton en la quæsture, n'ayant peu assister au procès, à cause qu'il s'estoit trouvé malade, Ca-

¹ Grec, de s'exposer à te faire chasser par nos sergens.

rulus envoya devers luy, le supplier d'y venir pour aider à ce pauvre homme : & luy s'y faisant porter dedans une litiere, après le jugement, donna la dernière voix, qui l'absolut judiciairement : toutefois jamais Caton ne voulut qu'il servist depuis de greffier, ny ne luy souffrit pas payer ses gages, & qui plus est ne voulut pas compter la voix de Lollius entre les autres.

XXIV. Ainsi ayant rabaislé l'audace des greffiers, scribes & clerks des finances, & les ayant rengez à la raison, il eut tous les registres & papiers à sa volonté dedans peu de temps, pour en faire à son plaisir, & rendit la chambre des comptes plus venerable & plus revercée que le senat mesme, de maniere que tout le monde estoit d'avis, & disoit, que Caton avoit adjousté à la quæsture la dignité de consulat. Car trouvant que plusieurs particuliers estoient du passé redevables à la chose publique, & la chose publique aussi à quelques particuliers, il donna ordre qu'elle ne feist plus de tort à personne, & que personne aussi ne luy en peust plus faire, contraignant roidement ceux qui devoient, de payer, & payant aussi promptement & volontairement à ceulx à qui il estoit deu : tellement que le peuple mesme avoit honte de voir payer aucuns qui s'attendoient bien de ne payer jamais rien, & à l'opposite aussi rembourser d'autres qui

ne cuidoyent jamais rien avoir de leurs debtes. Davantage plusieurs au paravant apportoyent au bureau des quaſteurs, des lettres & acquits autrement faiçts qu'ilz ne devoyent : & bien ſouvent ſes predeceſſeurs avoyent accouſtumé de recevoir par grace & par prieres, des mandemens tous fauls : mais durant ſa quaſture, jamais il ne paſſa rien de ceſte ſorte : car eſtant un jour en doubte d'un mandement qui luy fut preſenté, à ſçavoir ſ'il eſtoit vray & valable, encore que pluſieurs teſmoignaſſent que ouy, il n'en voulut jamais rien croire ny l'admettre, juſques à ce que les conſuls eulx meſmes en perſonne ſeuſſent venus teſmoigner & jurer qu'il avoit ainſi eſté ordonné.

XXV. Or y avoit il pluſieurs à qui Lucius Sylla en ſa ſeconde proſcription avoit donné ^x douze mille drachmes d'argent pour teſte de chaque citoyen proſcript qu'ilz avoyent occis de leurs propres mains, leſquelz eſtoient bien haïs & mauldicts de tout le monde, comme meurtriers & excommuniez, mais toutefois perſonne ne leur oſoit courir ſus pour en faire la vengeance : Caton les appella tous en juſtice, comme detenans injuſtement l'argent de la choſe publique, & les contraignit de le rendre, leur reprochant en cour-

^x Douze cents eſcus. Amyot. 9,337 livres 10 ſols de notre monnoie.

roux, non fans raison, la malheureté & meschanceté qu'ilz avoyent commise en cest endroit. Ilz n'eurent pas plus tost rendu cest argent, qu'ilz furent par autres accusez d'homicide : & comme estans ja condamnez par prejudice, au sortir d'un jugement, on les menoit droit en un autre, où ilz payoyent la peine qu'ilz avoyent meritée, au grand contentement & aise singuliere de tous les Romains, lesquelz estimoyent alors voir toute la tyrannie de ce temps là effacée, & Sylla mesme puny.

XXVI. Oultre cela estoit encore fort agreable au peuple la diligence & assiduité continuelle de Caton : pource qu'il estoit tousjours le premier venu au bureau des quæsteurs, & en partoit le dernier, fans jamais se lascher : jamais il ne failloit à pas une assemblée du peuple, ny à pas une congregation du senat, craignant, & ayant soigneusement l'œil à ce que legerement & par faveur on ne remeist quelque argent qui feroit deu à la chose publique, ou que lon n'otroyast rabais aux fermiers, ou que lon ne feist don d'argent, sinon à ceulx qui l'auroyent bien & justement merité. Ainsi ayant vuide & nettoyé de calumniateurs, & remply de deniers la chambre du tresor, il monstra que la chose publique pouvoit estre riche, fans grever ny faire tort à personne. Il est vray qu'au commencement

de ceste administration il fut ennuyeux à quelques uns de ses compagnons, pource qu'il leur sembla trop rude : mais à la fin il fut aimé de tous à cause qu'il se soubmettoit seul à souffrir toutes les crieries & malvueillances qui se levoient contre eulx : pource qu'ilz ne vouloyent pas laisser aller par faveur les deniers de la chose publique, & leur permettoit d'alleguer pour leur descharge & excuse envers ceulx qui les requeroient & importunoyent de prieres, qu'il leur estoit impossible de le faire contre la volonté de Caton.

XXVII. Et le dernier jour de son magistrat ayant esté reconvoyé par tout le peuple presque jusques en sa maison, il fut adverty que Marcellus estoit dedans la chambre du tresor, assiégué & enyironné de plusieurs de ses amis, personnes d'autorité, qui le pressoyent de faire enregistrer quelque don d'argent, comme estant chose deuë par le public. Ce Marcellus estoit son amy dès & depuis leur enfance, & faisoit très bien le deu de son office quand il estoit avec luy : mais quand il estoit seul, il se laissoit aller aux prieres de ceulx qui le requeroient, étant de si douce nature, qu'il avoit honte d'esconduire personne, & estoit trop prompt à concéder tout ce dont on le requeroit. Caton s'y en retourna tout court, & trouvant qu'il avoit par impor-

tunité fait enregistrer ceste donation, se fait apporter les registres, & l'effacee en sa presence; sans que l'autre dist un seul mot à l'encontre: puis cela fait, le reconvoya & accompagna jusques en sa maison, & ne se plaignit jamais; ny lors, ny onques depuis, de cest acte là, ains persevera tousjours en son amitié & familiarité comme devant.

XXVIII. Mais pour-estre hors de l'office de questure; il ne laissa pas la chambre du tresor sans guet ny garde: car il y faisoit tous les jours assister de ses serviteurs, lesquels redigeoyent par escript tout ce qui s'y passoit. Et luy mesme ayant recouvré pour le prix & somme de cinq talents ¹ des livres, esquelz estoit compris tout l'estat du revenu public & de l'administration d'iceluy, depuis le temps de Sylla, jusques à l'année de sa questure, il les avoit tousjours entre les mains, entrant tousjours au senat le premier, & en sortant le dernier. Et là bien souvent pendant que les autres senateurs s'assembloyent tout à loisir, il s'alloit seoir en quelque coing à part, & y lisoit tout bas en mettant sa robbe au devant, & jamais n'alloit aux champs es jours qu'il sçavoit qu'il y devoit avoir assemblée de senat.

XXIX. Depuis Pompeius & ses adherens;

¹ Trois mille escus. Amyot. 21, 343 liv. 15 sols de notre monnoie.

voyans qu'il estoit impossible de le forcer, & encore plus de le gaigner, à ce qu'il leur favorisast ès choses qu'ilz poursuyvoyent injustement, alloient espians les moyens de le distraire & divertir qu'il n'assistast au senat, en l'empeschant à defendre les causes de quelques siens amis, & à vacquer à quelques arbitrages, ou autres tels negoces : mais luy s'estant incontinent apperceu de leur aguet & embusche, il denoucea une fois pour toutes, à tous ceulx qui se vouloyent servir de luy, qu'il ne vacqueroit jamais à autres affaires quelconques ès jours que lon tiendroit le senat : car il n'estoit venu à s'entremettre des affaires de la chose publique pour s'enrichir, comme faisoient quelques autres, ny pour acquerir reputation, ny fortuitement & par cas d'aventure ; ains ayant par meure deliberation choisy l'entremise du gouvernement, comme le propre exercice d'un homme de bien, il estimoit estre tenu d'y vacquer & avoir l'œil plus soigneusement, que ne fait l'abeille à bastir ses goffres de cire où elle fait le miel : à l'occasion dequoy il mettoit peine de recouvrer par le moyen de ses hostes & amis, qu'il avoit en chacune province de l'empire Romain, les principaux actes, edicts, decret, sentences & jugemens plus notables des gouverneurs qui les regissoient.

CATON D'UTIQUE. 405

XXX. Il s'attacha une fois à publius Clodius ; seditieux harengueur , qui alloit suscitant & emouvant des commencemens de grandes nouvelles , en accusant envers le peuple les presbtres & les religieuses vestales , entre lesquelles Fabia Terentia sœur de la femme de Cicero fut appelée en justice : mais Caton ayant pris leur protection & defense , fit si grande vergoigne à leur accusateur Clodius , qu'il le contraignit de sortir hors de la ville : dequoy Ciceron luy rendant graces , Caton luy respondit que c'estoit à la chose publique à qui il en falloit rendre graces , à cause que c'estoit pour l'amour d'elle seule , qu'il disoit , faisoit & conseilloit toutes choses : à l'occasion dequoy il vint en telle reputation , que quelquefois en un plaidoyer où lon alleguoit la deposition d'un seul tesmoing , l'avocat plaidant pour la partie adverse , dit aux juges , qu'ilz ne devoient aucunement adjouster foy entiere au dire d'un seul tesmoing , quand bien ce seroit Caton mesme : & estoit ja un commun proverbe , quand on parloit de choses estranges & mal aisées à croire , de dire , « Cela n'est pas croyable , quand ce seroit Caton » mesme qui le diroit ». Et comme un jour au fenat quelque personnage de mauvaïse reputation , superflu & dissolu en despenſe , eust fait une longue harengue à la louange & recomman-

dation de sobriété ; temperance & espargne , il y eut un sénateur nommé Amnæus ; qui ne se peut tenir de luy dire , « Dea , mon amy , qui » penfes tu qui puisse plus avoir la patience de » t'ouyr ; veu que tu tiens table comme Crassus , » tu bastis comme Lucullus , & nous presches » comme Caton.¹ » ? Aussi appelloit on communement , par maniere de mocquerie , Catons , ceulx que lon voyoit graves & severes en paroles , & en faict desordonnez & vicieux.

XXXI. Plusieurs de ses amis l'incitoient & admonestoyent de demander l'office de tribun du peuple , mais , il n'en fat pas d'advjs pour lors , disant qu'il ne falloit pas employer ny despandre la puissance d'un tel magistrat & de si grande authorité , non plus que d'une forte medecine , sinon en temps & en choses necessaires ; & y ayant vacation publique d'affaires , il s'en alla à l'esbat en la Lucanie , où il avoit des maisons d'assez plaisant sejour , menant quant & luy force livres , & des philosophes pour luy tenir compagnie ; mais par le chemin il rencontra force somniers ; grande quantité de bédage , & un grand train de personnes ; il demanda que c'estoit , & on luy dit , que c'estoit Metellus Nepos , qui retournoit à Rome pour

¹ Dans la Vie de Lucullus , ce propos est attribué à Caton lui-même. Ch. LXXXI. Liv. II.

demander le tribunat. Si s'arresta tout court, & après avoir pensé un petit en soy mesme, commanda à ses gens qu'ilz retournassent en arriere. Dequoy ses amis estans esbahis, il leur respondit, « Ne sçavez vous pas, que Metellus » de soy mesme est à redoubter pour sa folie ? » & maintenant qu'il vient avec l'instruction de » Pompeius, il se ruera à travers les affaires, » comme fouldre qui gastera tout : à ceste cause » n'est il pas maintenant saison d'aller à l'esbat, » ny de se donner du bon temps, ains faut là » vaincre, ou mourir honorablement pour la » defense de la liberté ».

XXXII. Toutefois à la persuasion de ses amis, il alla premicrement un tour jusques à sa maison des champs, là où il n'arresta gueres, ains s'en retourna incontinent à Rome. Et y estant arrivé un soir, dès le lendemain matin il descendit sur la place, demandant & poursuyvant l'office de tribun du peuple, expressement pour resister aux entreprises de Metellus, à cause que ce magistrat là a beaucoup plus de puissance d'empescher, que de faire : car si tous les autres d'un accord avoyent arresté une chose ensemble, & qu'il y en eust un seul qui s'y opposast, le seul opposant l'emporteroit par dessus tous les autres. Or n'eut il pas du commencement grand nombre de ses amis autour de luy : mais quand on en-

tendit l'intention pour laquelle il faisoit lors ceste poursuytte, tous les gens de bien incontinent se rengèrent à ses costez, qui le confirmèrent en sa deliberation, & l'encouragerent de la poursuyvre, à cause qu'il ne faisoit pas tant pour soy, que pour la chose publique, de demander cest office en un tel temps, attendu que l'ayant peu obtenir par plusieurs fois sans difficulté, en temps où il n'y avoit point d'affaires, il ne l'avoit point voulu demander, ains s'estoit réservé à le poursuyvre lors qu'il falloit, non sans danger, combattre pour le bien de la chose publique, & pour la protection de la liberté. Si dit on, qu'il y eut si grande foule de gens qui vindrent pour luy assister à sa brigue, & de si chaude affection, qu'il en cuida estre estouffé, & ne pensa jamais arriver jusques sur la place, pour la presse du monde qui l'accompagnait.

XXXIII. Ainsi ayant esté déclaré tribun ¹ du peuple avec Metellus & d'autres, il apperçut que lon alloit marchandant & achetant des voix du peuple, quand on vint à l'élection des consuls, & fit une harangue, en laquelle il reprit & tenfa asprement le peuple pour ceste orde & sale marchandise, & à la fin d'icelle protesta avec serment, qu'il accuseroit & met-

¹ L'an de Rome 691, avant J. C. 63.

troit en justice celui qui autoit baillé argent pour se faire elire , exceptant Syllanus seul ; pource qu'il estoit son allié, ayant espousé Servilia , qui estoit sa sœur, car à celui là ne demanda il rien : mais il accusa , & se fit partie formelle contre Lucius Murena , qui par argent avoit tant fait , qu'il avoit obtenu le consulat avec Syllanus. Or y avoit il une ordonnance qui permettoit à l'accusé de donner garde à l'accusant pour voir ce qu'il proposeroit & dont il se vouldroit servir en son accusation , à fin que l'accusé ne fust point surpris au deprouveu : parquoy celui que Murena avoit baillé à Caton pour l'observer , le suyvant par tout , & considérant de près tout ce qu'il faisoit , quand il veit qu'il n'y alloit point cauteleusement ny malicieusement , ains rondement suyvant le droit chemin de juste accusateur , il en eut si grande fiance en la magnanimité & simple bonté du naturel de Caton , que sans autrement l'espier il ne luy faisoit que demander à luy mesme , ou sur la place , ou en sa maison , si ce jour là il avoit deliberé de procurer chose aucune appartenante à l'accusation : s'il disoit que non , il s'en alloit , luy adjoustant pleine foy. Quand ce vint au jour de l'assignation que la cause fut plaidée , Ciceron qui estoit ceste année là consul ^r,

^r L'an de Rome 691.

en defendant Murena se mocqua si plaisamment des philosophes, stoïques, & de leurs estranges & extravagantes opinions, qu'il en feit rire les juges, de sorte que Caton mesme se soubriant, dit à ceulx qui estoient autour de luy : « Voyez que nous avons un plaisant » consul, qui fait ainsi rire les gens ». Mais ayant esté Murena absoulz en ce jugement, il ne se porta point depuis en homme mauvais ny estourdy vers Caton, ains tant que son consulat dura ¹, se gouverna tousjours par son conseil ès principaux affaires, & continua de l'honorer, & suyvre son conseil, en ce qui appartenoit au devoir de son magistrat : dequoy Caton luy mesme estoit cause, pource qu'il n'estoit terrible ny redoubtable sinon au conseil, & en ses harangues devant le peuple, pour la defense du droit & de la justice seulement : car au demourant il se monstroit humain, gracieux & bening envers tout le monde.

XXXIV. Mais avant que d'entrer en l'exercice de son tribumat, estant Cicéron encore consul, il luy aida à bien faire le devoir de son estat en plusieurs autres choses, & mesmement à mettre fin à la conjuration de Catilina, qui fut un très grand & très bel acte : car ce Catilina machinoit un remuement universel, pour ruiner

¹ L'an de Rome 691.

& renverser sans dessus dessous toute la chose publique, excitant des seditions civiles au dedans, & des guerres ouvertes au dehors, dont estant convaincu par Ciceron, il fut contrainct de se sauver hors de Rome : mais Lentulus, Cethegus & plusieurs autres complices de ceste conjuration, blamans Catilina d'aller trop laschement & trop froidement en besongne, avoyent de leur costé entrepris de brusler toute la ville de Rome entierement, & mettre en combustion tout l'empire Romain par guerres estrangeres & rebellions de nations & provinces foraines : mais ayant esté leur conspiration descouverte, ainsi comme nous avons plus amplement déclaré en la vie de Ciceron, la chose fut mise au jugement du senat, pour sçavoir ce qui en devoit estre fait : & là Sillanus à qui premier fut demandée son opinion, dit qu'il estoit d'avis que lon leur devoit faire souffrir peine extreme, & consequemment tous ceulx qui opinerent après luy furent de mesme avis, jusques à Cæsar, lequel estant personnage bien parlant, & qui desiroit nourrir & entretenir plus tost que esteindre tous remuemens, seditions & changemens en la chose publique, comme matiere propre à ce qu'il avoit de longue main projectté en son entendement, feit une harenque pleine de douces paroles attrayantes, en laquelle il remonstra

que de faire ainsi mourir ces personnages, sans qu'ilz fussent judiciairement condamnez, il ne luy sembloit nullement raisonnable, ains que plus tost on les devoit tenir en prison. Cela changea tellement les opinions du reste des senateurs, pour la crainte qu'ilz eurent du peuple, que Sillanus mesme rhabilla son opinion, & dit qu'il n'avoit point entendu qu'on les deust faire mourir, ains les retenir en prison fermée, pource que l'extreme peine à un citoyen Romain estoit la prison.

: XXXV. Ainsi estans les opinions changées & inclinans les autres senateurs en la plus douce & plus humaine sentence, Caton se levant quand ce fut à luy à dire son opinion, commença en courroux avec une grande force de eloquence à reprendre grièvement Sillanus de s'estre changé, & à picquer asprement Cæsar, qui soubz une apparence populaire, & soubz couverture d'un parler doux & gracieux, alloit ruinant la chose publique, & intimidant le senat, là où il devroit avoir grande peur, & se reputer bien heureux, s'il se pouvoit sauver, que lon ne s'attachast à luy mesme, pour les occasions de l'en soupçonner qu'il donnoit, en voulant ainsi manifestement ravir d'entre les mains de la justice des traistres ennemis de la chose publique, & montrant de n'avoir aucune pitié ny compassion

de la ville de sa naissance, si noble & si grande, qui avoit esté si près de finale extermination, ains plus tost regretter & lamenter la fortune de ces malheureux hommes là, qui ne devoient jamais avoir esté nez, & la mort desquelz preservoit Rome de meurtres, maulx & dangers infinis. Il n'est demouré que ceste harengue seule, de toutes celles que feit onques Caton, par ce que Ciceron avoit ce jour là attiltré des clerks, qui avoyent la main fort legere, auxquelz il avoit davantage enseigné à faire certaines notes & abbreviations, qui en peu de traicts valoyent & representoyent beaucoup de lettres, & les avoit disposez çà & là en divers endroits de la salle du senat : car lon n'usoit point encore lors, & ne sçavoit on que c'estoit de notaires, c'est à dire, d'escrivains qui par notes de lettres abbrevgées figurent toute une sentence, ou tout un mot, comme lon a fait depuis : & dit on que ce fut lors premier que lon commença à en trouver la trace. Si le gaigna lors Caton, & feit tellement tourner les opinions, que ces hommes furent condamnez à mourir. Et pour ne rien omettre de ce qui peut servir à représenter au vif l'image de son naturel, jusques aux moindres indices, on dit que ce jour là y ayant grand debat & fort vehemente contention de luy à l'encontre de Cæsar, tellement que tout le senat

estoit attentif à les regarder & ouyr, on apporta de dehors un petit papier à Cæsar. Ce que Caton tira incontinent en suspicion, & l'en calumnia tant, que plusieurs des senateurs s'en emeurent, & commanderent que ce qui estoit escript en ce papier fust leu tout hault & clair : parquoy Cæsar tendit la lettre à Caton qui ne seoit pas gueres loing de luy. Caton l'ayant leüe trouva que c'estoit une lettre d'amour que sa sœur Servilia escrivoit à Cæsar, dont elle estoit amoureuse, ayant esté par luy corrompue : si la rejetta à Cæsar en luy disant, « Tien yvrogne » : & cela fait, se remeir à continuer le propos, qu'il avoit paravant commencé.

XXXVI. En somme, il semble que Caton a esté peu heureux du costé des femmes : car ceste Servilia, comme nous avons dit, eut mauvais bruit pour l'amour de Cæsar : mais l'autre Servilia, qui estoit aussi sa sœur, fut encore plus diffamée, pource que estant mariée à Lucillus l'un des premiers personnages de Rome, dont elle avoit eu un filz, elle fut à la fin par luy chassée & repudiée pour son impudicité : & qui est encore plus honteux, sa propre femme Attilia ne fut pas elle mesme nette de tel vice : car combien qu'il en eust eu deux enfans, il fut contrainct de la repudier, tant elle se gouverna mal : & depuis il espousa la fille de Philippus,

nommée Martia, laquelle semble avoir esté fort honeste dame. C'est celle de qui lon parle tant. Car ceste partie en la vie de Caton, ne plus ne moins qu'en une fable ou comedie, est disputable & bien mal-aisée à foudre : mais la chose fut telle, ainsi que l'escriit Thraseas, qui en remet la foy & la garantie sur un Munatius, lequel estoit familier amy de Caton. Entre plusieurs qui aimoyent & admiroyent les vertus de Caton, il y en avoit qui le monstroyent & le descouvroyent les uns plus que les autres : comme Quintus Hortensius personnage de grande autorité, & homme de bien avec, lequel desirant estre non seulement amy privé & familier de Caton, ains aussi son allié en quelque sorte que ce fust, & joindre par quelque affinité toute la maison de luy à la siene, tascha de luy persuader qu'il luy baillast en mariage sa fille Porcia, laquelle estoit mariée à Bibulus, & luy avoit ja fait deux enfans, pour y semer aussi, ne plus ne moins qu'en une terre fertile, de sa semence, & en avoir de la race, luy remontrant que cela sembloit bien un peu estrange de prime face quant à l'opinion des hommes : mais quant à la nature, qu'il estoit honeste, & utile à la chose publique, qu'une belle & honeste jeune femme en la fleur de son aage ne demourast point oiseuse, laissant esteindre son aptitude naturelle à

concevoir, ny aussi ne fâchast ny n'apauvrist point son mary, en luy portant plus d'enfans qu'il n'en auroit de besoing, & que en communiquant ainsi les uns aux autres les femmes idoines à la generation, à gens de bien & hommes qui en fussent dignes, la vertu vinst à se multiplier davantage, & à s'esprendre en diverses familles, & la ville consequemment à s'en mesler, unir & incorporer en soy mesme davantage par alliance : mais si d'aventure Bibulus aimoit tant sa femme qu'il ne la voulust point quitter entierement, il la luy rendroit incontinent après qu'elle luy autoit fait un enfant, & qu'il se setoit conjoint par un plus estroit lien d'amitié, moyenant ceste communication d'enfans, avec Bibulus mesme & avec luy. Caton feit responce qu'il aimoit bien Hortensius, & auroit bien agreable son alliance, mais qu'il trouvoit estrange qu'il luy parlast de luy bailler sa fille pour en engendrer des enfans, veu qu'il sçavoit bien qu'elle estoit mariée à un autre. Adonc Hortensius tournant le propos ne faignit point de luy descouvrir son affection, & luy demander sa femme, laquelle estoit encore assez jeune pour porter des enfans, & Caton en avoit desja suffisamment : & si ne sçauoit on dire que Hortensius feist ceste poursuite, à cause qu'il s'apperceust que Caton ne feist compte de Martia, car elle estoit lors enceinte de luy : mais tant

y a, que voyant le grand desir & la grande affection que Hortensius en avoit, il ne la luy refusa point, ains luy respondit qu'il falloit donques que Philippus pere de Martia en fust aussi content, lequel entendant que Caton s'y consentoit, ne voulut point neantmoins luy accorder sa fille, que Caton luy mesme ne fust present au contract; & stipulant avec luy¹. Ces choses furent faictes bien long temps depuis : toutefois pource que je suis tumbé sur le propos des femmes de Caton, il m'a semblé de haster ce recit, & le mettre avant son temps en ce lieu.

XXXVII. Ayant donques Lentulus & ses confors en la conjuration de Catilina, esté executez à mort, Cæsar pour se couvrir des charges & imputations que Caton luy avoit mis sus au senat, recourut en la sauvegarde du peuple, & retira autour de soy tous ceulx qu'il sçavoit qui avoyent mauvaise volonté, & qui ne demandoient qu'à renverser & gaster tout, en les mutinant & incitant encore plus à ce faire : au moyen dequoy, Caton craignant que telle maniere de gens ne suscitast quelque trouble & combustion en la chose publique, futada au senat de gaigner le menu populaire qui n'avoit rien, en luy faisant distribuer quelque bled pour vivre : ce qui fut

¹ Il la reprit depuis après la mort d'Hortense, l'an de Rome 705, comme on verra au ch. LXVIII.

fair : & monta ceste despenſe par an à ¹ douze cents cinquante talents. Ceste largeſſe aſſopir manifeſtement les menaces des troubles que lon craignoit de ce coſté là. Mais d'un autre coſté, Metellus entrant en ſon rribunar, faiſoit des aſſemblées & harengues ſeditieuſes, èsquelles il meit en avant au peuple un decret, par lequel eſtoit porté, que Pompeius fuſt au premier jour rappellé avec ſon armée en Italie, à fin qu'il prouveuſt à ce que la choſe publique ne tumbauſt en inconvenient pour le danger de Carilina. Ce qui n'eſtoit qu'une couverture de belles paroles : mais le bur & l'intention veritable où rendoit ceſt edict, eſtoit de mettre tous les affaires de la choſe publique & les forces de l'empire Romain entre les mains de Pompeius. Le ſenar fur aſſemblé là deſſus, auquel Caton ne parla pas d'entrée aigrement, ny de trop grande vehemence contre Metellus, comme il avoit accouſtumé de faire à l'encontre de ceulx qui ſe deportoyent comme luy : ains l'admoneſta doucement & moderément, juſques à le prier à la fin & luy haultlouer ſa maiſon, de ce qu'elle avoit tousjours ſuivy le party du ſenar & des gens de bien : mais cela eſleva encore plus en audace & en gloire Metellus, & feit qu'il com-

¹ Sept cents cinquante mille eſcus; *Amyot*, 5,835,937 livres 10 ſols de notre monnoie.

CATON D'UTIQUE. 419

mencea à avoir Caton en mespris, pource qu'il estima qu'il luy cedast ainsi de peur qu'il eust, tellement qu'il s'oublia jusques à dire des paroles presumptueuses, & user de fieres menaces, qu'il feroit ce qu'il avoit entrepris bon gré mal gré le senat. Adonc Caton changeant de visage, de voix & de parole, après luy avoir parlé fort asprement, en fin protesta roidement, que tant comme il auroit vie au corps, il ne souffriroit que Pompeius entraist avec armes en la ville de Rome. Quoy entendu, le senat eut opinion que ny l'un ny l'autre n'avoit le sens bien rassis, ny le jugement bien sain, mais que les deportemens de Metellus estoient une fureur, qui procedant d'une extremé malice & meschanceté, vouloit mettre toutes choses sans dessus dessous, & que ce que faisoit Caton, estoit un ravissement & ecstasé de vertu transportée hors de soy, pour vouloir defendre les choses justes & raisonnables.

XXXVIII. Quand le jour fut escheut, auquel on devoit faire passer cest edict par les voix du peuple, Metellus ne faillit pas d'avoir ses gens en ordonnance sur la place, force estrangers, force esclaves & force escrimeurs à oultrance tous en armes, avec ce qu'il y avoit une bonne partie de la commune qui desiroit le retour de Pompeius, pour l'esperance de quelque mutation;

& si estoit leur affaire grandement favorisé & fortifié de la part de Cæsar, qui lors estoit præteur. Et à l'opposite, de l'autre costé les plus gens de bien de la ville se courrouceoyent bien avec Caton, & disoyent comme luy, que c'estoit une grande meschanceté, mais ilz ne luy aidoyent point pourtant : à l'occasion dequoy ses parents & domestiques en estoient en grand soucy & en grande peine, de sorte qu'il y en eut qui passerent la nuit ensemble sans vouloir reposer & sans boire ny manger, pour le danger auquel ilz voyoyent sa vie, & mesmement sa femme & ses sœurs ne faisoient autre chose que plorer & se tourmenter en sa maison, là où luy tout au contraire parloit asseurement, & reconfortoit tout le monde : & après avoir souppé comme de coustume, il s'en alla coucher, & dormit de fort profond sommeil jusques au matin, que Munatius Thermus l'un de ses compagnons au tribunat le vint esveiller : si s'en allerent ensemble sur la place, où ilz furent accompagnez de bien peu de gens : mais ilz en trouverent plusieurs par le chemin qui leur venoyent au devant, pour les advertir qu'ilz se teinsent sur leurs gardes.

XXXIX. Quand ilz furent à l'entrée de la place, Caton apperceut incontinent le temple de Castor & Pollux tout environné d'hommes armez, & les degrez tenus & occupez par des

escrimeurs à oultrance , & Metellus qui estoit au plus hault , assis près de Cæsar : si se retourna adonc devers ses amis & leur dit , « Voyez quel » couard voylà , qui contre un seul homme nud » a assemblé tant de gens armez ». En disant cela il marcha droit celle part avec Thermus , & s'ouvrirent ceulx qui tenoyent les degrez pour les laisser passer , mais ilz n'en souffrirent monter pas un autre , encore eut Caton bien affaire à tirer Munatius à mont par la main : monté qu'il fut , il s'en alla droit asseoir entre Metellus & Cæsar , pour les engarder de parler ensemble à l'oreille. Ilz ne sceurent ne l'un ne l'autre que luy dire : mais les gens de bien qui veirent & considererent avec admiration le visage , l'assurance & le courage de Caton , s'approcherent de plus près , & par leurs cris l'enhorterent qu'il craignist rien , s'encourageans les uns les autres de tenir bon , & de se rallier ensemble pour la defense de la liberté commune , en secourant celuy qui combattoit pour elle : si y eut un sergent qui prit en main l'edict par escript , comme pour le lire au peuple. Caton luy defendit de ce faire : parquoy Metellus adonc le prit luy mesme , & commença à le lire. Caton le luy osta par force d'entre les mains : mais neantmoins Metellus en sachant le contenu par cueur , ne laissa pas de le vouloir prononcer sans eécriture : & Thermus luy

meit la main au devant de la bouche pour le garder de parler : tant que Metellus voyant ces deux hommes obstinez à l'empescher par toutes voyes qu'il ne feist passer son edict, & que le peuple chaland la voile se rengeoit du costé de la raison, il feit signe à ses gens, que quelques soudards armez qu'il tenoit exprès à ceste fin en sa maison, accourussent à l'effroy avec grands cris : ce qui fut fait : tellement que le peuple de frayeur s'escarta, les uns deçà, les autres delà, & ne demoura sur la place que Caton seul, auquel on tiroit d'amont force coups de pierres & de baston : mais Murena, celui mesme qu'il avoit accusé d'avoir achepté le consular, ne l'abandonna point en ce danger, ains le couvrant de sa longue robe cria à ceulx qui jettoient des pierres qu'ilz eussent à cesser : & en luy remonstrant le peril, auquel il se mettoit pour neant, feit tant envers luy, qu'en le tenant tousjours entre ses bras il le retira au dedans du temple de Castor & Pollux.

XL. Et lors Metellus voyant la tribune aux harengues vuide, & ses adversaires fuyans de tous costez hors de la place, cuida bien avoir tout gagné, & commanda à ses soudards armez qu'ilz se retirassent, & luy se tirant tout doucement en avant, essaya de faire lors passer & authentifier son edict : mais ses contraires se reve-

nans aussi tost de leur effroy, & retournans sur la place recommencerent à crier à l'encontre de Metellus plus fort & plus hardiment que devant, de sorte qu'il s'en trouva luy mesme en grand trouble & en grande frayeur, & ses adherents aussi, cuidans que leurs adversaires eussent recouvré des armes de quelque part, & que ce fust ce qui les feist ainsi fierement retourner contre eulx : tellement qu'il n'y eut pas un qui arrestast, ains se tirerent tous arriere de la tribune aux harengues. Ainsi estans ceulx de la ligue de Metellus escartez, Caton se presenta sur la tribune qui loua grandement le peuple de la bonne volunté qu'il avoit monstrée, en l'enhortant de perseverer tousjours de bien en mieulx : tellement que la commune mesme se banda lors contre Metellus : & le senat assemblé là dessus, ordonna que lon secourust Caton plus que jamais, & que lon resistast par tous moyens à cest edict de Metellus, comme estant pernicieux, & introduisant une sedition & une guerre civile en la ville de Rome. Quant à Metellus, il s'opiniastroit bien encore à poursuyvre son entreprise, & ne se vouloir point rendre : toutefois à la fin voyant que ses adherents s'estonnoient merueilleusement, & redoubtoient la constance de Caron, comme chose invincible & inexpugnable, il s'en courut un jour soudainement sur la

place, là où assemblant le peuple, il allegua plusieurs raisons pour cuider mettre Caton en haine de la commune, & dit entre autres choses qu'il se vouloit tirer hors de la domination tyrannique de Caton & de sa conspiration à l'encontre de Pompeius, dont on verroit que bien tost la ville se repentiroit d'avoir ainsi rebuté un si grand personnage. Cela dit, il se partit aussi tost pour s'en aller en Asie faire ses plaintes à Pompeius. Si fut Caton grandement estimé pour ce fait, d'avoir ainsi deschargé la chose publique du pesant fardeau du tribunat d'un tel fol, & d'avoir par maniere de dire, desfait en Metellus, la puissance de Pompeius : mais encore fut il loué & estimé davantage, quand il empescha que le senat, qui le vouloit à toute force, ne notast Metellus d'infamie, & ne le privast de son estat : car il s'y opposa, & pria le senat de ne le faire point. La commune prit pour un grand argument de nature douce, benigne & humaine, de ne vouloir point, par maniere de dire, fouler aux pieds son ennemy après l'avoir abbatu ; ny l'outrager après l'avoir à force vaincu : mais les sages hommes jugerent davantage, qu'il avoit prudemment & utilement fait, de n'irriter point Pompeius.

XLI. Environ ce temps retourna Lucullus de la guerre, de laquelle il sembloit que Pompeius

luy eust osté le couronnement d'entre les mains; & la gloire de l'avoir entierement parachevée, & fut encore bien près d'estre debouté de l'honneur du triumphe, pour la contradiction que luy feit Caius Memmius, l'accusant de plusieurs cas devant le peuple; plus en faveur de Pompeius, que pour inimitié particuliere qu'il eust à l'encontre de luy. Mais Caton, tant pource qu'il estoit son allié, attendu qu'il avoit espousé sa sœur Servilia, comme aussi pource que le cas en soy luy sembloit inique, résista à ce Memmius, & soubsteint plusieurs calumnies & imputations, si que finalement estant jetté¹ hors de son magistrat, comme d'une domination tyrannique, encore feit il tant, qu'il contraignit Memmius de soy departir de ses accusations, & de fouyr la lice. Parquoy Lucullus ayant obtenu l'honneur de l'entrée triumpnale; s'accointa encore plus que jamais de Caton, estimant avoir en luy un grand boulevard & seur rempar à l'encontre de la puissance de Pompeius, lequel retournant quelque temps après glorieux pour ses conquestes, & se confiant que à la faveur de sa bienvenue il ne seroit refusé de chose quelconque qu'il demandast à ses citoyens à son arrivée, il envoya devant requerir le senat de vouloir pour l'amour de luy différer l'election

¹ Voyez les Observations.

des consulz jusques à ce qu'il fut à Rome, à fin qu'estant present il peust favoriser la poursuite de Piso qui demandoit le consulat : à quoy comme la plus part du senat se laissast aller, Caton à l'opposite y contredit, non qu'il estimast ceste remise estre chose de tant grande consequence, ains voulant retrencher à Pompeius toute esperance d'attenter choses nouvelles & extraordinaires, & feit tellement changer d'avis au senat, que sur l'heure mesme il fut debouré de sa requeste.

XLII. Cela fascha fort Pompeius, lequel s'apercevant bien qu'il auroit Caton pour contraire en beaucoup de choses, s'il ne trouvoit moyen de le gagner, envoya querir Munatius qui luy estoit fort familier, par l'entremise duquel il feit demander à Caton deux niepces qu'il avoit prestes à marier, la plus aagée pour luy, & la plus jeune pour son filz aîné. Les autres disent que ce n'estoyent pas ses niepces, mais ses propres filles. Munatius feit le message à Caton, & à sa femme, & à ses sœurs, lesquelles desiroient singulierement ceste alliance pour la grandeur & dignité du personnage qui la demandoit : mais Caton sans dilayer, ny autrement en consulter à loisir, ains comme picqué, respondit rour sur l'heure, « Retourne, Munatius, retourne devers Pompeius, & luy dy,

» que Caton n'est point prenable par le moyen
 » des femmes , non qu'il n'ait autrement bien
 » chere son amitié : car là où il ne voudra faire
 » & pourfuyvre que choses justes , il trouvera
 » en luy amitié plus feure & plus certaine que
 » nulle alliance de mariage : mais au demourant,
 » qu'il ne baillera jamais ostages à l'appetit de
 » Pompeius contre la chose publique ». Les
 femmes furent sur l'heure bien malcontentes de
 ce refus , & ses amis mesmes blasmerent sa res-
 ponse , comme superbe & incivile : mais depuis
 il advint que Pompeius prattiquant de faire elire
 consul l'un de ses amis, envoya de l'argent par
 les lignées pour achepter & corrompre les voix
 du peuple , & fut ceste corruption assez notoire ;
 pource que l'argent fut compté dedans les jardins
 mesmes de Pompeius : parquoy Caton adonc
 remonstra aux femmes de sa maison , que s'il
 se fust obligé par alliance de mariage à Pom-
 peius, il eust esté contrainct d'avoir tous les jours
 part à l'infamie de telz actes : quoy entendu elles
 mesmes confesserent alors , qu'il avoit plus sage-
 ment fait de refuser une telle affinité , que elles
 de la desirer. Toutefois, s'il fault juger du conseil
 par les evenemens des choses , il me semble que
 Caton feit une très grande faulte de rejeter ceste
 alliance , pource qu'en ce faisant il fut cause
 que Pompeius se tourna du costé de César , &

prit une alliance, laquelle venant à conjoindre en un la puissance de Cæsar & celle de Pompeius, cuida ruiner de fond en comble tout l'empire Romain, à tout le moins changea elle entièrement tout l'estat du gouvernement de la chose publique : dont il ne fut à l'aventure rien advenu, si Caton craignant des legeres faultes de Pompeius, n'eust esté cause de luy en laisser faire de très lourdes, en augmentant la puissance d'un autre : mais cela estoit lors encore à advenir.

XLIII. Au demourant Pompeius estant en debat contre Lucullus, touchant certaines ordonnances qu'ilz avoyent faittes au royaume de Pont, pource que l'un & l'autre vouloit que les sienes eussent lieu, Caton favorisa à Lucullus, auquel notoirement on faisoit tort : à raison dequoy Pompeius voyant qu'il avoit du pire au senat, recourut au peuple, & meit en avant l'edict de faire departir des terres aux gens de guerre : mais Caton s'opposant encore là, fit rejeter son edict, qui fut cause que Pompeius par despit s'accointa lors de Publius Clodius, le plus seditieux & le plus audacieux de tous ceulx qui se mesloyent de prescher lors le peuple : & s'allia aussi en un mesme temps de Cæsar, dont luy mesme luy en bailla l'occasion & le commencement, pource que Cæsar retournant de sa præture d'Hespagne, demandoit l'honneur du triumphe, & tout en-

semble vouloit aussi briguer & pourfuyvre le consulat : mais il y avoit une ordonnance au contraire , car il falloit que ceux qui aspiroyent à quelque magistrat , fussent en personne dedans la ville , & que ceux qui aspiroyent à faire entrée triumphale , attendissent au dehors : pource requit il au senat qu'il fust dispensé de pouvoir demander le consulat par personnes interposées , à quoy la plus part du senat consentoit : mais Caton y contredisoit , & voyant que les autres senateurs inclinoyent à vouloir gratifier à Cæsar , quand ce vint à luy à dire là dessus sa sentence , il consuma tout le jour à parler , & engarda par ce moyen que le senat ne peut rien conclurre : parquoy Cæsar laissant la poursuite du triumphe , se meit à briguer le consulat , & l'amitié de Pompeius. Si fut eleu consul , & incontinent après donna sa fille Julia en mariage à Pompeius , & ayans fait entre eulx comme une conspiration à l'encontre de la chose publique , l'un mettoit en avant des edicts , par lesquels il pretendoit faire distribuer des terres aux pauvres citoyens Romains , & l'autre les defendoit : de l'autre costé Lucullus & Ciceron se bendans avec l'autre consul , qui estoit Bibulus ¹ faisoient tout ce qu'ilz pouvoient à l'encontre : mais principalement Caton , lequel ayant pour fort sus-

¹ L'an de Rome 695.

peûte ceste alliance de Cæsar & de Pompeius ; comme n'estant point faite pour aucune bonne intention, disoit qu'il ne craignoit pas tant ceste distribution de terres , comme il redoubtoit la recompense qu'en demanderoient ceulx qui par telz moyens alloient allechans & appastans le commun populaire. En quoy tout le senat fut bien de son advis, & plusieurs autres gens de bien qui n'estoyent pas du senat se rengeoient aussi de sa part, s'esbahissans & se courrouceans grandement de ceste estrange importunité de Cæsar, lequel avec l'autorité consulaire, alloit mettant en avant les mesmes choses que fouloyent proposer les plus seditieux & plus infolens tribuns du peuple, pour gagner la grace de la commune, & alloit ainsi vilement & lâchement mendiant la faveur du menu populaire.

XLIV. Parquoy Cæsar & ses adherents craignans de si grands adversaires, y procederent par vive force : car premierement il fut jetté sur la teste de Bibulus, ainsi comme il s'en alloit en la place, un plain panier de fiant & d'ordure, & rompit on à force les verges que les fergens portoyent devant luy, jusque à ce que finablement coups de traict volans de tous costez contre eux, & plusieurs y estans blecés, tous les autres abandonnerent la place, fuyans à val de rouverte : mais Caton se retira le dernier,

marchant son petit pas ordinaire, & encore se retournant souvent en maudissant telz citoyens. Si feirent les autres, non seulement passer leur edict par les voix du peuple, touchant la distribution des terres aux pauvres : mais qui plus est, y feirènt adjouster, que tout le senat seroit tenu de jurer qu'il ratifieroit le contenu en l'edict, & y tiendrait la main s'il se trouvoit aucun qui attentast de vouloir aller au contraire, soubz grandes peines à qui refuseroit de prester ce serment. Tous les autres senateurs jurèrent par force, se souvenans de l'inconvenient qui estoit jadis advenu en cas pareil à l'ancien Metellus, lequel fut banny de l'Italie pour n'avoir pas voulu jurer de maintenir & garder un edict semblable : à l'occasion dequoy les femmes supplierent en privé avec force larmes Caton qu'il voulust un peu flechir, & jurer : aussi feirent ses familiers & amis : mais celuy qui plus le persuada & le conduisit à jurer, fut l'orateur Ciceron, qui luy remonstra que à l'adventure n'estoit il pas raisonnable de vouloir seul desobeir à ce qui auroit semblé bon & juste à tous les autres ensemble, & que ce seroit fait en homme totalement insensé de se precipiter soymesme en un evident peril, pour cuider empescher une chose qui estoit desja toute faite : mais encore, que le plus extreme mal qu'il y auroit en cela, seroit,

s'il abandonnoit & laissoit en proye la chose publique, (pour le bien de laquelle il faisoit toutes choses,) à ceulx qui espioient tous les moyens de la ruiner, comme s'il fust bien aise de n'estre plus en peine de la defendre à l'advenir : « Car » si bien Caton, disoit il, n'a que faire de » Rome, certainement Rome a affaire de Caton, » & aussi ont tous ses amis » : desquelz luy mesme se disoit estre le premier qui en avoit besoing, à cause que manifestement Publius Claudius, par le moyen du tribonat, dressoit embusche pour le chasser hors du país. Lon dit que ces prieres & remonstrances faittes à Caton en privé dedans sa maison, & en public sur la place, l'amollirent un peu, & le feirent à la fin venir jurer le dernier de tous, excepté Faonius, qui estoit l'un de ses familiers amis.

XLV. Parquoy Cæsar élevé en courage, pour avoir conduit à fin ceste siene premiere entreprise, meit en avant encore un autre edict, par lequel il departoit presque toute la campagne ¹, & tout le país que lon appelle Terre de labour, aux pauvres & necessiteux citoyens de Rome. Auquel edict personne ne s'opposa que Caton : & Cæsar le fait prendre par ses sergens dedans la tribune mesme aux harengues pour le mener

¹ Grec, la Campanie; & c'est ce qu'on nomme aujourd'hui la terre de Labour au royaume de Naples.

en prison : mais pour cela il ne flechit point, ny ne remeit rien de la franchise de son parler, ains en allant continua tousjours de discourir à l'encontre de cest edict, & d'admonester le peuple de rejetter ceulx qui mettoient telles choses en avant. Tout le senat s'en alla après luy, & la plus saine partie du peuple aussi, monstrant assez par leur triste silence, qu'ilz estoient en eulx mesmes desplaisans & courroucez de l'injure que lon faisoit à un tel personnage : tellement que Cæsar mesme s'apperceut bien que le peuple en estoit malcontent : toutefois il s'opiniastra, attendant tousjours que Caton de luy mesme en appellast & priaist le peuple : mais quand il cogneut evidemment, que jamais il ne le feroit, à la fin vaincu de la honte & du deshonneur que ce luy estoit, il supposa & attiltra luy mesme l'un des tribuns du peuple, qui alla oster Caton d'entre les mains des sergens. Finablement l'issue de toute ceste pratique fut, qu'après avoir bien gagné le peuple par telz edicts & telles gratifications, ilz feirent decerner à Cæsar le gouvernement de toutes les Gaules, tant deçà que delà les monts, & de toute l'Esclavonie¹, avec un exercite de quatre legions, & pour l'espace de cinq ans,

¹ Grec, l'Ilyrie.

combien que Caton predist & denonceast assez au peuple, que luy mesme avec ses propres voix logeoit le tyran dedans la fortetesse, qui luy mettroit un jour le pied sur la gorge. Ilz feirent aussi elire tribun du peuple Publius Clodius, quoy qu'il fust de maison patriciene; ce qui estoit expressement defendu par les loix: mais ce Clodius leur avoit promis qu'il diroit & feroit tout ce qu'ilz voudroyent pour eulx, prouveu qu'en recompense ilz luy aidassent à chasser Ciceron hors de la ville de Rome: & davantage ilz feirent designer consulz pour l'année ensuyvant¹, Calpurnius Piso, pere de la femme de Cæsar, & Gabinius Paulus, homme du tout fait à la devotion, & selon le cueur de Pompeius, comme escrivent ceulx qui cognoissoyent sa vie & ses meurs.

XLVI. Mais combien qu'ilz teinsent la chose publique si fermement embrassée, & qu'ilz eussent reduit au dessoubz d'eulx une partie de la ville par amour, & l'autre par crainte, encore neantmoins redoubtoyent ilz tousjours Caton, considerans qu'en ce qu'ilz estoient venuz au dessus de luy, ce avoit esté à toute peine avec difficulté grande, & non sans leur honte, ayans esté contraincts de venir à la force, encore n'en

¹ L'an de Rome 696, avant J. C. 58.

avoyent ilz jamais cuidé venir à bout. Qui plus est, Clodius n'esperoit pas pouvoir jamais chasser ny ruiner Ciceron, tant que Caton seroit present : & ourdissans les moyens de le pouvoir faire, si tost qu'il fut installé en son magistrat, il envoya querir Caton, & luy commença à dire qu'il l'estimoit le plus homme de bien & le plus entier qui fust dedans Rome, & qu'il estoit prest à le luy monstrier par effect : car là où il y en avoit plusieurs qui le requeroient de leur faire rumber entre mains la commission d'aller en Cypre contre le roy Ptolomæus, il n'estimoit point qu'il y en eust d'autre qui meritaist cest honneur que luy, & que pour l'affection qu'il luy portoit, il luy feroit volontiers ce plaisir. Caton se prit incontinent à crier, que cela estoit une embuche & une injure, non pas un plaisir : & Clodius adonc luy repliqua fierement & superbement, « Et bien, puis que tu n'y veux donques » aller de gré, je t'y feray aller par force ». Ce qu'il feit. Car à la premiere assemblée de ville il luy en feit decerner la commission : mais pour y aller il ne luy ordonna ne vaisseau, ny gens de guerre, ny aucuns ministres, sinon deux secrettaires seulement, dont l'un estoit larron & fort mauvais homme, l'autre estoit un suyvnt de Clodius : & encore comme s'il luy eust donné peu à faire en Cypre contre Ptolomæus, il luy

fait davantage commander d'aller puis après remettre les bannis de la ville de Byzance en leur pais & en leurs biens, à fin de le tenir plus longuement hors de Rome, tant qu'il seroit en son magistrat : parquoy se voyant estrainct de telle necessité, il conseilla à Ciceron ; lequel estoit desja pourfuyvy par Clodius, qu'il n'entraist point en combustion avec luy, & qu'il ne jettast point la ville de Rome en guerre civile & en meurtres pour l'amour de luy, ains que plus tost il s'absentast pour un temps, à fin qu'il fust une autre fois cause de preserver son pays.

XLVII. Cela fait il envoya devant un sien amy Canidius en Cypre devers Ptolomæus, pour luy suader qu'il cedast sans venir aux armes, & qu'en ce faisant, il n'auroit faulte ny d'honneur ny de biens, pource que le peuple Romain luy ottroyeroit la prælature de Venus en la ville de Paphos. Ce pendant luy demoura en l'isle de Rhodes à faire ses preparatifs en attendant la responce. Mais sur ces entrefaites Ptolomæus le roy d'Egypte pour quelque courroux & quelque different qu'il eut avec ses subjects, s'estant party d'Alexandrie pour s'en aller à Rome, en esperance que Cæsar & Pompeius le remettroyent incontinent avec une grosse armée en son royaume, voulut bien en passant parler à Caton : si

* Aulêrès, surnommé aussi Nothus.

envoya devers luy, esperant que aussi tost comme il sçauroit sa venue, il le viendrait visiter. Caton estoit lors d'aventure à ses affaires, qui respondit au messager, que Ptolomæus vinst devers luy s'il vouloit. Ce qu'il feit : mais Caton ne luy alla point à l'encontre, ny ne se leva point au devant de luy, ains le salua seulement tout en la sorte qu'il eust fait le premier venu, & luy dit qu'il s'asseist. Cela premierement estonna ce roy de voir sous un si simple & si petit equippage une telle gravité & si grande haultesse ès façons de faire de Caton : mais quand il fut un peu entré en propos de ses affaires, & qu'il entendit une parole pleine de sens & de sain jugement, par laquelle il le tenoit franchement, & luy remonstroit l'erreur qu'il faisoit, d'abandonner une si grande opulence & felicité royale pour s'aller soumettre à tant d'indignitez de faire la cour, à tant de travaux, & à tant de corruptions de presens qu'il luy conviendrait faire pour gagner l'avarice de ceulx qui avoyent credit & autorité dedans Rome, laquelle estoit tant insatiable, que le royaume d'Egypte, quand bien il seroit tout entierement converty en argent pour leur bailler, à peine leur suffiroit : à l'occasion dequoy il luy conseilloit de s'en retourner tout court, & de chercher les moyens de se reconcilier & rapprocher avec ses subjects, luy disant davanrage,

qu'il estoit content de s'y en aller quant & luy pour s'entremettre de faire son appointment. Ptolomæus adonc revenant comme d'une passion ou d'une alienation d'entendement en son bon sens, considerant la verité en soy, & la profonde sagesse de ce personnage, fut entre deux de suyvre son conseil : & l'eust fait, n'eust esté que ses gens l'en destournerent : mais quand il fut arrivé à Rome, & qu'il luy fallut aller faire la cour aux portes de ceulx qui avoyent auctorité & qui estoient en magistrats, il soupira, & regretta fort alors la folie qu'il avoit faite, comme n'ayant pas mesprisé le conseil d'un sage homme, ains plus tost l'oracle d'un dieu.

XLVIII. Au demourant l'autre Ptolomæus, qui estoit en Cypre, de bonne adventure pour Caton, se feit luy mesme mourir avec du poison : & pource que lon disoit qu'il avoit laissé grosse somme de deniers, Caton delibera de s'en aller en personne à Byzance, & envoya en Cypre son neveu Brutus, pource qu'il ne se fioit pas trop à Canidius. Et après avoir remis les bannis de Byzance en grace avec les autres citoyens, & pacifié tous les differents qu'ilz avoyent ensemble, alors il s'en retourna en Cypre, là où il trouva une grande & royale richesse de meubles precieux, comme vaisselle d'or & d'argent, tables, pierreries, tapisseries & draps de

pourpre, qu'il falloit tous vendre & en faire argent : il y voulut user d'un extreme soing & diligence, en tirant les choses jusques aux plus haults prix qu'elles eussent sceu valoir, & assister à tout, pour tenir compte jusques au dernier denier : pour quoy faire il ne se fia point aux us & coutumes de l'encan : car il avoit tous les ministres qui s'en entremettoient pour suspects, comme les crieurs, les encherisseurs, jusques à ses propres amis : & pourtant parloit il luy mesme à part aux acheteurs qui mettoient à l'enchere; leur faisant haulser les prix, de sorte que la plus part des choses qui estoient en vente, furent ainsi estroussées.

XLIX. Cela irrita fort ses amis, quand ilz aperceurent qu'il se deffioit d'eulx, mesmement Munatius qui estoit son plus familier, lequel en prit un si grand despit, que jamais depuis ne se cuida rappaiser : de sorte qu'au livre que Cesar composa depuis contre luy, ceste partie de son accusation est l'endroit, auquel il insiste le plus longuement & plus aigrement. Toutefois Munatius mesme escrit, que ce courroux n'advint point par aucune deffiance de Caton, ains plus tost par le peu de respect que Munatius mesme luy portoit, & pour un peu de jalousie qu'il eut de Canidius : car il a escrit un livre

des faicts & dictés de Caton, que Thraseas ¹ a
suyvy en son histoire plus que nul autre, & en
ce livre il escrit qu'il arriva en Cypre le der-
nier, là où on luy bailla un meschant logis,
dont les autres n'avoient point voulu : & qui
plus est, quand il cuida entrer au logis de Caton,
on luy refusa la porte à cause qu'il estoit em-
pesché à emballer quelque chose avec Canidius :
dequoy s'estant plaint assez modestement, encore
luy feit on une fort rigoureuse responce, c'est
à sçavoir, « Que le trop aimer bien souvent est
» cause de faire haïr, ainsi comme escrit Theo-
» phrastus : comme maintenant, pource que tu
» m'aimes extremement, & qu'il te semble que
» je ne fais tel compte de toy que tu merites,
» tu te courrouces : & je te declare, que j'em-
» ploye Canidius plus volontiers que les autres,
» pource que je le cognois homme de bon es-
» prit, fidele & experimenté, estant venu dès
» le commencement, & ayant, à ce que j'ay
» peu voir, tousjours eu les mains nettes ».

L. Caton avoit premierement dit ces paroles
à Munatius de seul à seul : mais depuis il co-
gnut qu'il les avoit aussi refetées à Canidius, à
l'occasion dequoy il n'alloit plus soupper, comme
il avoit accoustumé, chez Caton : & estant ap-

¹ Voyez les Observations.

pellé au conseil, il ne s'y vouloit pas trouver, tant que Caton le menaça qu'il feroit saisir ses meubles & son bagage, comme lon fait à ceulx qui sont desobeiffans à justice : mais Munatius pour cela ne s'en soucia point, ains remonta sur mer, & s'en retourna à Rome, là où il garda bien longuement son courroux, jusques à ce. que Martia, laquelle estoit encore avec Caton, parla à luy, & ayans tous deux esté conviez de soupper chez un amy commun nommé Barca, Caton y arriva, que tous les autres estoient desja à table, & demanda où il se sereroit. Barca luy respondit qu'il se meist là où il luy plairoit, & après avoir regardé par tout, il dit, « Je me veux mettre » icy auprès de Munatius», & feir un circuit pour s'y aller mettre, sans routefois luy faire autre caresse durant tout le soupper. Ce neantmoins depuis à l'instance de Martia, qui l'en pria, Caton luy escrivit qu'il vouloit parler avec luy, & y alla Munatius dès le matin, là où Martia le reteint jusques à ce que tous les autres qui estoient aussi venuz saluer Caton, s'en fussent allez : & adonc Caton l'embrassa, & luy feir toutes les caresses qu'il est possible de faire. Nous avons bien voulu racompter cela un peu au long, estimans que ces petites choses là faittes en privé, donnent autant & plus à cognoistre les meurs & le naturel des hommes, que font

les grandes & faittes en public devant tout le monde.

II. Au reste Caton en ceste siene commission assembla bien jusques à environ la somme de sept mille talents ¹, & craignant la longueur du voyage qu'il avoit à faire par mer, il feit faire plusieurs petits coffrets, desquelz chascun contenoit environ douze cents cinquante escus ², & attacha à chascun une fort longue corde, au bout de laquelle il y avoit une bien grande piece de liege, à fin que si par cas d'aventure la navire venoit à se rompre, ces lieges montrasent l'endroit où seroit l'argent au fond de la mer : ainsi fut tout cest argent, excepté bien peu, conduit à sauyeté jusques dedans Rome. Mais ayant redigé par escript en deux livres tout ce qu'il avoit fait en ceste charge, il n'en peut sauver ny l'un ny l'autre : car un de ses serfs affranchis nommé Philargyrus en portoit l'un, le quel s'estant embarqué au port de Cenchrées ³, fut noyé, & le livre qu'il avoit, perdu quant & luy, & l'autre, luy mesme l'avoit bien conregardé jusques à Corfou ⁴, là où il se logea sur la place de la ville, y ayant fait tendre ses tentes :

¹ Quatre millions deux cents mille escus. *Amyot.* 32,685,250 livres de notre monnoie.

² Grec, deux talents & cinq cent drachmes.

³ Port oriental de Corinthe.

⁴ Grec, Corcyre.

mais les mariniers ayans froid la nuit, feirent un si grand feu qu'il se prit aux tentes, & brusta ce livre entre autres choses. Toutefois il menoit quant & luy les serviteurs du feu roy Ptolomæus, qui de son vivant avoyent eu en garde & en manient ses meubles & ses finances, lesquelz estoient pour clorre la bouche à ses envieux & malvueillans qui l'eussent voulu calumnier de quelque chose : toutefois il ne laissa pas de luy en faire bien mal, non qu'il eust ainsi soigneusement fait ce procès verbal de toute son administration pour approuver sa foy & faire cognoistre sa loyauté, ains pour servir aux autres d'exemple d'exquise diligence : mais la fortune luy envia cest honneur.

LII. Il arriva jusques dedans la ville de Rome par eau, & si tost que lon entendit qu'il approchoit, tous les magistrats, les presbtres, tout le senat, & une bonne partie du peuple sortirent au devant de luy le long de la riviere, de sorte que les deux rives du Tybre estoient toutes couvertes de monde, & sembloit proprement à le voir ainsi rebourser la riviere, que ce fust comme une entrée triumphale : toutefois il y en eut qui trouverent cela presumptueux & de mauvaise grace, qu'estans les consuls & les præteurs sortis au devant de luy, il ne feit point arrester son vaisseau, ains continua

de voguer tousjours contremont l'eau, estant dedans une galere royale à six rames pour banc, & n'arresta onques que toute sa flotte ne fust arrivée au port : toutefois quand on vint à porter à travers la place l'or & l'argent jusques dedans le tresor, le peuple s'esbahit d'en voir une si grande quantité, & le senat assemblé, luy decerna avec très honorables paroles une prature extraordinaire, & privilege de assister aux jeux en robbe de poutpre. Caton refusa ces honneurs, mais il pria le senat de donner liberté à un Nicias, maistre d'hostel du feu roy Ptolomæus, tesmoignant le soing, la loyauté & bonne diligence, dont il avoit usé en ceste affaire. Philippus pere de Martia, estoit ceste année là consul, de sorte que toute la dignité & l'autorité du consalat revenoit à Caton, pour autant que l'autre consul ne luy faisoit pas moins d'honneur pour sa vertu, que Philippus pour son alliance.

LIII. Au reste, Ciceron estant retourné de l'exil auquel l'avoit chassé Publius Clodius, & à son retour ayant grand credit s'en alla un jour au capitolé en l'absence de Clodius arracher & oster par force des tables que Clodius y avoit consacrées, es quelles estoit contenu tout ce qui s'estoit fait durant le temps de son tribuna-

¹ L'an de Rome 698. Caton n'avoit pas 38 ans, & la loi en exigeoit 40 pour la prature.

furquoy s'estant le senat assemblé, Clodius l'accusa de ceste violence & voye de faict. Ciceron luy respondit, que son election au tribunat ayant esté faite directement contre l'expresse prohibition des loix, estoit nulle, & par conséquent tout ce qu'il avoit ou fait, ou dit-en iceluy : mais en cest endroit Caton prit la parole, & se levant dit, qu'il estoit bien d'avis qu'en toute l'administration de Clodius, il n'y avoit rien eu de fain ny de bon : toutefois que si on cassoit & annulloit generalement tout ce qui autoit esté fait sous son autorité, il seroit force que lon annullast aussi tout ce que luy avoit manié en Cypre, pource que la commission, en vertu de laquelle il y auroit besongné, ne seroit pas legitime, puis que le magistrat, qui la luy auroit fait decerner, avoit esté indeuëment eleu. Mais pour estre Clodius de maison patriciene, son election au tribunat ne venoit point à estre faite contre les loix : car il estoit passé par adoption en une famille populaire, ce que la loy luy permettoit, & s'il avoit mal versé en son estat, comme beaucoup d'autres, il s'en falloit adresser à luy pour luy faire reparer sa faulte, & s'en prendre à l'homme qui avoit abusé, non pas destruire l'autorité du magistrat, qui n'en pouvoit mais & y estoit iutereffé.

LIV. Ciceron fut mal content de Caton pour ceste contradiction, & desista bien long temps

de luy monstrier signe d'amitié, comme il faisoit au paravant : mais depuis ilz se reconcilierent ensemble par une telle occasion : Pompeius & Crassus ayans esté parlementer avec Cæsar, lequel à ceste intention avoit repassé les monts des Alpes, avoyent arresté entre eux, qu'ilz demanderoient un second consulat, & quand ilz seroyent instalez en l'estat, ilz feroient prolonger à Cæsar son gouvernement, pour encore autant de temps comme il l'avoit desja tenu, & se feroient aussi bailler à eulx mesmes des provinces les meilleures & les plus grandes, avec de puissantes armées, & argent pour les entretenir & soudoyer : ce qui estoit une manifeste conspiration, pour departir entre eux tout l'empire Romain, & ruiner entierement la chose publique. Il y avoit lors plusieurs gens d'honneur qui se preparoyent pour demander le consulat : mais quand ilz veirent que Pompeius & Crassus se presentoyent à la poursuite, tous les autres se deporterent, exceptez Lucius Domitius, qui avoit espousé Porcia, la sœur de Caton : à la suasion duquel il ne se vouloit point deporter de sa poursuite, ny ceder en un combat, où il n'estoit pas question d'un magistrat, ains de la liberté mesme du senat & du peuple Romain. Si courut incontinent un bruit parmy la plus saine partie du peuple, qu'il ne falloit pas per-

mettre que la puissance de Pompeius se joignist à celle de Crassus par le moyen de ce magistrat, pource que lors elle seroit de beaucoup trop grande & trop forte, & qu'il en falloit pour le moins oster l'un : à l'occasion dequoy les bons se rengeoient de la part de Domitius, l'admonestans & enhortans de poursuyvre à bon esciant, & qu'il trouveroit plusieurs de ceux qui n'ozoyent parler ouvertement, pour la crainte de ces deux puissans personnages, qui luy favoriseroient soubs main au jour de l'election, quand ce viendroit à donner les voix. Ce que craignans Pompeius & Crassus, dresserent une escarmouche à Domitius le matin avant jour, ainsi comme il s'en alloit avec des torches au champ de Mars où se faisoit l'election, là où le premier qui portoit la torche devant Domitius, fut navré si grièvement, qu'il tumba mort à ses pieds, & après on frappa sur les autres, qui se sentans blecez s'en fouyrent, les uns d'un costé, les autres d'un autre, excepté Domitius & Caton : car Caton le reteint, combien qu'il fust luy mesme blecé en un bras, en le priant de demourer, & de n'abandonner point la defense de la liberté à l'encontre des tyrans, qui donnoient assez à cognoistre comment ilz useroient de leur magistrat, puis qu'ilz y aspiroyent & y pretendoient par si malheureuses & si mes-

chantes voyes : toutefois à la fin Domitius ne voulut plus demourer en ce petil , ains s'en fouit en sa maison.

LV. Ainsi furent Crassus & Pompeius declarez consuls sans contredit : mais Caton pour cela ne se rendit point encore , ains se presenta luy mesme à demander un office de præteur , à fin que ce luy fust à tout le moins comme un fort , pour de là faire teste à l'encontre de leur consulat , & que n'estant point personne privée , il eust plus d'autorité pour resister à ceulx qui tenoyent les premiers & principaux magistrats. Mais eulx craignans que la præture pour la reputation de Caton , ne vinst à estre en autorité & puissance egale au consulat , feirent premierement assembler à la haste le senat , sans que la plus part des senateurs en sceust rien , & en celle assemblée feirent arrester par decret du senat , que ceulx qui seroyent eleuz præteurs , entreroyent incontinent en possession & exercice de leurs offices , sans attendre le temps prefix & ordonné par les loix , durant lequel on pouvoit mettre en justice , ceulx qui auroyent achepté à deniers comptans les voix du peuple : puis ayans par ce decret forgé une impunité & licence de mal faire à ceulx qui y pretendoyent par telz moyens , ilz meirent en avant à ceste brigade quelques uns de leurs ministres , donnans eulx mesmes
l'argent

l'argent pour corrompre le peuple, & presidents eux mesmes à l'élection : mais nonobstant toutes leurs menées, la vertu & reputation de Caton les surmontoit encore, pource que le peuple luy portoit une si grande reverence, qu'il estimoit que ce seroit une indignité trop lasche de vendre Caton par ses suffrages, qui meritoit d'estre acheté pour le faire præteur, tellement que la premiere lignée estant appelée pour donner ses voix, le declara præteur : ce que voyant Pompeius, rompit aussi tost l'assemblée de l'élection, faignant trop deshonteement, qu'il avoit ouy tonner, pource que les Romains ont accoustumé de detester cela, & ne jamais ratifier rien, quand il survient quelque tel signe & prodige celeste : mais depuis ilz baillerent encore plus d'argent que devant, & avec cela chasserent les plus gens de bien hors du champ de Mars, & feirent tant à la fin par leurs pratiques, que un Vatinius fut eleu & déclaré præteur au lieu de Caton : & dit on que ceulx qui avoyent si iniquement & si meschamment employé leurs voix, comme par un remords de conscience, s'en fouirent incontinent du champ, & les gens de bien demourerent fort desplaisans du tort que lon avoit fait à Caton. Il se trouva là un des tribuns du peuple, qui teint assemblée de ville, là où Caton se tirant en avant, predict hault & clair devant toute

l'assistance, comme s'il eust esté inspiré de quelque divin esprit prophetique, tout ce qui estoit pour advenir de ces menées à la chose publique, & irrita les escoutans à l'encontre de Pompeius & de Cæsar, en remontrant qu'ilz se sentoyent coupables de telz attentats, & pretendoyent à faire de telles choses au maniemment des affaires, qu'ilz avoyent craint que Caton ne fust eleu præteur, de peur qu'il ne les esclairast de trop près, ou qu'il n'empeschast leurs desseings. Finablement quand il s'en retourna en sa maison, il fut accompagné luy seul de plus de gens, que ne furent tous les autres ensemble, qui avoyent esté eleuz præteurs.

LVI. Et comme Caius Trebonius tribun du peuple eust mis en avant un edict touchant la distribution des provinces aux nouveaux consuls, que l'un eust toutes les Hespagnes & toute l'Afrique, & l'autre toute l'Égypte & toute la Syrie, avec puissance de faire la guerre à qui bon leur sembleroit, tant par mer que par terre, tous les autres n'esperans pas le pouvoir empescher ne rien faire à l'encontre, se deporterent aussi d'y contredire : mais Caton estant monté sur la tribune aux harengues, avant que le peuple commenceast à donner ses suffrages, à peine luy voulurent bailler deux heures pour parler : encore à la fin voyans qu'il tiroit la chose en longueur pour consumer le temps à les prescher, & leur

remonstrer ce qui en adviendrait , ilz ne le voulurent plus laisser dire , ains envoyèrent un sergent qui le tira à bas par force : & comme neantmoins pour estre à bas , il ne cessast point de crier , & que plusieurs prestassent l'oreille à ses paroles & s'en emeussent , le sergent l'alla encore prendre , & l'emmena hors de la place : mais il ne l'eut pas plus tost lasché , qu'il s'en retourna incontinent vers la tribune aux harengues , où il recommença à crier plus que jamais , enhortant le peuple de vouloir avoir l'œil à secourir la liberté & la chose publique , qui s'en alloit perdue : ce qu'il fit par tant de fois , que finalement Trebonius . n'en pouvant plus endurer , commanda au sergent de le mener en prison : mais le peuple s'en alla après l'escoutant tousjours & prestant l'oreille à ce qu'il disoit , de maniere que Trebonius mesme craignant qu'il n'en sourdît quelque scandale , fut contraint de commander au sergent qu'on le laissast aller. Ainsi fit Caton passer tout ce jour là sans rien conclurre : mais le lendemain les adherents de la ligue contraire ayans intimidé partie des Romains , & gagné l'autre par belles paroles & par corruption d'argent , engardé par force d'armes l'un des tribuns du peuple Aquilius de sortir hors du senat , après avoir jetté violement Caton hors de la place , pource qu'il

crioit qu'il avoit tonné, & ayans blecé sur la place mesme plusieurs hommes, dont les uns y moururent tout sur l'heure, ilz feirent à la fin passer leur edict à vive force par les voix du peuple.

LVII. Dequoy plusieurs estans irrités s'en allerent en troupe pour renverser & abbatre les images de Pompeius, mais Caton y survenant les en garda : & comme puis après on eust aussi proposé l'edict des provinces & armées que Cæsar demandoit, Caton ne s'en adressa plus au peuple pour le cuider empescher, ains à Pompeius, luy denonceant & protestant, qu'il se mettoit luy mesme sur le col le joug de Cæsar, dont il ne s'appercevoit pas alors, mais que bien tost il luy commenceroit à peser, & s'en trouveroit pris & attaché : & lors quand il ne le pourroit plus supporter, ny trouver moyen de s'en depestrer, il se rejetteroit avec luy entre les bras de la chose publique, & luy souviendrait des admonestemens de Caton, lesquels n'estoyent pas moins profitables à Pompeius en particulier, que justes & raisonnables en soy. Caton luy fit par plusieurs fois de telles remonstrances : mais Pompeius n'en tint compte, pource qu'il ne pouvoit pas croire que Cæsar se deust jamais changer, & qu'il se fioit trop en sa prosperité, & en la grandeur de sa puissance.

LVIII. Au reste Caton estant eleu præteur pour l'année ensuyvant, sembla n'adjouster pas tant

d'honneur & de dignité au magistrat en l'administrant droittement, que luy en oster & le ravaller, en allant souvent les pieds nuds & sans saye à son tribunal & siege prætorial, president en tel estat à des jugemens criminelz, où il estoit question de la vie de personnes de qualité : & disent aucuns qu'il tenoit l'audience mesmes après disner, ayant beu du vin : mais cela n'est pas veritable. Au reste voyant que le peuple Romain estoit tout perdu & gaste par les corruptions de ceux qui aspiroyent aux magistrats, & que le peuple en faisoit desja un estat comme de gaing ordinaire, pour taschet à defraciner entierement ce vice de la chose publique, il suada au senat de faire un statut & ordonnance, « Que desor-
 » mais ceux qui seroyent eleuz à quelque ma-
 » gistrat, s'ilz n'avoyent personne qui les accusast,
 » fussent tenus de s'en venir d'eulx mesmes pre-
 » senter en jugement : & après avoir presté entre les
 » mains des juges le serment de dire verité, rendre
 » compte & raison judiciairement des moyens,
 » par lesquelz ilz seroyent parvenus à leurs offices».

LIX. Ceste ordonnance le rendit fort odieux à ceux qui briguoyent les offices, de sorte qu'un matin ilz s'en allerent en grand nombre au parquer où il tenoit son audience, & se prirent à crier contre luy, en luy disant des injures, & luy jettant des pierres, tellement que les assistens

furent contraints de s'en fouir du parquet, & luy mefme en eftant poulfé hors par la foule du peuple, & tiré çà & là, eut beaucoup d'affaire à gagner la tribune aux harengues, là où fe dressant en pieds, il reprima incontinent le bruit & l'emeute du peuple, par l'affurance & la fevere conftance de fon vifage feulemeut : puis leur ayant fait des remonftances telles que le temps & l'affaire le requeroient en paifible audience, il appaifa en peu d'heure entierement tout le tumulte qui s'eftoit emeu. Dequoy comme le fenat le louaft, il leur dit à tous hault & clair, « Et je » n'ay point occafion de vous louer, attendu que » vous avez abandonné un præteur en danger » de fa perfonne, fans vous mettre aucunement » en devoir de le fecourir ». Mais ceulx qui briguoyent les offices fe trouvoyent en grande perplexité, pource que d'un cofté ilz craignoient de defpendre argent pour achepter les voix du peuple, & d'autre cofté auffi ilz avoyent peur que un autre le faifant, ilz ne decheuffent de leur pourfuitte. Si feirent tous un accord enfemble, qu'ilz depoferoyent chacun la fomme de douze mille cinq cents efcus¹, & puis feroient juftement

¹ Grec, 115,000 drachmes, 97,165 livres 12 fols de notre monnoie. Le traduëteur latin a mis 500,000 festerces, comme on le lit dans une lettre de Ciceron à Articus, liv. 4 ; d'où il fuit que le festerce étant le quart de la drachme, vaut, felon les évaluations que nous avons fuivies, 3 fols, 10 deniers & $\frac{1}{16}$ de notre monnoie.

& droittement leur poursuite, à la charge, que celui qui se trouveroit y avoir fait faulte, & qui se feroit aidé de corruption, perdist l'argent qu'il auroit depósé. Cest accord faict entre eulx, ilz eleurent pour depositaire, tesmoing & arbitre Caton, entre les mains duquel il estoit dit qu'ilz deposeroient leur argent. Ce contract fut passé en sa maison, où ilz baillèrent tous pleges & respondans au lieu de l'argent, qu'il ne voulut pas recevoir : & quand se vint au jour de l'election, Caton assistant à un tribun du peuple qui la regissoit, & observant soigneusement comme lon procedoit à donner les voix, apperceut que l'un des poursuyvans faisoit contre les pactions du contract, & le condamna à payer la somme accordée aux autres, lesquelz estimans & louans grandement sa justice & entiere preudhommie, ne voulurent point de l'amende, jugeans que celui qui avoit forfait, estoit assez puny d'estre seulement condamné par Caton.

LX. Cest acte despleut aux autres senateurs, & suscita grande envie à Caton, comme s'il se fust voulu attribuer à luy seul l'autorité & la puissance de tout le senat, des juges & des magistrats. Car il n'y a point de vertu dont la gloire & la fiance engendre plus d'envie, que fait la justice : pource que ordinairement le peuple adjoust foy & donne autorité grande à ceulx là,

456 CATON D'UTIQUE.

plus qu'à nulz autres : car il ne les honore pas seulement, comme il fait les vaillans, ny ne les a pas en admiration, comme les sages & prudents, ains les aime davantage, se repose & se confie en eulx : là où des autres il en craint les uns, & se deffie des autres : &, qui plus est, il estime que la vaillance & la prudence viene plus tost de la force de nature, que de bonne volonté, supposant que l'une soit une vivacité & subtilité d'esprit seulement, & l'autre une force de cueur qui vient de la nature : là où chacun peult estre juste, prouueu qu'il le vueille seulement, qui est la raison pourquoy l'injustice est le vice dont on a le plus de honte, pource que c'est une malice & mauuaistié volontaire. & qui n'a point d'excuse. Voilà pourquoy tous les grands estoyent ennemis de Caton, comme estans par luy convaincus, mesmement Pompeius, qui estimoit que la reputation de Caton estoit la ruine de son autorité : & à ceste cause suscitoit tousjours quelqu'un pour le harceler, & luy dire des injures, entre lesquelz estoit Publius Clodius, qui s'estoit de rechef racconté avec Pompeius, & crioit à l'encontre de Caton, qu'il avoit desrobbé beaucoup d'argent au public en sa commission de Cypre, & qu'il faisoit la guerre à Pompeius, pourautant qu'il avoit refusé d'espouser sa fille.

LXI. A quoy Caton respondit, qu'il avoit

rapporté de Cypre plus d'or & d'argent à la chose
 publique, sans un seul cheval ny un seul gendarme,
 que n'avoit Pompeius avec tous ses triumphes &
 toutes ses guerres, dont il avoit travaillé tout le
 monde. Au demourant, qu'il n'avoit jamais re-
 cherché l'alliance de Pompeius, non qu'il l'en
 estimast indigne, mais pource qu'il voyoit qu'il
 ne marchoit pas d'un mesme pied que luy en
 l'administration de la chose publique : « Car on
 » m'a offert un gouvernement de province au
 » sortit de ma prature, que j'ay refusé, là où
 » luy en prent à force, & en donne à d'autres :
 » & en fin il a nagueres presté une armée de six
 » mille hommes à César pour s'en servir en la
 » guerre des Gaules, sans que ny l'autre nous
 » l'ait demandée, ny luy, la luy ait ottroyée
 » de nostre consentement, ains voyons que telz
 » exercites, tant d'armes, tant d'hommes & de
 » chevaux, sont desormais dons reciproques que
 » s'entredonnent & s'entreprestent. noz particu-
 » liers citoyens à noz despens : & luy Pompeius
 » retenant seulement le tiltre d'empereur & de
 » capitaine general, comme ses armées & ses
 » provinces pour les régir & gouverner à d'au-
 » tres, pendant qu'il demeure icy à nourrir des
 » seditions en la ville, & à susciter & entretenir
 » des troubles ès elections des magistrats, bastissant
 » par tel artifice les moyens de mettre la chose

» publique en telle confusion, que lon soit contraint
 » de luy donner & deferer puissance souveraine ».
 Voilà comment il se vengea de Pompeius.

LXII. Or avoit il entre ses familiers un nommé Marcus Faonius, tel que lon dit qu'estoit anciennement Apollodorus le Phalerien à l'endroit de Socrates, qui le contrefaisoit & l'imitoit en tout ce qu'il pouvoit. Cest homme ne s'emouvoit pas lentement ny froidement de la raison, ains s'en passionnoit jusques à en sortir hors de soy & à en entrer en fureur comme une personne yvre. Il demanda une année l'office d'ædile, dont il fut deboutté : mais Caton qui luy assistoit à sa brigade, s'advisa que les tables ou s'escrivoyent les voix, estoient toutes escrites d'une main, & par ce moyen ayant convaincu la faulseté, il en appella devant les tribuns du peuple, & feit tant, que l'election fut déclarée nulle. Et depuis Faonius ayant esté déclaré & installé ædile, Caton luy aida en toutes les autres charges de son magistrat, & mesmement à ordonner au theatre les jeux qui ont accoustumé de se faire à l'entrée de ce magistrat, pour donner passe-temps au peuple, èsquelz jeux il ne donna pas aux joueurs, musiciens & autres ministres des jeux, des couronnes d'or, comme faisoient les autres ædiles, ains des chappelets faits de tendres branches d'olivier sauvage, comme lon fait en

la Grece ès jeux Olympiques : & au lieu que les autres distribuoyent en leurs données aux pauvres de riches dons, luy donna aux Grecs de nation, de la poirée, des lectues, des reforts & des poires : & aux Romains, des pors de terre pleins de vin, de la chair de porc, des figes, des concombres & des fagots de bois de petite valeur : dont les uns se mocquoyent pour la viliré, les autres les reveroyent, voyans que Caton qui estoit si severe & si austere de nature, s'en mesloit, & peu à peu convertissoyent ceste reverence en plaisir. Et finablement Faonius luy mesme se jettant parmy le peuple, s'alla seoir entre les regardans pour voir jouer ses jeux, & batoit le premier des mains applaudissant à Caton qui conduisoit tout, & luy criant tout hault qu'il donnaist aux joueurs qui faisoient bien, & qu'il les honoraist, incitant ceulx qui estoient auprès de luy à faire de mesme, leur disant qu'il avoit donné toute puissance à Caton en ses jeux. Au mesme temps Curion compagnon & concurrent de Faonius en cest office d'edile faisoit en un autre theatre des jeux magnifiques, mais tout le peuple l'abandonnoit pour aller voir Faonius, qui faisoit à bon esciant l'homme privé, & Caton l'entreprenneur & le conducteur des jeux. Caton faisoit cela pour se mocquer de la despesne folle & superflue, que lon a accouf-

tumé de faire en telles choses, & monstrier que qui veult faire des jeux, il les fault faire en jouant, en les accompagnant d'une grace simple, non pas d'un appareil de grand coust, ny d'une superfluité sumptueuse, en employant beaucoup de sollicitude & de despenſe en choses de neant.

LXIII. Quelque temps ² depuis comme Scipion, Hypſeus & Milon aspirassent tous trois enſemble au conſulat, non ſeulement par corruption & diſtribution de deniers, qui eſtoient ja crimes tous communs & ordinaires ès brigues des eſtats de la choſe publique, ains ouvertement par armes, bateries & meurtres, tendans à guerre civile, tant ilz eſtoient tous trois audacieux & temeraires : aucuns meirent en avant que lon devoit commettre la charge de preſider aux elections à Pompeius, à fin que lon y procedaſt legitimement : à quoy Caton s'oppoſa du commencement, diſant qu'il ne falloir pas que les loix priſſent leur aſſurance de Pompeius, ains au contraire, Pompeius d'elles. Toutefois à la fin voyant que ce deſordre duroit trop longuement, ſans qu'il y euſt de ſouverains magiſtrats dedans Rome, & qu'il y avoit tous les jours, comme trois camps ſur la place, tellement qu'il eſtoit bien difficile d'arreſter deſor-

² L'an de Rome 701.

mais le mal, qu'il ne tirast plus oultre : alors il fut d'avis que plus tost que d'attendre l'extreme necessité, par volontaire concession du senat, on meist les affaires de la chose publique ès mains de Pompeius seul, en elisant le moindre mal pour obvier & remedier aux plus grands, & introduisant volontairement une espece de monarchie, plus tost que de differer jusques à ce, que l'issue de ceste sedition en produisist une forcée & contrainte. Parquoy, comme Bibulus qui estoit allié de Caton, eust mis ce conseil en avant au senat, qu'il falloit elire Pompeius seul consul : pource, disoit il, « Que où la chose » publique retournera en bon estat par l'ordre » qu'il y mettra, où, pour le moins, Rome servira au moins mauvais seigneur » : Caton adonc se levant, contre l'opinion & l'attente de toute l'assistance, approuva cest avis, disant qu'il valoit mieulx qu'il y eust un magistrat en la ville, quel qu'il fust, que de n'y en avoir du tout point, & qu'il esperoit que Pompeius sçauroit bien donner ordre à la confusion presente, & qu'il luy prendroit à la fin envie de conserver la chose publique, quand il verroit que lon l'auroit ainsi liberalement commise à sa foy.

LXIV. Ainsi ayant esté Pompeius par ce moyen eleu seul consul ¹, il l'envoya prier de venir un

¹ L'an de Rome 702.

peu devers luy ès jardins qu'il avoit aux faulxbourgs de la ville. Caton y alla, où il fut recueilly avec toutes les careffes, embrassemens & demonstrations d'amitié qu'il est possible de faire : & finablement Pompeius, après l'avoir bien fort remercié de l'honneur qu'il luy avoit fait, le pria de luy vouloir estre assesseur & conseiller ordinaire en son magistrat. Caton luy respondit, que ny il n'avoit dit ce qu'il avoit dit au paravant pour aucune malvueillance qu'il luy portast, ny ce dernier advis aussi pour bien qu'il luy voulust, ains le tout pour le bien & l'utilité de la chose publique : au demourant, quant à ses affaires privez & particuliers, qu'il le conseileroit toutes & quantes fois qu'il luy en demanderoit son advis : mais quant au public, qu'il en diroit tousjours ce qui luy sembleroit pour le mieulx, encore qu'il ne luy en demandast rien : & de faict il le feit tout ainsi comme il le dit. Car tout premier, comme Pompeius establist de griefves peines & amendes nouvelles à l'encontre de ceulx qui par argent auroient corrompu les voix du peuple, il luy conseilla de ne remuer rien du passé, ains seulement prouvoir à l'advenir, pour autant qu'il seroit mal aisé de arrester un terme de temps, jusques auquel on devroit rechercher les fautes passées : & que davantage, si lon establissoit les peines plus re-

centes que les crimes, on feroit tort à ceulx qui seroyent appellez en justice, de les punir par une ordonnance qu'ilz n'auroyent point transgressée : & depuis ayans esté accusez aucuns personnages de qualité amis & familiers de Pompeius, Caton appercevant qu'il se laissoit aller, & fleschissoit en beaucoup de choses, il le redressa, & le tenfa bien asprement. Davantage Pompeius avoit par edict aboly la coustume de louer en jugement les criminelz accusez, & neantmoins luy mesme ayant composé une harengue à la louange de Munatius Plancus, l'envoya aux juges pendant que sa cause se plaidoit. Caton, qui d'aventure estoit un des juges en ce procès là boucha ses oreilles avec ses deux mains, defendant que lon ne leust ce tesmoignage là : à raison dequoy Plancus le recusa encore après que les plaidoyers eurent esté ouys d'une part & d'autre : mais nonobstant cela, il ne laissa pas d'estre condamné pourtant. Brief Caton tenoit en telle peine & perplexité ceulx qui estoient accusez, qu'ilz ne sçavoyent bonnement comment ilz devoient faire de luy : car ilz ne l'ozoyent laisser entre leurs juges, ny le recuser aussi : car il y en eut plusieurs condamnez, pource qu'en recusant Caton, il sembla qu'ilz ne se confiasent point en leur innocence : & reprochoit on à aucuns pour un grand vitupere;

qu'ilz n'avoient pas voulu accepter Caton pour juge, quand on leur avoit présenté.

LXV. Pendant que ces choses se passoyent à Rome, César estoit en la Gaule où il faisoit la guerre, & ne se départoit point des armes quant à luy : mais neantmoins par dons & argent il alloit tousjours gagnant amis dedans Rome pour y estre aussi puissant, de sorte que desja les admonestemens & prediCTIONS de Caton commenceoyent à esveiller Pompeius du sommeil, dont il avoit esté si longuement endormy, & à luy faire un peu songer au peril que paravant il n'avoit jamais voulu croire : mais toutefois le voyant encore plein de paresse & de doute, n'ozant mettre à bon esciant la main à l'œuvre, pour empescher les desseings de César, il luy prit volonté de demander le consulat, en intention que où il luy osteroit incontinent les armes, où il descouvriroit son embusche, & feroir voir la fin où il pretendoit. Ses competeurs estoyent deux autres gens de bien & honestes hommes aussi, dont l'un Sulpitius ² avoit receu beaucoup d'honneur & d'avancement par le moyen du credit & de l'autorité de Caton, à raison de quoy plusieurs estimoyent qu'il ne faisoit gueres honestement, ains se monstroir

² Et l'autre M. Claudius Marcellus, qui furent consuls l'an de Rome 703.

ingrat, de soy formaliser contre luy en ceste poursuite : toutefois jamais Caton ne s'en plaignit, ains au contraire dit qu'il ne se falloir point esbahir s'il ne vouloit point ceder à autrui, ce qu'il estimoit estre le plus grand bien qui luy peust advenir : mais il suada au senat de faire un statut, que desormais ceulx qui brigueroyent un estat, supplieroyent & requerroient eulx mesmes seuls le peuple, & ne le feroient point requerir par d'autres : ce qui irrita bien encore davantage le commun peuple contre luy, attendu que non seulement il leur avoit osté le gaing manuel de l'argent qu'ilz souloyent recevoir ès elections pour donner leurs voix, mais encore les privoit des moyens de faire plaisir à beaucoup de gens, rendant le populaire & pauvre & mesprisé tout ensemble. Qui plus est, n'ayant pas la grace attrayante pour gagner la faveur de la commune en priant luy-mesme, ains aimant mieulx retenir la dignité de ses meurs & de sa vie, que d'acquiescer celle du consulat, luy mesme fit sa brigue, & ne voulut pas laisser faire à ses amis les choses par lesquelles on acquiert & gaigne les cueurs d'une commune. Aussi se trouva il debouté de sa demande. Si avoit ce rebut accoustumé d'apporter non seulement aux refusez, mais aussi à leurs parents, amis & alliez, un deuil & tristesse, avec une honte qui duroit

par plusieurs jours : mais Caton en feit si peti de compte, que le lendemain au matin il joua à la paulme avec ses familiets dedans le champ de mars, & après le disner s'en alla sur la place sans souliets en ses pieds & sans fayon, se promener comme il avoit accoustumé. Dequoy Ciceron le reprit, en ce que le temps ayant besoing d'un tel magistrat comme luy, il n'y avoit pas mis assez de peine, ny ne s'estoit estudié de gaigner la faveur de la commune par courtoisie de les caresser & de leur parler doucement, & onques puis n'avoit voulu essayer d'y parvenir, ains s'en estoit totalement deporté, combien qu'il demanda depuis une autre fois l'office de prature. A quoy Caton respondoit, que quant à la prature, il n'en avoit point esté debouré de la volonté du peuple, pource qu'il avoit esté forcé, corrompu & gaigné par argent : mais en l'election des consuls, n'y estant entrevenu corruption quelconque, il cogneut evidemment que c'estoit pour estre desaggreable au peuple, à cause de ses meurs : lesquelz changer à l'appetit d'autrui, ou bien en usant de mesme, retumber encore en pareil inconvenient de refus, ne seroit pas faire en homme de sens & d'entendement.

LXVI. Au reste, César s'estant attaché à des nations fort belliqueuses, & les ayant, non sans

grands travaux & perilz subjuguées, & davan-
 tage ayant couru sus aux Allemans, avec les-
 quelz le peuple Romain avoit la paix, & en
 ayant bien desfait trois cents mille, ses amis
 requeroient que le peuple en feist sacrifices solen-
 nelz pour en rendre graces aux dieux : mais
 Caton en plein senat dit, qu'il estoit d'adviz,
 que lon le devoit livrer entre les mains de ceulx
 qu'il avoit à tort oultragez, pour en faire telle
 punition que bon leur sembleroit, à fin de re-
 jeter sur luy seul tout le peché de la paix violée,
 & ne le recevoir point sur la ville qui n'en pou-
 voit mais : toutefois, dit il, « Bien devons nous
 » faire sacrifices aux dieux pour leur rendre gra-
 » ces de ce qu'ilz n'ont pas tourné la vengeance
 » de la fureur & temerité du capitaine sur noz
 » pauvres soudards qui n'en sont point culpa-
 » bles, ains ont pardonné à la chose publique ».
 Dequoy Cæsar estant adverty, escrivit une lettre
 missive au senat, contenant plusieurs injures &
 plusieurs charges qu'il mettoit sus à Caton : le-
 quel se levant, non comme picqué de soudaine
 cholere ny d'envie de contester, ains de sens
 froid & rassis, ne plus ne moins que s'il eust
 premedité de longue main ce qu'il avoit à dire,
 monstra que les imputations que Cæsar luy met-
 toit sus par ses lettres, n'estoyent que brocards
 de mocquerie qu'il avoit ramassez, comme pour

se gaudir, ou pour faire rire la compagnie : mais à l'opposite commençant à descouvrir tous ses conseils dès son commencement, & toute son intention, aussi particuliere comme s'il n'eust pas esté son adversaire, mais plus tost complice & compagnon de sa conjuration : & remontrant à l'assistance, que ce n'estoyent pas les Allemans ny les Gaulois qu'ilz devoient redoubter, ains luy mesme, s'ilz estoient sages, il emeut & irrita tellement les escoutans, que les amis & adherents de Cæsar se repentirent bien d'avoir présenté ses lettres & de les avoir fait lire, pource qu'en ce faisant ilz avoyent donné à Caton occasion de deduire plusieurs propos raisonnables, & plusieurs accusations veritables à l'encontre de Cæsar : toutefois il ne fut pour lors rien arresté contre luy au senat, ains seulement fut dit, qu'il estoit raisonnable de donner un successeur à Cæsar : & adonc ses adherents requirèrent, que Pompeius doncques laissast les armes aussi, & qu'il quittast les provinces qu'il tenoit, ou autrement que lon ne contraignist point non plus Cæsar de ce faire.

LXVII. Caton adonc se prit à crier, que n'estoit bien ce qu'il avoit tousjours predit, & que Cæsar s'en venoit pour opprimer la chose publique, usant ouvertement encontre elle mesme des armes qu'il avoit obtenues par fraude & trom-

perie d'elle : mais pour chose qu'il sceust dire, il ne gaignoit rien hors du senat, à cause que le peuple favorisoit à Cæsar, & vouloit tousjours qu'il demourast très grand : & le senat adjouſtoit bien foy à son dire, mais il redoubtoit le peuple, juſques à ce que les nouvelles vindrent que la ville d'Ariminum eſtoit priſe, & que Cæſar s'en venoit en armes droit à Rome : car alors tout le monde jetta les yeux ſur Caton, & le peuple & Pompeius confeſſerent, que luy ſeul avoit bien preveu dès le commencement ; le but où pretendoit Cæſar, & l'avoit franchement predit. Et adonc leur dit Caton, « Si vous » m'euffiez voulu croire, ſeigneurs, & ſuyvre » mon conſeil, vous ne craindriez pas mainte- » nant un homme ſeul, ny n'auriez pas auſſi » voſtre eſperance en un autre ſeul ». Pompeius à cela reſpondit, que Caton avoit pour certain bien plus véritablement prophetizé, mais que luy y avoit plus amiablement ouvré : & Caton conſeilla au ſenat de mettre les affaires en la main de Pompeius : pource, dit il, « Que ceulx » qui ſont les grands maulx, ſont ceulx qui » ſçavent mieulx les moyens de les guarir ».

LXVIII. Mais Pompeius n'ayant point autour de luy d'armée ſuffiſante pour attendre Cæſar, & voyant encore ce peu de gens qu'il avoit, aſſez froidement encouragez, abandonna Rome.

Et Caton ayant resolu de s'en aller quant & luy, envoya devant son jeune filz à Munatius qui estoit au pais des Brutiens, & mena son aîné quant & soy : & au surplus ayant sa maison & ses filles besoing de quelqu'un qui les gouvernast, il reprit encore Martia, qui lors estoit veufve & avoit beaucoup de biens, pource que Hortensius venant à mourir l'avoit instituée son heritiere : ce que Cæsar en son libelle diffamatoire contre Caton note fort injurieusement, luy reprochant avarice & sa mercenaire convoitise de gagner par faite nopces : « Car s'il avoit, » dit il, besoing de femme, pourquoy la cedoit » il premierement à un autre ? Et s'il n'en avoit » que faire, pourquoy la reprenoit il puis après ? » Si n'estoit qu'il la bailla du commencement » à Hortensius comme une amorche, & la luy » presta jeune en intention de la reprendre riche. » Toutefois à l'encontre de cela il suffit, ce me » semble, de respondre & alleguer ces vers » d'Euripides » :

En premier lieu, je vien à contredire
Ce qui ne loist seulement pas à dire :
Car reprocher nullement on ne deust
A Hercules, que le cueur lasche il eust.

Car il me semble que c'est tout un, de reprocher à Hercules couardise, & à Caton avarice.

& convoitise de gaigner : mais si pour quelque autre regard il a failly en ce mariage , c'est chose à l'aventure que lon pourroit bien disputer : car incontinent après qu'il eut espousé Martia , & qu'il luy eut commis sa maison , son mefnage & ses filles , il se meit à suyvre Pompeius , & onques puis ce jour là , comme lon dit , il ne feit ny ses cheveux , ny sa barbe , ny ne meit chapeau de fleurs sur sa teste , ains se mainteint tousjours jusques à la mort en estat de dueil , avec un morne silence & une grande tristesse de cueur en ceste calamité de la chose publique , aussi bien quand ceulx de son party avoyent quelque avantage , comme quand ilz perdoient. Et luy estant escheut par le sort le gouvernement de la Sicile , il passa à Syracuse , là où estant adverty que Asinius Pollio de la part des ennemis estoit arrivé à Messene ¹ avec force de gens de guerre , il luy envoya demander , qui le faisoit là venir : & Pollio luy demanda à l'encontre , qui estoit cause de ce mouvement de guerre.

LXIX. Et ayant nouvelles que Pompeius avoit de tout poinct abandonné l'Italie , & estoit delà la mer campé joignant la ville de Dyrrachium , il dit adonc qu'il voyoit au gouvernement des dieux une grande incertitude & grande variété.

¹ Messine.

attendu que Pompeius avoit au paravant tousjours esté heureux, lors qu'il ne faisoit rien de bien, ny selon le droit & l'équité, & maintenant qu'il vouloit préserver son païs & combattre pour la liberté, il le voyoit destitué de son bonheur. Si dit adonc qu'il estoit bien assez fort pour chasser Asinius hors de la Sicile, s'il eust voulu : mais pource qu'il luy venoit un autre renfort, il ne voulut pas affliger ny travailler ceste isle des calamitez que porte la guerre. Parquoy après avoir conseillé aux Syracusains qu'ilz se rengeassent du costé des plus forts pour se conserver, il monta sur mer, & s'en alla trouver Pompeius, là où il fut tousjours d'un mesme advis de tirer ceste guerre en longueur, esperant tousjours qu'il se pourroit faire quelque appointement, & ne voulant point que lon vinst à la bataille, là où il seroit force, que l'une des parties se trouvant plus foible que l'autre ; fust mise au fil de l'épée : & si suada à Pompeius & au conseil qui estoit à l'entour de luy, de decerner choses respondentes à cela, que lon ne saccageast en celle guerre aucune ville qui fust de l'empire Romain, & que lon ne feist mourir aucun citoyen Romain, sinon qu'il se trouvast en bataille les armes au poing : en quoy il acquit grand honneur, & attira plusieurs hommes au party de Pompeius pour la con-

sideration de sa bonté, clemence & humanité.

LXX. Et estant envoyé en Asie pour aider à ceulx qui estoient commis à assembler vaisseaux & lever gens de guerre, il mena quant & soy sa sœur Servilia, & le filz que Lucullus avoit eu d'elle, pource que depuis sa viduité elle l'avoit tousjours suyvy, & en ce faisant avoit beaucoup diminué du mauvais bruit qu'elle avoit au paravant, quand on veit qu'elle s'estoit volontairement soubmise à la garde & à l'estroite façon de vivre de Caton, l'accompagnant en sa fuite. Toutefois pour cela Cæsar ne laissa pas de luy reprocher encore ceste siene sœur. Si n'eurent point les capitaines de Pompeius affaire de Caton ailleurs qu'à Rhodes, là où il gaigna par remonstrances les habitans, & y laissa Servilia avec son petit filz, & s'en retourna au camp de Pompeius, lequel avoit desja assemblé une grosse puissance, tant par terre que par mer, là où il semble que la volonté & l'intention de Pompeius se monstra plus evidemment qu'en nul autre endroit : car il avoit proposé en soy mesme de donner la charge de l'armée de mer à Caton, qui n'estoit pas moindre que de cinq cents vaisseaux de guerre, sans les fregates, fustes & autres telz petits vaisseaux non couverts, dont il y avoit un nombre infini : mais s'estant soudain advisé de soy mesme, ou bien en ayant esté adverty par aucun de ses

amis, que la fin & le but où tendoit Caton en toutes ses actions de gouvernement, estoit delivrer Rome de tyrannie, & que si une fois il estoit maistre d'une si belle & si grosse puissance, il voudroit que le jour mesme que lon auroit desfait Cæsar, Pompeius aussi laissast les armes, & se soubmeist aussi tost aux loix, il changea de conseil, combien qu'il luy en eust desja tenu propos à luy mesme, & au lieu de luy, en donna la charge à Bibulus.

LXXI. Mais pour cela il ne s'apperceut point que Caton en fust moins affectionné, ains dit on qu'en l'une des escarmouches & rencontres qui furent faittes devant la ville de Dyrrachium, comme Pompeius preschaft les souldards, & commandast aux autres particuliers capitaines d'en faire autant, chascun en son endroit, à ceulx qui estoient sous leur charge, les souldards les escoutoyent assez froidement, sans faire demonstration quelconque, qu'ilz en eussent les cueurs gneres plus eschauffez : mais quand Caton après tous les autres vint à leur discourir, autant que la commodité du temps le portoit, la raison de la philosophie, touchant la liberté, la vertu, la mort & la gloire, avec une vehemence d'affection grande, & à la fin venant à conclurre sa harangue par une invocation des dieux, tournant son parler à eulx, ne plus ne moins que.

s'ilz eussent esté presents , & regardans ceulx qui combatoyent vertueusement & vaillamment pour la defense de leur païs, ilz jetterent un si hault try, & conceurent en eulx mesmes une telle ardeur de vouloir bien faire , que tous les capitaines en prirent fort bonne esperance , & s'en allerent la teste baissée donner dedans les ennemis de si grande fureur , qu'ilz les desfeirent & les tournerent en fuitte ce jour là : mais la bonne fortune de Cæsar leur osta l'entiere victoire finale, par la doubte & deffiance de Pompeius, qui ne sceut pas cognoistre & se servir de son bon heur, ainsi comme nous avons plus amplement escrit en sa vie.

LXXII. Mais au lieu que tous les autres s'esjouissoient de cest exploit , & haultlouoyent cest avantage qu'ilz avoyent eu sur leurs ennemis, Caton au contraire deploroit la calamité de la chose publique , & lamentoit la malheureuse ambition , qui estoit cause que tant de bons & vaillans citoyens d'une mesme ville s'entretuoyent & meurtrifoyent ainsi les uns les autres. Depuis ceste defaite, Cæsar ayant pris le chemin de la Thesalie, Pompeius se deslogea de là où il estoit campé pour aller après : & laissant à Dyrrachium force armes & grand nombre de personnes , qui luy appartenoyent ou de parenté ou d'alliance , il y comméit pour garde & capi-

taine Caton avec quinze cohortes de gens de guerre : ce qu'il feit pour la crainte & deffiance qu'il avoit de luy : car s'il venoit de male adventure à perdre la bataille, il ſçavoit bien qu'il ne pouvoit commettre cela à homme plus loyal ne plus fidele, qu'à luy : mais auffi s'il la gaignoit, il ſe doubtoit bien, que là où ſeroit Caton il ne pourroit pas diſpoſer de routes choſes à ſa voutenté. Il y eut bien auffi pluſieurs autres gens d'honneur & perſonnages de grande qualité, qui furent, par maniere de dire, rejettez & laiſſez dedans Dyrrachium avec Caton.

LXXIII. Finablement la deſfaiſte de Pharfale entendue, Caton prit ceſte reſolution en ſoy meſme, que ſi Pompeius eſtoit mort, il repaſſeroit en Italie tout ce qu'il avoit de gens avec ſoy, & s'en iroit puis après ſeul en exil le plus loing qu'il pourroit de la tyrannie : & s'il eſtoit encore viſ, qu'il luy garderoit juſques au bout les forces qu'il luy avoit miſes entre mains. En laquelle deliberation il traversa en l'iſle de Corſou, là où eſtoit l'armée de mer, & y trouvant Ciceron, luy voutut ceder la charge de capitaine, comme à perſonnage de plus grande dignité, pource qu'il avoit eſté conſul, & luy ſeulement præteur : mais Ciceron ne la voutut pas accepter, ains s'en retourna en Italie. Et là Caton voyant que Pompeius le filz, par une

arrogance & haultaineté importune , vouloit punir ceux qui se retiroyent de l'armée de mer , & notamment qu'il estoit en vouldunté de mettre la main sur Ciceron le premier , il le tensa à part en privé , & l'addoucit , de maniere qu'il sauva certainement la vie à Ciceron , & osta la crainte de la perdre aux autres. Au reste , conjecturant que Pompeius le pere se seroit sauvé en Ægypte & ¹ en Afrique , il resolut de faire voile incontinent pour l'aller trouver en toute diligence. Si s'embarqua avec toute sa troupe : mais premier que faire voile , il donna congé de s'en aller ou de demourer à tous ceulx qui n'avoient pas grande vouldunté de le suyvre à ceste guerre.

LXXIV. Mais estant arrivé en Afrique , ainsi comme il alloit regeant la coste , il rencontra Sextus le plus jeune des enfans de Pompeius , qui luy dit le premier , comment son pere avoit esté tué en Ægypte , dont tous ceulx de la troupe furent fort desplaisans : mais il n'y en eut pas un qui après la mort de Pompeius voulust seulement ouir parler de recevoir commandement d'autre que de Caton : à l'occasion dequoy ayant honte & compassion de faillir au besoing à tant

¹ Grec : ou en Libye. Mais ce nom désigne ici non pas une province particuliere , mais l'Afrique même ainsi nommée par les Grecs , & dont l'Égypte faisoit partie.

de gens de bien, & qui avoyent donné si certaine preuve de leur fidélité, en les abandonnant seulz sans conduite, ne sachans qu'ilz devoient faire, ne où ilz devoient aller en pais estrangier, il en prit la charge à leur requeste, & aborda premierement en la ville de Cyrenes, là où il fut receu par les habitans, qui peu de jours au paravant avoyent fermé les portes à Labienus. Estant là, il ouit nouvelles que Scipion beau-pere de Pompeius s'estoit retiré devers le roy Juba, qui l'avoit receu, & que Actius Varus, auquel Pompeius avoit commis le gouvernement de la province d'Afrique, estoit en leur compagnie avec armée, & delibera de s'aller joindre à eulx : si se meit en chemin par terre, à cause* que c'estoit en la saison d'hyver, & fait assembler bon nombre d'afnes pour porter de l'eau, & bonne provision de vivres & de bestail, qu'il faisoit mener après luy avec force chariots, & de ces hommes que lon appelle en Afrique les Pfilles¹, lesquelz guarissent les morsures des serpens, & succent le venin avec la bouche, & charment & enchantent les serpens mesmes, de maniere qu'ilz les rendent comme esvanouis, & n'ayans pouvoir aucun de mal faire. Si furent sept jours entiers à marcher continuellement, luy servant de guide, &

¹ Voyez les Observations.

marchant le premier à pied, sans jamais monter à cheval ny sur autre beste de voiture. Depuis le jour qu'il entendit la perte de la bataille de Pharsale, il ne souppa onques sinon assis¹, & adjousta cela au reste de son dueil, qu'il ne se coucha jamais que ce ne fust pour dormir. Ayant passé l'hyver en la Libye, il se meit aux champs avec ses gens, qui n'estoyent pas moins de dix milles, & trouva les affaires de leur part en assez mauvais estat, pour le debat & différent qui estoit entre Scipion & Varus, à l'occasion duquel ilz faisoient tous deux la cour au roy Juba², & taschoyent à gagner sa bonne grace : & luy estoit homme insupportable pour la gravité qu'il tenoit, & pour l'oultrecuidance & la gloire dont il estoit plein, à cause de ses richesses & de sa puissance, comme il monstra la premiere fois qu'il parla avec Caton : car il feit mettre sa chaire entre celle de Scipion & celle de Caton, pour avoir l'honneur de seoir au milieu : ce que voyant Caton prit sa chaire, & la porta luy mesme à costé de Scipion pour le mettre au milieu : combien qu'il fust son ennemy, & qu'il eust escript un livre plein d'injures & de parolles diffamatoires à l'encontre de luy. Il y en a qui ne font compte de cest acte, & neant-

¹ Les anciens s'estuvoient & se lavoyent, puis se mettoient dedans le lit pour soupper. *Amyot.* Non pas dedans, mais dessus.

moins reprennent bien Caton de ce , que se promenant un jour en la Sicile , il donna l'honneur du milieu à Philostratus , pour honorer en luy la philosophie. Ainsi reprima Caton l'arrogance de ce roy là pour celle fois , car au paravant il faisoit de Scipion & de Varus comme de ses vassaulx & satrapes : mais Caton les reconcilia ensemble.

LXXV. Au demourant comme toute la compagnie le requist de prendre la charge de toute l'armée , & que Scipion mesme & Varus luy cedassent les premiers , & luy quittassent volontiers l'honneur de commander à tout le camp , il respondit qu'il ne transgresseroit point les loix , attendu qu'il ne faisoit la guerre que pour l'autorité & la conservation d'icelles , ny n'entreprendroit la prerogative de commander , luy qui n'estoit que viceprateur , là où il y avoit un viceconsul : car Scipion avoit esté créé tel , avec ce que le peuple se confioit , que les affaires iroyent bien , si un Scipion leur commandoit dedans l'Afrique. Scipion donques ayant accepté la charge de capitaine general , voulut incontinent en faveur de Juba mettre tous les habitans de la ville d'Utique^{*} au fil de l'espee jusques aux petits enfans , & raser les edifices entiere-

^{*} Sur la côte d'Afrique près du promontoire d'Apollon , qui est vis-à-vis la Sardaigne.

ment, comme fuyant le party de Cæsar : mais Caton ne le voulut point endurer, ains criant, protestant & appellant les dieux à tesmoings au conseil, eut beaucoup d'affaire à preserver les pauvres gens de ceste cruelle execution : & depuis en partie par les prieres des citoyens, & en partie aussi à l'instance de Scipion qui l'en requit, il entreprit de la garder, de peur qu'elle ne vinst de gré ou de force en la puissance de Cæsar, pource que c'estoit une place forte & bien à propos pour routes choses, à qui la tenoit : mais Caton la prouveut & fortifia encore davantage, car il meit dedans une quantité infinie de bledz, il feit remparer les murailles, hauffer les tours, & caver tout à l'entour de la ville de profondes trenchées, avec des clostures de paliz : entre lesquelles trenchées & la ville il feit aller habiter & loger les jeunes hommes d'Utique, les contraignant de bailler leurs armes, & reteint les autres au dedans de la ville, donnant ordre avec grand soing à ce, que personne d'eulx ne fust oultragée ny offensée par les Romains, & encore envoya force bledz, armes & argent au camp : de maniere que la ville d'Utique estoit comme l'estappe de la guerre.

LXXVI. Et comme il avoit paravant conseillé à Pompeius de ne venir point à la bataille, autant en conseilla il encore lors à Scipion, de ne

hazarder rien contre un homme agguerry & trop entendu au faict des armes , ains de se servir du temps , qui petit à petit matteroit la force & vigueur de sa tyrannie : mais Scipion fut si presumptueux , qu'il ne teint compte de son conseil , ains escrivit quelquefois à Caton luy reprochant sa couardise en paroles de telle substance. « Qu'il » luy devroit suffire d'estre à seureté en une bonne » ville , enfermé dedans de fortes murailles , sans » vouloir empescher les autres d'executer hardie- » ment avec raison , ce que leur occasion leur » presenteroit ». A quoy Caton luy rescrivit , qu'il estoit prest de repasser en Italie avec les gens de pieds & de cheval qu'il avoit amenez en Afrique , pour divertir Cæsar , & le faire retourner contre luy : mais Scipion ne fait que s'en mocquer. Parquoy Caton monstra bien adonc evidemment , qu'il se repentoit fort de lui avoir cédé l'autorité de capitaine general de l'armée , pource qu'il voyoit bien qu'il ne conduiroit pas sagement les affaires de ceste guerre : & s'il advenoit qu'il en demourast vainqueur , il n'useroit pas modereement de sa victoire envers ses citoyens : à raison dequoy il commença des lors à avoir mauvaise esperance de l'issue de ceste guerre , & le dit à ses familiers , pour l'insuffisance & l'outrecuidance des capitaines : & neantmoins que si par cas fortuit , & autrement

qu'il n'esperoit, il en advenoit quelque bien, & que Cæsar fust desfaiët, il ne se tiendrait jamais plus à Rome, ains fueroit la cruauté & l'inhumanité de Scipion, lequel ufoit desja de griefves & fieres menaces contre plusieurs : mais à la fin, le malheur advint encore plustost qu'il ne l'attendoit : car un soir bien tard arriva un messager, estant party du camp trois jours auparavant, qui apporta la nouvelle, que tout estoit perdu, par ce qu'il avoit esté donné une grosse bataille près la ville de Thapfes¹, que Cæsar avoit gaignée, & avoit pris les deux camps, que Scipion & Juba s'en estoient fouiz avec bien petit nombre de gens, & tout le reste de leurs armées mis au trenchant de l'espée.

LXXVII. Ces choses ainsi advenues, ceux qui estoient à Utique, effroyez de ceste nouvelle, comme l'on peut estimer en guerre, & mesme-ment de nuit, à peine se peurent contenir au-dedans des murailles de la ville, tant ilz eurent le sens & l'entendement troublé de frayeur : mais Caton se présenta à eulx, qui arresta ceulx qu'il rencontra par les rues crians & fuyans, en les reconfortant au mieulx qu'il peut : & s'il ne leur osta toute leur frayeur, au moins leur osta il l'estonnement & le trouble d'esprit où ils estoient, en leur

¹ Sur la côte d'Afrique, à droite en descendant de Carthage; elle regarde presque l'île de Malthe.

disant, que la perte n'estoit pas à l'aventure si grande comme lon la faisoit, & que c'estoit tous-jours la coustume d'amplifier de paroles les mauvaises nouvelles, ainsi appaisa il un peu le tumulte, & le matin au point du jour il feit crier, que les trois cents hommes qu'il avoit choisis pour son conseil, eussent à se rendre au temple de Jupiter, estans tous citoyens Romains, qui pour trafic de marchandise & de banque se tenoyent en Afrique, & tous les senateurs Romains aussi avec leurs enfans. Ainsi comme ilz s'assembloyent encore, luy mesme s'y en alla aussi poseement, & avec une aussi rassise constance, comme s'il ne fust rien survenu de nouveau, tenant un livret en sa main, qu'il alloit lisant. Ce livret contenoit l'estat de la monition dont il avoit fait provision pour la guerre, de bledz, d'armes, d'arcs, de traicts & d'hommes de pieds : puis quand ilz furent assemblez il commença à louer hautement la bonne affection, la foy & loyauté de ces trois cents Romains, qui de leurs personnes, de leur argent & de leur conseil avoient tous-jours très utilement servy la chose publique, & leur conseilla de ne se départir point d'ensemble, en perdant esperance, ou cherchant chacun moyen de se sauver à part, pource qu'en demourant ensemble, César les mespriserait moins s'ilz vouloyent guerroyer, & leur pardonneroit plus tost

s'ilz luy demandoient mercy : pourtant leur conseilla il d'adviser qu'ilz devoient devenir, & que quant à luy il ne trouveroit rien mauvais de ce qu'ilz en resouldroyent : car si leur volonté se tournoit avec la fortune, il estimeroit que ce changement ne procederoit que de la nécessité du temps : mais s'ilz estoient deliberez de perfectionner à combattre le malheur, & jusques au bout se soubmettre à tout peril pour defendre la liberté, que non seulement il loueroit, mais aussi admireroit leur vertu, & qu'il leur seroit chef & compagnon à tenter & esprouver jusques au dernier point la fortune de leur país, qui n'estoit point Utique ny Adrumetum¹, ains la ville de Rome, laquelle pour la grandeur de sa puissance s'estoit bien souvent relevée de plus lourdes & plus grieveuses cheutes, & qu'ilz avoyent encore plusieurs moyens de salut & de seureté de leurs personnes, dont le plus grand estoit, qu'ilz avoyent à faire à un ennemy, qui pour les occasions de ses affaires estoit distrait en divers lieux, parce que d'un costé l'Hespagne s'estoit rebellée contre luy en faveur du jeune Pompeius, & que la ville de Rome ne se pouvoit encore accoustumer à prendre le mors, & ne le pouvoit endurer, ains se soublevoit à toute mutation, & qu'il ne falloit point fouir le

¹ Sur la même côte que Thapse, mais un peu au-dessus à la hauteur de Malthe, à côté de la petite Leptis.

travail ny le peril, ains plus tost prendre exemple de leur ennemy, qui n'espargnoit aucunement sa personne pour venir au dessus de si grandes meschancerez qu'il avoit entreprises : là où, au contraire, à eulx l'incertitude de ceste guerre, s'il en succedoit bien, se termineroit en une très heureuse vie : & s'il en advenoit mal, en une très glorieuse mort : toutefois qu'il falloit qu'ilz en deliberassent entre eulx, en priant les dieux que pour recompense de la vertu & bonne volonté qu'ilz avoyent monstrée jusques là, ilz leur feissent la grace de se resouldre à ce qui leur feroit le meilleur.

LXXVIII. Après que Caton leur eut tenu ces propos, il y eut bien aucuns des assistens qui furent emeus par la vivacité de ses remonstrances, mais la plus part fut encore plus encouragée par l'exemple de sa genereuse magnanimité, voyans comme il ne s'estonnoit de rien, & de son humanité & bonté : tellement qu'ilz oublierent, par maniere de dire, tout le danger où ilz estoient & le prierent d'user de leurs personnes, de leurs biens & de leurs armes, tout ainsi que bon luy sembleroit, le reputans seul capitaine invincible, sur lequel fortune n'avoit point de pouvoir, & estimans leur estre meilleur de mourir en obeïssant à son conseil, que de se sauver en abandonnant un personnage de si excellente & si parfaite

vertu. Et comme quelqu'un de l'assemblée meist en avant, qu'il falloit proposer liberré aux esclaves, & que la plus part des assistens en fust d'opinion, Caton dit qu'il n'en feroit point, pource qu'il n'estoit ny juste ny raisonnable : mais bien que si les maîtres leur vouloyent donner liberré, il estoit content de les recevoir pour soudards, ceulx qui seroyent en aage de porter armes. Il y en eut plusieurs qui promirent de le faire, & luy, commanda que lon enrollast les noms de ceulx qui le vouldroyent, & s'en alla.

LXXIX. Tantost après, luy vindrent lettres du roy Juba & de Scipion, desquelz Juba estoit caché en une montagne avec peu de gens, & luy envoyoit demander ce qu'il avoit resolu de faire, pource, que s'il avoit delibéré d'abandonner Utique il l'attendroit, & s'il se deliberoit de la tenir, qu'il le viendrait secourir avec une armée : & Scipion estoit à l'ancre au dessoubz d'un chef, qui n'estoit gueres loin d'Utique, qui attendoit tout de mesme quelle resolution il prendroit. Caton fut d'avis de retenir les messagers qui avoyent apporté leurs lettres, jusques à ce qu'il fust resolu de ce que vouldroyent devenir les trois cents, pource que ceulx qui estoient du corps du senat Romain se monstroyent bien deliberez : car ilz affranchirent incontinent leurs serfs, & leur baillerent des armes. Mais les autres

trois cents estans marchands traffiquans sur la mer & exerceans la banque & l'usure, qui avoyent la plus grande partie de leurs facultez en serfs, ne reteindrent pas longuement les belles remonstres de Caton, ains les laisserent escouler incontinent, tout ainsi comme il y a des corps qui reçoivent aiseement la chaleur, & la perdent aussi legerement, se refroidissans tout aussi tost comme lon en esloigne le feu. Aussi ces marchands là, pendant qu'ilz avoyent Caton devant leurs yeux, s'emouvoyent & s'eschauffoyent un petit : mais quant à part ilz avoyent compté avec eulx, la peur qu'ilz avoyent de Cæsar leur faisoit oublier toute la reverence qu'ilz portoyent à Caton & à leur devoir. « Car qui sommes nous (disoyent ilz) & qui est celuy à qui nous desdaignons d'obeir ? n'est ce pas Cæsar, en la main duquel est aujourd'hui reduitte toute la puissance de l'empire Romain ? & au regard de nous, il n'y a pas un qui soit un Scipion, ny un Pompeius, ny un Caton : & toutefois en ce temps où tout le monde chale la voile de crainte, & se tient encore plus bas qu'il ne devroit, nous voulons entreprendre de combattre dedans Utique pour la liberté des Romains, à l'encontre de celuy, auquel Caton mesme fuyant avec Pompeius, a abandonné l'Italie, & affrontons noz serfs pour faire la guerre à Cæsar, »

» n'ayans nous mesmes non plus de liberté, qu'il
 » luy plaist de nous en laisser. Reconnoissons nous
 » donques nous mesmes pendant qu'il en est encore
 » temps, & demandons mercy à celuy qui est le
 » plus fort, envoyans devers luy pour le prier de
 » nous pardonner». Les plus honestes de ces trois
 cents marchands Romains tenoyent ce langage
 là : mais la plus part d'entre eulx espioient les
 moyens de se saisir des personnes de ceulx qui
 estoient du senat, esperans de faire mieulx leur
 appointment avec Cæsar, en les luy livrant entre
 ses mains.

LXXX. Caton se doubta bien incontinent de
 ceste mutation, mais il n'en voulut rien recher-
 cher ny adverer davantage, & renvoya les mes-
 sagers à Juba & à Scipion, par lesquelz il leur
 manda qu'ilz s'esloignassent d'Utique, pour la
 doubte & deffiance qu'il avoit de ces trois cents.
 Or estoit il eschappé de la bataille assez bon
 nombre de gens de cheval, lesquelz tirans devers
 Utique, envoyèrent trois d'entre eulx à Caton,
 qui ne luy porterent pas une mesme resolution
 de toute la troupe, pource que les uns vou-
 loient s'aller rendre la part où seroit le roy Juba,
 les autres se vouloyent joindre à Caton, & les
 autres craignoient d'entrer seulement dedans
 Utique. Ce qu'entendant Caton donna charge à
 Marcus Rubrius d'avoir l'œil sur ces trois cents,

& recevoir les noms des serfs qu'ilz affranchiroient volontairement sans forcer personne : & ce pendant luy avec les senateurs sortit d'Utique au devant de ces gens de cheval , où il parla aux capitaines , & les pria de ne vouloir point abandonner tant de gens de bien , senateurs Romains , qui-là estoient , & ne vouloir point avoir pour leur capitaine ce roy Juba plus tost que Caton , ains entrer dedans Utique : là où il les pourroit sauver , & se sauver soy-mesme avec eulx , attendu que la ville n'estoit point prenable de force , & que elle avoit provision de bledz & de toute autre munition pour plusieurs années. Autant leur en requirent les autres senateurs ayant les larmes aux yeux : à l'occasion dequoy les capitaines allerent parler à leurs gens , pendant lequel parlement Caton s'assit dessus une levée de terre avec les senateurs attendant leur response : mais sur ces entrefaites arriva devers luy Rubrius tout emeu , se plaignant du tumulte & desordre de ces trois cents marchands , qui vouloyent mutiner & faire rebeller la ville : à raison dequoy , les autres perdans tout courage & toute esperance se prirent à plorer & lamenter leur fortune : mais Caton essaya de les reconforter , envoyant devers les trois cents les prier de vouloir avoir encore un peu de patience , & ce pendant les deputez par ces gens de cheval vindrent

apporter leur responce , qu'ilz vouloyent des choses trop dures : car ilz dirent qu'ilz n'avoient que faire de la soulde de Juba , & qu'ilz ne craignoyent point Cæsar , prouueu qu'ilz eussent Caton pour leur capitaine : mais qu'il leur sembloit n'y avoir point de propos de s'enfermer dedans une ville avec les habitans qui de leur origine estoyent Phœniciens , la plus muable & plus desloyale nation qui soit au monde.

« Car encore , disoyent ilz , que pour ceste heure » ilz ne remuent rien , si est ce que quand Cæsar » viendra , ilz feront les premiers qui nous voul- » dront courir sus , & nous trahiront : pourtant » si Caton vouloit qu'ilz se joignissent à luy pour » faire la guerre , il falloit qu'il chassast tous les » naturelz habitans d'Utique hors de la ville , » ou bien qu'il les feist tous occire dedans & » lors qu'ilz y entreroient quand elle seroit vuide » d'ennemis & de Barbares ». Caton estima cela trop barbare & trop cruel , toutefois il leur repliqua qu'il en communiqueroit avec les trois cents , & retournant dedans la ville parla à eulx : lesquelz n'usèrent plus de desguisement ny ne controuuerent plus de desfaites pour la reuerence de Caton , ains declarerent ouvertement qu'ilz se courrouceroyent à l'encontre de qui les voudroit presser de faire la guerre à Cæsar , attendu qu'ilz ne le vouloyent ny ne le pou-

voyent faire : & y en eut mesme quelques uns qui murmurèrent entre leurs dents, qu'il falloit retenir en la ville les senateurs, jusques à ce que César fust venu.

LXXXI. Caton ne fait pas semblant de l'avoir ouy, car aussi avoit il l'ouye un peu dure : mais sur ce poinct quelqu'un luy vint dire, que les gens de cheval s'en alloient : parquoy craignant que ces trois cents ne meüssent les mains sur ceulx du senat, il s'y en alla luy mesme en personne avec ses amis, & les voyant desja esloignez, il monta à cheval & picqua après eulx, lesquels furent bien aises de le voir & le receurent entre eulx, luy conseillans qu'il se voulust sauver avec eulx. Mais Caton les pria de sauver ceulx du senat, si affectueusement que les larmes, à ce que lon dit, luy en vindrent aux yeux, en leur tendant les mains, & retournant leurs chevaux avec les brides, & leur prenant leurs armes, tant qu'à la fin il impetra d'eulx qu'ilz demoureroyent à tout le moins encore ce jour là pour donner moyen à ceulx du senat de s'en fouir à sauveté. Retournant donques avec eulx en la ville, il en ordonna les uns aux portes pour les garder, & en meit d'autres en garnison dedans le chasteau : les trois cents à l'heure eurent peur que ce ne fust pour les chastier de ce qu'ilz s'estoyent tournez. Si envoyerent devers Caton

le supplier de s'en venir, comment que ce fust, devers eulx : mais ceulx du senat l'environnans tout à l'entour ne voulurent point qu'il y allast, & dirent qu'ilz n'abandonneroyent point leur protecteur & sauveur à des traitres desloyaux : car à la verité tous ceulx qui lors se trouverent dedans Utique, de quelque estat qu'ilz fussent également, cogneurent evidemment la vraye vertu qui estoit en Caton, & esprouverent qu'il n'y avoit rien de saint en tout ce qu'il faisoit, ains ayant de longue main resolu de s'occire soy-mesme, il prenoit tant de peine & se travailloit avec si grande sollicitude pour les autres, à fin que après les avoir mis en seureté de leurs vies, il se despeschast luy-mesme de la sienne : car il estoit aisé à voir qu'il avoit resolu de mourir, encore qu'il n'en monstast au dehors aucuns signes de cuer dolent & affligé.

LXXXII. Parquoy il obtempéra à la requeste des trois cents, & après avoir reconforté ceulx du senat, s'en alla tout seul devers eulx, lesquelz le remercierent de ce qu'il avoit daigné venir, & le supplierent qu'il se voulust servir d'eulx, & s'y fier hardiment en toute chose, moyenant qu'il leur pardonnast s'ilz ne pouvoyent pas tous estre des Catons, & qu'il eust compassion de leur foiblesse de cuer, s'ilz n'estoyent pas si fermes ne si genereux que luy, pource qu'ilz avoyent

deliberé d'envoyer devers Cæsar le supplier
 premierement & principalement pour luy, &
 que là où ilz ne pourroyent obtenir grace pour
 luy, ilz estoient resolu de n'en recevoir point
 pour eulx mesmes, ains combattroyent pour son
 salut jusques au dernier soupir. A quoy Caton
 leur respondit qu'il leur sçavoit bien bon gré de
 la bonne affection qu'ilz monstroyent avoir envers
 luy, & qu'il estoit besoing qu'ilz envoyassent
 donques vistement prier pour leur salut, mais
 pour le sien qu'il n'en falloit point parler, pource
 que c'est à faire à ceulx qui sont vaincus que prier,
 & à ceulx qui ont failly, de demander pardon :
 mais quant à luy, non seulement il avoit toute sa
 vie esté invincible, ains avoit vaincu tant comme
 il avoit voulu, & avoit tousjours esté plus puis-
 sant que Cæsar en droit & en justice, & que
 c'estoit luy mesme qui maintenant estoit pris
 & vaincu, pource que ce qu'il avoit tousjours
 nié machiner contre la chose publique, estoit
 lors evidemment averé & prouvé contre luy.
 Ayant fait telle responce à ces trois cents, il se
 departit d'avec eulx.

LXXXIII. Et entendant que Cæsar estoit desjà
 en chemin avec toute son armée pour s'en venir à
 Urique : « O dieux, dit il, il vient donc contre
 » nous, comme contre des hommes » ! Et adonc
 se tournant devers ceulx du senat, il leur con-

seilla de ne differer plus , ains adviser chacun à se sauver , pendant que les gens de cheval estoient encore en la ville. Si feit fermer toutes les autres portes , excepté celle du port qui respondoit à la marine : puis distribua des navires & vaisseaux à ceulx qui estoient soubz sa charge , provoyant à ce que tout allast par ordre , & qu'il n'y eust point de tumulte ny de confusion , que lon ne feist tort à personne , & que chacun eust argent & moyen de se pouvoir sauver. Mais comme Marcus Octavius qui avoit deux legions , s'estant venu camper assez près de Utique eust envoyé devers luy pour arrester , à qui & jusques où chacun d'eulx auroit autorité de commander , il ne respondit rien à cela : mais se tournant devers ses amis leur dit , « Nous esmerveillons nous si » nous avons tout gasté & perdu , veu que nous » voyons qu'au milieu de la mort l'ambition & » convoitise de dominer regne encore entre » nous » ? Sur ces entrefaittes on luy vint dire ; comme les gens de cheval s'en voulant aller , pilloyent desja & saccageoyent les biens des habitans d'Utique , comme butin de bonne guerre. Il s'y en alla courant à l'heure mesme ; & aux premiers qu'il trouva osta des mains ce qu'ilz avoyent pris : les autres avant qu'il vinst jusques à eulx , jetterent ce qu'ilz emportoient ; & regardant tous en terre de honte , s'en allerent

sans dire mot. Adonc Caton faisant assembler les naturelz habitans d'Utique, les pria de n'irriter & n'aigrir point Cæsar à l'encontre des trois cents, ains plus tost d'essayer à obrenir pardon de luy tous ensemble : puis s'en allant de rechef sur la marine, regarda partir ceulx qui s'embarquoyent, embrassant & disant adieu à tous ses hostes & amis ausquelz il avoit conseillé de se sauver, les accompagnant jusques dedans leurs vaisseaux. Quant à son filz, il ne luy suada point de s'en aller, ny n'estima point qu'il le deust presser d'abandonner son pere.

LXXXIV. Au demourant il y avoit en sa compagnie un nommé Statyllius, homme jeune d'aage, mais fermé de courage, qui s'estoit proposé à imiter la constance inflexible de Caton, qui luy conseilloit qu'il montast sur mer, & s'embarquast avec les autres, pource qu'il sçavoit bien qu'il haïssoit à mort Cæsar. Il n'en voulut rien faire : parquoy Caton se tournant devers Apollonides philosophe de la secte stoïque, & devers Demetrius, de la secte des peripatetiques : « C'est à vous autres, dit il, à amollir & applatir » ce jeune homme, que vous voyez ainsi enflé, » & à le ramener par voz remonstrances à son » utilité ». Ce pendant luy convoyoit tous les autres, faisoit droit à ceulx qui luy demandoient justice, & donnoit ordre à leurs affaires, de sorte qu'il

qu'il passa en cela toute celle nuit & tout le jour ensuyvant. Cela fait, Lucius Cæsar parent du victorieux, estant delegué par les trois cents pour aller devers luy interceder pour tous, pria Caton de luy aider à dresser la harengue dont il avoit à user pour eulx : « Car pour toy, Caton, » dit il, je ne faindray point de luy baiser les » mains, & de me jetter à ses genoux s'il est » besoing, à fin qu'il te pardonne ». Caton luy respondit qu'il ne vouloit point qu'il le feist : « Car si je vouloye sauver ma vie par la grace de » Cæsar, il ne faudroit sinon que je m'en allasse » moy mesme devers luy : mais je ne veux point » sçavoir gré ny estre obligé à un tyran pour une » injustice : car c'est injustice à luy d'usurper la » puissance de sauver la vie comme seigneur, à » ceulx à qui il n'a nul droit de commander : » mais bien advisons ensemble, si tu veux, ce » que tu diras pour impettrer grace à ces trois » cents ». Si furent quelque espace de temps ensemble à en deviser, & à la fin quand il voulut partir, Caton luy recommanda son filz & ses amis : & l'ayant embrassé, & pris congé de luy, s'en retourna en son logis, là où il feic assembler son filz & ses familiers & amis, ausquelz il teint plusieurs propos, & entre autres dissuada à son filz de s'entremettre jamais du gouvernement de la chose publique, pource que

le faire ainsi qu'il appartiendrait à la dignité d'un filz de Caton, la qualité du temps & des affaires ne le permettoit pas, & de le faire autrement, il ne seroit par honeste : puis sur le soir il entra dedans l'estuve pour se laver, & ainsi comme il se lavoit se souvenant de Statyllius, il s'escria tout hault : « Et bien, Apollonides, tu as don-
 » ques fait partir à la fin Statyllius, en luy raval-
 » lant ceste haultesse de courage qu'il avoit : il s'en
 » est bien allé sans nous dire adieu ». « Comment
 » allé, respondit Apollonides, il a le cueur plus
 » grand & plus ferme que jamais, & est impos-
 » sible de le faire fieschir, combien que nous
 » en ayons devisé & disputé bien longuement
 » ensemble : car il dit resoluëment, qu'il fera
 » tout ainsi que tu feras ».

LXXXV. Après s'estre lavé, il s'assit à table comme il avoit accoustumé depuis la journée de Pharsale, car il ne se coucha onques puis, que ce ne fust pour dormir : & souppa en compagnie de tous ses amis, & mesme des officiers de la ville d'Utique : après le soupper furent mis en avant plusieurs bons propos, & faits plusieurs beaux discours de la philosophie, les uns sur les autres, tant que la dispute vint finablement à tourner sur ces lieux communs des opinions étranges que tiennent les philosophes stoïques, comme,
 « Qu'il n'y a que le sage & homme de bien qui

» soit franc & libre, & que tous les meschans » sont serfs & esclaves ». A quoy le philosophe peripatetique, qui là estoit, ne faillit pas incontinent à contredire : mais Caton prenant la parole d'une grande vehemence & d'une voix plus aspre & plus grosse que de coustume, continua ceste dispute fort longuement, & contesta d'une affection merveilleuse, de sorte qu'il n'y eut celuy en la compagnie qui ne cogneust évidemment qu'il estoit tout resolu de s'oster des miseres de ce monde, en mettant fin à sa vie : à l'occasion dequoy quand il eut achevé de dire, voyant que tous les assistens se taisoyent & faisoient triste chere, pour les reconforter & divertir de ceste suspicion, il commença de rechef à demander des affaires, & monstrier d'en avoir soing & sollicitude, comme ayant peur qu'il n'advinst quelque fortune à ceulx qui estoient montez sur mer, ou à ceulx qui avoyent pris leur chemin par terre, ayans à passer un païs desert, sauvage, & où il n'y avoit nulles eaux.

LXXXVI. Ainsi s'estant la compagnie du soupper departie, il se promena encore avec ses amis, comme il avoit ordinairement accoustumé après soupper, & ayant commandé aux capitaines du guet ce que le temps requeroit, quand il se voulut retirer en sa chambre, alors il embrassa son filz & le caressa avec tous ses

amis les uns après les autres plus amiablement qu'il n'avoit appris : ce qui donna de rechef soupçon de ce qu'il avoit en pensée de faire. Entré qu'il fut en sa chambre & couché en son lit, il prit en main le dialogue de Platon où il traite de l'ame, & en leur la plus grande partie, puis regardant au dessus de son chevet il ne voit point son espée, pource que son filz la luy avoit fait oster comme il estoit encore à table. Si appella un sien valet de chambre, & demanda qui luy avoit osté son espée : le valet ne luy respondit rien, & luy se remeint à lire encore en son livre : puis un peu après sans presser autrement ny monstrier qu'il en eust trop de haste, ains de vouloir sçavoir seulement qu'elle estoit devenue, il commanda qu'on la luy rapportast. Il passa un assez long espace de temps, de sorte qu'il eut achevé de lire entièrement tout le livre sans que personne luy apportast son espée : parquoy il appella tous ses serviteurs les uns après les autres, & commença à leur user de plus rude parole en leur redemandant son espée, jusques à donner sur le visage de l'un un si grand coup de poing, qu'il s'enfanglanta toute la main, se courrouceant à bon esciant, & criant que son propre filz & ses serviteurs le vouloyent livrer tout vif à son ennemy, tant que son filz plorant & ses amis

CATON D'UTIQUE. 507

y accoururent , qui se jettans à ses piedz se prirent à lamenter & à le supplier.

LXXXVII. Mais Caton se levant du liſt les regarda en travers de mauvais œil , & leur dit :
 « Dea , quand & où a-ce eſté que lon m'a veu
 » troublé d'entendement ? Que ne me remonſtre
 » lon par raiſon , ſ'il ſemble que je preigne con-
 » ſeil aucun qui ne ſoit bon , ſans me vouloir
 » engarder d'uſer de mon advis & de mon ſens ,
 » & ſans me deſarmer ? Que ne lies tu ton pere ,
 » mon amy , & que ne luy attaches tu les mains
 » derriere le dos , juſques à ce que Cæſar ar-
 » rivant me treuve ſans moyen de me pouvoir
 » defendre ? Car contre moy-meſme je n'ay point
 » affaire d'eſpée pour me deſfaire , ſi je veux ,
 » attendu qu'il ne me fault que retenir mon
 » halene un peu de temps , ou bien donner un
 » ſeul coup de la teſte contre la muraille , pour
 » me faire mourir ». Ainſi comme il diſoit ces
 paroles , ſon filz fortit de la chambre plorant ,
 & auſſi feirent tous ſes autres amis , & ne de-
 moura que Demetrius & Apollonides avec luy ,
 auſquels parlant ja plus doucement , il dit :
 « Eſtes vous point auſſi vous autres d'advis de
 » retenir en vie par force un homme de l'aage
 » que je ſuis ? Et n'eſtes vous point demourez
 » icy pour vous tenir aſſis ſans rien dire ne faire
 » que me garder ? Ou ſi vous me venez ap-

li 3

» porter quelques raisons & arguments pour me
 » donner à entendre qu'il ne soit indigne ny
 » deshoneste à Caton, n'ayant autre moyen de
 » sauver sa vie, d'attendre à la respiter & sauver
 » par la mercy de son ennemy, que n'alleguez
 » vous maintenant quelques preuves pour me
 » monstrier cela, à fin que rejettant ces autres
 » raisons & opinions, lesquelles nous avons te-
 » nues ensemble jusques icy, estans à ceste heure
 » devenus soudainement plus sages par le moyen
 » de Cæsar, nous en soyons de tant plus tenus
 » de luy rendre graces? Toutefois je ne dis pas
 » cela, pource que j'aye arresté aucune chose de
 » ma vie, ains en consulteray & arresteray au-
 » cunement avec vous, quand j'en delibereray
 » avec les livres & raisons, desquelles vous
 » mesmes usez quand vous voulez philosopher :
 » & pourtant allez vous en hardiment, & dites
 » à mon filz, qu'il ne vueille point forcer son
 » pere à ce qu'il ne luy sçauroit prouver par
 » raison qu'il le deust faire ».

LXXXVIII. Ces paroles ouyes, Demetrius
 sans luy respondre sortit en plorant de la chambre,
 & lors luy envoya lon son espée par un petit
 enfant : quand il la teint il la desguainna, &
 regarda si la poincte en estoit bien aguisee &
 le fil bien trenchant : ce que ayant trouvé, alors
 « Je suis, dit il, maintenant à moy ». Si la meit

auprès de soy, & reprit encore son livre, que lon dit qu'il leut par deux fois d'un bout à autre : puis s'en dormit d'un fort profond sommeil, tellement que ceux qui estoient hors de la chambre l'entendoyent bien ronfler. Environ la minuiet il appella deux de ses affranchiz, Cleantes son medecin, & Butas celuy duquel il se servoit le plus es affaires d'estat, & l'envoya sur le port voir si tous ceulx qui s'estoyent embarquez, avoyent fait voile, & bailla sa main pour la bander, à cause qu'elle luy estoit enflée du coup de poing qu'il avoit donné à l'un de ses esclaves. Cela resjouit tous ceulx de sa famille, pensans que ce fust signe qu'il eust encore envie de vivre. Peu après retourna Butas qui luy rapporta que tous les autres avoyent fait voile, excepté Crassus qui estoit encore demouré pour quelque affaire, & qu'il s'en alloit embarquer, mais qu'il faisoit un grand vent, & y avoit une grosse tourmente en la mer. Ayant ouy ce rapport il se prit à soupirer pour la compassion qu'il eut de ceux qui estoient montez sur mer : & renvoya Butas de rechef sur le port pour voir si aucuns auroient point relasché, qui eussent affaire de quelque chose pour le luy venir dire. Les petits oyseaux commençoient desja à chanter, & luy prit de rechef un petit de sommeil : mais sur ce poinct retourna Butas qui luy dit qu'il n'y

avoit bruit quelconque sur le port. Caton luy dit qu'il s'en allaſt doncques, & qu'il fermaſt la porte après luy, & ſe ravalla dedans ſon liſt, comme pour dormir ce qui reſtoit encore de la nuit : mais auſſi toſt que Buras eut le dos tourné il deſguainna ſon eſpée, & s'en donna un coup au deſſoubz de l'eſtomach : touteſois pour l'inflammation qu'il avoit à la main il ne peut pas frapper ſi grand coup qu'il en treſpaſſaſt ſoudainement : ains en tirant à ſa fin il tumba de deſſus ſon liſt, & feit bruit en tombant, par ce qu'il renverſa une table geometrique qui eſtoit joignant ſon liſt, tellement que ſes ſerviteurs qui en oyrent le bruit, s'eſcrierent incontinent : & auſſi toſt ſon filz & ſes amis entrerent en la chambre, là où ilz le trouverent tout ſouillé de ſang : & la plus part de ſes boyaux ſortant hors du corps, combien qu'il fuſt encore en vie & qu'il les regardaſt. Si furent tellement outrez de douleur, qu'ilz ne ſceurent de prime face que dire ne que faire : mais ſon medecin s'approchant voulut eſſayer de remettre les boyaux qui n'eſtoient point entamez, & recouldre la playe : mais quand il ſe fut un peu revenu d'eſvanouiſſement, il repouſſa arriere le medecin, & deſchirant ſes boyaux avec ſes propres mains ouvrit encore plus ſa playe, tant que ſur l'heure il en rendit l'eſprit.




Mort de Caton.

T. 17. P. 104.

Morichet del.

1780

Leveque, sculp.



LXXXIX. Et en moins de temps que lon n'eust pensé que ceulx de la maison seulement eussent peu sçavoir l'inconvenient, les trois cents Romains accoururent à la porte de son logis, & incontinent après s'y assembla aussi tout le peuple de la ville : qui tous d'une voix l'appellerent leur bienfaiteur & leur sauveur, en le nommant seul homme libre & invincible : ce qu'ilz faisoient encore qu'ilz eussent nouvelles que Cæsar approchoit bien fort d'Utique, & neantmoins il n'y eut ny crainte de peril, ny envie de flatter le vainqueur, ny different ou querelle qu'ilz eussent ensemble, qui les engarda de porter honneur à la memoire de Caton : ains ornans son corps magnifiquement, & luy faisant un convoy de funerailles le plus honorable qu'ilz peurent, l'inhumerent sur le rivage de la mer, là où il y a encore aujourd'hui une siene statue tenant une espée en la main : puis cela fait, ilz entendirent à se sauver eulx & leur ville. Mais Cæsar ayant nouvelles par ceulx qui alloient devers luy, que Caton ne bougeoit d'Utique, & ne s'enfuyoit point, ains envoyoit tous les autres, & que luy, son filz & ses amis demouroient, sans monstrier qu'ilz eussent crainte de rien, ne sçavoit penser qu'elle estoit sa deliberation : & pource qu'il en faisoit trèsgrand compte, se hastoit à la plus grande diligence qu'il pou-

voit avec toute son armée : mais quand il eut la nouvelle comment il s'estoit desfait soy mesme, on escrit qu'il dit ces paroles seulement, « Je » porte envie à ta mort, Caton, puis que tu » m'as envié la gloire de t'avoir sauvé la vie ». Car à la verité si Caton eust peu souffrir que Cæsar luy eust sauvé la vie, il n'eust pas tant diminué de sa gloire, qu'il eust augmenté celle de Cæsar : toutefois quant à ce qu'il eust fait, on n'en sçauroit que dire asseurement, sinon que lon conjecture de Cæsar en la plus humaine partie. Il mourut en l'aage de quarante & huit ans.

XC. Et quant à son filz, Cæsar ne luy feit aucun desplaisir : mais on dit qu'il fut homme de peu de valeur, & desordonné avec les femmes : car estant logé en la Cappadocie chez un seigneur du sang royal du païs, nommé Maphradates, lequel avoit belle femme, il y demoura plus longuement qu'il ne devoit pour son honneur, pource qu'il donna occasion de se faire mocquer, de sorte que lon escrivoit de luy par mocquerie, « Caton partira demain, dedans » trente jours ». Et, « Maphradates & Porcius » sont deux bons amis, ilz n'ont qu'une ame » : à cause que ceste femme de Maphradates s'appelloit Ppsyché, qui signifie en langage Grec, ame. Et, « Caton est genereux & magnanime, il a l'ame » royale ». Toutefois il esteignit & amortit toute

ceste infamie par sa mort, en combatant vertueusement contre Auguste & contre Antonius en la journée de Philippes, pour la liberté : là où estant leur armée mise en rouble, il ne voulut ny fouir ny se cacher, ains se jettant à travers les ennemis, feit bien cognoistre qui il estoit, en donnant courage à ceux de son party, qui faisoient encore teste, tant qu'il fut occis sur la place, laissant à ses adversaires grande admiration de sa vaillance & vertu. Et encore plus Porcia la fille de Caton, qui ne ceda point à son pere ny en chasteté ny en grandeur de courage : car estant mariée à Brutus qui tua Cæsar, elle fut participante de la conjuration, & s'osta la vie aussi magnaniment comme il appartenoit à sa vertu & au noble sang dont elle estoit issue, ainsi comme nous avons escrit plus au long en la vie de Brutus. Et Statyllius, qui avoit dit qu'il feroit tout ce que Caton feroit, fut lors empesché de se tuer par les philosophes, dont nous avons parlé cy dessus : mais depuis s'estant montré très fidele & très utile à Brutus en tous ses affaires, il fut aussi tué sur le champ en la bataille de Philippes.

LA COMPARAISON
DE PHOCION AVEC CATON D'UTIQUE,*PAR DU HAILLAN*.*

Si quelqu'un vouloit prendre la peine de comparer Phocion & Caton avec tous les illustres Grecs & Romains, je me fais accroire que ces deux emporteroyent tousjours le prix, à prendre les choses au compas de la vertu : & ceste entreprise ne seroit pas des plus mal-aisées à exécuter. Mais de les comparer l'un à l'autre, pour rapporter les particularitez, & remarquer en icelles lequel des deux a l'avantage, pour le faire exactement c'est chose non seulement difficile, mais impossible, à mon avis : & le discours que j'en ai maintenant recueilli n'est que pour estendre un peu plus au large ce que nostre auteur en dict brièvement sur l'entrée de la vie de Phocion. S'il eust voulu alonger ce propos & fournir la comparaison toute entière, sans doute ce seroit un de ses chefs d'œuvre. Il n'a pas voulu y entrer, ou se desfiant de soy mesme, ou desfiant tous les plus habiles, & (à l'exemple d'Apelles) laissant un tableau imparfait que nul ne pourra jamais achever. Par ainsy je prie

qu'on n'estime nullement de moi que je m'attribue ce subtil & delié jugement que Plutarque requiert en celui qui voudra trouver & sçavoir discerner les diversitez des vies de ces deux ornemens du monde.

II. Or j'encline bien à son avis que non seulement ils ont esté semblables de similitude generale & universelle, comme de dire qu'ils ont esté tous deux gens de bien, tous deux bien entendus en matiere d'estat & de gouvernement : Mais aussi que leurs vertus monstrent tout un mesme traitt, un mesme moule, un mesme teint & mesme couleur empreinte en leurs mœurs, jusques aux plus menues & dernieres particularitez, ayans tous deux l'austerité presque en egale mesure conjointe avec la douceur, la prouesse avec la prudence, la vigilance craintive pour les autres avec l'assurance resoluë pour eux mesmes, fuite des choses honteuses & zele de la justice. Toutesfois puis qu'il laisse ce mot de presque comme une entrée en la comparaison, voyons si en quelques choses l'un a point avantage sur l'autre, en laissant au sage lecteur le jugement, qui lui sera un outil en main, pour ouvrir, ferrer, adoucir & polir cest ouvrage de plus en plus. Car il n'y a Vies en tout ce livre que je desire estre plus souvent leues de routes personnes, specialement de ceux qui ma-

nient affaires d'estat, ni que je pense contenir plus d'instructions que ces deux-ci : & comme un visage excellent en perfection se monstre beau en tous sens, aussi trouvera on ces deux tableaux si bien elabourez par la vertu, qu'elle semble avoir consumé sur iceux ses traits, ses couleurs & sa derniere main. Je parle d'une vertu civile, & de tout ce que l'homme peut aprehender, qu'on trouvera exquis au possible en Phocion & en Caton, à chacun desquels on peut proprement apliquer ces vers dits d'un autre très digne personnage,

Il ne veut point sembler juste, mais l'estre,
 Aimant vertu en pensée profonde.
 Dont nous voyons ordinairement naistre
 Sages conseils où tout honneur abonde.

III. Mais considerons un peu l'Athenien à part & plaidons en sa faveur contre le Romain. Premièrement je trouve l'escole de Phocion mieux réglée que celle de Caton : car encores que tous deux ayent esté excellemment façonnez à toutes perfections de bonnes mœurs, toutesfois la vie de Phocion a esté moins austere, plus civile, plus profitable à sa patrie, & sa mort moins mortelle & plus noble que celle de Caton. J'en di autant de leurs familles, Phocion & sa femme ayans vescu irreprehensiblement : mais ce que

Caton fit de sa femme Martia, la donnant, & la retirant puis après à foi, est un cas honteux & inexcusable. Jamais Athenien ne vid rire ni plorer Phocion : mais sçavoir-on lire ses responses sans rire ? Remarque-on pas sous le voile de ce corps un esprit gentil, content & joyeux à merveilles ? Vous voyez un homme à toutes heures, & de si amiable rencontre qu'il est impossible d'en eviter ni lascher la prise. Encores qu'il frappe de taillant & de pointe l'on ne veut ni ne peut-on parer au coup, tant il assene droit & de bonne grace, sans espargner aucun : mais Caton semble avoir eu une austerité plus chagrine, à raison dequoi sur la resolution qu'il print d'aller voir l'Asie, Curion lui dict, tu feras fort bien, car tu en retourneras plus gai & plus aprivoisé que tu n'es. Ce nonobstant depuis on le void mesler beaucoup d'aigreur en ses propos & actions. Sa contenance mesme, la couleur & façon de ses habits, & sa conversation en public tant en la ville que par les champs, sans respect des charges qui luy estoyent commises, monstrent qu'il s'estoit resolu de tenir un chemin tout contraire à tous les autres en toutes choses. Mais c'est en la mort mesme qu'on conoit l'austerité de Phocion la plus attempée qu'il est possible envers ses amis & ennemis. Caton au contraire ayant en peu de mots fait le procès

à Cesar & à soi mesme, ne peut parler que rudement à son fils & à ses familiers, & se blesse mesme en frapant l'un de ses esclaves, son austérité estant comme une espée d'aigre trempe & batue à froid par les paradoxes des Stoïques, au lieu que celle de Phocion estoit composée de la grave douceur des Platoniciens.

IV. Je trouve aussi que Phocion, sans esparagner la verité a sçeu mieux s'accommoder aux humeurs de son tems. S'il eut tenu la procedure de Caton, la republique d'Athenes n'eut pas obtenu de Philippus, ni d'Alexandre, ni d'Antipater, ce qu'ils lui ottroyerent : au lieu que Caton heurtant le senat & le peuple, sans vouloir rien quitter de la rigueur du droit, non plus que s'il eut eu afaire à Numa Pompilius & aux Romains d'alors, n'avança pas beaucoup ni pour soi ni pour les autres. L'éloquence de Phocion a un tefmoin en Demosthene assez suffisant pour faire contre-carre à tout ce que dix autres bien diferts fauroient mettre en avant pour prouver que Caton a esté grand Orateur. Tous deux ont aimé une brieveté sententieuse en leurs harangues : mais Phocion y a plus souvent & mieux rencontré que Caton, lequel se laissant aller à son naturel faisoit de longs & ennuyeux discours quelquefois. Les exemples de leur douceur sont très beaux, mais Phocion semble emporter

porter le dessus & vivant & mourant. Caton a esté par fois bien severe, là où il pouvoit se retenir : mais son affection l'emportoit comme quand en plein senat il voulut voir la lettre qu'on escrivoit à Cesar, & ayant reçu le payement de sa curiosité la lui rendit, sans pouvoir se tenir de l'appeller yvrongne. Adjoûtons à cela le trop soudain refus qu'il fit à Pompeius demandant l'une de ses nieces en mariage : car encores qu'il y eust raison en son dire, si ne devoit-il pas se monstrier si prompt ne si vehement en un affaire qui pour l'honneur de celui qui recherchoit son alliance, & pour la consideration de l'estat auquel estoient lors les affaires, meritoit quelque delai pour digerer la responce & aviser de plus près à ce qui estoit expedient pour le bien public.

V. Quant à la prouesse, combien que Caton ait fait diverses preuves de sa valeur au fait des armes, Phocion le precede, tant pour avoir esté, à cause de sa reputation, esleu par quarante cinq fois capitaine d'Athenes, que pour ses beaux exploits de guerre, à une partie desquels tout ce qu'a fait Caton n'est pas comparable. Et qui est à noter, ayant tant de fois esté nommé chef, ce fut tousjours en son absence, & par ceux auxquels il contredisoit incessamment : mais ils conoissoient que sa vertu estoit leur sauvegarde, comme les victoires qu'il gagna sur Philippus,

la surprinſe de Megare & la deſaite des Lacedemoniens en font ſoy : au lieu que Caton eut de la peine à obtenir un regimen de mil hommes de pied : & quant à ſon voyage de Cypre il y alla par force , & ne combatit point , le bonheur ayant voulu pour lui que Ptolomeus ſe deſſit ſoi-meſme.

VI. Pour le regard de la prudence guerriere , j'en attribue davantage à Phocion , comme les conſeils qu'il donna , les expediens qu'il ſuivit ès guerres contre Philippus , & ſes avis aux Atheniens , pour le fait de leurs armes ſe veriſient : là où Caton , faiſant conſcience de chaffer Afinius Pollio hors de la Sicile , aſoiblit d'autant Pompeius , puis en lieu de ſe trouver en l'armée , afin d'y tenir à bon eſcient la main aux affaires qui requeroient ſa preſence , & empêſcher le deſordre, qui y ſurvint par l'indifcrétion des autres ſenateurs , il ſe laiſſa mener par l'ambition de Pompeius , lequel l'enferma dedans Dyrrachium , afin de tailler & rongner à ſon plaisir : en quoi il ſembloit que Caton penſoit deſja à ce qu'il executa depuis dedans Utiſque , & qu'il commençoit à perdre toute eſperance : comme auſſi en abandonnant la Sicile il ne s'eſtoit peu contenir de dire qu'il voyoit au gouvernement des dieux une grande incertitude & varié , attendu que Pompeius avoit tousjours eſté heureux au-

CATON D'UTIQUE. 515

paravant, lors qu'il ne faisoit rien de bien ni selon le droit & l'équité : & lors qu'il vouloit préserver son païs & combattre pour la liberté il le voyoit destitué de son bon-heur. La prudence militaire demande bien d'autres considérations, & ne faut jamais ainsi desespérer des affaires, sur tout quand on tient les armes justes, encor que la main qui les porte ait ses imperfections : car selon que la philosophie de Caton mesme dit très bien,

L'homme juste & constant demoure ferme en place,
Et se rit du danger prochain qui le menace;
Il poursuit jusqu'au bout ses desseins bien conçus,
Voire quand l'univers lui tomberoit dessus.

Or de quitter ainsi le fardeau au milieu du chemin il n'y a point de propos : encorés moins de ce qu'il fit en Afrique, laissant la charge de l'armée à Scipion, lequel il conoissoit n'avoir les parties requises pour une telle commission. L'amour du bien public & la vie de tant de Romains, qui restoient en pieds, devoient estre preferées à certaines loix positives, qui commandoient que le vicepreteur cedast à un viceconsul : aussi ne tarda-il gueres puis après à s'en repentir, faute qu'un sage chef de guerre ne doit jamais commettre, de dire je n'y pensois pas. Et à la verité ceste inadvertance de Caton hasta la ruine de

316 CATON D'UTIQUE.

l'armée d'Afrique, & lui osta la vie à lui-même incontinent après.

VII. Il y a beaucoup plus à débattre pour la prudence politique : toutefois regardons ce qui s'en peut dire pour Phocion. Il vint au maniement des affaires, lors que sa république n'avoit comme plus de vigueur, & toutefois il la sauva des mains de Philippus, d'Alexandre & d'Antipater par une sagesse excellente, mania tous les grands de son temps fort dextrement, se rendant du tout imprenable à l'or & à l'argent, encores qu'il eust peu de biens, mais il aimoit mieux commander à ceux qui en avoient, que les posséder, & poursuivit en ce vertueux train du mépris des richesses caduques jusques à la fin : étonna par sa constance ceux qui n'estoient pas expérimentez, rabroua les harangueurs & jeunes conseillers, leur fermant la bouche par ses vives répliques : contint le peuple d'Athènes, inconstant au possible, en un merveilleux devoir, l'espace de vingt ans : ne se trouve avoir dict chose aucune en conseil dont il se soit repenti puis après, ains rencontra tousjours si bien en ses avis, que les Athéniens ne se trouverent jamais mal de l'avoir creu, & ne prospererent onques en aucun acte qu'il leur desconseillast d'entreprendre. C'estoit au reste le plus mauvais flateur du monde, & quand il leur crioit,

vous me pouvez bien bailler des commissions qui ne devroient pas estre executées, mais de me faire dire chose qui ne se doit pas dire vous ne m'y sçauriez contraindre, par efets il leur en disoit encore davantage. Car il ne redoutoit ni amis ni ennemis, tant il estoit avant apuyé sur la vertu, laquelle lui avoit gravé ceste pensée au fond du cœur, qu'en procurant le bien de sa patrie il ne faut pas craindre la mort : ouy bien quand on conseille ou commet choses indignes & meschantes. Lors que les harangueurs & le peuple se monstroient hauts à la main, il faisoit teste à leurs vains discours sans rien rabatre de sa vehemence : mais il assaisontoit tousjours son aigreur de quelque bon mot, pour leur apprendre qu'il les conoissoit bien & ne se soucioit gueres d'eux. Si quelque calamité les rendoit souples, après les avoir gracieusement repris & avertis il descouvroit du premier coup le remede, & sans acception de personne conseilloit ce qui estoit le plus expedient pour le salut de tous, en quoi il persevera jusques au dernier soupir.

: VIII. Mais Caton s'estant trop tost lassé & desesperant de pouvoir plus servir à Rome, pour la liberté de laquelle il avoit fait merveilles, a terni le lustre de sa prudence. Et quand il auroit en sa vie fait dix fois mieux que Phocion, on

ne se peut excuser qu'il ne se soit oublié au besoin. Outre cela, s'il faut juger des conseils par les evenemens, il semble estre en grande faute d'avoir rejetté l'alliance que Pompeius recherchoit en sa maison, pource que cela fut cause que Pompeius print parti avec Cesar lequel lui donna sa fille, dont s'ensuivit une ligue qui cuida ruiner de fond en comble tout l'empire Romain. Davantage, perseverant en son austerité acoustumée, lors qu'il estoit question de couper à la racine toutes les menées de ces factieux, par le moyen du consulat, au lieu de le pourchasser dextrement, il y proceda de si mal agreable façon qu'il fut debouté de sa demande : dequoi Ciceron le reprend & à bon droit, en ce que le temps ayant besoin d'un tel magistrat comme lui, il n'avoit mis assez de peine, ni ne s'estoit estudié de gaigner la faveur de la commune par courtoisie de les caresser & de leur parler doucement, & oncques puis n'avoir voulu essayer d'y parvenir, ains s'en estoit totalement deporté, qui estoit lascher la corde au lieu de la retenir.

IX. Je ne puis excuser la faute que commit Phocion après la mort d'Antipater, en ne prenant pas garde aux menées de Polyperchon & de Nicanor : car cela fit oublier ses services passez, & le mit tellement hors de grace, que ne pou-

vant obtenir audience il fut acablé. Cela est requis en ceux qui ont bien suivi leur route d'aviser soigneusement qu'ils ne fassent naufrage au port, s'il est possible : mais,

Les cas divins sont en beaucoup de formes.

Comme dit le poëte Euripides, & la voye de l'homme n'est pas en sa disposition. C'est l'œuvre d'une plus haute puissance de faire que cestui-ci ou cestui-là franchisse nettement toutes difficultés. Au demeurant, quant à la vigilance craintive pour les autres j'estime celle de Phocion plus retenue, d'autant que Caton tombe incontinent en une ecstase d'esprit, & ne demande qu'à perdre la vie quand il void les affaires tant soit peu hors des bornes d'une exacte vertu. Pour le regard du zèle à la justice, Phocion emporte entre les Grecs le titre de preud'homme, & ne procure en toute sa vie que choses honnestes & convenables, pour l'entretenement des loix & de la liberté publique. Caton semble bien plus aspre en cet endroit, mais c'est avec moins de durée. En ce qui touche la fuite des choses honteuses, je trouve qu'ils ont une grande convenance ensemble, encores que par divers chemins ils aient couru vers un mesme but, Phocion d'un esprit plus posé, ainsi qu'un fleuve coulant doucement, & Caton avec une ardeur de courage, comme

un torrent impetueux qui surmonte tous empeschemens.

X. Le dernier point nous demeure , c'est l'assurance resoluë de ces deux personnages , & qui est ce qui excelle en eux. Or je dirai en un mot que si Caton eut attendu l'evenement des choses , & ne se fut desesperé , certainement il devanceroit l'autre de beaucoup de pas : mais Phocion s'estant montré courageux en toute sa vie seella magnifiquement ses actions en sa mort , laquelle merite une infinité de louanges , pour avoir esté accompagnée d'une constance , patience , amitié , debonnaireté , justice & sincerité telle que sa vie n'a rien d'excellence à comparaison de cela. Marcher en capitaine alors , fortifier ses amis , pardonner à ses ennemis , c'est l'acte de Phocion , c'est à dire , d'un second Socrates , d'un sage genereux & vertueux entre tous autres. De quelque sens qu'on le prenne alors il faut reconoistre en lui une magnanimité plus qu'humaine : au lieu qu'en Caton vous ne voyez que tesmoignages de la misere de l'homme abandonné à ses opinions , quoique les stoïques disent au contraire. Car encor qu'en ce combat , il ait comme garroté les mains de la mort & luté contre elle par deux fois , si est-ce que je ne lui donne pas le prix de victoire comme à Phocion , qui ne cherchant ni ne fuyant son heure a attendu que le souverain

capitaine l'ait apellé , & est sorti valeureusement de ceste garnison terrienne par la porte qui lui estoit ouverte , sans la rompre de foi-mesme pour sortir d'un danger afin d'entrer en un autre plus grand. C'est lui qui a bufeté la mort , qui lui a fauté au coler & l'a engloutie en payant & beuvant la ciguë. Au demeurant la mort de Phocion fut bien vengée : car ses acufateurs perirent malheureusement , & les Atheniens sentirent à leur confusion la perte qu'ils avoient faite.

XI. Mais à l'aventure est-il temps que nous repliquions pour le Romain , lequel outre le tesmoignage qu'il a de tous les hommes de jugement , tant anciens que de nostre aage , se maintient assez de foi-mesmes , & en plusieurs belles parties semble avoir la preeminence par dessus Phocion. Ce qu'en dit nostre auteur me servira de preface à ce que j'y adjousterai : car qui pourroit peindre entierement Caton que la vertu mesme ? Il m'est avis , dit-il , que ce personnage ressemble proprement aux fruits qui viennent hors de saison : car ainsi qu'on les void volontiers & les louë on , mais on n'en use point : aussi l'innocence ancienne estant de si long temps sortie hors d'usage , & venant lors après si long intervalle , à se monstrier parmi les vies corrompues & les mœurs gastées de ce temps là , lui aquit une grande gloire & renommée : mais au

demeurant elle ne se trouva pas sortable à mettre, en œuvre, ni propre à employer aux affaires, pource que la gravité & perfection de sa vertu, estoit trop disproportionnée à la corruption de ce siecle-là. Car il ne vint pas à s'entremettre du gouvernement des affaires, estant desja la chose publique ruinée, comme fit Phocion en la siene, ains y vint comme elle estoit desja fort esbranlée & travaillée de grandes tourmentes : & si n'eut jamais le rimon ni l'autorité de pilote en main, ains s'entremet seulement de manier les voiles & le cordage, en assistant & secondant ceux qui avoient plus de credit & de puissance que lui : & neantmoins encores donna-il beaucoup d'affaires à la fortune, laquelle ayant entrepris de ruiner & abolir la chose publique, le fit bien à la fin par d'autres, mais ce fut à grande peine, lentement & avec un long trait de temps : encores fut-elle bien près de demeurer dessous, par le moyen de Caton & de sa vertu.

XII. Il faut donc acuser le temps, non pas Caton : mais puis que nous sommes sur les comparaisons, achevons ce traitt. Premièrement ceci est remarquable en Caton, que dès son enfance il entra au chemin de la vertu, de si bonne sorte qu'il continua tousjours de bien en mieux : & tandis que Phocion despendoit les jours en l'escole de Platon & de Xenocrates, cestui-ci se

faisoit conoître philosophe par efect. Car son deportement envers Pompedius Sylla, l'autorité qu'il avoit entre tous ses autres enfans, & l'espée qu'il demanda à son gouverneur pour chastier les tyrannies de Sylla, sont actes genereux au possible, encores qu'il fust bien jeune d'ans alors. Ceste vehemence donc, pour ne rien quitter au vice, se monstrier conservateur de verité, & vigilant protecteur de la vertu, n'estant diminuée ains toujours acreuë en lui, il devance en cela Phocion, qui n'a pas esté si roide à beaucoup près. Mais il y a davantage, que Caton estant en une republique bien autre que celle d'Athenes, & où il avoit à combattre des ennemis trop plus dangereux & puissans, voire l'un d'entr'eux, à savoir Cesar plus redoutable que tous ceux de Phocion, neantmoins a renversé une infinité de conseils & d'efforts. Si son naturel & son credit l'eussent poussé au premier rang, il eust peu confondre tous les ennemis de l'estat, ausquels il ne quita jamais rien, qu'une fois par l'importunité de Cicéron, encores eut-il bien tost sa revanche, leur faisant de merveilleux procès, & peut on dire que l'empire Romain n'a rien veu d'invincible que le courage de Caton.

XIII. Or ce ne sont point ici des contes à plaisir, ni des loüanges de quelque flateur de cour : car quand je voudrois dire de Caton tous

les biens du monde , je n'en saurois specifier davantage que ce que les Grecs , Romains & François en ont laissé par escrit. Mais sa seule vie & ses actions le representent en si haut estat , qu'il semble que nature ait choisi ce patron pour monstrier jusques où l'humaine constance & fermeté peut atteindre. Ne nous arrêtons point pour ce coup aux beaux traits des poëtes , qui ne disent pas tout encores qu'ils l'eslevent par dessus les Romains , par dessus Cesar , par dessus leurs dieux & leurs dieux : mais confinions nous dedans ce que Plutarque nous en dit. C'est un grand honneur à Caton d'avoir tant aimé son frere , qui le loüe si hautement : & cela efface une partie de l'opprobre au fait de sa femme & contrepefe à l'heur de Phocion qui ne rencontra gueres bien en fils ni en gendre. Au contraire Portia & Brutus firent honneur à la vertu de Caton.

XIV. Au demeurant , ce qu'il embrassa l'exercice de toute vertu avec si grande affection qu'il sembloit y estre poussé par quelque inspiration divine , ce qu'il aimoit la severité de justice , qui ne fleschit pour grace ni pour faveur quelconque , ce qu'il aime verité & sincerité , ce qu'il hait jusques au bout l'avarice , & mesprise tous allechemens mondains , sont vertus communes entre lui & Phocion : mais en la pratique desquelles Caton se monstre beaucoup plus ardent. Son

langage roide , plein de sens & de vehemence , accompagné d'une brieveté gracieuse & d'un naturel grave & venerable , emporte quelque chose par dessus la severité des sourcils de Phocion , lequel cependant se laissoit choir en une extremité contraire , aprestant à rire au peuple par beaucoup de traits un peu trop plaisans , comme ce que nous avons de reste de ses harengues & l'effect aussi le prouvent assez. Pour exemple , ces deux-ci sufiront , qu'en pleine assemblée de ville il prit à la barbe Archibiades , se gaudissant de lui , & une autrefois apella tout haut Aristogiton lasche & meschant , pource qu'il contrefaisoit le boiteux. Quant à ce que Caton nomma Cesar yvrongne , ce fut un trait de cholere lancé à propos , dequoi si le senat se fust voulu informer la honte tomboit sur l'incontinence de Cesar , & non pas sur Caton , lequel en l'estat des affaires d'alors avoir juste occasion de s'enquerir quels papiers on apportoit à Cesar tandis qu'il estoit au conseil.

XV. Pour le regard de son austerité , les maladies des republiques sont telles souventes-fois qu'elles ne demandent pas des medecins piteux ou qui facent rire leurs malades , lesquels ont besoin de cantere & de feu. Rome estoit lors en estat très dangereux : & comme Phocion se disoit bien cognoître les Atheniens , on peut dire que

Caton lisoit au fond du cœur des senateurs Romains, dont il apert par les fragmens de ses harangues, où il descouvre les menées de Catilina, de Pompeius & de Cesar comme s'il eust esté de leur partie. Il n'estoit pas question de lancer des traits de risée en plein Senat, ni lors que tout alloit en decadence sornetter cestui-ci ou cestui-là. C'est assez que l'homme vertueux goute bien son bonheur, & rie en soi-mesme de la vanité des autres, sans leur servir de plaissant par ses paroles ou contenance : combien qu'au reste Caton n'ait pas esté si severe qu'il n'ait aimé les bonnes compagnies, & n'y a peu demeurer si longuement comme il faisoit, voire par fois toute la nuit que les sages propos n'ayent esté assaisonnez de quelque mot pour rire honnestement : & Faonius son familier estoit homme né pour donner du passe temps aux autres. Sa douceur est singuliere envers ses amis, auxquels il prestoit son argent, ses propres terres & esclaves, sans en tirer aucun profit, ains pour les acommoder seulement : & faisoit en cela beaucoup plus que Phocion lequel ne prit voirement jamais rien de personne, aussi n'avoit il point les moyens de secourir ses prochains, & eut bien affaire à se desgager des grifes de l'usurier Callicles. De quelle affection console & conseille il ceux qui estoient dedans Utique après la défaite de Scipion & de

Juba ? Pour tous les honneurs que le public lui fait il ne change aucunement sa simple façon de vivre & de converser entre grands & petits : & pour charge quelconque qu'il ait eüe , mesmes en guerre , il n'en a voulu grande suite ni plus somptueux appareil.

XVI. La prouësse semble avoir esté plus grande en Phocion , mais ce n'est pas aux voyages ni aux coups seulement qu'il faut juger de l'adresse des hommes. Il y a bien quelque chose davantage. Ce que Caton dresse tellement les soldats d'une legion à lui commise , qu'on n'eust sceu dire s'il les avoit rendus plus paisibles ou plus aguerris , plus vaillans ou plus justes , est un honneur propre à lui seul. De voir un homme vertueux ou de l'estre , ce n'est pas chose impossible : mais c'est se passer maître en vertu d'y savoir bien ranger les autres , sur tout des soldats : à quoi Phocion n'a sceu atteindre , au contraire , on void comme il se plaint du fils de Chabrias , & void on assez d'insolence ès guerres de son temps. Quand aux coups de main , ce tesmoignage rendu à Caton qu'en gentillesse de nature , grandeur de courage , vehemence & efficace de parole il surmontoit tous ceux qui se faisoient appeller colonnels & capitaines : item qu'il mettoit le premier la main à faire ce qu'il commandoit , monstre que si ses citoyens se fussent fiez en la suffisance de ses armes , & s'il n'eust

eu autre but de servir à sa patrie qu'à la guerre, il eust bien fait d'autres services aux Romains que Phocion n'en fit aux Atheniens : & je ne sçai si tout ce que Phocion fit en vingt années contre les ennemis est à comparer au bien que Caton procura à l'armée Romaine par la discipline qu'il y établit. Bien dirai-je que ce qu'il apporta de Cypre à Rome sans avoir donné un seul coup d'espée, lui acquit plus d'honneur, & aux Romains plus de commoditez que ne firent tous les exploits de Phocion à lui & à ceux d'Athenes. Mais quand parmi les armes il n'oublie son étude en la philosophie ni l'amour fraternelle : quand d'autre part il laisse en arriere ses amis pour penser premierement au public, comme on le void au maniement des deniers de Cypre, ce lui est un grand avantage par dessus Phocion, lequel demeure bien ferme quant à foi, mais il ne sçait ou ne veut pas empescher que beaucoup de corruptions ne se glissent entre ceux qui n'estoient pas loing de lui, tefmoin son gendre Charicles.

XVII. Je viens maintenant à la prudence : & pour le regard de la militaire, j'ajousterai ce mot à ce qui en a esté dit que par fois les affaires demandent un esprit froid, & qui perde peu pour sauver beaucoup. Il difere voirement de chasser Pollio dehors de la Sicile, pource qu'il ne vouloit pas ruiner le pais, & consideroit que Cesar estant
amené

amené à la raison, comme il y avoit lors en apparence que cela se pourroit faire, il n'estoit besoin de remuer le monde en tant d'endroits. S'il a aimé le bien des peuples, s'il a préféré le repos d'infinies personnes innocentes, à une guerre civile, qui le pourra taxer de couïardise ou d'imprudence ? Et quant à ce qu'il lasche trop la bride à Pompeius, il ne pouvoit faire autrement, puis que la conduite des affaires estoit ès mains de celui là, & ce n'est chose aisée, ni seure ni bien seante de vouloir controller de trop près un chef de guerre. S'il se plaint du gouvernement des dieux, c'est en jettant l'œil sur l'estat extérieur des affaires : & tant s'en faut qu'une telle pensée le descourage, qu'au contraire il ramasse & conduit les troupes après la journée de Pharsale, reünit Juba, Scipion & Varus, donne de tels conseils, que si on les eut suivis, à l'aventure Cesar se fut trouvé à recommencer. Au demeurant, Scipion, auquel il quita la charge selon la teneur des loix, estoit homme suffisant pour faire quelque chose de bon : l'armée le respectoit, & s'il n'a fait son devoir, Caton s'estant acquité du sien, & faisant bonne garde d'une ville de très grande importance n'est à reprendre : car d'enfreindre la discipline militaire, sur tout en telles guerres, c'est ouvrir la porte à un million de desordres. Mais qui pourroit se douter d'une chose où il

n'y a point d'apparence ? Caton devoit il présumer que Scipion, perdrait tout ? devoit il s'ingérer ou accepter légèrement une si grande charge encores qu'elle lui fut offerte ? Il ne cherchoit pas l'honneur : c'estoit ce dont il se donnoit moins de peine. Son affection estoit de servir à sa patrie , mais en observant les loix , & sans s'exposer de gayeté de cœur à l'envie de ceux qui estoient en plus haut degré que lui. Ce n'est point par les evenemens simplement qu'il faut condamner les hommes. Mais il y a plus : c'est qu'avant la desfaiëte de Scipion , on conut que Caton avoit du sang aux ongles , quand il offrit de mener ses troupes en Italie , pour y attirer Cesar : ce qui ne fut aprouvé , ains mesprisa-on son conseil salutaire , dont s'ensuivit une extreme desolation. Mais la faute que commit Phocion , ne voulant se saisir de Nicanor , ce qui esclouit tant de maux , est beaucoup plus grande qu'on ne la juge de prime face , comme aussi Plutarque la décrit exactement.

XVIII. Or laissons ce point pour considerer la prudence politique de Caton , laquelle je trouve excellente à merveilles : car sans parler de ces commencemens , comment mania il les finances de Rome ? Et quel besoin avoit l'espargne publique de la prudence de ce personnage , qui ne s'ennuye ni ne se lasse de tra-

vail quelconque, ains en peu de temps remet les choses en leur premiere valeur & dignité? Comment fait il charier droit ceux qui vouloient tant soit peu decliner? De quelle adresse releve il ceux qui avoient mal versé? Pourra-on remarquer en Phocion un si brave trait politic qu'en Caton, lequel fait rendre gorge aux assassins & parricides salariez des deniers publics du temps de Sylla? Et qu'est ce d'avoir procuré que justice en fut faite, sinon sauter à deux pieds sur le ventre de la tyrannie, trainer ignominieusement par tout Rome les os de ce sanguinaire dictateur, & flestrir son nom d'un opprobre eternel? Mais Phocion n'entra pas si avant: car à son veu & seu l'on corrompoit les harangueurs d'Athenes qui demeuroient impunis, & Caton fait chastier les malefices qui sembloient avoir aquis grace par prescription de temps.

XIX. Quant aux menées de Pompeius, de Metellus, de Cesar & de leurs adherans, pour l'estonner, pour le chasser, ou pour abatre ce haut courage, c'est autant de temps perdu pour eux. Il se roidit lors qu'ils pretendent l'amolir, chasse l'un des plus efrontez de la bande hors de la ville, est reputé le plus grave d'entre les Romains, qui est autant comme si on l'eut appellé le plus sage du monde: prevoyant diverses menées il demande & obtient le tribunal, met en

justice celui qui avoit brigué ceste charge, se comportant de telle sorte que hors ce qui concernoit le public on le trouvoit doux & gracieux au possible. Mais combien dextrement esventa il les mines de Cesar au fait de Catilina? Encores que Ciceron ait merité grande louange en ceste poursuite, tous ses efforts estoient vains sans la prudence de Caton, lequel rembarre ceux qui vouloient desja brouiller l'estat, apaise le peuple mutiné, renverse d'un bras heroïque les desseins de Metellus, & toutefois le supporte, quant à sa personne, empeschant ceux qui le vouloient noter d'infamie. En combien de sortes & quantesfois a il dissipé les conseils de Pompeius? Finalement fut ce pas lui tout seul qui par sa constante prudence arresta tous les factieux, lesquels ne trouverent plus leur remede à leurs affaires que de l'envoyer en Cypre, où il se porta si bien que son retour les rendit plus confus qu'auparavant. Et tant s'en faut que leurs nouvelles pratiques l'estonnassent, qu'au contraire il s'y oposa d'une incroyable grandeur de courage, sans respecter ni Crassus, ni Pompeius, ni sa propre vie qu'il mit en danger une infinité de fois : avertit par une prévoyance admirable & le peuple & Pompeius mesme de tout ce qui aviendroit de leurs desordres & des entreprises de Cesar. Poursuivant encores plus vive-

ment sa pointe durant sa preture, il tascha de couper par le pied les grandes corruptions survenues en la justice, ce qui le mit en un merveilleux danger : nonobstant quoi il demeure invincible, censure tout le senat, contraint ses adversaires de souffrir quelque reformation, dont s'ensuivent nouvelles menées des grands, qui le font acuser d'avoir desrobé le public : mais on void sa prudence en ses justifications, & comment il acoustre Pompeius entre les autres.

XX. Il n'y a particularité en tout ce que nous venons de toucher sommairement de sa prudence qui ne meritaist un bien long discours, & quand on examinera l'un après l'autre, l'on trouvera que Phocion ne s'est fait que jouer, tandis qu'il a manié les affaires d'estat, au pris de Caton, lequel en combatant pour le bien public ne fait bouclier que de sa vie, accuse Pompeius, Cesar, Rome & la fortune mesme : brief surmonte toute puissance adverse : demeure, comme un cube, tousjours ferme en son plan, ne se desment en sorte que ce soit, & en tout sens que le voudrez prendre, au senat, en l'assemblée du peuple, en la tribune aux harangues, en son bureau de questeur, en sa chaire de preteur ou de tribun, avec ses amis, en presence de ses ennemis, soit qu'on le vueille mener en prison, ou ramener en sa maison, il a tousjours

une même forme : tout estat, tout port, toute façon lui sied bien, & ne fait chose quelconque à son desavantage, ains a tousjours par tout, par dessus tous, & en toutes choses le dessus.

XXI. Ce qu'on lui objecte d'avoir esté trop austere envers Pompeius & en la brigue du consular, doit estre regardé d'un autre sens. Il voyoit l'estat de Rome tant embrouillé, & Pompeius si avant en la meslée, que de penser l'en retirer par une alliance, c'estoit aux despens de sa niece hasarder le repos de son esprit & sa réputation. Il n'estoit pas tenu de s'engager jusques là : & si Pompeius a esté si despit, ou si mal avisé de se joindre avec Cesar contre sa patrie, sa faute ne doit pas estre deschargée sur Caton, qui ne pouvant forcer son noble naturel, & n'ayant acoustumé d'entrer es estats que par la porte d'honneur & de vertu, n'a rien faict indigne de sa valeur en tenant son rang : au lieu que ç'eust esté jouer (comme on dict) tout son bien contre un rien, s'il se fut mis à briguer à la façon des autres, & que par quelque accident le peuple l'eust rebuté. Au pardeffus, tout ainsi qu'au paravant il avoit sans respect d'aucun conseil & procuré le bien public, il continua tousjours, & ce qu'il fut d'avis d'eslire Pompeius seul consul, ne fut pas signe d'inconstance, ains un acte de fidelle conseiller d'estat, qui s'accommode prudemment

aux affaires, comme un pilote expert sçait caler la voile à propos, cingler sous vents contraires, & par diverses routes arriver à mesme port. Quand Pompeius l'en voulut remercier on void quelle responce il lui fit, & comme tost après il se banda de nouveau pour maintenir l'autorité des loix contre tous aduersaires. Mais que gaigna Cesar à se plaindre de lui par lettres bien aspres ? Combien furent peu avisez ses amis de les produire en plein senat ? Fit-il pas alors voir à l'œil & toucher du doigt à qui voulut tous les conseils de Cesar, comme s'il eut esté son complice ? Fallut-il en attendre les preuves ? Les armes que Cesar leva contre sa patrie avererent devant les senateurs & citoyens Romains que Caton estoit le plus sage d'entre tous les autres hommes.

XXII. Quant à sa vigilance craintive pour les autres, l'assurance résolue pour soi mesme, fuite de choses honteuses, & zele à la justice : il en a desja esté parlé & toute sa vie monstre ces vertus avoir esté si nettes & luisantes en lui, qu'il n'est possible d'y rien requerir autant que les choses humaines peuvent avoir de perfection. J'ajouste qu'on trouvera ces vertus & toutes les autres enchainées ensemble en Caton plus qu'en nul autre Grec ou Romain : tellement que qui considerera sa prudence, il la trouvera juste, vail-

lante , modérée , patiente , vigilante , assurée & inexpugnable , sans qu'on puisse aisément discerner laquelle des vertus devance les autres : car elles s'entretiennent en rond , & l'environnent avec une harmonie merveilleusement juste.

XXIII. Et à la vérité , si la mort eut esté autre (car les stoïques ne me payent point de raison en conseillant leur sage de se desfermer soi mesme , quand les chaines de ceste vie lui pesent trop) il peseroit plus lui seul que tout tant qu'il y a d'illustres Grecs & Romains dedans les histoires , encôres avec ce défaut il ne laisse pas de les emporter presque tous à la balance. J'excepte Phocion , sur tout en sa mort : car (à mon avis) il a un merveilleux avantage sur Caton , de ce costé-là. Je ne veux pas entrer en la refutation du paradoxe des stoïques sur ce point de la mort. Nous avons aprins (graces à la bonté divine) en meilleure eschole qu'en la leur , que nostre mort , ou issue de ceste vie , depend d'une autre volonté que la nostre , & que si en aucun temps de nostre vie nos passions doivent estre retenues , c'est lors que l'impatience nous conseille d'atenter quelque chose contre nos propres personnes. Si nous vivions pour nous mesmes seulement , il nous seroit loisible de prendre la clef des champs , & d'une infinité d'issues qui se presentent en

choisir quelqu'une : somme , nous pourrions mourir où , quand & comme bon nous sembleroit. Et encores que parfois la providence divine semble nous laisser en un estre de vie pire que la mort , neantmoins si nous avons de bons yeux nous regardons nostre vie affligée d'un autre œil que ne font les stoïques , & l'estimons tousjours beaucoup quand elle tend à son but , encores que ce soit à travers de grandes calamitez. Mais le souverain legiflateur defendant le meurtre comprend en ceste defense celui qui se tue soi-mesme : & nature bien escoutée & reconue , refute & abhorre ceste absurde opinion. Aussi quelques autres qui ne semblent pas si grands philosophes , & qui toutefois philosophent mieux en cest endroit , nous enseignent à demeurer en nostre vocation au monde , & attendre que celui qui nous y a posez comme en garde nous vienne lever de là pour nous donner repos. Ce n'est pas constance ni patience de dire , je ne puis demeurer en celle place. Est-ce sagement fait de partir sans congé ? A ce conte il ne nous faudra point de superieur. Encores le sage des stoïques est-il un degré au dessous de Jupiter. Qu'il attende donc que son maistre desnoue la chaine. Il y a plus de magnanimité à la porter doucement qu'à la rompre. L'indiscretion , l'impatience &

le defefpoir hafent le pas aux hommes qui cherchent ainfi leur mort.

XXIV. Mais n'entrons pas plus avant en la confideration de ce paradoxe eſtrange : plutoſt deplorons l'aveuglement de l'homme naturel, voyans tels perſonnages que Caton, Brutus, & autres, choper ſi lourdement à la fin de leur vie. Il ne la faut jamais quitter, diſoit Cleomenes à un poſſédé de ceſte humeur, tant qu'il y a un doigt d'eſperance de reſte. Combien la vie d'un homme genereux a-elle de conſtance & de toute ſorte de luſtre à une minute près de la fin ? Caton pouvoit faire beaucoup de ſervices à ſa patrie, remonſtrer à Ceſar ſon devoir, deſployer en ce beſoin tout ce qu'il y avoit de reſte en ſon eſprit, puis attendre l'evenement, comme il avoit fait tant d'autres fois, ayant veu ſa vie ſur le trenchant du raſoir, comme on dit. Il eſtimoit, dira quelqu'un, que tout eſtoit perdu, & n'avoit plus aſeccion de vivre. Nous ne devons jamais laiſſer du tout fondre noſtre cœur, ni ruiner ce qui ne nous a pas eſté donné comme pour en diſpoſer à noſtre fantaſie. Mais les deportemens de Caton en la ville d'Utique pour apaifer les uns & faire evader les autres rendent ceſte tragedie encore plus pitoyable : & au reſte ça eſté une terrible lutte d'empoigner par deux

fois la mort au collet, & un courage merveilleusement atroce de s'arracher ainsi les entrailles. Ce sont des esclaves d'une pensée qui a étudié & digéré la mort de longue main : & ce qu'il lisoit dedans le discours de Platon touchant l'immortalité de l'âme n'estoit pas qu'elle eust besoin d'assurance nouvelle. Il'en avoit beaucoup plus que Platon n'en a représenté dedans ses écrits : sa science & résolution estoient pour ce regard par dessus la philosophie. Il ne prit pas cette occupation pour le service de la mort, car mesmes il n'entreroit pas son sommeil pour l'importance d'une telle deliberation. Ce fut une continuation de coustume de mesler ses études avec ses autres actions : mais lors il trouva un livre conforme à son dessein. Or combien qu'en ce coup il y ait de la faute, comme a esté dit, toutefois on y remarque encore ceste magnanimité qui a relui en toute sa vie, aimant mieux la perdre que la tenir de celui qu'il jugeoit estre meurtrier des loix & de la liberté des Romains. Si la mort de Phocion a esté vengée, & si les Atheniens se sont repentis de lui avoir fait tel tort : ceux d'Utique puis Cesar ont regretté Caton. Et quant à Cesar, Antonius & autres qui opprimèrent la patrie, par le juste jugement de celui qui a infinis moyens de châtier petis & grands, ils

ont eu leur tour , & sont peris malheureusement. Voilà une entrée à la comparaison de ces deux rares ornemens du monde. Si dessus au discours d'Alexandre & de Cesar , j'ai retenu à en donner ma dernière résolution : j'ai bien plus d'occasion de m'arrêter quand je parle de ces deux ci : partant j'en laisse la sentence & la poursuite au lecteur.

OBSERVATIONS

SUR LA VIE D'AGÉSILAS.

CHAP. XL, p. 49. On ne trouve ce nom de Gelon' nulle part. Dans la Vie de Pelopidas, Plutarque nomme pour béotarques, Pelopidas, Charon & Mélon', que Xenophon écrit Mellon. Ce qui semble indiquer la correction à faire en cet endroit & proposée par M. Reiske, & avant lui par Dodwell dans ses annales de Xénophon, XXXIII. Il faut observer qu'en parlant de cette affaire même, dans la même Vie de Pelopidas, Plutarque attribue cette insidieuse suggestion à Pelopidas & Gorgidas, béotarques. Cela ne fait point de contradiction, parce qu'il y avoit sept béotarques. Ces deux événemens sont de la troisième année de la centième olympiade, selon Dodwell, quoique Diodore place l'affaire de Sphodrias à la quatrième année.

CHAP. XLIII, p. 63. Il y a ici dans le texte une faute incroyable. Cléombrote y est désigné comme fils d'Agésilas. Il l'étoit assurément de Pausanias le fils de Plistoanax; c'étoit l'autre branche des rois de Sparte, appelés les Agides. Chercher à deviner ce qu'il faut mettre à la place de ce mot, fils, comme l'a entrepris M. Dufoul, c'est assurément perdre son tems & sa peine en vain. Il faut effacer le mot absurde, & s'en tenir là. Quant à ce que Plutarque prête ici à Agésilas, Xenophon dit expressément que ce furent les éphores qui engagèrent Agésilas à se charger de cette expédition, parce qu'ils avoient une plus haute idée de sa prudence que de celle de Cléombrote.

CHAP. XLV, p. 65. On va lire quelques lignes plus loin qu'Epaminondas, déjà célèbre par sa sagesse & ses

connoissances , n'étoit point encore connu du côté des talens militaires , à l'époque de cette ambassade. Il n'avoit donc point encore remporté cette fameuse bataille de Leuctres , qui abatit la puissance de Sparte , fit passer la prééminence de la Grèce aux Thébains , & éleva Épaminondas au plus haut degré de la gloire militaire. Il paroît donc évident qu'il ne peut être question ici que de la bataille de Tégyre , gagnée par Pelopidas la première année de la cent-unième olympiade , avant J. C. 376 ans. Cette conjecture de plusieurs savans est confirmée par plusieurs manuscrits qui portent en cet endroit Tégyre au lieu de Leuctres.

CHAP. XLVII, p. 68. On peut consulter Dodwell , dans ses Annales de Xénophon , chap. XXXIX & XL , pour juger sur quels motifs il s'appuie pour soupçonner d'erreur cet espace de vingt jours , que Plutarque établit ici entre la paix conclue à Sparte & la bataille de Leuctres , ce qui paroît en effet bien court pour avoir pu suffire aux événemens intermédiaires ; d'où il conclut que la paix dont parle ici Plutarque , se fit le 14 du mois Attique Scirophorion , qui avoit commencé cette année la quatrième de la cent-unième olympiade , le 14 juin ; moyen en quoi le quatorzième du mois Scirophorion se trouvoit concourir avec le 18 de juin ; & que la bataille de Leuctres se donna la deuxième année de la cent-deuxième olympiade , le 5 du mois Hécatombéon , qui concouroit pour cette année avec le 8 juillet , le mois Attique ayant commencé le 3 du mois de juillet , dans l'année de la période Julienne. Au surplus , on a déjà remarqué l'erreur d'Amyot , par rapport à la comparaison de nos mois avec les mois Attiques. Voyez les Observations sur le T. III, p. 536.

CHAP. LII, p. 77. Cet endroit n'est pas facile à expli-

quer. Polyen, [L. II, ch. 1, §. 14, raconte le même fait. Mais il semble changer le lieu de la scène. « Une sédition » s'étant élevée à Sparte, dit-il, un grand nombre de gens » armés s'emparèrent d'une montagne consacrée à Diane » Issoria, près de Pitane ». Issorium est, suivant Etienne, une montagne de la Laconie. Pitane est une petite ville de la Laconie, dont la position n'est donnée d'une manière précise par aucun ancien. Mais elle étoit, selon Pindare (olym. 6), & suivant son Scholiaste, sur les bords de l'Eurotas; & l'Eurotas qui couloit, selon Strabon, auprès de Sparte, étoit, selon Polybe, Extr. L. XV, à son orient d'été. Tout ceci semble fixer le lieu que nous cherchons, hors de la ville, vers l'orient. Mais Hesychius nous dit qu'Issorium est un quartier de Sparte, ce qui est d'accord avec Plutarque; & Pausanias place aussi le temple de Diane Issoria dans la ville, mais vers le couchant de la place publique, ce qui ne paroît pas pouvoir s'accorder avec la position près de Pitane, donnée par Polyen. Que conclure de ceci? qu'il faut distinguer deux objets, le temple dans la ville, & la montagne Issorium près de Pitane, à l'orient de Sparte sur l'Eurotas. Diane y étoit honorée d'une manière particulière. Une partie des habitans de Pitane, s'étant établie à Sparte, y porta son culte, & y bâtit un temple de Diane Issoria, près du quartier appelé le Lescé ou le conseil des Crotoniens, qui étoient une tribu des Pitaniens, selon Pausanias; & la similitude de nom aura fourni à l'un des deux historiens l'occasion d'une méprise. Mais je crois que c'est de la montagne même qu'il s'agit ici, parce que les ennemis venant attaquer la ville par le côté de l'Eurotas à l'orient, il n'eût pas été possible de faire croire aux séditeux qu'ils pussent s'excuser sur un ordre mal-entendu, en se réunissant en si grand nombre à l'occident de la ville, qui n'avoit aucun besoin d'être gardé, les ennemis étant au-delà de l'Eurotas à son orient.

SUR LA VIE DE POMPÉE.

CHAP. I, p. 103. Eschyle avoit composé deux tragédies sous le titre de Prométhée; l'une de Prométhée enchaîné, c'est celle que nous avons, où il déploie une haine amère contre Jupiter: l'autre, de Prométhée délivré par Hercule. Le vers cité par Plutarque est tiré de celle-ci, que le tems nous a enlevée.

CHAP. XXII, p. 128. Il y a eu à Rome d'autres personnages qui ont porté le surnom de Maximus. Plutarque parle ici de ceux qui l'ont obtenu par d'autres vertus que les vertus militaires, quoique ceux dont il s'agit en cet endroit fussent aussi très-illustres de ce côté, comme on le voit dans Tite-Live, L. II, ch. 31, par rapport au dictateur Valerius, qui remporta sur les Sabins une victoire si éclatante, l'an de Rome 260, qu'outre les honneurs du triomphe, le sénat lui décerna une place distinguée pour lui & pour sa postérité, dans le cirque, où on lui plaça une chaire curule; & par rapport à Fabius Rullus, que d'autres appellent Rullianus, & le P. Petrus Rutilianus, dans le même historien, L. VIII, ch. 30, il étoit alors mestre de cavalerie, sous le dictateur Papirius, l'an de Rome 419, & remporta en son absence, malgré la défense qu'il lui avoit faite de combattre, une victoire complète sur les Samnites. On peut lire dans Tite-Live combien le sénat & le peuple eurent de peine à sauver ensuite sa vie de la sévérité du dictateur, obstiné à punir de mort cette infraction de la discipline militaire. Il fut depuis consul plusieurs fois, censeur l'an de Rome 450, dictateur l'an de Rome 453. Ce fut, dans la censure, qu'il fit dans le sénat & dans le peuple la réforme dont parle ici Plutarque & dont Tite-Live parle à la fin de son neuvième livre, & qui lui mérita le surnom de Maximus.

Quant

Quant à Valerius, Cicéron dit expressément dans son livre intitulé *Brutus*, T. I, p. 211, la même chose que Plutarque. Ce ne fut pas lui cependant qui commença l'ouvrage de la réconciliation du peuple avec le sénat, mais Menenius Agrippa, comme on le lit dans Tite-Live, L. II, ch. 32. Cet événement de la retraite du peuple sur le mont Sacré est de l'an de Rome 261.

CHAP. XXXVI, p. 151. La manière dont le texte grec est conçu auroit dû suffire pour avertir Amyot qu'il tomboit dans une lourde méprise. Il n'est pas question ici des Jumeaux, c'est-à-dire, de Castor & de Pollux. Le temple de Claros, dit Plutarque, le temple de Didyme, le temple de Samothrace. Je crois qu'il étoit facile de reconnoître ici trois lieux & trois temples différens. Didyme est un canton du territoire de Milet, ville située sur la côte de l'Asie, appelé Ionie, où étoit un temple fameux consacré à Jupiter & à Apollon, & à cause de cela peut-être nommé Didyméen, parce que Didyme, en grec, signifie deux; Strabon, Mela, Pline, Pausanias, Quint-Curce, tous les écrivains anciens sont d'accord. Ceux-ci ne le présentent que sous le nom d'Apollon Didyméen; mais Etienne de Byfance le donne, d'après Callimaque, comme commun à Jupiter & à Apollon. Le sacerdoce en avoit été long tems confié aux Branchides, dont nous avons parlé aux Observations sur le Tome XVI, p. 541 & 542.

Ibid. p. 152. Ici le texte altéré par des copistes ignorans a induit Amyot en erreur; mais il n'étoit pas difficile de substituer Lacinie à Lucanie. Aucun ancien ne parle d'un temple de Junon en Lucanie, & tous parlent d'un temple fameux de Junon surnommée Lacinienne à cause du promontoire Lacinium, où elle étoit en grande vénération. Sur ce côté de l'Italie qui regarde la mer Ionienne, il

546 OBSERVATIONS.

y avoit trois promontoires fameux ; au midi est le Zéphyrien , au nord l'Iapygien , dans le milieu le Lacinien. Cicéron raconte, dans son *Traité de la Divination* , qu'Annibal effrayé par un songe n'osa enlever une colonne d'or qui étoit dans ce temple ; & Fulvius Flaccus périt misérablement l'an de Rome 583 ; selon Tite-Live , pour l'avoir dépouillé l'an de Rome 581.

CHAP. LX, p. 193. Hermagoras, surnommé Carion, selon Suidas, étoit de la ville de Temnos dans l'Eolie d'Asie : il enseigna à Rome, & mourut fort vieux sous Auguste. Il avoit écrit plusieurs livres sur la rhétorique ; & Suidas ne cite point d'autres ouvrages de lui. D'où il me paroît naturel de conclure que cette question générale dont parle ici Plutarque, étoit un de ses premiers principes sur l'art oratoire. Or, il me semble dès lors très-probable que c'est précisément celui dont parle Cicéron dans son premier livre de *l'Invention*, p. 55. « Hermagoras, dit-il, divise la matière de l'orateur en deux, la cause & la question ; la cause a pour objet une controverse, où il intervient des personnes ; la question une controverse sans interposition de personnes, telle que celle-ci ; y a-t-il quelque chose de bon, excepté ce qui est honnête ? Les sens sont-ils vrais ? Quelle est la forme du monde ? Quelle est la grandeur du soleil ? Toutes choses, ajoute Cicéron, qu'on reconnoît évidemment n'avoir aucun rapport avec la fonction de l'orateur ». D'où il conclut que cette division d'Hermagoras ne vaut rien.

SUR LA VIE DE PHOCION.

CHAP. IV, p. 294. Le passage de Cicéron que Plutarque cite ici sur la conduite de Caton, se trouve dans la première

lettre à Atticus, L. II. Mais ce qui termine cette phrase, savoir, que par cette austerité peu convenable au tems, il se fit exclure du consular, est une addition de Plutarque, & ne pouvoit se trouver dans cette lettre de Cicéron. L'emprisonnement du consul Métellus, & la brigue de Clodius pour obtenir le tribunat, fixent la date de la lettre de Cicéron à l'an de Rome 694, & ce ne fut que huit ans après que Caton demanda & manqua le consulat, c'est-à-dire, l'an de Rome 702, comme on le verra dans sa Vie même, où Plutarque nous apprend qu'il eut pour compétiteur Sulpitius, qui fut en effet consul avec Métellus, l'an de Rome 703.

CHAP. XXX, p. 331. Le nom grec est Hermus, & non-pas Hermium. Ce bourg ou dème de l'Attique, étoit de la tribu Acamantide. Il étoit situé un peu au-dessus du Pirée, un peu plus près d'Athènes que d'Eleusine. C'est mal-à-propos que quelque correcteur indiscret aura inséré dans le texte *is igmîn*, dont Amyot a fait le nom Hermium. Etienne dit formellement que la résidence en ce lieu s'exprime en grec par ces mots *is igmîn*. Voyez Meursius de Pop. Att. T. I, p. 271.

CH. XXXIII, p. 336. M. Dufoul se trompe en traduisant jusqu'à soixante ans à compter depuis la puberté, ce qui feroit soixante-dix-huit ans, selon son explication même. Les loix d'Athènes portoient que les jeunes gens commenceroient à prendre les armes à dix-huit ans; ils étoient employés à la défense de l'Attique jusqu'à vingt. A cette époque, ils servoient jusqu'à quarante dans toutes les guerres, en dedans ou en dehors de l'Attique; après quoi, ils étoient exempts du service militaire: dans des occasions extraordinaires, on alloit jusqu'à quarante-cinq, comme on le voit dans la troisième Olynthienne de

348 OBSERVATIONS.

Demosthène. Ainsi la publication de Phocion étoit déjà assez extraordinaire en comprenant jusqu'à l'âge de soixante ans , sans prolonger jusqu'à soixante dix-huit.

CHAP. XXXIX , p. 344. Il est vrai que le texte porte en cet endroit *ἡ καθαρὴ λιμένα* , ce qui signifie un port net , & pourroit par extension signifier un port vuide de vaisseaux. Mais puisqu'Amyot a reconnu que cette expression ne présentoit point de sens , ce qui l'a déterminé à traduire par le mot de rivage ; il auroit pu aller plus loin , & supposer quelque faute légère dans le texte. Il n'y avoit pas mille lieues de *καθαρὴ* à *καὶ ἀγρῶ* , & il auroit reconnu le nom propre d'un des trois ports du Pirée ; car le Pirée n'est appelé port qu'improprement. C'étoit un dème de l'Attique , ou bourg devenu partie d'Athènes par la jonction des murs , qui l'y réunirent depuis Thémistocle ; & il avoit trois ports , qu'on fermoit avec une chaîne commune , dont l'un s'appelloit Aphrodisium , un autre Zée , & le troisième Canthare. Voyez Meursius dans son livre intitulé , *le Pirée*.

SUR LA VIE DE CATON D'UTIQUE.

CHAP. I, pag. 370. Il seroit difficile de se former une idée précise de la généalogie de Caton d'Utique , d'après ce que Plutarque dit ici , & d'après ce qu'il a dit à la fin de la Vie de Caton le Censeur. Aulu-Gelle , dans son treizième livre , chap. 19 , nous a heureusement éclairci ce que Plutarque n'explique point , ou même présente d'une manière propre à occasionner de la confusion. Je vais la donner telle qu'Aulu-Gelle nous la présente.

Marcus Caton l'Ancien ou le Censeur avoit eu de sa première femme un fils , qui mourut du vivant de son père , étant désigné préteur , après avoir composé des livres fort estimés sur le droit. Il laissa un fils nommé

Marcus Caton Nepos, c'est-à-dire, petit-fils, parce qu'il étoit petit-fils de Caton le Censeur, chef de la famille. Il fut orateur & eut de la réputation dans ce genre. Il fut consul avec Quintus Marcius l'an de Rome 636, & mourut dans son consulat en Afrique, laissant un fils qui fut édile, ensuite préteur, & mourut dans la Gaule Narbonnoise.

Caton le Censeur épousa dans sa vieillesse la fille de Salonius, & en eut un fils surnommé Salonien, du nom de son grand-pere maternel. Celui-ci eut deux fils, Lucius Caton, & Marcus Caton, qui fut tribun du peuple, & pere de Caton d'Utique.

CHAP. XLI, p. 425. Des savans ont remarqué avant moi l'altération qu'on ne peut s'empêcher de supposer ici dans le texte de Plutarque; car certainement Caton n'a point été déposé ni forcé d'abdiquer son tribunal. Ils ont proposé diverses conjectures. Peut-être approcheroit-on très-près de l'idée de Plutarque, si on lui faisoit dire que Caton, sans user des droits de sa charge, comme trop tyranniques (en ce que le caprice d'un homme par un seul mot prévaloit sur toute autorité & toute raison), l'emporta néanmoins tellement par son ascendant personnel, qu'il réduisit Memmius à renoncer au combat, en se déportant de ses accusations. Mais ceci n'est qu'une conjecture, qui n'en exclut pas de meilleures. Car on a vu un peu plus haut que Métellus avoit accusé Caton de tyrannie (p. 424); d'autres séditieux pouvoient renouveler cette imputation, quelque extravagante qu'elle fut; ainsi avec un léger changement on pourroit lire: Caton bravant les imputations des séditieux qui lui reprochoient d'abuser tyranniquement du pouvoir de sa charge, poussa sa pointe avec tant de vigueur, qu'il l'emporta enfin, & réduisit Memmius, &c.

CHAP. XLIX, p. 440. Thraſſas Poetus de la ville de Padoue , capitale du Padouan , qui eſt aujourd'hui une partie des états de Veniſe , homme d'un rare mérite. Tous les écrivains de Rome louent ſa vertu. Tacite l'appelle quelque part la vertu même , Annal. L. XVI, ch. 21. Néron le fit mourir ; mais il ne l'en eſtimoit pas moins , comme on peut le conclure de la réponſe de ce monſtre à un infâme délateur qui accuſoit Thraſſas d'avoir prévariqué dans ſes fonctions de Juge : « Je voudrois bien , » dit le tyran , être auſſi aſſuré de ſon amitié , que je » ſuis convaincu de ſon intégrité ». Voyez les Préceptes d'adminiſtration , ch. XLIV, p. 165 , T. XV. Il avoit écrit la Vie de Caton d'Utique , dans laquelle il avoit ſuivi les renſeignemens que lui fournisſoit l'ouvrage de Munatius Rufus , contemporain de Caton , & qui avoit été compagnon de ſon voyage en Cypre , comme lo dit Valere-Maxime , l. IV, ch. 3.

CHAP. LXXIV, p. 978. Les Pſylles habitoient près la grande Sytte , entre les Naſamons & les Gétules , ſelon Strabon , qui dit à-peu-près la même choſe que Plutarque ſur cette vertu naturelle contre les ſerpens. On attribuoit , ſelon lui , aux Tentyrites , habitans près de la petite Dioſpolis en Egypte , la même faculté naturelle contre les crocodiles. J'ai ſouvent entendu dire que les Nègres (Africains) , eſclaves dans l'Amérique , prennent & tuent ainſi les ſerpens ſans craindre leurs morſures ; cela n'eſt pas démontré impoſſible. Mais je remarque que les gens qui combattent obſtinément les choſes les plus raiſonnables & les mieux établies , croient ſans examen toutes les fables des voyageurs , toutes les impoſtures des charlatans.

Fin du Tome ſixieme.

T A B L E

DES VIES DES HOMMES ILLUSTRÉS.

T O M E I.

Thésée ,	page 3.	} comparés 147.
Romulus ,	75.	
Lycurgue ,	159.	} comparés 305.
Numa Pompilius ,	244.	
Solon ,	321.	} comparés 447.
Publicola ,	397.	

T O M E II.

Thémistocle ,	page 3.	} comparés 167.
Camille ,	75.	
Périclès ,	178.	} comparés 331.
Fabius Maximus ,	267.	
Alcibiade ,	340.	} comparés 520.
Coriolan ,	438.	

T O M E III.

Paul Émile ,	page 5.	} comparés 174.
Timoléon ,	97.	
Pélopidas ,	183.	} comparés 344.
Marcellus ,	269.	

Aristides ,	354.	} comparés 513.
Caton le Censeur ,	436.	

T O M E I V.

Philopœmen ,	page 3.	} comparés 116.
T. Quintius Flaminius ,	61.	
Pyrrhus ,	126.	} comparés 342*.
Caius Marius ,	226.	
Lyfander ,	357.	} comparés 534.
Sylla ,	435.	

T O M E V.

Cimon ,	page 5.	} comparés 192.
Lucullus ,	64.	
Nicias ,	204.	} comparés 377.
Marcus Crassus ,	288.	
Sertorius ,	392.	} comparés 511.
Eumenes ,	448.	

T O M E VI.

Agefilas ,	page 5.	} comparés 277.
Pompée ,	103.	
Phocion ,	290.	} comparés 598*.
Caton d'Urique ,	370.	

DE L'IMPRIMERIE DE PH.-D. PIERRES,
Premier Imprimeur Ordinaire du Roi, &c.

